

Sei di Uka Ago Ruaka di Buka Bedakai

**Portions of the Holy Bible in
the Doromu-Koki language
of Papua New Guinea**

**Sampela hap Buk Baibel
long tokples Doromu-
Koki long Niugini**



Sei di Uka Ago Ruaka di Buka Bedakai

Portions of the Holy Bible in the Doromu-Koki

language of Papua New Guinea

(Ruth, Mark, Luke, 1 Thessalonians, 2 Thessalonians, Titus, Philemon,
1 John, 2 John, 3 John, and Jude)

[kqc]

Translation by Wycliffe Bible Translators

© 2011, Wycliffe Bible Translators, Inc.

Print publication, 2011, Wycliffe Bible Translators, Inc.

Web version

© 2015, Wycliffe Bible Translators, Inc.

<http://www.Wycliffe.org>

<http://pngscriptures.org>

<http://www.ScriptureEarth.org>



Creative Commons license (Attribution-Noncommercial-No Derivative Works)

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long

<http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stremi samting i no orait long dispela tok orait, stremi tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long

<http://creativecommons.org/licenses/by-nc-nd/3.0>.

Sapos yu gat askim long dispela, **plis askim mipela**.

Table of Contents

Ruth	Ruth.	5
Mark	Mk	11
Luke	Lk	54
1 Thessalonians	1 Thes.	127
2 Thessalonians	2 Thes.	133
Titus	Tit.	137
Philemon.	Phlm	141
1 John	1 Jn	143
2 John	2 Jn	151
3 John	3 Jn	153
Jude	Jude.	155

Ruth

di buka

Ago di ini adina

Ruth di sina sina amuta nufa bi *Ourefeidena vene tora* di ruda reyadi di medari. Ruth, kaere bi Moab rema yokoi, bi Israel rumana meyo. Ini maruka muyeyo ri, Ruth bi ini radini Israel rema ma Israel di Sei rofu uka maro. Kamini ini usika ourena di utari gutuna bi rumana rua meyo ma David, kaere bi Israel di kini buni vayavaya yokoi maka, di bobada niyo.

Ourefeidena vene tora di oteimana sina bi Sei di vene fufuta maradi ri no yaku maro. *Ruth*, kaere bi yava ika rema, yaku Sei rofu mokena vari gira aiyo. Makai resi Sei yaku buni tora gade maro ma ina yaku ini uka vari gira mana vene sa yokoiri niyo.

Beika sina ideri

Naomi Ruth sa Bethlehem taoniri dairiyadi 1.1-22

Ruth bi Boaz baku reyo 2.1-3.18

Boaz Ruth meyo 4.1-22

Elimelech ini rema mida sa Moab gaganiri roku reyadi

1 ¹Senagi senagi, mirona ituari ourefeidena vene tora amegamadi ri^a, adabo minari negau niyo. Bethlehem amiye yokoi Judah ri, ini rema ma rumana mida remanu sa, Moab gaganiri roku reyadi. ²Mina amiye di roka bi Elimelech ma ini rema di roka bi Naomi, ma ini mida remanu di roka bi Mahlon ma Chilion. Ina bi Ephrathah vene, Bethlehem taoni, Judah gagani vene. Ma disi Moab gaganiri amegamadi. ³Amegamadi ri, Naomi di maruka Elimelech muyeyo, ma ini rumana mida remanu sa amegamadi. ⁴Moab rema meyadi, ini roka bi Orpah ma Ruth. Lagani vana ufo amegamadi ri, ⁵Mahlon ma Chilion ka muyeyadi ma Naomi bi maruka ma mida de inike amegamo.

^a **1.1** Kini de ameyo.

Naomi ma Ruth Bethlehem ri dairiyadi

⁶Gabi Moab ri neideyo bi VARIKA AMIYE yaku amiye di rauna moyari aedesi iruku rau regamo. Naomi ini radini remanu sa mina gagani ferei digi dogo reyadi. ⁷Ini radini remanu sa, ini amegamadi sana feresi Judah gagani di ida moyiyadi. ⁸Kamini Naomi yaku ini radini remanu rofu niyo, “Ya remanu yi nono di yavari dairigedi. VARIKA AMIYE buni tora gade ya rofu moi ogau reibigo, na rofu ma yi muyenari regamadi kana. ⁹VARIKA AMIYE ya remanu rofu yi gado variyaganedi rumana bouna ya mago.”

Kamini ina remanu fuka reyo ma rema remanu isaka nigasa ¹⁰niyadi, “Una bi yi vene rofu ya sa gogo dairigifa.”

¹¹Idu Naomi yaku niyo, “Dairifa nai vefa vene. Beika maina na sa baigedi? Ye nai rumana mida be moigida, ma yi maruka nigedi ba? ¹²Rautu dairifa, nai vefa vene. Na bi rumana moina rofu, kamini ugava niyaka. Gokai beika nai mokenari uka mokedo gua urusari maruka nufa mida evata rigida vo nisi, ¹³nari de regedi ma ina tora nigedi ri. Ya bi mena de regedi ma ina tua regedi ba? Ide, nai radiyaka, na rofu bi vegu gira tora, ya kana ide, ini adina VARIKA AMIYE na rofu gedu maro.”

¹⁴Mina neideyadi ri dubusa isaka niyadi. Kamini Orpah yaku ini radini fuka resi yuata niyo, idu Ruth yaku ini radini moi gira reyo. ¹⁵Naomi yaku niyo, “Na ve kumo, yi nabore bi dairido ini vene ma ini sei^b rofu. Ini vegu kana re.”

¹⁶Idu Ruth ni kabai reyo, “Na bi na ni guba ga re ya yaku feresi dairigida bi. Goidu digiya na ka digida, ma goidu amegiya na bi ya sa amegida. Yi vene bi nai vene ma yi Sei bi nai Sei. ¹⁷Goinari muyegiya na ka muyegida, ma mironari na guri aigedi. VARIKA AMIYE yaku kaunava gira gira na maraine, muyena yaku maka una gaima rigo vo nisi.”

¹⁸Naomi yaku Ruth veyo ri, bi ina sa dina vata rego, mina resi dairiyainedi ni guba de reyo.

¹⁹Ye ina remanu disi Bethlehem ri okiyadi. Bethlehem okiyadi ri, rautu vene vesi tururu reyadi ma rema vene yaku ago ni tona dudu niyadi, “Aee, mirona bi Naomi ba?”

²⁰Ina vene rofu niyo, “Naomi vo nisi nai roka ga nifo, idu nai roka Marah^c nifo, adina VARIKA AMIYE Vava yaku nai vegu di ida moi gira reyo. ²¹Na bi gugura fore nufa diyaka, idu VARIKA AMIYE yaku notoka na moi dairiyo. Beika resi Naomi roka nidedi? Adina VARIKA AMIYE yaku esika na maro, VARIKA AMIYE Vava yaku no nafafau aiyo.”

²²Ye Naomi, ini Moab radini Ruth ya ota risi Moab gagani feresi Bethlehem ri dairiyadi, barley^d ini butu butu rena di medari.

^b 1.15 *sei*; ba *sei vene*. ^c 1.20 *Naomi....Marah*: Hebrew agori Naomi bi “safi” idu Marah bi “gira.” ^d 1.22 *barley*: Ina bi witi o koni o raisi asini.

Ruth bi Boaz di murori moimai regamo

2 ¹Ma Naomi bi ini usika ourena nufa ini maruka di eta rofu, Elimelech rubu rofu, roka nufa ma gugura nufa amiye, ini roka bi Boaz. ²Ma Ruth Moab rema Naomi yaku niyo, “Na ni kumo murori nesi barley ada bubudo fereyadi butu rigida. Nai mokei vava reida amiye yokoi yaku na moigo ma ina sa moimai regida.”^e

Ma Naomi yaku ina rofu niyo, “Mo bovo, nai vefa.”

³Ye Ruth yaku murori nesi moimai vene usi digamo, moiga ferena barley ada bubudo butu rigamo. Inkiye veyo ina bi Boaz di muro, kaere bi Elimelech di ini ruburi, moimai reyo.

⁴Mina ituari Boaz Bethlehem gutuna okisi baiyo ma moimai vene rofu niyo, “**VARIKA AMIYE** bi ya sa!”

Ina yaku ni kabai niyadi, “**VARIKA AMIYE** yaku buni tora gade ya mabobigo!”

⁵Ma Boaz yaku moimai ourefeidena amiye ni kaiteyo, “Mirona bi kaere rema off?”

⁶Ourefeidena amiye yaku ni kabai reyo, “Ina bi Moab gagani rema yokoi, kaere bi Naomi sa Moab gagani gutuna dairi baiyadi.” ⁷Mina rema yaku niyo, ‘Na ni kumo moimai vene usi barley butu rigida.’ Murori nesi moimai kora reyo uruyaku gutuna uriyenau niyo, minari bi neitua maka duduburi asa moiyo.”

⁸Resi Boaz yaku Ruth niyo, “Nai vefa, nai mokena sina buni ya nigida. Bouna sanari ga butu ri idu mina murori maka nai moimai rema vene sa maka moimai re. ⁹Murori rumana vene yaku nugasi butu rededi mina rema vene usi digasa tuta butu ri. Na bi rumana vene ni oteimaraka, ga ya avaka moiyaned, ma koru vaigya ri moimai rumana vene yaku koru biyori usi aiyadi mina moisi iri.”

¹⁰Ye Ruth neideyo ri bi kuri agu risi ini ne kono masi Boaz rofu niyo, “Beika buni baku reyaka, na bi yava ika rema ma beika resi na rofu yi uka na maisa?”

¹¹Boaz yaku ni kabai reyo, “Yi maruka tuyeyo gutuna baiyo ya yaku yi radini rofu beika regamo bi na niyadi, gokai yi nono baba ma yi ode yava feresi ma amiye toto vene sa ameisa. ¹²**VARIKA AMIYE** yi beika buni reyo ini obini dairi ya mago. **VARIKA AMIYE**, Israel di Sei, kaere ini ada gabireri ya rau redo, yaku ini obini tau ya mabobigo.”

¹³Ruth yaku ni kabai reyo, “Nai varika amiye, ya yaku yi nemokori buni toga na mavo. Yi naivo rema rofu amuta dudu ago na ni maisa, idu na bi yi naivo rema yokoi kana de.”

¹⁴Iruk iridedi ri Boaz yaku Ruth niyo, “Minari bae desi beredi be moigiyra rofu waini ideri birisi iri.” Muro rena vene sa ameinu reyo ri, Boaz yaku

e **2.2** Lev 19.9-10; Deut 24.19

barley oriyadi mina be maro. Iruku iriyo rofu uka bere nisi bafu be fereyo. ¹⁵Mina usi dadisi neyo barley butu rigi ri, Boaz yaku ini moimai vene ni mama reyo, “Tau rigedi sanari moigo ka ga vegasa nifa. ¹⁶Idu tau riyadi sanari ini rata be moisi ae magedi ma butu riyaine. Ina rofu ga ni vai refa.”

¹⁷Ye Ruth barley butu riyio ma uriyenau niyo, kamini tau risi mina utei reyo. Ini toe bi 10 kilogramme^f kana. ¹⁸Mina adodisi taoni dairiyo ma gokaisanu tau moiyo mina ini radini yaku veyo. Beika irisi bafu fereyo mina ka moi yakusi ini radini maro. ¹⁹Naomi yaku ini radini ni kaiteyo, “Ya bi gua goinari butu butu reyo? Kaere di sanari moimai reyo? Mina amiye kaere yaku ya vei mama riyio ina rofu bi buni tora gade magol!”

Mina usi Ruth yaku ini radini ni oteimaro kaere amiye di ini sanari moimai regamo. Niyo, “Mina amiye gua ina sa moimai reyaka di roka bi Boaz.”

²⁰Naomi yaku ini radini rofu niyo, “VARIKA AMIYE yaku uka buni ina rofu mabobigo! Ini buni tora gade bi toga rei baido muyena ma vegu vene fafau.” Dubusa niyo, “Mina amiye bi uni davatu yokoi, uni usika ourena toe erufudo amiye yokoi.”^g

²¹Kamini Moab rema Ruth yaku niyo, “Boaz yaku ka na rofu niyo, ‘Nai moimai vene sa amegiya bogo nai barley moimai rededi mina moi koina regedi.’”

²²Naomi yaku ini radini Ruth rofu niyo, “Nai vefa, buni bi ini ofi vene sa dibigiya, ini adina amiye be di murori digiya ri yaugedi baebu.” ²³Ye Ruth bi Boaz di ini moimai ofi ofi adinau amei digasa butu butu regamo boyo barley ma witi dogo reyadi koina niyo. Ma ini radini sa amegamo.

Ruth ini maruka baku reyo

3 ¹Meda nokoiri Naomi ini radini rofu niyo, “Nai vefa, na yaku rumana yokoi maina regida ye yaike yava gaima amegiya. ²Ya bi Boaz di ini moimai rema vene sa moimai regamadi. Resi Boaz bi uni davatu, kaere bi gua urusari fotaka utei resi koka rena yavari barley ada di fotaka makugo. ³Rafesi sisika buni nevero risi varuka burefe iniyе aku. Resi fotaka utei resi koka rena yavari ne, idu yi ne uruma bi ari kode gaveyaine mamo iri iri koina rego. ⁴Ini varedo sana vei diba re. Bosi ini yuka bou sase resi vare. Beika regiya bi ina yaku ya nigo.”

⁵Ruth yaku ni kabai reyo, “Ya yaku beika nisa bi regida.”

⁶Ye Ruth ini radini yaku niyo kana fotaka utei resi koka rena yavari neyo. ⁷Boaz ini vima buni dudu, iri iri koina niyo ri barley tau riyadi sanari varegi neyo. Ruth kiya kiya atafu bosи ina yuka bou sase resi vareyo. ⁸Uru tobori Boaz tururu resi kero reyo ma rema yuka adinari varedo veitao reyo. ⁹Ni kaiteyo, “Ya bi kaere?”

^f 2.17 Hebrew agori bi “ephah”. ^g 2.20 Lev 25.25

Ina yaku niyo, “Na bi Ruth yi moimai rei tavoi reida rema, yi varuka bou riyo tu yaku na bou ri, adina ya bi usika ourena toe erufusa amiye.”

¹⁰Boaz yaku kabai reyo, “Nai vefa, VARIKA AMIYE yaku buni tora gade ya mabobigo. Beika gua reyo di uka buni, ma sena mokei tora reyo kana de. Ya bi rumana rua gugura tau nufa o tau de maina de reyo. ¹¹Nai vefa, ori ga re. Yi beika usa nigiya na bi regida. Nai asiyaka rumana tau taoniri bi ina diba ya bi vegu buni rema. ¹²Rama na ka yi maruka di usika ourena amiye, idu usika ourena toe erufudo amiye ka atafuri amedo.^h

¹³Gua urusa minari varegiya ma uruyaku mirona rumana ya uka mokego ri ya mego, bi buni. Idu ya uka de mokego vo nisi, bi rama iniye VARIKA AMIYE amedo dada, na yaku regida. Gua bi varei ari uveyo.”

¹⁴Ye Ruth bi Boaz di yuka adinari vareyo idu amiye ga diba niyagane uruyaku gorogoro dadiyo. Ma Boaz niyo, “Amiye ga neidegedi rema fotaka utei resi koka rena yavari dui reyo.” ¹⁵Boaz ka yaku niyo, “Yi varuka moi baised rafori ibu re.” Makai reyo ri, Boaz yaku 20 kilogramme kana barley rausi resi Ruth adodi maro. Ma taoniri dairiyo. ¹⁶Kamini Ruth okiyo ma ini radini yaku ni kaiteyo, “Nai vefa, gokai dibo reyo?”

Resi Boaz yaku beika tau reyo mina ni oteimasi ¹⁷ka niyo, “Ina yaku mina feta koru ida barley na masi niyo, ‘Vana notoka yi radini rofu de dairigija.’”

¹⁸Kamini Naomi ya niyo, “Nai vefa, tua re, ve kumo gabu beika vata nigo. Boaz bi asa you feidena de koderi mina ago gua moi rorobo rego.”

Boaz Ruth meyo

4 ¹Mina ituari Boaz dadi bosu taoni di ida venari ameinu reyo. Usika ourena toe erufudo amiye, kaere bi Boaz yaku sena ni vabi reyo, mina baiyo ri Boaz yaku raka niyo, “Nai asini, bae minari ameinu re kumo.” Ye boi nesi ameinu reyo. ²Boaz yaku taoni di tora vene vana ufo moisi niyo, “Minari ameinu regedi.” Makai reyadi. ³Resi usika ourena toe erufudo amiye rofu niyo, “Naomi bi Moab gutuna dairi baised uni dubuini Elimelech di kono tu bi sero redo. ⁴Nai mokena bi mina ago ni okuda ameinu reyadi ma nai amiye di tora tora di nemokori ya yaku voi reyaine. Voi regiya vo nisi bi buni. Idu, ya de voi regiya vo nisi ka na ni oteima resi na diba. Adina amiye yokoi ini vava de idu ya maka, ma usi bi na.”

Ma niyo, “Na yaku voi regida.”

⁵Kamini Boaz yaku niyo, “Mina kono Naomi rofu voi regiya medari bi, Ruth kaere bi Moab rema ma obu niyo ka voi moigiy mini. Makai regiya ri bi mina kono di muyeyo amiye di roka sa ameibigo.”

⁶Mina usi usika ourena toe erufudo amiye yaku ni kabai resi niyo, “Makai bi nai vava mina rofu moi taga rigida adina makai regida ri, bi

^h 3.12 Ruth 2.20

nai mida mida yaku mina kono de moigedi. Ye, ya yaku voi re. Na bi anua regida.”

⁷Sena ituari Israel gaganiri bi kono o gugura sero regika bi, sero redo amiye yaku ini yuka ro moisi voi reyo amiye maro. Israel gaganiri kono o gugura sero regika makai resi koina niyadi.ⁱ

⁸ Ye mina usika ourena toe erufudo amiye yaku Boaz rofu niyo, “Ya kaya voi re.” Ma ina bi ini yuka ro kutusi maro.^j ⁹Kamini Boaz yaku tora vene ma amiye tau rofu niyo, “Gua vesi neideyadi na yaku Elimelech, Chilion ma Mahlon di ini gugura tau Naomi rofu voi reyaka. ¹⁰Ye Ruth, kaere bi Moab rema ma Mahlon di obu ka nai rema niyo. Makai regida ri bi muyei diyadi vene di roka ameibigo ini gugura sa, ye ini roka ini usika ourena di rofu, ma taoniri roka bura rededi bukari de roro nigo. Gua vesi neideyadi.”^k

¹¹ Resi tora vene ma vene tau taoni di ida venari yaku niyadi, “Rama, una bi vesi neideyafa vene mini. VARIKA AMIYE yaku mina rema kaere yi yavari bogo rofu buni reyaine, Rachel ma Leah kaere bi Israel di mida tau evata reyadi kana. Ya bi Ephrathah ri amiye tora nigiya ma Bethlehem ri ka yi roka ogau nibogo.^l ¹²VARIKA AMIYE yaku mina rema ofi rofu tutubena ya maraine, kaere bi Perez, Tamar ma Judah di mida, di usika ourena kana nigedi.”^m

Boaz ma ini tutubena vene

¹³ Ye Boaz yaku Ruth mesi ina sa vareyo. VARIKA AMIYE yaku buni tora gade maro ma rivo nisi rumana mida odiyo. ¹⁴Kamini rema vene yaku Naomi ni oteimaradi, “VARIKA AMIYE buni tora gade masifa, kaere bi mina medari usika ourena toe erufudo amiye sa ya ferei tavoi de reyo. Ina bi Israel gaganiri ini roka tora niyaine! ¹⁵Ina yaku mida odiyo kaere yaku yi vegu moi rua rego ma ugava nigiya ri ya nari rei mona reyaine. Adina yi radini kaere bi ini uka ya mado bi rumana mida viro vara” ya yaku moiyagadu ri ka vo nisi ya rofu bi buni niyagadu.” ¹⁶Resi Naomi yaku mina mida moisi ini budari aisi nari reyo.

¹⁷ Rema vene mironari amededi yaku niyadi, “Naomi bi rumana mida nufa niyo.” Ma ina roka niyadi Obed.

Ye ina bi Jesse di baba, ma Jesse bi David di baba.

¹⁸ Mina bi Perez di ini vata ni raroda reyadi vene: Perez bi Hezron di baba, ¹⁹Hezron bi Ram di baba. Ram bi Amminadab di baba, ²⁰Amminadab bi Nahshon di baba, Nahshon bi Salmon di baba, ²¹Salmon bi Boaz di baba ma Boaz bi Obed di baba, ²²Obed bi Jesse di baba, ma Jesse bi David di ini baba.

ⁱ 4.7-8 Deut 25.9 ^j 4.8 Fefa ago beri bi *maro*; Hebrew agori mina ago bi de.

^k 4.10 Deut 25.5-6 ^l 4.11 Gen 29.31 ^m 4.12 Gen 38.27-30 ⁿ 4.15 *viro vara* bi *seven*.

Ago buni

Mark

yaku bura reyo

Ago di ini adina

Ago buni Mark yaku bura reyo ago ideri ini adina bi mini: "...Sei di Mida Iesu Keriso di ago buni..." Minari Iesu bi moimai rena amiye ma vava nufa amiye. Ini vava bi ini oteimana ago ma vima no odoro ma amiye di vegu no koite makuna ideri amedo. Iesu iniye rofu niyo bi ina bi Amiye di Mida, kaere bi desi ini vegu masi amiye ini vegu no kero reyagane dada.

Mark yaku vegu rorobo niyaganedi Iesu di sina niyo. Mina sina yokoi yokoi bi Iesu di ini moimai rena, oteimana ago de. Ago ne tumu yokoi John Baptist ma Iesu di uka maina rena ago koina nina koderi Mark yaku Iesu di moi buni rena di vegu ma ini oteimana rofu bura reyo. Gabi Iesu di usi dina vene ina diba, idu Iesu di tuma vene di vegu no ina rofu moi tora riyadi. Ago metonari bi Iesu di ini vegu di fura remanu amegamo ri ina satauro ikoko reyadi ma muyesi dadiyo di sina ni okuyadi.

Ago metona remanu nanaka bi [] ideri amededi. Amiye be yaku nidedi mina ago bi amiye be yaku bura reyadi, diya *Mark yaku bura reyo*.

Beika sina ideri

Ago buni di ini adina 1.1-13

Iesu di moimai rena Galilee ri 1.14–9.50

Galilee gutuna Jerusalem rofu 10.1-52

Metona furari Jerusalem ideri ma adinari 11.1–15.47

Iesu dadiyo di sina 16.1-8

Iesu vededi ma omari dadi boyo 16.9-20

John Baptist yaku sina niyo
(Mt 3.1-12; Lk 3.1-18; Jn 1.19-28)

1 ¹Mina bi Sei di Mida^a Iesu Keriso di ago buni yomakai kora reyo.

²Sei di ago niyo amiye Isaiah yaku bura reyo kana:^b

“Sei yaku makai niyo, ‘Nai ago moi raga redo amiye yi budari ni feidegida.

Yi ida moi dogo rego.’

³ Amiye yokoi di goroka bi gagani autu sanari raka nido,^c

‘Varika Amiye di ida dogo resi

ini dibo ida moi rorobo rifa.’ ”

⁴Ma John Baptist gagani autu sanari vegu no feresi moi etagae rina ma Sei yaku ini vegu no koite makuna di babatiso di ago ni rausi resi ina vene babatiso magamo.^d ⁵Ye Judea gagani tora noiбану vene tau ma Jerusalem vene ina rofu baigamadi. Ye ini vegu no ni rausi regamadi ma Jordan koruri babatiso regamo.

⁶John di varuka bi kamelo^e di ueta ma ini gagaba ukita maena bi boromakau di ro. Ini iruku bi kaufa ma kaoro di ona.^f ⁷Ma ni rausi resi niyo, “Na usi baigo amiye ini vava yaku nai vava etei riyo, ye na bi rorobo de efuka odesi ini yuka ro di maena younegida. ⁸Na yaku koru dudu ya babatiso reyaka, idu mina amiye bi Vima Kikifa dudu ya babatiso rego.”

Iesu di babatiso rena ma uka maina
(Mt 3.13–4.11; Lk 3.21-22; 4.1-13)

⁹Mirona ituari Iesu bi Nazareth taoni Galilee gutuna baiyo ma John yaku Jordan koruri babatiso maro. ¹⁰Iesu bi evade koru ideri gutuna bae iruruka resi nei reyo ri bi oma ekeyo ma Vima Kikifa bi pune erena kana inafafau deyo. ¹¹Ma goroka yokoi oma gutuna degasa niyo, “Ya bi nai uka maida mida; ada tora gade ya rofu reida.”^g

¹²Ne ituari maka Vima Kikifa yaku gagani autu sanari Iesu ni feidey.

¹³Ma gagani autu sanari meda 40 ideri amegamo ri Satani yaku vegu no reyainedi vo nisi ini uka maina reyo. Ina bi tuma dona nadina sa amegamo ma Sei di naivo naivo vima yaku nari regamadi.

Iesu oyena rutu vene vana raro raka niyo
(Mt 4.12-22; Lk 4.14-15; 5.1-11)

¹⁴John Baptist moi gira reyadi fufuta rofu Iesu Galilee ri nesi Sei di ago buni ni rausi regamo. ¹⁵Resi niyo, “Gua bi Sei di meda, ma Sei di

^a **1.1** Bura bedakai bi *Sei di Mida* nufa de. ^b **1.2** Mal 3.1 ^c **1.3** Is 40.3 (LXX) ^d **1.4** *John Baptist gagani autu sanari...babatiso di ago ni rausi resi ina vene babatiso magamo* bura bedakai *John Baptist gagani autu sanari...babatiso di ago nigamo maka nufa.* ^e **1.6** *kamelo* bi hosi kana; gagani autu sanari amiye di gugura fare moi didedi. ^f **1.6** 2 Kgs 1.8
^g **1.11** Gen 22.2; Ps 2.7; Is 42.1; Mt 3.17; 12.18; Mk 9.7; Lk 3.22

ourefeidena amena sana bi atafu okiyo. Yi vegu no feresi moi etagae risi ago buni rofu mokena vari gira aifa!”^h

¹⁶Iesu bi Galilee koru moka tora seri atafuri bogasa bi Simon ini usika Andrew sa koruri fate makugamadi mina veyo, adina ina bi oyena rutu vene. ¹⁷Iesu yaku ina vene rofu niyo, “Na usi baifa ma oyena koda rena kana amiye ni rutu rena ya rigida.” ¹⁸Minari maka ini fate feresi usi diyadi.

¹⁹Doba deri bogasa bi James ma John, Zebedee di mida veyo. Ina yaku boutifafau fate veika regamadi. ²⁰Iesu yaku evade uba dubuisa raka niyo ma ini baba Zebedee ma ini moimai rededi vene boutiri feresi usi diyadi.

Amiye nokoi vima no sa
(Lk 4.31-37)

²¹Iesu bi ini usi dina vene sa Capernaum taoniri boyadi ma evade Sabati medari usa usa yava ideri dui resi amiye ni oteimagi kora reyo.

²²Ye ini oteimana ago rofu tururu reyadi, adina ini oteimana bi kaere vava nufa amiye kana ma ini ago gira oteimana vene kana de.ⁱ

²³Mina ituari maka amiye yokoi usa usa yava ideri vima no ini rovaitari amegamo yaku raka niyo, ²⁴“Iesu Nazareth amiye, una rofu bi beika ura reisa? Ya bi una ukero vau regika okiyo ba? Na na diba ya bi kaere — ya bi Sei di Kikifa Amiye!”

²⁵Iesu yaku ni kaka reyo, “Babo ni. Mina amiye rofu yakusi di!”

²⁶Vima no yaku mina amiye moi seko sako resi ababa nisi ini rovaitari yaku diyo. ²⁷Amiye tau bi tururu resi iniye iniye ni kaiteyadi, “Mina bi beika? Mina bi oteimana di ida rua nokoi mini ini vava nufa! Vima no rofu ago gira mado ma ka ina rofu neidesi anema yora nidedi!”

²⁸Kamini evade Galilee gagani tora noibanuri ini sina urafo rei diyo.

Iesu amiye tau gade moi buni riyo
(Mt 8.14-17; Lk 4.38-41)

²⁹Usa usa yavari fereyadi ri evade James ma John sa Simon ma Andrew di yavari dui reyadi. ³⁰Simon di imokai rema bi gauka resi rovaita vakivaki regasa ekamari varegamo ma Iesu okiyo ri evade ni oteimaradi. ³¹Ye mina rema rofu bosí ini vana moisi moi dadiyo. Rovaita vakivaki bi fereyo ma iruku dabara resi nari regamo.

³²Uriyenauri amiye yaku gauka vene tau ma vima no nufa vene tau Iesu rofu afei baiyadi. ³³Amiye tau kaere mina taoniri amededi mina yava ida nefauri okiyadi. ³⁴Ma Iesu yaku gauka vene tau gade moi buni risi vima no tau gade umeki reyo. Ina yaku vima no niyo ago de niyadi, adina diba niyadi ina bi kaere.

^h 1.15 Mt 3.2 ⁱ 1.22 Mt 7.28-29

Iesu yaku Galilee gaganiри sina ni diyo
(Lk 4.42-44)

35 Uruyaku gorogoro meda youna koderi, Iesu bi dadisi yava feresi yaku deyo. Minari bi gagani autu sanari usa usa nigi diyo. **36** Ye Simon ini asiyaka vene sa maina digamadi, **37** ma baku resi niyadi, “Amiye tau vakoi bi ya yaku maina rededi.”

38 Ye Iesu yaku ni kabai reyo, “Una bi berou rautu eta rofu boi negifa. Ma na bi ina vene sa ka ago ni rausi regida, adina na bi mina dada deyaka.”

39 Ye Galilee gagani tau vakoiri disi ini usa usa yavari ago ni rausi resi vima no umeki regamo.^j

Iesu yaku amiye moi buni riyo
(Mt 8.1-4; Lk 5.12-16)

40 Refera amiye yokoi Iesu rofu okisi efuka odesi guyaguya niyo, “Ya ura reisa vo nisi, ya yaku na moi ruaka rigiya.”^k

41 Iesu bi iriyeduка^l resi ini vana moi roto risi mina amiye avaka moisi niyo, “Na yaku ura reida; ruaka ni!” **42** Minari maka ini rovaitari refera gauka ferei diyo ma ruaka niyo. **43** Ye Iesu yaku ago gira nisi evade maka ni feidesi **44** niyo, “Amiye yokoi ga ni oteima, idu nesi ya kaya Sei ma amiye utari naivo amiye oteimasi yi rovaita buni niyo kana ori sisika re. Ye amiye vegedi ya bi buni niyo Moses yaku ago girari niyo kana Sei rofu moi ori sisika regiya.”^m

45 Idu mina amiye yaku disi mina ago ni rausi regasa gagani noibanuri digamo. Dada Iesu ina yaku ago tora gade niyo mina taoni ideri dina bi de reyo. Idu ina bi gagani autu sanari amegamo, ye amiye gagani gagani noibanuri okisi ina vegamadi.

Iesu dibo anua yuka kevo amiye moi buni riyo
(Mt 9.1-8; Lk 5.17-26)

2 **1** Meda be koina niyo ri, Iesu bi dubusa Capernaum taoniri dairiyo, rautu vene bi okiyo ago mina neideyadi. **2** Ye amiye tau gade egogo reyadi ri yava ida dui dui sana ka vata baiyo ma Iesu yaku sina buni ni oteimagamo. **3** Mina fuofuori amiye vana raro okiyadi, dibo anua yuka kevo amiye uakaisi Iesu urana afei baiyadi. **4** Idu amiye tau gade dada mina amiye ina rofu moi dui rena bi anua reyadi. Dada Iesu amegamo sana ramari yava tebo maka nuruyadi. Ye dibo anua yuka kevo amiye bi ekama fafauri aisi moi feide neyadi. **5** Ye Iesu mina vene di mokena vari

^j 1.39 Mt 4.23; 9.35 ^k 1.40 *na moi ruaka rigiya*: Mina gauka yaku amiye moi kino redo.

^l 1.41 *iriyeduка*; buru bedakai bi *gubuyo* nufa. ^m 1.44 Lev 14.1-32

gira aina veifategasa mina dibo anua yuka kevo amiye rofu niyo, “Nai mida, yi vegu no bi koite makuyaka.”

⁶Ago gira oteimana vene bedakai minari amesi ina kaya mokeyadi,
⁷“Gokai resi mina kana sina nido? Mina bi Sei di roka moi no rido! Sei maka amiye di vegu no moi koite makugo!”

⁸Evade maka Iesu yaku mina vene di mokena ini ukari veifatesi ina rofu niyo, “Beika resi makai yi ukari mokededi? ⁹Goina ago nigida bi rena gira de, dibo anua yuka kevo amiye rofu, ‘Yi vegu no bi koite makuyo,’ o ‘Dadisi yi maduna moisi nana re?’ ¹⁰Idu, ya vei mama regedi Amiye di Mida bi vava nufa konori vegu no koite makugo.” Kamini Iesu yaku dibo anua yuka kevo amiye rofu niyo, ¹¹“Ya nida dadisi yi ekama vanau moisi rautu di!”

¹²Ye dadisi minari maka ini ekama moisi amiye tau di nemokori yaku diyo. Ye ina tau noibantu tururu resi Sei di roka moi odoro resi niyadi, “Sena mina vegu kana be deveyafa!”

Iesu yaku Levi raka niyo
(Mt 9.9-13; Lk 5.27-32)

¹³Iesu bi kamini dubusa Galilee di koru moka seriri dairiyo ma amiye tora gade bi ina rofu okiyadi, ma oteimagi kora regamo. ¹⁴Ye nana rei bogamo ri Levi, Alphaeus di mida, veyo bi fore butu rena ofesiri amegamo. Ina rofu niyo, “Na usi bae.” Ma dadisi usi diyo.

¹⁵Gabi bi Levi di yavariⁿ iruku irigamo ri, fore butu rededi vene ma vegu no rededi vene tau gade okisi Iesu ini usi dina vene sa ameinu resi iruku irigamadi, ini adina bi amiye tora gade usi diyadi. ¹⁶Pharisee di ago gira oteimana vene nei resi Iesu yaku vegu no rededi ma fore butu rededi vene sa iruku irigamo mina veifatesi ini usi dina vene ni kaiteyadi, “Beika resi makai kana vene sa iruku iridedi?”

¹⁷Ma Iesu mina ago neidesi ni kabai reyo, “Amiye buni bi gauka dogo amiye de mokegedi, idu gauka vene maka. Na bi mokena rorobo vene rofu disi raka nigi de okiyaka, idu vegu no rededi vene rofu okiyaka.”

Oyo rena ida ni kaitena ago
(Mt 9.14-17; Lk 5.33-39)

¹⁸Meda yokoiri John Baptist ma Pharisee di usi dina vene yaku oyo regamadi. Amiye be okisi ina rofu ni kaiteyadi, “Beika resi John Baptist ma Pharisee vene di usi dina vene bi oyo rededi, idu yi usi dina vene bi de?”

¹⁹Ye Iesu yaku ni kabai reyo, “Rema mego amiye yaku ini asiyaka vene sa ameibigo ri, iruku oyo regedi ba ide? Ide mada! Mena rumana ina

ⁿ 2.15 Levi di yavari; o ini (mina bi Iesu di) yavari.

sa amegamo ri, bi iruku oyo de regedi. ²⁰Idu mina meda baigo ri, rema mego amiye moi digedi, mirona medari mamo iruku oyo regedi.”

²¹“Amiye yokoi de ruaka ma koitenā de varuka tu yaku varuka kori fafau faniya de rego; makai rego ri, bi varuka ruaka moi rutu rego ma varuka kori uvesi rego ma ruba moi tora nigo. ²²Ma amiye yokoi de waini ruaka moi si waini kori di ro ideri aigo; makai rego ri, bi ro ufategedi, ma waini ma ro bi no nigedi; mina dada waini ruaka bi waini di ro ruaka ideri rausi regiya.”

Sabati di ni kaitena ago

(Mt 12.1-8; Lk 6.1-5)

²³Ma Sabati medari Iesu ma ini usi dina vene sa witi muro idari nana diyadi. Ini usi dina vene yaku witi di ada koma regi kora reyadi.^o ²⁴Ma Pharisee vene ina rofu niyadi, “Neide, beika resi beika Sabati meda una rofu bi tabu mina rededi?”

²⁵Ma ina rofu niyo, “Ya ka bura de veyadi beika David ini amiye sa yaku reyadi mirona medari rauna reyadi ri?^p ²⁶Ye Sei di yava ideri dui resi Sei rofu mana beredi irisi ini vene ka maro. Mina vata niyo ri Abiathar bi Sei ma amiye utari naivo amiye tora. Ago gira yaku nido bi tabu Sei ma amiye utari naivo vene maka bi mina beredi irigedi.”^q

²⁷Ma Iesu niyo, “Dada Sabati meda bi amiye di buni rofu riyo; amiye bi Sabati rofu de riyo. ²⁸Mina dada Amiye di Mida ka bi Sabati meda di Varika Amiye.”

Vana kevo amiye

(Mt 12.9-14; Lk 6.6-11)

3 ¹Kamini Iesu bi dubusa usa usa yavari dui reyo ma mironari bi vana kevo amiye yokoi amegamo. ²Ye vegamadi Sabati medari mina amiye moi buni rigo vo nisi bi ini no dada nisi tourage regika. ³Iesu yaku mina vana kevo amiye rofu niyo, “Mina amiye tau di nemokori dadisi are re.” ⁴Resi ni kaiteyo, “Beika vegu bi buni ago gira dudu Sabati medari regiya? Vegu buni regiya o vegu no regiya ba? Amiye di vegu moi rigiya o umuyegiya ba?”

Idu ina vene bi bere niyadi. ⁵Iesu bi gubuyo resi ina vene nene resi iriyeduwa reyo, adina bi uka gira resi de neideyadi. Mina amiye rofu niyo, “Yi vana ae roto ri.” Ini vana ae roto risi dubusa dairi buni niyo. ⁶Kamini Pharisee vene usa usa yava feresi evade Herod di eta rofu vene sa sina ago Iesu umuyegi ni rorotari reyadi.

Amiye tora gade Galilee koru moka tora seriri

(Lk 6.17-19)

⁷Iesu ma ini usi dina vene sa Galilee koru moka torari diyadi, ma amiye tau gade ina usi boyadi. Ina bi Galilee eta rofu baiyadi; ka Judea

^o 2.23 Deut 23.25 ^p 2.25-26 1 Sam 21.1-6 ^q 2.26 Lev 24.9

rofu,⁸ Jerusalem rofu, Idumea rofu, ma Jordan Koru meda dadido eta rofu, ma gagani Tyre ma Sidon mina taoni eta berou berou okiyadi. Mina amiye tau gade Iesu rofu okiyadi ini adina bi neideyadi ini beika regamo dada.⁹ Amiye bi tau gade dada Iesu ini usi dina vene niyo bouti yokoi moi tore rei feregedi ma amiye yaku de itei ri foyoma de regedi.^r¹⁰ Ina bi amiye tau gade moi buni rigamo, mina dada gauka vene iniye iniye ebeku regasa ida maina regamadi ina avaka moigedi vo nisi.¹¹ Ma kaere amiye vima no ini rovaitari bi ina vegamadi ri bi ina adina keto resi raka nigamadi, “Ya bi Sei di Mida!”

¹² Ma ago gira gira dudu niyo amiye ga niyagane ina bi kaere.

Iesu ini ni feidena vene tuero moiyo
(Mt 10.1-4; Lk 6.12-16)

¹³ Kamini Iesu bi omuna odorori boyo, ini ura bi rumana vene be abidi rego. Resi mina rumana vene raka niyo ma baiyadi.¹⁴ Ma ina yaku rumana vene tuero ina sa ameyaganedi abidi resi bi ni feidena vene roka maro. Mina bi disi ini ago ni rausi reyagane dada.¹⁵ Ma vava maro; mina vava dudu bi vima no umeki regedi.

¹⁶ Ina yaku amiye tuero abidi reyo bi mini: Simon (Iesu ini roka maro bi Peter);¹⁷ ma James ini dubuini John sa, Zebedee di mida mida (Iesu ini roka maro bi Boanerges, mina ini adina bi, “Oma yaku ofu tu nido kana di mida”);¹⁸ ma Andrew, Philip, Bartholomew, Matthew, Thomas, ma James, Alphaeus di mida, ma Thaddaeus, ma Simon, ina bi zealot^s di amiye yokoi.¹⁹ Ma Judas Iscariot kaere bi Iesu tautore reyo.

Iesu ma vima no di tora Beelzebul
(Mt 12.22-32; Lk 11.14-23; 12.10)

²⁰ Kamini Iesu bi yavari dairiyo, ma rema rumana dubusa egogo reyadi; ye Iesu ini usi dina vene sa ini iri iri ari bi ebu reyo.²¹ Iesu di davatu vene yaku ini moimai regamo sina nido neideyadi ri, bi dadisi neyadi beika nido bi ga niyainedi, adina amiye bi nigamadi, “Ina bi forovai reyo!”

²² Ago gira oteimana vene kaere bi Jerusalem gutuna deyadi yaku nigamadi, “Vima no Beelzebul bi ini rovaitari dui reyo, adina vima no di ourefeidena amiye yaku vava mado ma vima no umeki redo.”^t

²³ Ye Iesu bi amiye raka ni egogo resi mokena ago ni oteimagamo. Resi yomakai ago niyo, “Gokai dudu Satani yaku Satani iniye umeki rego?

²⁴ Gagani yokoi uta okusi iniye iniye berou berou are resi ruda rego vo nisi bi berou berou keto rego.²⁵ Ma rubu iniye iniye uta okusi ruda rego vo nisi

^r 3.9-10 Mk 4.1; Lk 5.1-3 ^s 3.18 Zealot bi Rome vene tourage regi regamo amiye.

^t 3.22 Mt 9.34; 10.25

bi berou berou keto rego. ²⁶Ye Satani ini vene sa iniye iniye berou berou are resi okusi ruda regedi vo nisi, bi are rei gira de regedi. Tutumui digedi.

²⁷“Idu amiye yeiva di yava bi dui resi ini gugura fore de duma rego. Makai siko bi mina amiye yeiva ukita rigo mamo ini gugura fore duma rego.

²⁸“Rama iniye ya vene rofu nida, ‘Sei yaku amiye di vegu no tau ma roka moi no rina ago tau koite makugo.’^u ²⁹Idu amiye kaere yaku Vima Kikifa rofu ini roka moi no rigo vo nisi, bi Sei yaku ini vegu no de koite makugo. Ini vegu no di toe bi toga toga ameibobigo.”^v ³⁰(Makai niyo adina bi niyadi, “Ina bi vima no ina sa amedo.”)

Iesu ini nono ma ini dubuiyaka sa
(Mt 12.46-50; Lk 8.19-21)

³¹Kamini Iesu ini nono ma ini dubuiyaka baisi yava etofaro are regamadi. Resi ago ina rofu ni feideyadi. ³²Amiye tau gade bi ina sa amei desi egoru resi ina rofu nigamadi, “Ve kumo, yi nono ma yi dubuiyaka^w bi etofaro ya yaku ni kaitededi.”

³³Kamini ni kabai resi niyo, “Kaere bi nai nono ma kaere bi nai dubuiyaka?” ³⁴Resi amiye amei desi reyadi ri, mina vesi niyo, “Ve kumo mina vene bi nai nono ma nai dubuiyaka! ³⁵Adina ya kaere Sei di mokenari beika regiya bi ya bi nai dubuini, nai tobaini, ma nai nono.”

Oga varina amiye di mokena ago
(Mt 13.1-9; Lk 8.4-8)

4 ¹Iesu bi dubusa Galilee koru moka tora adinari amiye oteimagi kora reyo. Amiye tau gade gade ina adina egogo reyadi, mina dada bi boutiri ameinu regi keu risi koru tobo rofu boyo ma amiye tau gade bi koru vasari are reyadi.^x ²Kamini mokena ago dudu ago tau gade ni oteimasi niyo:

³“Neidefo! Amiye yokoi ini yoyava varigi diyo. ⁴Ye yoyava vari vari reyo^y ri bedakai bi yuka rafo adina sanari yareyadi ma erena yaku okisi iri vau reyadi. ⁵Be bi abita fore odoro yareyadi; minari kono bi keika maka. Evade meto boyadi, adina kono bi doba de. ⁶Kamini meda are reyo ri, bi vai taresi abiye niyadi, adina ini daru kono ideri nei mona de reyadi. ⁷Ma be bi imiye tafa fogori yaresi boi tora niyadi ma imiye yaku fafa risi fono reyadi. Mina dada rama de niyadi. ⁸Ma be bi kono buniri yaresi meto fatesi imu resi rama niyadi. Be bi 100, be bi 60, ma be bi 30 niyadi.”

⁹Kamini niyo, “Kaere neidego, bi neideyaine!”

^u 3.28 roka moi no rina ago; o ina rofu ini roka moi no rina ago. ^v 3.29 Lk 12.10

^w 3.32 Bura bedakai bi ma tobaiyaka nufa. ^x 4.1 Lk 5.1-3 ^y 4.4 Mirona medari amiye yaku yoyava varigasa kono fafau makuyadi.

Mokena ago di ida
(Mt 13.10-17; Lk 8.9-10)

¹⁰Kamini inike ameyo ri, bi ina adinari vene ma ini usi dina vene tuero sa yaku ni kaiteyadi mina mokena ago ni rorotari reyaine. ¹¹Ina rofu niyo, “Ya bi Sei di ourefeidena amena sana di kiki ago moi yadi, idu etofaro vene bi mokena ago dudu maka tau vakoi moigedi, ¹²ye yomakai,”

‘Vededi,
 idu vei mama de rededi;
 ma neidededi,
 idu neidei mama de resi diba de nidedi.
 Bema regedi vo nisi bi Sei rofu kero regedi,
 ma ini vegu no koite makugo.’ ”

Iesu oga varina amiye di mokena ago ni rorotari reyo
(Mt 13.18-23; Lk 8.11-15)

¹³Kamini ni kaiteyo, “Ya vene bi mina mokena ago di ini adina diba ba de? Gokai mina mokena ago tau gade diba nigedi? ¹⁴Oga varina amiye bi Sei di ago vari digamo. ¹⁵Amiye bedakai bi yuka rafo ida sanari yoyava yareyadi kana. Ye ago neidena doba deri, evade Satani okisi bi moi diyo. ¹⁶Kamini bedakai bi abita foreri yareyadi kana; kaere ago neidesi evade maka ada dudu moi yadi. ¹⁷Idu ini daru inike bi de, ma amei doba de regedi. Ye mina ago dada toe ma esika baigedi ri, bi evade you feidegedi. ¹⁸Ma amiye be bi imiytafa fogori yareyadi kana. Mina vene bi ago neideyadi, ¹⁹idu mina kono di mokena toe, ma ini gugura tau gade di ofa ofa ago, ma gugura be di ura bi ago buni moi forovai reyadi, ye ina bi meko varena de reyo. ²⁰Idu amiye be bi kono buniri yoyava yareyadi kana; ago neidesi moi gira risi rama nido; be bi 100 nido, be bi 60 nido ma be bi 30 nido.”

Ramefa ini ikina sanari
(Lk 8.16-18)

²¹Iesu yaku niyo, “Ramefa moisi foroka gabireri o ekama gabireri de aisa. Idu, ya yaku ini ikina sanari ikisa.^a ²²Gokai beika sui niyadi bi moi ogau nigedi ma gokai beika bou riyadi bi bou uyounegedi.^b ²³Amiye ini neidego vo nisi, bi neideyaine!”

²⁴Ma ina vene rofu niyo, “Ya beika neidededi mokei mona refa! Ya amiye gokai toe maddedi kana, Sei yaku mina toe dairisi ka ini odoro

^z **4.12** Is 6.9-10 (LXX) ^a **4.21** Mt 5.15; Lk 11.33 ^b **4.22** Mt 10.26; Lk 12.2

ya mago.^c ²⁵Adina kaere ini beika baika nufa bi moi tanu mago. Idu kaere ina bi de inkiye inkiye nufa, ka ina rofu amedo bi moi dairigo.”^d

Yo bodo di mokena ago

²⁶Iesu yaku dubusa niyo, “Sei di ourefeidena amena sana bi yomakai: Amiye yaku konori yoyava makudo. ²⁷Urusa ma ariu, varedo o dadisi amedo, gokai dudu mina yo ini meto fiu ni bodo bi ina kaya ka diba de. ²⁸Kono inkiye dudu maka yoyava bosí rama nidedi; ouresi bi ini rata ogau nido, resi bi ini imu mamo meko varedo. ²⁹Rama gira nisi kaka nigo ri, mina amiye evade yaku biyeta moisi nugago, adina bi butu butu di meda okiyo.”^e

Mastadi yo di mokena ago (Mt 13.31-32, 34; Lk 13.18-19)

³⁰Kamini ni kaitesi niyo, “Beika yaku nigifa Sei di ourefeidena amena sana bi gokai kana? Beika mokena ago dudu yaku ni rorotari regifa? ³¹Mina bi yomakai: Mastadi di yoyava konori bi keika keika inkiye. Amiye yokoi mina mastadi di yoyava konori variyo. ³²Vareyo ri, tora nisi yabo tau vakoi ebu rego. Ini teteka tora tora rigo ma erena yaku okisi ini adari nui rigedi.”

³³Mokena ago tau gade dudu makai ini adari ufateyainedi ina rofu ni oteimagamo. ³⁴Ina bi mokena ago dudu maka sina nigamo, idu inaikie ini usi dina vene rofu mina sina tau noibanu sui nisi ni rorotari regamo.

Iesu yaku miya ma aura moi amuta riyo (Mt 8.23-27; Lk 8.22-25)

³⁵Mirona uriyenau mina meda makari Iesu yaku ini usi dina vene rofu niyo, “Una koru moka tora berou eta rofu boi nenadi.” ³⁶Ye usi dina vene ina vene amiye tau noibanu feresi bi bouti odoro keu riyadi Iesu yaku amegamo ri, ma ina ka ina vene sa bouti be minari afeyadi. ³⁷Fuofuori aura yeiva tora fu reyo ma ureure tafo resi bouti ideri dui reyo, ye koru yaku vata baigamo. ³⁸Iesu bi bouti fufuta rofu ini ada adikuna odoro varegamo. Ini usi dina vene edadisi niyadi, “Oteimana amiye, ya bi una mokei tora reisa ba ide? Una bi kamini tuyegifa.”

³⁹Iesu dadisi aura besenai ago masi koru moka tora rofu niyo, “Amuta ni!” Aura minari bere niyo, ma koru moka tora amuta niyo. ⁴⁰Ini usi dina vene rofu niyo, “Beika resi ya ori reyadi? Gokai resi yi mokena vari gira Sei rofu de aiyadi?”

⁴¹Ma ina kaya ori tora resi inkiye inkiye niyadi, “Ye mina amiye bi gokai kana amiye? Aura ma koru tafo ka ini ago neidededi!”

^c 4.24 Mt 7.2; Lk 6.38 ^d 4.25 Mt 13.12; 25.29; Lk 19.26 ^e 4.29 Joel 3.13

Iesu yaku amiye vima no nufa moi buni riyo
(Mt 8.28-34; Lk 8.26-39)

5 ¹Iesu ini usi dina vene sa Galilee koru moka tora berou eta rofu Geresa gaganiri okiyadi. ²Soka reyo doba deri bi, amiye nokoi vima no ina sa amegamo amiye guri sana fore ruba gutuna baisi ina baku reyo. ³Mina guri sanari amegamo. Amiye yaku dubusa seini dudu ukita risi ferena bi rena de regamadi. ⁴Uru tau gade ini yuka ma ini vana ukita reyadi idu toga toga seini ubaki resi auri ini yukari moi fufuta regamo. Ini yeiva bi tora gade iniye, ye amiye yaku moi gira kiki rena de. ⁵Ari ma urusa bi toga toga guri sanari ma omunari raka nisi fore dudu ina kaya nugagamo.

⁶Maikeri gutuna nesi Iesu veyo. Resi raga resi ina adina ini efuka meimisi ⁷raka ni tora reyo, “Iesu Oma Odoro Sei di Mida, beika resi na rofu baisa? Sei ini roka dudu, ya usa nida, esika na mana ga re!” ⁸(Mina nigamo ini adina bi Iesu yaku niyo, “Vima no, mina amiye rofu yaku!”)

⁹Kamini Iesu yaku mina amiye ni kaiteyo, “Yi roka bi beika?”

Mina amiye yaku ni kabai reyo, “Nai roka bi ‘Taugadegade’ adina una bi tau gade!” ¹⁰Ina bi Iesu toga guyaguya nigamo vima no mina gaganiri umeki rena ga reyaine vo nisi.

¹¹Mironari bi dona tau gade gade atafu, omuna ikari ina vana irigamadi. ¹²Vima no yaku Iesu guyaguya niyadi, “Una ni feidegiya dona amededi sanari, ini rovaita ideri dui regifa.” ¹³Ni feideyo ma vima no mina dona tausini remanu kana tau noibantu ini rovaitari dui reyadi ma rarava eta eta raga nesi koru moka torari yoyo resi koruri sofу nisi muyeyadi.

¹⁴Dona vana regamadi vene bi ori disi beika vata niyo taoniri ma gagani gaganiri vene rofu sina ni digamadi. Amiye diyadi beika vata niyo mina vegedi vo nisi. ¹⁵Iesu rofu okiyadi ri, bi mina amiye veyadi kaere bi vima no tau gade gade ini rovaitari ideri amegamo. Ina bi mironari amegamo rovaita dogo resi mokena rorobo dudu, ma ina tau noibantu ori reyadi. ¹⁶Kaere mina veyadi vene bi amiye ni oteimaradi beika vima no nufa amiye rofu vata niyo, ma dona rofu beika vata niyo ka.

¹⁷Ye Iesu rofu ni guba reyadi ini gagani feresi diyainedi vo nisi.

¹⁸Kamini Iesu bouti odoro keu rigamo ri, amiye vima no nufa yaku ina rofu guyaguya niyo, “Na ka ya sa digida.”

¹⁹Idu Iesu ni de resi niyo, “Rauturi dairisi yi yava vene nigiya gokai Varika Amiye ya rofu iriyedula resi vegu buni reyo.”

²⁰Ye mina amiye feresi taoni taoni vana ufo (Decapolis) rofu disi amiye rofu ago ni rausi regamo Iesu yaku gokai ina rofu reyo. Ma amiye tau neideyadi ri bi tururu reyadi.

Rema mida yokoi kaere muyeyo ma rema gauka yokoi
(Mt 9.18-26; Lk 8.40-56)

²¹ Iesu boutiri dubusa dairisi koru moka tora berou ugasi boi neyo ri amiye tora gade okisi seriri ina negau egogo reyadi. ²² Mironari usa usa yava di ourefeidena amiye nokoi ini roka Jairus okiyo. Kamini Iesu veyo ri, ini yuka adinari iniye you makusi ²³ guyaguya niyo, “Nai vefa keika bi gauka tora nufa muyego. Ya usa nida baisi yi vana inafafau aigiyia, ye buni nigo resi vegu ameyaine.”

²⁴ Ye ina sa boyo. Ma amiye tau gade yaku usi bos i inafafa riyadi.

²⁵ Rema yokoi bi lagani tuero rema di gauka gura ugamo. ²⁶ Gauka dogo amiye tau yaku vei dogo reyadi. Idu ini fore tau gade koina niyo ma buni nina de; ini gauka bi ari neinei tora nigamo. ²⁷ Ina yaku Iesu di sina neideyo ri, bi amiye tau gade di fufutari baisi ini varuka avaka moiyo. ²⁸ Adina ina kaya rofu nigamo, “Na ini varuka maka avaka moigida vo nisi, bi buni nigida.”

²⁹ Ini varuka avaka moiyo ri, bi minari maka ini dava degamo koina niyo, ye amuteyo ini rovaita ideri ini gura bi koina niyo. ³⁰ Evade Iesu mokeyo ini vava bi ina rofu yakuyo, ye kero resi mina amiye tau gade rofu ni kaiteyo, “Kaere yaku nai varuka avaka moiyo?”

³¹ Ini usi dina vene yaku niyadi, “Ya mina amiye tau gade yaku ya fafa rididi veisa ba ide, idu una ni kaiteisa, ‘Kaere yaku nai varuka moiyo?’ vo nisa.”

³² Ma Iesu bi ne desi maina regamo kaere yaku mina vegu reyo vo nisi.

³³ Mina rema diba niyo beika ina rofu vata niyo ye baisi ini yuka rafo adinari iniye you makusi ori dudu tururu resi sina rama ni oteimaro.

³⁴ Ma Iesu yaku ina rofu niyo, “Nai vefa, yi mokena vari gira aina yaku ya moi buni riyo. Uka amuta dudu digiya ma yi gura uyo ka erufugida.”

³⁵ Kamini Iesu mina nigamo ri, Jairus, kaere bi usa usa yava di amiye tora, bi amiye be ini yava gutuna ina rofu okisi niyadi, “Yi vefa bi muyeyo. Beika resi mina oteimana amiye rofu toga mokena moigasa ameisa?”

³⁶ Iesu beika niyadi bi mokei vava de reyo.^f Resi usa usa yava di amiye tora niyo, “Ori ga re; mokena vari gira ae maka.” ³⁷ Bogika amiye yokoi ina sa afena de reyo, idu Peter, James ma ini dubuini John maka afeyo.

³⁸ Usausa yava di ourefeidena amiye di yavari okiyadi ri, bi Iesu ne reyo ri bi amiye bi uka vorivori dudu isaka nisi goroka tora dudu guroro regamadi ma veyo. ³⁹ Dui rei bos i niyo, “Beika resi uka vorivori rededi? Beika resi isaka nidedi? Mina rema mida keika bi muyena de, idu bi neota varedo.”

^f 5.36 mokei vava de reyo; o neideyo.

⁴⁰Idu amiye ina rofu yoga nigamadi, ye amiye tau noibantu etofaro ni feidesi mina rema mida di nono baba ma ini usi dina vene regode sa mina rema mida keika muyesi varedo sanari dui rei boyadi. ⁴¹Ini vana moisi niyo, “*Talita, koum!*” Mina ago ini adina bi, “Rema mida keika, na ya rofu nida dadi!”

⁴²Minari maka dadisi dibo reyo. (Ini vata niyo lagani bi tuero.) Mina vata niyo ri, ina vene tau noibantu tururu iniye reyadi. ⁴³Ma Iesu yaku ago gira masi niyo amiye yokoi ga ni oteimarainedi, ma ina rofu yaku niyo iruku yokoi be mafo kumo iriyaine.

Iesu bi Nazareth ri fufuta maradi
(Mt 13.53-58; Lk 4.16-30)

6 ¹Iesu ini usi dina vene sa mina sana feresi ini tora niyo taoniri dairiyo. ²Sabati meda niyo ri usa usa yavari amiye rofu oteimagi kora reyo. Amiye tau gade vima disi ini beika niyo neideyadi ri, iniye niyadi, “Goidu mina baku reyo? Mina mokena tora moiyo bi beika? Gokai dudu mokena vegu makai redo? ³Mina bi yava rina amiye, Mary di mida ma ini dubuiyaka bi James, Joseph, Judas ma Simon ba? Ma ini tobaiyaka ka minari amededi ba?” Ye makai ina rofu uka no reyadi.

⁴Iesu yaku mina vene rofu niyo, “Gagani tau vene Sei di ago nido amiye yaku vei odoro regamadi, idu ini rauturi bi ini davatu vene ma usika ourena yaku bi de.”^g

⁵⁻⁶Ini vima diyo adina bi amiye ini mokena vari gira de aiyadi. Ye minari bi mokena vegu yokoi de reyo, idu gauka vene be maka ini vana moi fafau aisi moi buni riyo.

Iesu yaku ini usi dina vene tuero ni feideyo
(Mt 10.5-15; Lk 9.1-6)

Kamini Iesu bi rautu rautu amiye ago ni oteimagamo. ⁷Ini mina amiye tuero raka nisi ni egogo resi remanu remanu dudu ni feidegi kora reyo. Ina yaku vava vima no fafau ina vene rofu magamo. ⁸Resi ago gira ina rofu niyo, “Gugura bi yokoi de idari moigedi, idu yukana maka – iruku bi de, ma dura bi de, ma fore yi foketari aina ka de.”^h ⁹Resi yi yuka ro maka bi risi varuka yokoi maka akugedi. ¹⁰Goina yava dui regedi bi minari amegedi mamo mina taoni ferei digedi. ¹¹Ma goina gagani yokoiri de ya moi dui regedi o yi ago de neidegedi ri, bi minari feresi yi yuka di budoka usi eyaregedi. Ye mina bi ini vegu makai regedi yaku bi vei mama regedi.”ⁱ

¹²Kamini disi ago buni ni rausi reyadi, dada amiye yaku neidesi vegu no feresi moi etagae riyangane. ¹³Minari bi vima no tau gade amiye di

^g 6.4 Jn 4.44 ^h 6.8-11 Lk 10.4-11 ⁱ 6.11 Acts 13.51

rovaitari umeki regamadi ma gauka bi oira rovaitari rausi regasa moi buni rigamadi.^j

John Baptist di muyena
(Mt 14.1-12; Lk 9.7-9)

¹⁴ Ye kini Herod^k yaku beika vata nigamo bi neideyo, adina ini roka bi gagani tauri ogau nigamo. Amiye be yaku nigamadi, “John Baptist bi muyena gutuna rae reyo. Mina dada bi mokena vegu redo.”^l

¹⁵ Idu be yaku niyadi, “Ina bi Elijah.”

Ma be yaku niyadi, “Ina bi Sei di ago nido amiye kaere bi senagi senagi Sei di ago niyo amiye nokoi kana.”

¹⁶ Herod yaku mina neideyo ri bi niyo, “Ina bi John Baptist, kaere bi ini ada nugai feideyaka ma ina bi dubusa dairisi vegu niyo!” ¹⁷ Herod ina kaya mina ago niyo adina bi sena ago maro ma John moisi ini yuka ukita risi dibura yavari aiyadi, Herodias, kaere bi ini dubuini Philip di rema, dada.^m ¹⁸ Ini adina John yaku Herod rofu nigamo, “Yi dubuini di remaⁿ meyo bi tabu.”

¹⁹ Mina dada Herodias ini uka esika John rofu bi tora gade ma ini ura bi ina umuyego vo nigamo, idu ina rofu ida de. ²⁰ Herod bi John rofu ori regamo, adina bi ina diba John bi mokena rorobo amiye ma amiye kikifa, mina dada buniri maka aigamo. Ina sina neideyo ri, bi ini mokena neuneu niyo. Idu, ini ura bi ini sina neidegi vo niyo.

²¹ Herodias ini mokegamo meda bae okiyo ri, bi Herod di vata niyo medari ina yaku ini ourefeidena vene, ruda vene di tora tora ma Galilee di ourefeidena vene raka nisi irakuna ina rofu maro. ²² Herodias di vefa^o dui resi adena usi Herod di ini okiyadi vene sa di uka moi ada reyo. Ye kini yaku mina rema niyo, “Ya ura beika magida? Yi beika ura regiya bi ya magida.” ²³ Ni tore resi mina rema niyo, “Gua ya nida mini beika na usa nigiya bi ya magida, ye nai ourefeidena amena sana mina berou rofu tu ya magida.”

²⁴ Mina rema minari maka yaku nesi ini nono ni kaiteyo, “Beika bodo ni kaitegida?”

Ma ini nono yaku niyo, “John Baptist di ada.”

²⁵ Mina rema evade maka dairi nesi kini rofu ni guba reyo, “Nai ura bi ya yaku ruika maka John Baptist ini ada biyo odorori aisi na ma!”

²⁶ Ye kini bi iriyeduka no niyo, idu in i ni tore reyo ago ma ini niyo ma okiyadi vene dada ina ura bi ina rofu rego. ²⁷ Ye evade ini iya redo amiye ni feidesi ago gira niyo ini ada moi baiyaganedi. Ma dibura yavari nesi

^j 6.13 Jas 5.14 ^k 6.14 *kini Herod*: Herod Antipas, Galilee di ourefeidena amiye.

^l 6.14-15 Mt 16.14; Mk 8.28; Lk 9.19 ^m 6.17-18 Lk 3.19-20 ⁿ 6.18 *yi dubuini di rema*: yi abuata. ^o 6.22 *Herodias di vefa*; buru bedakai bi *Ini vefa Herodias* nufa.

ini ada nu buru reyo. ²⁸ Resi mereki odorori ae moi bainsi mina rema ofi maro, ma ina yaku dadisi bi ini nono maro. ²⁹ Ye John di usi dina vene mina neidesi bainsi ini rovaita moisi guri aiyadi.

Iesu yaku amiye 5,000 ubua reyo
(Mt 14.13-21; Lk 9.10-17; Jn 6.1-14)

³⁰ Kamini ini ni feidena vene bi ina sa amei desi bi ini beika reyadi kana ma beika oteimaradi kana mina nigamadi. ³¹ Minari bi amiye tau gade gade ma nega baigasa neyadi, dada iri iri di meda bi de, ye niyo, “Ya yaku maka na sa baigedi ma disi mafumafu sanari sifere regifa.” ³² Ye boutiri keu risi iniye iniye mafumafu sana nokoiri boyo.

³³ Idu boyo ri, bi amiye tau kaere ini goidu dina vesi diba niyadi bi taoni tau gutuna yuka dudu raga resi sena bogamadi ini boi okigedi sana. ³⁴ Ye bouti feresi soka regasa bi amiye tau gade gade vesi ina rofu iriyeduka reyo, adina bi mamoe ini dogo amiye bi de kana, dada ago tau gade ni oteimagi kora regamo.^p ³⁵ Ma meda bi uriyenau eta rofu niyo ri, bi ini usi dina vene ina rofu bainsi niyadi, “Mina bi autu sana ma ari bi koina niyo mini. ³⁶ Amiye ni feide kumo rauturi gagani sanari disi ini iruku voi resi iriyaganedi.”

³⁷ Idu ni kabai resi niyo, “Ya yaku iruku mafo kumo iriyaganedi.” Ma niyadi, “Una yaku siriva fore^q 200 dudu beredi voi resi mina vene magifa ma irigedi ba?”

³⁸ Ma ina yaku niyo, “Yi beredi gokaisanu? Disi vegiya.” Ye baku resi niyadi, “Beredi vana berou autu ma oyena remanu mini.” ³⁹ Ye ago ina vene rofu niyo bi amiye tau neinei dudu mutaka odoro ameinu reyainedi. ⁴⁰ Dada amiye bi tau neinei be bi 100 dudu ma be bi 50 dudu ameyadi. ⁴¹ Ma beredi vana berou autu ma oyena remanu moi omari nesi bi buni tora gade Sei rofu masi bi beredi moi okusi ini usi dina vene maro ma amiye tau rofu rau reyadi. Ina ka oyena remanu moi odesi amiye tau rofu rau reyadi. ⁴² Ye ina tau noibanu iriyadi ma ini uka bere niyadi. ⁴³ Ma beredi ma oyena tuta butu risi foroka tuero moi vata baiyadi. ⁴⁴ Ye mina iriyadi vene bi rumana vene 5,000.

Iesu korufafau nana reyo
(Mt 14.22-33; Jn 6.15-21)

⁴⁵ Ye evade ini usi dina vene rofu ago maro bi bouti keu risi ina siko Bethsaida ri koru moka tora berou eta rofu boyaganedi ma mina usi amiye tau gade ni feidego. ⁴⁶ Ye amiye feresi bi omuna ikari usa usa

^p 6.34 Num 27.17; 1 Kgs 22.17; 2 Chr 18.16; Ezek 34.5; Mt 9.36 ^q 6.37 *siriva fore*: Siriva fore yokoi maka bi rautu amiye di moimai meda yokoiri di ini davana kana. (Mt 20.2 baku re).

nigika boyo. ⁴⁷Uriyenau tumu niyo ri, bouti bi koru moka tora tobo ramari, ye Iesu bi inaik konori ameyo. ⁴⁸Nei reyo ri, bi ini usi dina vene bi fayo rena bi gira iniye nigamo, adina aura bi bogamadi sana baigamo dada. Ye ari uvego atafuri ina vene rofu koru moka torafafau nana regasa boyo. Ina bi ina vene ebu rego vo niyo.^r ⁴⁹Idu Iesu koru moka torafafau nana regamo vegasa mokeyadi mina bi godiyo. Kamini imuna niyadi, ⁵⁰ina tau vesi ori iniye reyadi dada.

Idu Iesu yaku evade niyo, “Uka gira nifa; mina bi na; ori ga refa!”
⁵¹Kamini boutiri ina vene sa keu riyo ma aura amuta niyo. Ina vene bi iniye vima no diyadi, ⁵²adina ini adari diba de amiye 5,000 ubua reyo ri ini uka forovai reyadi dada.

Iesu Gennesaret gaganiri gauka vene moi buni riyo
(Mt 14.34-36)

⁵³Kamini koru moka tora ugaradi ri, bi Gennesaret gaganiri okisi minari bouti utae reyadi. ⁵⁴Ye bouti fereyadi ri, amiye evade vei mama reyadi. ⁵⁵Ma amiye raga resi berou berou mina gaganiri ini gauka vene ekamari uakaisi afei okigamadi, mina bi neideyadi Iesu ini goidu amegamo sanari. ⁵⁶Ye goidu soka regamo ri, rautu rautu neinei o taoni o gagani maketi sanari gauka vene moi baigamadi. Ina rofu guyaguya nigamadi, ini gauka vene yaku ini varuka metona maka avaka moi buni niyaganedi. Ye kaere tau yaku avaka moi yadi bi buni niyo.

Tutubena vene di oteimana ago
(Mt 15.1-9)

7 ¹Kamini Pharisee vene ma ago gira oteimana vene be kaere bi Jerusalem gutuna baisi bi Iesu sa ameyadi. ²Minari veyadi bi Iesu ini usi dina vene be bi vana dudu kino ma koitena de yaku iruku moigasa irigamadi.

³(Pharisee vene ma Jew vene noibanu bi ini tora vene di ago gira vaitani ini vana bi dogo resi koitegedi mamo iruku irigedi. ⁴Bema maketi sana gutuna baigedi ri bi iruku de irigedi mamo rafesi iruku irigedi. Ma ini sena tora vene di ago gira mina ka vededi bi kaposi ma fani ma ketoro^s ka koitegedi.)

⁵Ma Pharisee vene ma ago gira oteimana vene yaku Iesu ni kaiteyadi, “Beika resi yi usi dina vene bi uni aufakai di toutou de amesi ini vana kino sa iruku iridedi?”

⁶Dada ni kabai resi niyo, “Isaiah bi rama nisi ya ofarosi vene dada Sei di ago nisi buru riyo bi mini:^t

^r 6.48 ebu rego; o ina rofu yova rigo. ^s 7.4 Bura bedakai bi ma ekama nufa.

^t 7.6-7 Is 29.13 (LXX)

'Mina vene bi ini afiye dudu na kikifa rededi,
idu ini uka bi na rofu bi maike tora.

⁷Na ni vakei kava rededi;
adina mokededi amiye di oteimana ago
bi Sei di ago gira kana!'

⁸"Ma ya bi Sei di ago gira bi you feidesi sena amiye di ago moi gira ridedi."

⁹Ma ina vene ka rofu niyo, "Ye ya bi Sei di ago gira gedu masi bi yi yi aufakai di toutou moi gira ridedi. ¹⁰Mina dada Moses yaku makai niyo, 'Yi nono baba kikifa re,' ma 'Kaere yaku nono o baba ni karaini rego, bi umuyeyaine.'^u ¹¹Idu ya yaku nidedi bi amiye yokoi ini sogona amededi vo nisi bi mina yaku ini baba o nono aedegedi. Idu nido, 'Mina bi Corban (Sei di sogona') ¹²resi ka nido, 'Yi baba o nono bi aedeni ga re.'^v ¹³Ya yaku aufakai di toutou amiye rofu oteimadedi, dada Sei di ago moi no ridedi. Ya yaku ka vegu no tau gade makai rededi."

Amiye kino nidedi di vegu mini
(Mt 15.10-20)

¹⁴Kamini dubusa amiye tau gade raka ni egogo resi niyo, "Ya amiye tau na neidefa diba niyaine. ¹⁵Beika baika etofaro baisi amiye di rovaita ideri dui rego yaku moi kino de rigo. Idu beika amiye di ini rovaita gutuna yakugo yaku mina amiye moi kino rigo."¹⁶ v

¹⁷Amiye tau feresi yavari dui reyo ri, ini usi dina vene yaku ni kaiteyadi beika mina mokena ago di rama bi. ¹⁸Ma ina rofu niyo, "Ma ya ka bi ada yora de ba? Diba de nidedi ba, beika amiye etofarori baisi ini rovaitari dui rego yaku moi kino de rigo? ¹⁹Adina bi ini uka mekori de dui redo idu ini rivori maka bi ini rovaitari yakudo." (Makai niyo iruku tora noibantu bi ruaka maka moi rama aiyo.)

²⁰Ka niyo, "Beika amiye rofu yakudo yaku moi kino rido. ²¹Amiye di uka ideri gutuna yakudedi mini: mokena no, mena de vene koa ren, duma duma ren, amiye umuyena, mena vene koa ren, ²²udu, amiye uka esika mana, amiye ofa ni mana, uka ideri mokena no, uka mukuna, gonema, amiye di roka moi no rina, ya kaya roka ni odoro, ma dona auna di moke moke. ²³Mina vegu no tau yaku amiye di ini rovaita ideri amededi bi yakusi amiye moi kino ridedi."

Rema yokoi di uka vari gira maro
(Mt 15.21-28)

²⁴Kamini mina sana feresi dadisi Tyre taoni di gagani rofu diyo. Ina bi yava ideri dui resi baiyo ini ura bi amiye diba de niyagane ina bi minari.

^u 7.10 Ex 20.12; 21.17; Lev 20.9; Deut 5.16 ^v 7.16 Bura bedakai bi nanaka 16 nufa: *Amiye ini neidego vo nisi, bi neideyaine!* (4.23 baku re).

Idu ina bi sui nina de erau niyo. ²⁵Rema yokoi kaere bi ini rema mida bi vima no nufa bi Iesu di sina neideyo ri, bi evade maka ina rofu baisi ini yuka adinari efuka meimiy. ²⁶Ina bi Greek rema Phoenicia gagani Syria ri vata niyo. Iesu ni guba regamadi mina vima no ini mida rofu umeki reyainedi. ²⁷Ma ina rofu niyo, “Ouresi bi ferei kumo mida mida yaku ini beika ura rededi siko iriyagane, adina bi buni de mida mida di iruku moisi auna rofu makugiya.”

²⁸Ye mina rema ni kabai reyo, “Varika Amiye, auna yaku ka mida mida di iruku bubudo teiboro gabireri iridedi.”

²⁹Kamini Iesu yaku niyo, “Makai dudu na niyo ma ya bi dairigiya, vima no bi yi midari yakuyo.”

³⁰Ina bi rautu disi veitao reyo ri, bi ini mida bi varegamo ma vima no ka diyo.

Iesu yaku babo ma anema kora amiye moi buni riy

³¹Kamini Iesu bi Tyre taoni di gagani feresi Sidon dui resi Galilee korutorari Decapolis taoni di gagani ideri okiyo. ³²Mironari amiye yokoi ina rofu afei okiyadi. Ina bi babo ma vena ufoka resi ago nina bi gira. Ina vene yaku guyaguya niyadi ini vana mina amiyefafau aiyaine. ³³Ye Iesu yaku afei tae ri diyo mina amiye tau rofu resi ini vana ebuna moisi mina amiye di anema ideri aisi ayaka su resi ini afiye avaka moiyo. ³⁴Ne odoro risi oma vesi ababa nisi ina yaku niyo, “Ephphatha!” Mina bi “Ne are!”

³⁵Mina dudu mina amiye di anema fo'o niyo, ma ini afiye roge reyo ma ago ni mama reyo. ³⁶Iesu yaku ago gira dudu mina vene rofu niyo, “Amiye nokoi ga ni oteimaragane.” Ago gira Iesu yaku niyo bi tora iniyne niyo ri, ina vene toga ini vegu di ago ni rausi regamadi. ³⁷Amiye di vima bi tururu tora gade resi niyadi, “Ina yaku deda tau moi burefe rido; ina yaku ka anema kora neidesi babo ago niyadi.”

Iesu yaku amiye 4,000 ubua reyo

(Mt 15.32-39)

8 ¹Mirona itua medari, amiye tau gade egogo reyadi. Ina vene bi irigedi iruku bi koina, ye Iesu yaku ini usi dina vene raka ni egogo resi niyo, ²“Na bi mina vene rofu iriyeduka reida, adina bi na sa sena meda regodenu ameyadi ma irigedi iruku bi koina. ³Bema raunari ini rauturi ni feidegida bi idau tuyei tamatama regedi, adina bedakai bi gagani maike gutuna soka reyadi.”

⁴Ye ini usi dina vene yaku ni kaiteyadi, “Amiye yokoi bi goidu mina gagani autu sanari beredi moisi amiye tau gade ubua rego?”

⁵Ma ina rofu ni kaiteyo, “Ya bi beredi bado gokaisanu nufa?”

Ina yaku niyadi, “Viro vara.”

⁶ Ye ina yaku amiye tau gade konori ameinu reyagane vo niyo. Resi bi beredi bado viro vara moisi buni tora gade Sei rofu masi beredi okusi ini usi dina vene maro amiye tau gade rau regedi dada, resi makai reyadi. ⁷Ina vene sa ka oyena keika be nufa, mina ka buni tora gade Sei rofu masi ka ini usi dina vene maro rau reyaganedi. ⁸Ma ina vene iruku iriyadi ma uka bere niyadi. Ye tuta fereyadi bi foroka viro vara moi vata baiyadi. ⁹Amiye 4,000 kana; ni feideyo ma diyadi. ¹⁰Kamini evade ini usi dina vene sa bouti keu risi Dalmanutha gagani rofu boyadi.

Pharisee vene mokena vegu ni kaiteyadi
(Mt 12.38-42; 16.1-4)

¹¹ Ye Pharisee vene okiyadi ri, Iesu rofu kayamo regi kora regamadi. Omari rebe yokoi reyainedi kaiteyadi ebene regika bi rama ba ide ina bi Sei yaku vava maro.^w ¹²Ma ini vima dudu ababa nisi niyo, “Beika resi gua amededi vene yaku rebe ni kaitededi? Rama iniye ya nida, rebe nokoi mina vene rofu de mago.”^x

¹³ Kamini mina vene feresi dubusa bouti keu risi berou eta rofu ugasa boyo.

Pharisee ma Herod di yeast^y
(Mt 16.5-12)

¹⁴ Ma Iesu di usi dina vene bi beredi bado moigi toto niyadi, ye ina vene sa bi beredi yokoi maka boutiri moi digamadi. ¹⁵Idu Iesu ago gira masi niyo, “Nari refa. Pharisee vene ma Herod di yeast rofu vei mona refa.”^z

¹⁶ Idu iniye iniye ni dodi resi niyadi, “Mina niyo ini adina una bi beredi be de nufa.”

¹⁷Kamini Iesu yaku ini beika ni dodi regamadi bi diba nigasa ni kaiteyo, “Beika resi beredi bado koina dada ni dodi rededi? Ya vene bi toga vena ide ma adari ufatena de rededi? Yi uka bi gira niyadi ba? ¹⁸Yi nemoko bi amededi idu de vededi ma anema nufa idu de neidededi ba? Ba ya diba de mokededi?”^a ¹⁹Mironari na yaku beredi vana berou autu odehyaka amiye 5,000 dada, bubudo moisi bi foroka gokaisanu moi vata baiyadi?”

Ina vene yaku niyadi, “Tuero.”

²⁰“Ma mironari na yaku beredi viro vara odehyaka amiye 4,000 dada, bubudo moiyadi ri bi gokaisanu foroka vata baiyadi?”

Ina vene yaku niyadi, “Viro vara.”

²¹Ina vene rofu niyo, “Ya bi toga yi adari ufatena de rededi ba?”

^w 8.11 Mt 12.38; Lk 11.16 ^x 8.12 Mt 12.39; Lk 11.29 ^y Mina bi farava moi uruna gauna.

^z 8.15 Lk 12.1 ^a 8.18 Jer 5.21; Ezek 12.2; Mk 4.12

Iesu yaku ne taufa amiye Bethsaida ri buni riyo

²² Bethsaida taoniri okiyadi ri, amiye yaku nemoko taufa amiye yokoi afei okisi Iesu guyaguya niyadi, ina yaku avaka moiyainedi. ²³ Iesu yaku nemoko taufa amiye vanau riyo rofu rautu etofaro yakusi mina amiye di nemokori ayaka su reyo rofu ini vana mina amiye fafau aisi niyo, “Beika be veisa?”

²⁴ Nemoko taufa amiye yaku ne odoro risi niyo, “Amiye veida bi yabo kana dibo rededi.”

²⁵ Dubusa Iesu yaku ini vana mina amiye di nemokori aiyo. Kamini ini nemoko areyadi, ma ini nene rena mina dairiyaine riyo, resi beika tau gade mina vei mama riyo. ²⁶ Iesu yaku mina amiye ini yavari ni feidesi niyo, “Rauturi bi ga re.”

Peter yaku ni okuyo Iesu bi Keriso

(Mt 16.13-20; Lk 9.18-21)

²⁷ Kamini Iesu bi ini usi dina vene sa Caesarea Philippi di rauturi bogasa idauri ni kaitesi niyo, “Amiye yaku nidedi na bi kaere vo nidedi?”^a

²⁸ Ye ni kabai reyadi, “Be yaku nidedi ya bi John Baptist, be yaku nidedi bi Elijah, ma be yaku nidedi bi Sei di ago niyo amiye yokoi.”^b

²⁹ Ma ni kaiteyo, “Idu ya yaku nidedi na bi kaere?”^c

Peter yaku ni kabai reyo, “Ya bi Keriso.”

³⁰ Kamini ni diba reyo bi amiye yokoi ina dada ga ni oteimaraine.

Iesu ini muyena di ago niyo

(Mt 16.21-28; Lk 9.22-27)

³¹ Kamini ni oteimagi kora reyo, “Amiye di Mida bi esika esika tau moiyaine ma tora vene, Sei ma amiye utari naivo vene di varika vene ma ago gira oteimana vene yaku fufuta masi umuyegedi, ma gabi meda regodenuri dubusa dadi rae rego.” ³² Ina yaku mina ago ina rofu ni ogau regamo. Kamini Peter yaku moi etagae risi besenai ago magi kora reyo. ³³ Idu Iesu fuyo resi ini usi dina vene vesu Peter ni vai reyo, “Satani, nai fufuta rofu di, adina ya bi Sei di mokena kana de moisa, idu amiye di mokena moisa.”

³⁴ Resi amiye tau gade ini usi dina vene sa raka nisi egogo resi niyo, “Kaere amiye ini ura bi na usi digo vo nisi, bi ina kaya toto resi ini satauro moisi na usi baiyaine.”^d ³⁵ Adina kaere ini vegu moi rigi ura rego, bi boiyo rego, idu kaere na ma ago buni dada ini vegu you feidego, bi moi rigo.^e ³⁶ Adina beika buni bi amiye yokoi mina kono tora noibanuri baku

^a 8.28 Mk 6.14-15; Lk 9.7-8 ^c 8.29 Jn 6.68-69 ^d 8.34 Mt 10.38; Lk 14.27

^e 8.35 Mt 10.39; Lk 17.33; Jn 12.25

resi ini vegu eyarego? ³⁷O ini vegu dada bi beika dairi mago? ³⁸Bema amiye yokoi na dada ma nai ago dada maena rego mina uka vari gira de mana ma vegu no rena tutubenari, Amiye di Mida ini Baba di vabarari ini akeke naivo naivo vima sa okigo ri ina rofu ka maena rego.”

9 ¹Kamini ina rofu niyo, “Rama ya nida, ya bedakai minari bi de muyegedi, idu ina bi Sei di ourefeidenamena sana ini vava nufa dego vegedi.”

Iesu veyadi ini rovaita bi idana

(Mt 17.1-13; Lk 9.28-36)

²Kamini meda koru ida koina niyo ri, Iesu yaku Peter, James ma John afesi omuna tora yokoiri inaikemaka boyo. Mironari ina vene di nemokori ini rovaita idana niyo.^f ³Ini varuka bi feo kamanika iniye niyo, feo tayataya amiye yokoi mina kono tora noibanuri ka mina kana varuka koitenadi feo kana de. ⁴Ma Elijah Moses sa bi ina vene rofu ogau nisi Iesu sa sina nigamadi. ⁵Kamini Peter yaku Iesu rofu niyo, “Oteimana amiye, bi buni una bi minari. Una bi karaga regode akunadi – nokoi bi yi, nokoi bi Moses di, ma nokoi bi Elijah di.” ⁶Ina bi ina diba de beika ago nigamo bi, adina ori iniye reyadi.

⁷Ma seuya desi ina vene bou riyo, ma ago goroka mina seuya gutuna baisi niyo, “Mina bi nai uka maida Mida; ina bi neidefa!”^g ⁸Evade maka ne kero reyadi, idu amiye yokoi de veyadi, idu Iesu maka ina vene sa amegamo.

⁹Ye omuna deyadi ri, Iesu yaku ago gira magamo, “Amiye yokoi ga ni oteimafa beika veyadi bi bogo Amiye di Mida bi muyenari dadi rae rego mamo.”

¹⁰Mina ago bi neidei mokesi iniye maka ni dodi reyadi, “Muyenari dadina bi beika?” ¹¹Ma ni kaiteyadi, “Beika resi ago gira oteimana vene yaku nidedi Elijah siko deyaine?”^h

¹²Ye ni kabai reyo, “Rama Elijah siko desi beika tau dubusa moi dogo rei mona rego. Ma beika resi bi bura riyadi Amiye di Mida bi esika esika tora iniye baku rego ma etofa regedi? ¹³Idu ya nida, Elijah baiyo ma beika mokeyadi bura reyadi kana ina rofu reyadi.”

Iesu yaku mida vima no sa moi buni riyo

(Mt 17.14-20; Lk 9.37-43a)

¹⁴Kamini ini usi dina vene rofu baiyadi ri, bi amiye tau gade gade buru riyadi veyadi, ma ago gira oteimana vene be yaku ina vene sa kayamo regamadi. ¹⁵Mina makari amiye tau gade Iesu veyadi ri, vima disi raga bosi buni maradi. ¹⁶Iesu yaku ni kaiteyo, “Ya bi beika nisi ina vene sa kayamo rededi?”

^f 9.2-7 2 Pet 1.17-18 ^g 9.7 Mt 3.17; Mk 1.11; Lk 3.22 ^h 9.11 Mal 4.5; Mt 11.14

¹⁷Ye mina amiye tau gade fogori amiye yokoi ni kabai reyo, “Oteimana amiye, nai mida ya rofu afei baiyaka, kaere bi vima no ya dui resi moi babo riyo. ¹⁸Goidu ina urana redo ri, bi ina kaya konori makudo ma vena kabudo resi ini gade aki gigi redo ma ini rovaita ka gira nido. Ye yi usi dina vene rofu mina vima no umeki reyaganedi usa niyaka, idu anua reyadi.”

¹⁹Iesu yaku ni kabai reyo, “Ya gua mokena vari gira de aina vene, gokaisanu ari doba ya sa amegida? Meda gokaisanu ya sa moimai regida? Mida na rofu afei baifo!” ²⁰Ina vene yaku mina mida Iesu rofu afei boyadi.

Vima no yaku Iesu veyo ri minari maka moi tururu resi mida konori maku nesi tagi masih buyo buyo resi vena koru kabudo negamo. ²¹Iesu yaku mina mida di baba ni kaiteyo, “Gokaisanu meda mina gauka baku reyo?”

Ini baba yaku ni kabai reyo, “Ina mida kakuari. ²²Ari tau gade vima no yaku ka moisi ita mokari ma koruri makuyo muyeyaine vo nisi. Idu ya mokeisa regiya vo nisi buni bi una iriyeduka resi una aede!”

²³Iesu yaku niyo, “Bema ya mokeisa regiya vo nisi, vegu tau ya rofu bi aita ya kaere Sei rofu uka vari gira magiya.”

²⁴Ma evade maka mina mida di baba yaku rama iniye raka nisi usa niyo, “Nai uka vari gira keika maida bi na aede bi tora nigo!”

²⁵Iesu yaku amiye tora gade urana baiyadi veyo ri, bi vima no rofu ni kaka resi niyo, “Ya anema kora ma vena babo vima no ya rofu ago gira maida, mina mida di rovaitari yakusi dubusa dui rena ga re!”

²⁶Kamini vima no raka tora nisi mina mida bi moi tururu resi ini rovaitari yakuyo. Ye mida bi muyena asini varegamo, ye amiye tau yaku niyadi, “Rama iniye muyeyo!” ²⁷Idu Iesu bi vanau moisi moi odoro reyo ma mida bi are reyo.

²⁸Ma Iesu yava ideri dui reyo ri, bi ini usi dina vene sui dudu ni kaiteyadi, “Beika resi bi umeki rei anua reyafa?”

²⁹Iesu yaku ina vene rofu niyo, “Mina kana meki rena ida bi koina, idu usa usa maka bi yeiva.”

Iesu dubusa ini muyena di sina niyo

(Mt 17.22-23; Lk 9.43b-45)

³⁰Iesu ini usi dina vene sa bi mirona sana feresi Galilee di kono ebu resi boi neyadi, ini ura de amiye yaku diba nigedi ini dibo sana, ³¹adina ini usi dina vene oteimagasa niyo, “Amiye di Mida amiye di vanari siri rego ma umuyegedi ma meda regodenu koina niyo ri dadi rae rego.”

³²Idu ina vene bi ini adari de ufateyadi beika niyo ma bi mina ori resi ide ni kaiteyadi.

Kaere bi tora iniye?

(Mt 18.1-5; Lk 9.46-48)

³³Capernaum taoniri okiyadi. Kamini Iesu yaku yava ideri ina vene ni kaiteyo, “Ya vene bi beika nigasa kayamo regamadi idau?”

³⁴Idu bi bere niyadi, adina bi idau digasa kayamo reyadi kaere bi tora iniye.ⁱ ³⁵Iesu ameinu resi bi ini usi dina vene ni rutu resi niyo, “Bema kaere amiye ourego vo nisi mokego bi ina bi amiye tau gade gabireri keika iniye nisi ka amiye tau di naivo amiye nigo.”^j ³⁶Resi mida keika yokoi moisi ini fogori moi are resi binu masi ina vene rofu niyo, ³⁷“Kaere amiye yaku nai roka dudu mida keika yokoi mina kana moi dui rego, ina ka na moi dui rego. Ma kaere yaku na moi dui rego bi diya maka na moi dui rego, idu kaere na ni feideyo amiye ka moi dui rego.”^k

Kaere una rofu no de nido bi uni

(Lk 9.49-50)

³⁸John yaku niyo, “Oteimana amiye, una bi amiye nokoi veyafa yi rokari vima no umeki regamo, ma una yaku niyafa ga reyagane ini adina bi una sa usi dina de amiye.”

³⁹Iesu yaku niyo, “Ga ni vai refa, adina amiye yokoi ide yaku nai rokari bi mokena vegu rena moimai rego ari yokoiri bi na dada ago deda no mina nigo. ⁴⁰Ye kaere una rofu no de, ina bi uni.^l ⁴¹Rama iniye ya nida, kaere amiye nai rokari biyori koru ya mago ya bi Keriso di dada, ini obini ide you feidego.”^m

Vegu no di uka maina rena

(Mt 18.6-9; Lk 17.1-2)

⁴²“Idu kaere amiye mina mida keika yokoi kaere bi mokena vari gira na aido bi ourefeidego vo nisi ma vegu no rego bi kaunava tora moigo. Bi buni bi donkey di witi utei rina di fore tora ini kuriri ukita resi davarari makugo. ⁴³Ye yi vana yaku ya moi vegu no rofu ourefeidego vo nisi, nugai feide! Makai bi buni, vana yokoi maka nufa vegu buni dui rena ma buni de vana remanu nufa ita moka dui rei bogedi, minari ita bi de kafedo.”ⁿ ⁴⁴◦ ⁴⁵Ye yi yuka yaku ya moi vegu no rofu ourefeidego vo nisi, nugai feide! Makai bi buni, yuka kevo nufa vegu buni dui rena ma buni de yuka remanu nufa ita moka ya makugo. ⁴⁶P ⁴⁷Ma yi nemoko yaku ya moi vegu no rofu ourefeidego vo nisi, kini biyoka resi maku! Makai bi buni ya rofu Sei di ourefeidena amena sanari nemoko yokoi maka nufa dui rena ma buni de nemoko remanu nufa ita mokari makuna.”^q ⁴⁸Mironari bi ‘adi tuyena de ma ita vaido mina de kafego.’^r

ⁱ 9.34 Lk 22.24 ^j 9.35 Mt 20.26-27; 23.11; Mk 10.43-44; Lk 22.26 ^k 9.37 Mt 10.40; Lk 10.16; Jn 13.20 ^l 9.40 Mt 12.30; Lk 11.23 ^m 9.41 Mt 10.42 ⁿ 9.43 Mt 5.30

^o 9.44 Bura bedakai bi nanaka 44 nufa: *Mironari ‘bi adi tuyena de ma ita vaido mina de kafego’* (nanaka 48 baku re). ^p 9.46 Bura bedakai bi nanaka 46 nufa: *Mironari ‘bi adi tuyena de ma ita vaido mina de kafego’* (nanaka 48 baku re). ^q 9.47 Mt 5.29

^r 9.48 Is 66.24

49 “Amiye tau bi ita sa ramena rigedi.

50 “Ramena bi buni; idu ramena di safi koina nigo vo nisi, bi gokai ida dudu ini safi dubusa moi safi rigiya?”^s

“Ya kaya ya kaya maka ramena risi ya neinei ideri bi uka amuta dudu maka amefa.”

Iesu yaku rema mesi ferena di ago oteimaro

(Mt 19.1-12; Lk 16.18)

10 ¹Kamini minari feresi Jordan Koru di berou eta rofu Judea gagani gaganiri boi neyo ma amiye tau gade dubusa egogo reyadi, ma ini vegu kana dubusa ni oteimagamo.

² Ye Pharisee vene ini uka maina regi ina rofu baisi ni kaiteyadi, “Rumana yaku ini rema mesi ferego bi ago gira ukero vau rido ba ide?”^t

³Iesu yaku ni kabai reyo, “Moses bi beika ago gira ya maro?”

⁴Ma ina yaku niyadi, “Moses bi ago ni diyo bi rema ferena fefafa bura riyaine.”^t

⁵Ma Iesu yaku niyo, “Yi uka gira kiki dada bi ya rofu mina ago gira bura riyo. ⁶Idu ini adinari gutuna beika baika riyo ri, ‘Sei yaku bi rema ma rumana riyo.’^u ⁷Mina dada rumana ini nono baba feresi etagae riyo ini rema sa rovaita gogo nilegedi.”^v ^w ⁸Ye ina bi dubusa remanu de, idu ‘yokoi maka nilegedi.’ ⁹Mina dada beika Sei yaku moi gogo risi moi yokoi maka riyo, bi amiye yaku ga moi etagae riyagane.”

¹⁰ Ye, mina yavari amegamadi ri, Iesu ini usi dina vene dubusa yaku ni kaiteyadi mina ago di adina dada. ¹¹Niyo, “Kaere amiye ini rema feresi rema bouna mego, bi koa rego mina rema bouna dada.”^x ¹²Ma rema yaku ini rumana ka feresi ma rumana bouna mego vo nisi, ina bi koa rego.”

Iesu mida keika keika buni tora gade maro

(Mt 19.13-15; Lk 18.15-17)

¹³Kamini be vene yaku ina rofu mida keika keika afei baiyadi bi avaka moyainedi, idu ini usi dina vene yaku ni vai reyadi. ¹⁴Idu Iesu mina veyo ri, gubuyo resi niyo, “Mida keika keika bi ferefo kumo na rofu baiyagane; ga meki refo, adina Sei di ourefeidena amena sana bi mina kana vene di. ¹⁵Rama ya nida, kaere amiye yaku Sei di ourefeidena amena sana mida keika kana de moigo vo nisi, bi de iniye iniye dui rego.”^y ¹⁶Ye mida keika keika binu masi ini vanafafau aigasa buni tora gade maro.

^s 9.50 Mt 5.13; Lk 14.34-35 ^t 10.4 Deut 24.1-4; Mt 5.31 ^u 10.6 Gen 1.27; 5.2

^v 10.7 Bura bedakai bi *ini rema sa rovaita gogo nilegedi* nufa de. ^w 10.7-8 Gen 2.24

^x 10.11-12 Mt 5.32; 1 Cor 7.10-11 ^y 10.15 Mt 18.3

Amiye gugura tau nufa
(Mt 19.16-30; Lk 18.18-30)

¹⁷Kamini bi ida nana regamo ri, amiye yokoi raga resi ini budari efuka imi resi usa niyo, “Oteimana amiye buni, beika regida bi toga toga ameibobina vegu moigida?”

¹⁸Ma Iesu yaku niyo, “Beika resi na rofu bi buni vo nisa? Amiye yokoi bi buni de; Sei iniye maka bi buni. ¹⁹Ya ya diba ago gira di ago bi: ‘Amiye umuyena ga re; mena vene koa ga re; duma duma ga re; amiye di vegu fafau ofa ofa ago ga ni; amiye rofu moi ofa nina ga re; yi nono baba di ago neide.’ ”^z

²⁰Ye mina amiye yaku niyo, “Oteimana amiye, na keikari gutuna mina kana vegu ago tau vakoi moi gira rei baida.”

²¹Ma Iesu mina amiye veyo ri, bi uka masi niyo, “Nokoi maka bi yaku de reyo; bosí yi gugura tau mina sero resi ini fore irava vene masi yi gugura buni bi omari baku resi na usi bae.” ²²Idu mina ago rofu mokena moi toe riyo ri, bi ini uka yarena iniye reyo, adina ina bi gugura tau gade nufa.

²³Iesu bi ne kero resi ini usi dina vene rofu niyo, “Gugura tau gade nufa vene yaku Sei di ourefeidena amena sanari dui rena bi gira iniye!”

²⁴Ini usi dina vene bi ini agori tururu reyadi. Idu Iesu bi dubusa niyo, “Mida mida, Sei di ourefeidena amena sanari dui rena bi gira iniye!

²⁵Kamelo yaku niduru nemokori dui rego bi aita, idu gugura tau gade nufa amiye yaku Sei di ourefeidena amena sanari dui rena bi gira iniye.”

²⁶Ye ina vene bi mina ago rofu besa tururu iniye resi iniye iniye niyadi, “Kamini kaere moi vegu rigo?”

²⁷Iesu bi ina vene vesi niyo, “Amiye yaku anua regedi, idu Sei rofu de; tau rena bi aita iniye.”

²⁸Kamini Peter ina rofu nigi kora reyo, “Ve kumo, uni beika baika tau vakoi feresi ya usi diyafa.”

²⁹Iesu yaku niyo, “Rama ya nida, amiye yokoi yaku ini yava, o usika ourena, o nono baba, o mida o kono na ma ago buni dada fereyo vo nisi

³⁰bi gua tau 100 kana besa ini yava, ma usika ourena, ma nono, ma mida, ma kono, ka esika esika moigo. Ma gabi mina meda baigo ri, toga toga ameibobina vegu moigo. ³¹Idu amiye tau gade kaere bi ourededi bi gabi nilegedi, ma gabi nidedi vene yaku ouregedi.”^a

Iesu dubusa uru regode ini muyena ni okuyo
(Mt 20.17-19; Lk 18.31-34)

³²Kamini ini usi dina vene sa Jerusalem bogamadi ri, Iesu bi idari oureyo, ma ini usi dina vene bi tururu reyadi ma kaere usi diyadi vene

^z **10.19** Ex 20.12-16; Deut 5.16-20 ^a **10.31** Mt 20.16; Lk 13.30

ka ori reyadi. Dubusa ini amiye tuero moi gaima risi beika ina rofu vo nigo mina niyo.³³ Resi niyo, “Una bi Jerusalem bogifa, ma Amiye di Mida tautore resi Sei ma amiye utari naivo vene di varika vene ma ago gira oteimana vene rofu magedi. Ina vene yaku nigedi muyeyaine ma tutubena idana vene rofu magedi umuyegedi dada.³⁴ Ina rofu ni kurusi ayaka su resi umuyegedi. Idu gabi meda regoderi, dubusa dadi rae rego.”

John ma James di usa
(Mt 20.20-28)

³⁵ Kamini James ma John, Zebedee di mida, ina rofu bainsi niyadi, “Oteimana Amiye, uni ura bi beika ya rofu usa nigifa bi una rofu re.”

³⁶ Iesu ni kaiteyo, “Ya ura rededi bi beika ya rofu regida?”

³⁷ Ni kabai reyadi, “Yi vabarari una nokoi bi yi vana rama rofu aisi nokoi yi enana rofu aigya.”

³⁸ Idu Iesu yaku niyo, “Ya beika usa nidedi bi ya ya toto. Na biyori duduka regida o babatiso rego mina kana regedi ba?”^b

³⁹ Ye ni kabai reyadi, “Mina bi buni regifa.”

Iesu yaku niyo, “Na biyori duduka resi babatiso regida mina kana ya duduka resi babatiso regedi.⁴⁰ Idu nai vana rama rofu o enana rofu ameinu rena di vava bi na yaku de ya magida, idu mina bi kaere kaere dogo reyo vene di.”

⁴¹ Ye amiye vana ufo mina neidesi bi James ma John rofu gubuyo reyadi.

⁴² Ma Iesu yaku raka nisi ni egogo resi niyo, “Ya ya diba tutubena idana vene di ourefeidena vene kaere vei mama rededi yaku amiye fafau ini vava moi raga rededi; ma ini tora vene yaku ini vava dudu beika vegu rigedi amiye ini gabirerori rofu ago gira nidedi.^c ⁴³ Ye yi fogori bi makai de, idu kaere yi fogori ini ura tora nigo vo nisi, bi yi naivo naivo amiye nigo.^d ⁴⁴ Ma kaere yi fogori ya ouregi ura redo, bi amiye tau vakoi di moimai rei tavoi redo amiye nigo.

⁴⁵ Adina Amiye di Mida deyo ka, diya amiye naivo reyaganedi, idu bi amiye naivo regi ma ini vegu magi, amiye tau di vegu no reyadi davana regika kana.”

Iesu yaku amiye ne taufa ini roka Bartimaeus moi buni riyo
(Mt 20.29-34; Lk 18.35-43)

⁴⁶ Jericho taoniri okiyadi. Ye Iesu ma ini usi dina vene ma amiye tau gade minari gutuna feregamadi ri, ne taufa amiye, ini roka bi Bartimaeus, bi ida negau amegamo. Ina bi Tameus di mida ka usa usa nigamo amiye. ⁴⁷ Neideyo bi Iesu Nazareth amiye bi mini, kamini raka nigi kora resi niyo, “Iesu, David di tutubena, na iriyedu ka re!”

⁴⁸ Emaradi babo niyaine vo niyadi, idu besa raka niyo, “David di tutubena, na iriyedu ka re!”

^b 10.38 Lk 12.50 ^c 10.42-43 Lk 22.25-26 ^d 10.43-44 Mt 23.11; Mk 9.35; Lk 22.26

⁴⁹Ye Iesu are resi niyo, “Raka nifa.”

Ma amiye taufa raka nisi niyadi, “Uka gira ni! Are gira re. Ina bi ya raka nido.”

⁵⁰Ye ini bou varuka makusi dadisi are resi Iesu urana diyo.

⁵¹Iesu yaku ni kaiteyo, “Ya ura reisa bi beika ya rofu regida?”

Ne taufa amiye yaku niyo, “Oteimana amiye, na ura reida bi dubusa vegida.”

⁵²Ma Iesu yaku niyo, “Digiya, yi mokena vari gira aina yaku ya moi buni riyo.”

Ma evade maka ini ne dubusa areyadi ma Iesu idari usi boyo.

Iesu kini kana Jerusalem ri dui reyo

(Mt 21.11; Lk 19.28-40; Jn 12.12-19)

11 ¹Kamini Jerusalem ri bae ekaira resi Bethphage ma Bethany taoni keika Olive yabo di omuna adinari boyadi ri, Iesu bi ini usi dina amiye remanu ni feidesi ²niyo, “Rautu yokoi yi budari rofu bogedi. Mina sanari evade boi okigedi ri, bi donkey^e di mida ukita riyadi baku regedi; ina bi keu rina kode. Younesi moi baifa. ³Ye amiye yokoi yaku ya ni kaitego beika resi makai rededi vo nigo vo nisi, bi nifa, ‘Varika Amiye^f yaku ura redo dada,’ ma minari evade ni feidego.”

⁴Ye feresi donkey di mida ida venari ukita riyadi mina baku resi youneyadi ⁵ma amiye be mironari are regamadi yaku ni kaiteyadi, “Ya bi beika resi mina donkey di mida younededi?”

⁶Ma ina yaku ni kabai reyadi Iesu niyo kana ma mina vene yaku feresi moi diyaine. ⁷Ma donkey di mida Iesu rofu moi baisi ini bou varukafafau youyadi ma Iesu keu riyo. ⁸Ma amiye tau yaku inifafau varukamoisi idau ibu reyadi idu be bi yabo teteka kono gutuna nugasi idau ibu reyadi. ⁹Kamini amiye be kaere ouregamadi ma be bi usi digamadi ma raka nigamadi, “Sei moi odoro ri! Sei buni tora gade mado kaere bi Varika Amiye di rokari baido!^g ¹⁰Sei buni mado uni baba, kini David di ourefeidena amena sana baido! Sei oma odoro iniyeri moi odoro ri!”

¹¹Mina usi Jerusalem ri okisi Sei vakena yavari dui resi mina gagani veitao reyo. Idu ari bi koina niyo dada ini usi dina vene tuero sa Bethany urana diyadi.

Iesu yaku fuka yabo kana mina ni karaini reyo

(Mt 21.18-19)

¹²Aru uveyo ri, Bethany fereyadi ri, Iesu bi rauna reyo. ¹³Ye gaima gutunari bi fuka yabo kana yuveita iye nufa vesi vegika fuka be baku

^e **11.2** Mina bi hosi keika kana, anema doba nufa. ^f **11.3** Varika Amiye; o ini biyaguna.

^g **11.9** Ps 118.25-26

rego ba ide atafu baiyo. Idu atafu baiyo ri, bi yuveita iye maka baku reyo, adina mina bi diya di meko nina meda.¹⁴ Kamini mina fuka yabo kana rofu niyo, “Amiye dubusa ya rofu meko de iriyaine!”

Ma ini usi dina vene mina ago neideyadi.

Iesu bi Sei ni vakena yavari boyo
(Mt 21.12-17; Lk 19.45-48; Jn 2.13-22)

¹⁵ Kamini Jerusalem okiyadi ma Iesu bi Sei vakena yavari dui resi bi sero rena vene ma voi rena vene umeki rei feidegi kora reyo. Fore senesi rena vene di teiboro ma pune erena sero rena vene di amena fata moi evaivo riyo.¹⁶ Sei vakena yavari diga bogasa gugura tau uakaigamadi ka biri riyo.¹⁷ Resi ni oteimagasa niyo, “Sena bura reyo, ‘Nai yava bi gagani gagani vene tau gade di usa usa nina yava vo nigedi.’ Idu ya vene yaku duma duma vene di sui nina yava kana reyadi!”^h

¹⁸ Kamini Sei ma amiye utari naivo vene di varika vene ma ago gira oteimana vene mina ago neideyadi ri bi ida be maina regamadi gokai dudu Iesu umuyegedi mina. Idu ina bi Iesu rofu ori reyadi, ini adina bi amiye tau ini oteimagamo ago mina neidesi bi vima diyadi.

¹⁹ Uru nigika regamo ri bi Iesu ini usi dina vene sa bi taoni feresi yakuyadi.

Fuka yabo di ini oteimana ago
(Mt 21.20-22)

²⁰ Uruyaku, ida ma nana rei baigamadi ri mina fuka yabo kana mina ne rei veyadi. Ye abiye niyo ini daruri.²¹ Peter beika vata niyo mokesi niyo, “Ve kumo, oteimana amiye! Ya yaku ni karaini reyo fuka yabo bi abiye niyo!”ⁱ

²² Ma Iesu ni kabai reyo, “Sei rofu mokena vari gira aifa.²³ Rama ya nida, bema amiye yokoi yaku mina omuna rofu nigo, ‘Ya kaya dadisi koru moka tora ideri you,’ ma mokei itu de rego, idu beika nido bi vata nigo mina rofu mokena vari gira aigo vo nisi, bi ina rofu vata nigo.^j ²⁴ Mina dada ya nida, mokena vari gira aisi beika baika tau rofu usa usa nigedi bi moigedi.²⁵ Are resi usa usa nigedi ri, ye amiye yokoi ya rofu vegu no riyo, ini vegu no moi erufu refa. Makai regedi ri yi Baba omari ka yi vegu no koite makugo.”^k ²⁶^l

Iesu di vava mina ni kaiteyadi
(Mt 21.23-27; Lk 20.1-8)

²⁷ Kamini dubusa Jerusalem ri dairi baiyadi. Ye Iesu bi Sei vakena yavari nana rei bogamo ri, Sei ma amiye utari naivo vene di varika vene, ago

^h 11.17 Is 56.7; Jer 7.11 ⁱ 11.23 Mt 17.20; 1 Cor 13.2 ^j 11.25 Mt 6.14-15 ^k 11.26 Bura bedakai bi nanaka 26 nufa: *Idu ya be mina vegu no de koite makugo vo nisi, yi Baba kaere bi omari ka yi mina vegu no de koite makugo.* (Ve Mt 6.15).

gira oteimana vene ma tora vene ina rofu baisi ²⁸ni kaiteyadi, “Beika vava dudu mina vegu reisa? Ma kaere yaku mina vava ya maro ma reisa?”

²⁹Ni kabai reyo, “Nai ni kaitena bi yokoi maka. Na ni kabai regedi vo nisi, ya nigida beika vava dudu mina vegu reida. ³⁰Na nifa, John di babatiso rena bi oma gutuna ba amiye gutuna deyo?”

³¹Ye inkiye inkiye ni dodi resi niyadi, “Bema nigifa, ‘Oma gutuna,’ ina yaku ni kaitego, ‘Ma beika resi ina rofu mokena vari gira de aiyadi?’

³²Idu bema nigifa, ‘Amiye gutuna...’” (Bi amiye tau gade ori reyadi,

adina bi amiye tau vakoi mokeyadi John bi Sei di ago niyo amiye yokoi.)

³³Ye ni kabai reyadi, “Una una toto.”

Ma Iesu yaku niyo, “Na yaku ka makai de ya nigida na bi beika vava dudu mina vegu reida bi.”

Waini meko di muro nari vene di mokena ago

(Mt 21.33-46; Lk 20.9-19)

12 ¹Kamini mokena ago nigi kora reyo: “Amiye yokoi bi waini meko di muro varisi kota mina buru risi waini meko itei rina di kono ruba goesi ota rina vene di fata risi muro nari rena vene be ini nanaka moigika ni masi yava ika oto diyo.^l ²Mina usi butu rena di meda okiyo ri, bi ini moimai rei tavoi redo amiye yokoi muro nari rena vene rofu ni feideyo ma waini meko vareyo mina bi butu reyainedi. ³Idu bi mina moimai rei tavoi redo amiye moi gira resi ubobo resi vana notoka ni feideyadi. ⁴Kamini dubusa ini moimai rei tavoi redo amiye yokoi ina vene rofu ni feideyo, idu mina vene yaku ini ada usi ni moi maena reyadi. ⁵Dubusa yokoi ni feideyo, idu bi umuyeyadi. Ina bi besa ma ni feideyo, idu bedakai bi uyadi ma bedakai bi umuyeyadi. ⁶Ye ina sa bi nokoi maka amegamo, ini uka mado mida. Ina bi gabi koukou ni feidesi niyo, ‘Nai mida bi matagini regedi.’ ⁷Idu muro nari rededi vene yaku inkiye inkiye niyadi, ‘Mina bi muro biyaguna nigo. Baifo kumo umuyenadi, ma beika baika ini baba ferego bi uni nigo!’ ⁸Ye moi gira resi umyesi waini meko di muro etofarori makuyadi.

⁹“Ye waini meko di muro biyaguna amiye bi gokai beika be rego? Ina bi baisi muro nari rededi vene umyesi muro bi bouna vene mago. ¹⁰Ya bi Sei di agori mina bura veyadi ba?^m

‘Yava akuna vene moi kekevata uyadi fore
bi yava moi gira redo fore inkiye niyo.

¹¹ Mina bi Varika Amiye yaku reyo;
ma uni nemokori bi buni vayavaya!?’”

¹²Ma ina moi gira regika ida maina reyadi, adina diba niyadi mina mokena ago ina venefafau niyo. Idu amiye tau gade rofu ori reyadi, dada feresi diyadi.

^l 12.1 Is 5.1-2 ^m 12.10-11 Ps 118.22-23

Fore butu resi mana di ni kaitena ago
(Mt 22.15-22; Lk 20.20-26)

¹³Gabi Pharisee ma Herod di eta rofu vene bedakai ni feideyadi, ini ago nigo ri ni eru regedi. ¹⁴Ye bainsi Iesu rofu niyadi, “Oteimana amiye, una una diba ya bi sina rama maka nisa amiye. Ya bi amiye rofu de ori reisa, ini adina bi amiye gokai kana bi de mokeisa, idu sina rama dudu maka Sei di ida oteimaisa. Caesar rofu takesi fore fei ren a bi uni ago gira rofu rorobo ba ide? Fei bi regifa ba ide?”

¹⁵Idu Iesu bi sena ini ofarosi sina vei diba resi ni kaiteyo, “Beika resi nai uka maina rededi? Siriva fore yokoi moi na mafo kumo vegida.”

¹⁶Fore moi baiyadi, ma ni kaiteyo, “Mina bi kaere di vima ma roka?”

Ye ni kabai reyadi, “Caesar di.”

¹⁷Kamini ina vene rofu niyo, “Beika Caesar di, bi Caesar mafa, ma beika Sei di bi Sei mafa.”

Ma ini ago rofu vima diyadi.

Muyenari dadi rae ren a di ni kaitena ago
(Mt 22.23-33; Lk 20.27-40)

¹⁸Kamini Sadducee vene be Iesu rofu baiyadi, kaere bi muyen a gutuna dadi rae ren a bi egere de vo nidedi vene.ⁿ ¹⁹Ina yaku niyadi, “Oteimana amiye, Moses yaku una rofu bura reyo bi: ‘Amiye kaere ini rema feresi muyego, mida de ma natu bi ini dubuini yaku mina obu mego ma ina rofu ini dubuini di mida mago.’^o ²⁰Yokaru bi dubuiyaka viro vara amegamadi. Ourena bi rema meyo, idu muyeyo, mida yokoi de. ²¹Ina usi vata niyo amiye ka makai mesi muyeyo, mida yokoi de. Ye mina usi amiye ka makai reyo. ²²Mina vegu yokoi maka mina dubuiyaka viro vara tau noibanu rofu vata niyo — ina tau noibanu mida de muyeyadi. Gabi bi mina rema ka muyeyo. ²³Ye muyen a gutuna dadi rae ren ari, ina bi kaere di rema nigo, adina bi amiye viro vara tau noibanu yaku meyadi?”

²⁴Iesu yaku ni kabai reyo, “Yi forovai rededi ba ide, Sei di ago ma ini vava ya ya toto dada? ²⁵Adina muyen a gutuna dadi rae regedi ri, bi iniye iniye de megedi, idu omari naivo naivo vima kana nigedi. ²⁶Idu muyen a gutuna dadi rae regedi kana ya Moses di bura ren ari bura veyadi ba ide imiye yabo orina agori gokai Sei yaku ago ni maro, ‘Na bi Abraham di Sei, Isaac di Sei ma Jacob di Sei?’^p ²⁷Ina bi vegu ameibobina vene di Sei, diya muyen a di Sei. Ya bi forovai tora reyadi!”

ⁿ 12.18 Acts 23.8 ^o 12.19 Deut 25.5 ^p 12.26 Ex 3.6

Ago gira tora inkiye
(Mt 22.34-40; Lk 10.25-28)

²⁸ Ma ago gira oteimana amiye yokoi baisi bi ini ni dodi regamadi ago neideyo. Ye Iesu yaku rama rorobo dudu ago magamo mina veyo ri, bi ni kaiteyo, “Ago girari goina bi tora inkiye?”^q

²⁹ Iesu yaku niyo, “Tora inkiye bi yomini, ‘Neidefo Israel vene, Varika Amiye uni Sei ina bi Varika Amiye yokoi maka.’^r ^s ³⁰ Yi uka meko noibantu dudu, yi vima noibantu dudu, yi mokena noibantu dudu ma yi yeiva tora noibantu dudu Varika Amiye yi Sei uka magiya.’ ³¹ Ago gira remanu bi yomini: ‘Ya atafu amedo amiye uka magiya, ya kaya uka maisa kana.’ Ago gira tora yokoi ide mina remanu maka.”^t

³² Ago gira oteimana amiye Iesu rofu niyo, “Oteimana amiye ya bi rama niyo; ya bi rorobo inkiye niyo, ‘Sei bi nokoi maka; Sei yokoi ide idu ina maka.’^u ³³ Yi uka meko noibantu dudu, yi mokena noibantu dudu ma yi yeiva tora noibantu dudu uka magi ma yi atafu amedo amiye uka magi kana yaku aira ori kamu rena ma vibani ori sisika rena ebu redo.”^v

³⁴ Kamini Iesu veyo ina bi ni mona mona inkiye resi niyo, “Ya bi Sei di ourefeidena amena sanari bi maike de.”

Ye amiye yokoi yaku dubusa ni kaitegika de regamadi.

Keriso di ni kaitena ago
(Mt 22.41-46; Lk 20.41-44)

³⁵ Kamini Iesu bi Sei vakena yavari amiye oteimagasa ni kaiteyo, “Gokai dada ago gira oteimana vene yaku nidedi Keriso bi David di tutubena? ³⁶ David inkiye Vima Kikifa di vava dudu niyo:^w

‘Varika Amiye yaku nai Varika Amiye rofu niyo:

Nai vana rama rofu ameinu re

kumo na yaku yi tuma vene yi yuka aina sana rigida.’

³⁷ David inkiye yaku ‘Varika Amiye,’ vo niyo, ye gokai ida dudu ina bi ini tutubena?”

Iesu yaku ago gira oteimana vene di vegu ni diba reyo
(Mt 23.1-36; Lk 20.45-47)

Amiye tau gade gade ada dudu ini ago neidegamadi. ³⁸ Ye ini oteimana ago bi yomini: “Vei mona refo ago gira oteimana vene rofu, kaere varuka doba dudu nana regika ma maketiri amiye yaku ago buni dudu matagini reyagane ³⁹ ma usa usa yavari ma irakuna sanari amena sana ka buni

^q 12.28-34 Lk 10.25-28 ^r 12.29 Varika Amiye uni Sei ina bi Varika Amiye yokoi maka; o Varika Amiye bi uni Sei, Varika Amiye maka. ^s 12.29-30 Deut 6.4-5 ^t 12.31 Lev 19.18

^u 12.32 Deut 4.35 ^v 12.33 Hos 6.6 ^w 12.36 Ps 110.1

torari ura rededi. ⁴⁰Ina vene yaku obu vene di gugura ka duma resi ofa dudu usa usa doba nidedi. Mina kana vene, ini kaunava moigedi bi toe tora inkiye.”

Obu di fore maro

(Lk 21.1-4)

⁴¹Iesu bi Sei ni vakena yava di fore aina mauari berou eta rofu ameineu resi amiye ini fore aigamadi mina vegamo. Amiye gugura tau nufa bi fore tora aigamadi. ⁴²Idu obu irava baisi bi fore keika keika remanu aiyo di yeiva bi keika inkiye. ⁴³Iesu ini usi dina vene ni rutu resi niyo, “Rama inkiye ya nida, mina obu gugura de nufa bi tora inkiye aiyo ma mina amiye tau yaku aiyadi bi ebu reyo. ⁴⁴Mina vene yaku fore tora tora bi ini gugura taufafau aiyadi, idu mina rema ini gugura nufa de bi, ini tora noibanu aiyo; mina bi ini fafau ameibogo gugura.”

Iesu yaku Sei di ni vakena yava di tumuda rigo di ago niyo

(Mt 24.1-2; Lk 21.5-6)

13 ¹Iesu Sei vakena yava feresi yakuyo ri, ini usi dina amiye yokoi yaku niyo, “Ve kumo, oteimana amiye, mina fore bi buni inkiye! Ma mina yava bi buni vayavaya!”

²Kamini ni kabai reyo, “Mina yava tora tora veisa ba? Minari fore fafafau amededi gabii yokoi de amegedi; mina tau gade varadaugedi.”

Toe ma esika esika

(Mt 24.3-14; Lk 21.7-19)

³Kamini Iesu bi Olive yabo omunari Sei vakena yava berou rofu amegamo ri, Peter, James, John ma Andrew yaku sui dudu ina rofu baiyadi. ⁴Resi ni kaiteyadi, “Una ni, mina bi goivaka vata nigedi? Ma ini rebe bi gokai mina vau regedi?”

⁵Ma ina vene rofu nigi kora reyo, “Nari rei mona refa; nokoi yaku ya eru ga reyaine. ⁶Amiye tau gade nai roka dudu baisi inkiye ni kake regedi, ‘Na bi Keriso,’ resi amiye tau gade eru regedi. ⁷Idu iya rena negau ma iya rena maike di sina neidegedi ri, mina yaku yi uka ga dadiyaine. Mina kana bi vata niyaine, idu ari metona bi baina kode. ⁸Adina gagani tora inkiye inkiye ma ourefeidena vene inkiye inkiye ruda regedi. Gagani bedakairi, bi kono yagayaga regedi ma adabo ogau nigedi. Mina bi mida odina gera rena esika bae kora regedi kana.

⁹“Ya kaya nari rei mona refa. Kanisoro vene di vanari ya siri resi ini usa usa yavari ubobo regedi. Na dada ya moi gavana ma kini di nemokori are resi ina rofu nai ago nigedi.^x ¹⁰Ma gagani gagani tauri ago buni siko ni rausi

^x 13.9-11 Mt 10.17-20; Lk 12.11-12

reyaine. ¹¹ Ya moisi kotari are regedi ri, gokai ago nileged bi mokena toe ga moiyanine. Idu, mina medari beika ya mago ya yaku nileged. Mina bi diya ya yaku sina nidedi, idu mina bi Vima Kikifa yaku. ¹² Ma usika ourena yaku usika ourena muyena rofu siri rego, ma baba yaku ini mida rofu makai rego. Mida mida yaku ini nono baba rofu tourage regedi ma umuyegedi. ¹³ Ma amiye tau gade yaku nai roka dada ya rofu gubuyo regedi, idu kaere yaku bogo meda metona baigo ri, bi are rei gira rego mamo bi moi vegu rigo.^y

Vegu no inkiye

(Mt 24.15-28; Lk 21.20-24)

¹⁴ “Bura vena amiye bi ada yora niyaine: Ye vegu no inkiye redo amiye are ga reyaine sanari are rego vegedi ri, bi ya kaere Judea gagani bi omuna rofu ori difa.^z ¹⁵ Ma yava tebo odorori amiye bi ga neyaine ini yava dui rei bosi ini gugura fore ga moi yakuyaine.^a ¹⁶ Ma murori amedo amiye bi inifafau varuka moigi ga dairiyaine. ¹⁷ Idu mirona ituari mina vegu no vata nigo ri, nono kaere bi rivo nufa ma nono ini mida susu irido inafafau bi no inkiye inkiye! ¹⁸ Idu usa usa nifo kumo mina bi avari ogau ga niyaine, ¹⁹ ini adina mirona ituari bi no tora gade inkiye, senagi senagi Sei yaku oma ma kono riyo, baiyo ma gua mina kana bi koina, gabii rofu di mina kana bi dubusa ogau de nigo.^b ²⁰ Ye Varika Amiye yaku mina vegu no di ari de moi tumu reyagadu, amiye nokoi moi vegu de riyagadu, idu ini abidi reyo vene dada mina ari moi tumu rego.

²¹ “Kamini amiye nokoi yaku ya nigo vo nisi, ‘Ve kumo, Keriso bi yomini!’ ma ‘Ve kumo, ina bi yomironi!’ ini ago rofu mokena vari gira ga aifa. ²² Ini adina bi, Keriso ofa vene ma Sei di ago nidedi ofa vene ogau nisi rebe ma mokena vegu dudu Sei di abidi reyo vene ofa dudu eru regedi, vata nigo vo nisi bi. ²³ Ye nari regasa are refa; na bi beika tau ogau nileged bi ari dobau sena ya niyaka.

Amiye di Mida di baido sina

(Mt 24.29-31; Lk 21.25-28)

²⁴ “Idu mirona ari ini toe nigo mamo gabii meda bi mukuna nigo ma eo bi ini vabara de kikigo,^c ²⁵ iya bi omari gutuna yarei degedi, ma omari ini vava amededi mina ka moi tururu regedi.^d ²⁶ Mina usi amiye yaku Amiye di Mida seuyari vava ma vabara tora nufari debigo vegedi.^e ²⁷ Ma ini naivo naivo vima ni feidego ma ini abidi reyo vene kono tora noibanu gutuna ma kono di berou berou noibanu gutuna oma berou berou noibanuri moi egogo regedi.

^y 13.13 Mt 10.22 ^z 13.14 Dan 9.27; 11.31; 12.11 ^a 13.15-16 Lk 17.31 ^b 13.19 Dan 12.1; Rev 7.14 ^c 13.24 Is 13.10; Ezek 32.7; Joel 2.10, 31; 3.15; Rev 6.12 ^d 13.25 Is 34.4; Joel 2.10; Rev 6.13 ^e 13.26 Dan 7.13; Rev 1.7

Fuka yabo kana di ago
(Mt 24.32-35; Lk 21.29-33)

28 “Gua fuka yabo rofu mokefa. Ini bobo ruika fu nisi iye imu rego ri, ya bi diba nilegedi amona bi bae negau nido. 29 Mina dada, mina ogau nibigedi ma vegedi ri, bi ya ya diba ari bi negau nigi rego.^f 30 Rama ya nida, gua ari amededi vene bi muyei vau regedi koderi bogo mina beika baika tau gade vata nilegedi mamo. 31 Oma ma kono bi roro nilegedi, idu nai ago bi roro de nilegedi.

Meda ma ari bi nokoi ina diba de
(Mt 24.36-44)

32 “Idu amiye yokoi mirona meda o ari di nemoko bi toto, omari di naivo naivo vima ka ina toto, Mida ka ina toto, idu Baba iniye maka ina diba.^g 33 Ya vene bi nari gira rei mona refa! Adina ya ya toto mirona meda baigo bi. 34 Mina bi amiye yokoi yava ika oto dina kana: Ini yava feresi ini moimai rei tavoi rededi vene vanari aisi ina yokoi yokoi ini moimai neinei mago. Ye yava ida vena nari rego amiye maka bi ni oteimago, nemoko kikigasa amego.^h 35 Mina dada nari gira refo ini adina bi ya ya toto yava biyaguna amiye goivaka baigo, bi uriyenauri, urusa tobori, kokoro koo-nigo ri ba uruyaku gorogoro okigo. 36 Evade maka okigo ri, varebigedi ga ya vei tau reyaine. 37 Beika ya vene rofu ya nida, amiye tau rofu nigida: nemoko kikifo!”

Iesu umuyegedi di sina
(Mt 26.1-5; Lk 22.1-2; Jn 11.45-53)

14 ¹Passover ma Beredi Yeast de Feidena di Irakuna bi meda remanu maka niyo mina irakuna regedi di. Ma Sei ma amiye utari naivo vene di varika vene ma ago gira oteimana vene bi Iesu buoru rigi moi gira resi umuyegika di ida maina regamadi.ⁱ ²Adina niyadi, “Idu mina irakuna fuofuori bi de regifa, adina bi amiye siboroka regedi baebu.”

Iesu bi Bethany ri diga ini adari moi rausi reyo
(Mt 26.6-13; Jn 12.1-8)

³Ma Iesu bi Bethany ri sena refera nufa amiye roka Simon di yavari amegasa iruku irigamo ri, rema yokoi fore roka alabaster dudu riyadi siua yokoi, ideri bi diga roka nard di sisika buni vata baiyo, mina moi boyo. Diga bi fore tora gade dudu voi rededi. Mina rema yaku siua ini diga nufa uratokusi ini adari erausi reyo.^j ⁴Minari amededi vene bedakai

^f 13.29 *ari bi negau amedo; o ini dairina bi negau amedo.* ^g 13.32 Mt 24.36

^h 13.34 Lk 12.36-38 ⁱ 14.1 Ex 12.1-27 ^j 14.3 Lk 7.37-38

bi gubuyo resi iniye iniye niyadi, “Beika resi mina diga ini sisika buni bi maku tavoi reyo? ⁵Mina diga di sisika buni bi besa 300 siriva fore^k dudu voi resi fore bi irava vene maragadu!” Ye mina rema rofu gubuyo dudu ago gira niyadi.

⁶Idu Iesu yaku niyo, “Mina rema ferefä! Ya bi beika resi ina rofu toe madedi? Ina bi na rofu vegu buni vayavaya reyo. ⁷Adina irava vene bi ya sa toga ameibigedi ma goina medari yi mokegedi bi mina vene aedegedi. Idu na bi toga ya sa de ameibigida.^l ⁸Ina beika rego bi reyo mini; ina yaku diga nai rovaitari erausi reyo bi dobau na guri aigedi dada na dogo reyo. ⁹Rama ya nida, kono tora noibanuri bi mina ago buni ni rausi regedi ri, ka mina rema yaku ini beika reyo mina oteimagedi, ina ka mokeyagane.”

Judas yo niyo Iesu tautore regi

(Mt 26.14-16; Lk 22.3-6)

¹⁰Kamini Judas Iscariot, kaere bi Iesu di usi dina amiye tuero yokoi, bi Iesu tautore regi Sei ma amiye utari naivo vene di varika vene rofu boyo.

¹¹Mina neideyadi ri, bi ada tora gade resi Judas rofu ni tore reyadi fore magedi vo niyadi. Ye Judas bi gokai tautore rego di ida maina reyo.

Iesu yaku Passover di iruku ini usi dina vene sa iriyadi

(Mt 26.17-25; Lk 22.7-14, 21-23; Jn 13.21-30)

¹²Ouresi medari, Beredi Yeast de Feidena di Irakunari, Passover di mamoe di mida ori sisika reyadi ri, Iesu di usi dina vene yaku ni kaiteyadi, “Yi ura bi goidu sana dogo regifa ma yi Passover di iruku irigiyä?”

¹³Ye ini usi dina vene remanu ni feidesi niyo, “Taoni ideri bosi mironari amiye nokoi koru urena adodisi ya baku regedi bi usi difa.

¹⁴Goina yavari dui rego bi yava biyaguna amiye ni oteimafo, ‘Oteimana amiye yaku niyo, Goina daiyutu bi nai usi dina vene sa Passover di iruku irigifa?’ ¹⁵Mina yava amiye yaku odorori daiyutu tora ya oteimago. Mina bi sena veuka reyadi. Mironari uni iruku dogo refo.”

¹⁶Ma ini usi dina amiye remanu bi feresi taoniri dui resi bi gokai ago niyo kana mina veitao resi Passover di iruku dogo reyadi.

¹⁷Kamini uriyenau niyo ri, Iesu bi mina amiye tuero sa okiyadi.

¹⁸Amegasa iruku irigamadi ri, Iesu yaku niyo, “Rama ya nida, ya nokoi yaku na tautore rego — kaere na sa iri iri redo.”^m

¹⁹Iriyedula regi kora resi yokoi yokoi ina rofu niyadi, “Rama na bi de ba?”

²⁰Ma ni kabai reyo, “Mina bi yi fogori tuero nokoi, kaere bi na sa ini beredi siua ideri birisifa. ²¹Adina Amiye di Mida bi muyego bura reyadi

^k 14.5 siriva fore: 6.37 baku re. ^l 14.7 Deut 15.11 ^m 14.18 Ps 41.9

kana, idu mina amiye rofu bi iriyeduka no iniye, kaere bi Amiye di Mida tautore rego! Buni bi mina amiye bi vata de niyagadu vo nisi!”

Varika Amiye di iri iri

(Mt 26.26-30; Lk 22.14-20; 1 Cor 11.23-25)

²²Kamini iruku irigamadi ri, Iesu bi beredi be moisi Sei rofu buni tora gade masi uroki resi ina vene magasa niyo, “Moifa, mina bi nai rovaita.”

²³Resi biyo moisi Sei rofu buni tora gade masi ina vene maro ma ina tau vakoi gaga reyadi. ²⁴Ma ina vene rofu niyo, “Mina bi nai dava Sei di uka ago regi amiye tau gade rofu rausi reyaka.”ⁿ ²⁵Rama ya nida, na bi ida nokoi kana dubusa mina waini di meko de irigida mirona medari bogo Sei di ourefeidena amena sanari waini ruaka irigida mamo.”

²⁶Kamini yauta nisi yakusi Olive yabo omuna ikari boyadi.

Iesu yaku Peter ina rofu ni sui ren a ogau niyo

(Mt 26.31-35; Lk 22.31-34; Jn 13.36-38)

²⁷Ma Iesu ina vene rofu niyo, “Tauvakoi bi feresi ori digedi, adina bi buru reyo, ‘Mamoe dogo redo amiye umuyegida ma mamoe bi rerevaidi nigli.’^o ²⁸Idu gabi dadi rae regida ri, na siko Galilee ri ourei bogida.”^p

²⁹Idu Peter ina rofu niyo, “Mina tau ka ya feresi ori digedi vo nisi, idu na bi de!”

³⁰Kamini ni kabai reyo, “Rama ya nida, kokoro gua mina urusari uru remanu raka nina koderi, bi uru regode na ni sui regiya.”

³¹Idu Peter ago ni gira resi niyo, “Ya sa muyegifa vo nisi, ida nokoi dudu ya ni sui de regida.”

Ma ina tau vakoi makai ka niyadi.

Iesu Gethsemane ri usa usa niyo

(Mt 26.36-46; Lk 22.39-46)

³²Kamini gagani roka Gethsemane ri boyadi ma Iesu yaku ini usi dina vene rofu niyo, “Na usa usa nigida ri, bi minari amefa.” ³³Resi bi Peter, James ma John ina sa afesi kenoka resi uka moigi kora reyo. ³⁴Ma ina rofu niyo, “Iriyeduka tora yaku nai vima vata baiyo ye makai muyegida kana amuteida. Minari amesi varena ga refa.”

³⁵Kamini inaiket etagae risi konori raudai regasa usa usa niyo ye buni mirona meda nemoko bi ina rofu moi etagae ri yaine. ³⁶Resi niyo, “Madini Baba, vegu tora gade ya rofu bi aita maka. Mina esika esika di biyo na rofu moi etagae rigiya. Idu, yi ura mina resi nai mokena dudu bi ga regiya.”

³⁷Kamini ina vene rofu dairisi veitao reyo ina bi varegamadi. Ma Peter rofu niyo, “Simon, ya bi vareisa ba? Ya bi meda nemoko nokoi maka

ⁿ 14.24 Ex 24.8; Jer 31.31-34 ^o 14.27 Zech 13.7 ^p 14.28 Mt 28.16

nemoko kikigi yeiva nufa ba ide?”³⁸ “Nemoko kikigasa usa usa nifa kumo yi uka maina regi keto rego baebu. Vima bi regi ura redo, idu rovaita bi afi reyo.”

³⁹ Resi dubusa etagae risi mina ago dubusa usa usa niyo. ⁴⁰ Kamini dairi okisi bi dubusa varegamadi veitao reyo, adina varei muyeyadi. Ina vene bi diba de ina rofu bi beika nilegedi.

⁴¹ Ma uru regodenu dubusa dairisi ina vene rofu niyo, “Ya vene bi besa sifere regasa varededi ba? Kaini! Meda nemoko bi okiyo. Vefo, Amiye di Mida bi tautore resi vegu no rena vene di vanari aigedi. ⁴² Dadifo! Una bi dinadi! Ve nai tautore rena amiye bi baido mini!”

Iesu moi gira reyadi

(Mt 26.47-56; Lk 22.47-53; Jn 18.3-12)

⁴³ Mina makari Iesu bi ago nigamo ri, Judas, kaere bi amiye tuerori yokoi, bi amiye tau gade sa bainasi ma gai nufa okiyadi; Sei ma amiye utari naivo vene di varika vene ma ago gira oteimana vene ma tora vene sa. ⁴⁴ Kamini tautore rego amiye yaku gokai rego di ida bi sena masi niyo, “Kaere amiye fuka regida bi mini, moi gira resi yi gabireri nari gira resi afei difa.”

⁴⁵ Judas evade okisi Iesu urana bosi niyo, “Oteimana amiye,” resi fuka reyo. ⁴⁶ Ye vanau moisi moi gira reyadi. ⁴⁷ Idu yokoi kaere ina atafuri are regasa amedo yaku bainasi moi yakusi kuaita resi Sei ma amiye utari naivo amiye tora di moimai rei tavoi redo amiye di anema nugai feideyo. ⁴⁸ Kamini Iesu yaku ina vene rofu niyo, “Ya vene bi duma duma amiye yokoi kana bainasi ma gai moisi na moi gira regika baiyadi ba? ⁴⁹ Ari neinei ya sa Sei vakena yavari amegamafa, idu bi de na moi gira reyadi. Idu Sei di ago di buru reyadi mina bi bae rama aiyainedi.”^q

⁵⁰ Ye amiye tau vakoi bi ina feresi ori diyadi.

⁵¹ Mida godua nokoi bi varuka keika iru maka risi Iesu usi bogamo. Kamini mina amiye moigika reyadi, ⁵² idu ini varuka keika fereyo rofu fai sara raga reyo.

Iesu kanisoro di nemokori are reyo

(Mt 26.57-68; Lk 22.54-55, 63-71; Jn 18.13-14, 19-24)

⁵³ Kamini bi Iesu Sei ma amiye utari naivo amiye tora rofu afei boyadi, ma tora vene ma ago gira oteimana vene tau gade bi egogo reyadi. ⁵⁴ Ma Peter bi egaima risi usi disi mina Sei ma amiye utari naivo amiye tora di yava ida nefau dui resi naivo naivo vene sa ameinu resi ita imigamo.

⁵⁵ Kamini Sei ma amiye utari naivo vene di varika vene ma kanisoro vene noibanu bi ago di adina maina regamadi gokai dudu Iesu umuyegedi, idu

^q 14.49 Lk 19.47; 21.37

bi ago de baku reyadi. ⁵⁶Adina amiye tau gade bi ofa ofa dudu Iesu ni kake rigamadi, idu ini sina bi yokoi de.

⁵⁷Ye amiye bedakai bi are resi ofa ofa sina ina rofu nigasa niyadi, ⁵⁸“Una neideyafa ini beika niyo, ‘Amiye vana yaku akuyadi Sei vakena yava bi ukero vau resi meda regodenuri bi dubusa akugida, amiye yaku akuna de mina akugida.’ ”^r ⁵⁹Mina sina niyadi mina ka rama aina de reyo.

⁶⁰Kamini Sei ma amiye utari naivo amiye tora yaku dadisi ina vene di nemokori Iesu ni kaiteyo, “Ya bi ni kabai de regiya ba? Mina ago ya rofu ni kake rededi bi beika be nigiya?”

⁶¹Idu bi bere nisi ago nokoi de ni kabai reyo. Dubusa Sei ma amiye utari naivo amiye tora yaku ni kaiteyo, “Ya bi Keriso kaere bi Sei buni tora gade mana di Mida ba?”

⁶²Ma Iesu yaku niyo, “Mina bi na; ye Amiye di Mida bi Vava Inkiye Amiye di vana rama rofu ameinu resi seuya omari sa baibigo ma vegedi.”^s

⁶³Kamini Sei ma amiye utari naivo amiye tora yaku ini fafau varuka uesti resi ni kaiteyo, “Beika resi nisi una bi mina ago di adina besa ni maina resifa? ⁶⁴Ya bi mina Sei di roka moi no riyago ago neideyadi. Ye ya yaku mokededi bi gokai?”^t

Ina tau vakoi yaku niyadi muyego bi buni.

⁶⁵Ma bedakai bi ina rofu ayaka su regi kora resi ini nemoko fafa risi vana kumu risi ugasa niyadi, “Ya bi Sei di ago nido amiye vo nisi, beika vata nigo una ni!” Resi naivo vene yaku moisi bi ini ragena fafa riyadi.

Peter yaku Iesu ni sui reyo

(Mt 26.69-75; Lk 22.56-62; Jn 18.15-18, 25-27)

⁶⁶Ma Peter bi yava ida nefauri amegamo ri, Sei ma amiye utari naivo amiye tora di rema ofi yokoi baiyo. ⁶⁷Ina yaku Peter veyo bi ita imigasa amegamo resi nesi niyo, “Ya ka Iesu Nazareth amiye sa.”

⁶⁸Idu ina yaku ni sui reyo, “Na na toto ya beika nisa bi nai adari ufatena de redo,” vo nisi ida vena etofarori yakuyo. Kamini mina ituari maka kokoro raka niyo.”^u

⁶⁹Kamini mina rema ofi vesu amiye sa are regamadi rofu dubusa niyo, “Mina amiye ka bi ini asini yokoi.” ⁷⁰Idu dubusa ni sui reyo.

Ma doba deri atafuri are regamadi vene dubusa Peter rofu niyadi, “Rama ya ka bi ini asini yokoi, adina ya ka bi Galilee amiye.”

⁷¹Kamini iniye fafau ni karaini resi iniye ni varika regi kora resi niyo, “Mina amiye ya vene yaku ni dodi rededi bi na na toto!”

^r 14.58 Jn 2.19 ^s 14.62 Dan 7.13 ^t 14.64 Lev 24.16 ^u 14.68 Bura bedakai bi Kamini mina ituari maka kokoro raka niyo nufa de.

⁷² Ma evade kokoro dubusa raka niyo. Kamini Peter bi beika vata nigo di ago Iesu yaku niyo mina mokeyo, “Kokoro uru remanu raka nina koderi uru regode na ni sui regiya.” Mina mokena yaku uyo ma isaka niyo.

Iesu bi Pilate di nemokori aiyadi
(Mt 27.1-2, 11-14; Lk 23.1-5; Jn 18.28-38)

15 ¹Ari kuifa uruyaku niyo ri, Sei ma amiye utari naivo vene di varika vene, tora vene ma ago gira oteimana vene bi kanisoro vene tau vakoi sa kota regi ago ni rorotari resi bi Iesu di vana ukita resi afei bosi Pilate di vanari aiyadi. ²Ye Pilate yaku ni kaiteyo, “Ya bi Jew vene di kini ba?”

Ma ni kabai reyo, “Ya bi mina niyo.”

³ Ye Sei ma amiye utari naivo vene di varika vene bi ni tourage reyadi.

⁴ Ye Pilate yaku dubusa ni kaiteyo, “Ya bi de ni kabai regiya ba? Ya veisa ba de, gokaisanu ago no tau ya rofu ni tourage rededi?”

⁵ Idu Iesu bi ago yokoi kava de ni kabai reyo, ye Pilate bi tururu iniyreyo dada.

Iesu di umuyena ago
(Mt 27.15-26; Lk 23.13-25; Jn 18.39–19.16)

⁶ Ye Passover irakuna neineiri amiye usa nina kana dibura amiye yokoi erufuyaine nigamo. ⁷ Ma amiye roka Barabbas bi gavmani rofu ruda rena vene sa dibura yavari amegamo. Ina bi mina gavmani rofu ruda rena vegu dudu amiye umuyeyadi. ⁸ Amiye tau bi Pilate rofu baiyadi ini mina ari okido ri rei baido kana ni kaiteyadi. ⁹ Pilate yaku mina vene ni kaiteyo, “Yi ura rededi bi Jew vene di kini moi yakugida ba?” ¹⁰ Adina Pilate bi sena diba niyo Sei ma amiye utari naivo vene di varika vene bi gonema dudu ini vanari aiyadi.

¹¹ Idu Sei ma amiye utari naivo vene di varika vene bi amiye tau gade di uka moi yadi, ye Barabbas moi erufuyainedi. ¹² Idu Pilate dubusa ina vene ni kaiteyo, “Ye yi ura bi na bi beika mina amiye Jew vene di kini vo nisa ina rofu regida?”

¹³ Ma dubusa imuna niyadi, “Satauro ikoko re!”

¹⁴ Idu Pilate yaku ni kaiteyo, “Beika resi, ina bi beika vegu no be reyo?”

Idu besa imuna niyadi, “Satauro ikoko re!”

¹⁵ Ye amiye tau di uka moi ada regi Pilate yaku Barabbas ina vene rofu erufusi ago masi Iesu iya rededi vene di vanari aiyo bururu resi satauro ikoko reyaganedi.

Ruda vene Iesu ni kuruyadi
(Mt 27.27-31; Jn 19.2-3)

¹⁶ Kamini iya rededi vene yaku Iesu gavana di ourefeidenava yava tora ideri afei boyadi. (Mina yava di roka bi Praetorium.) Mina usi iya rededi

vene tau vakoi raka ni egogo reyadi. ¹⁷Resi varuka kaka ina rofu aku masi yabo imkiye maena moi mekuna resi kini kana ada bou ini adari aiyadi. ¹⁸Resi ina rofu kokora nigi kora reyadi, “Jew vene di kini o!” ¹⁹Ini adari kodu dudu usi inafafau ayaka su resi efuka meimisi ini budari ni kurugamadi. ²⁰Kamini ni kuruyadi koina niyo ri, bi varuka kaka doba kutusi iniye di varuka aku masi satauro ikoko regi afesi yakuyadi.

Iesu satauro ikoko reyadi

(Mt 27.32-44; Lk 23.26-43; Jn 19.17-27)

²¹Kamini Cyrene gagani amiye yokoi roka Simon, kaere bi Alexander ma Rufus di baba, bi baku reyadi. Ina bi taoni etofaro gutuna digamo ri, bi ini satauro uakaiyaine moyjadi.^v ²²Kamini bi gagani roka Golgotha ri afei baiyadi. Mina ago di ini adina bi “Ada Girika di Sana.” ²³Kamini waini muramura roka myrrh sa maradi idu moina de reyo. ²⁴Ma kamini satauro ikoko resi laki dudu isira reyadi kaere yaku bi ini varuka ini yokoi yokoi moyjadi.^w ²⁵Iesu bi satauro ikoko reyadi ri, bi meda nemoko naini uruyaku. ²⁶Ini no ni kake regi bi yomakai bura reyadi: “Jew vene di kini.” ²⁷Kamini duma duma amiye remanu ina sa satauro ikoko reyadi, yokoi bi ini vana rama rofu ma yokoi bi ini vana enana rofu.^x ²⁸y

²⁹Ma amiye kaere ini adina digamadi bi ni kurugasa ini ada buro regasa nigamadi, “Ye, ya yaku Sei vakena yava ukero vau resi meda regodenuri dubusa akugya vo niyo!^z ³⁰Satauro gutuna sokau rei desi ya kaya moi vegu ri!”

³¹Mina ida nokoi makari Sei ma amiye utari naivo vene di varika vene ma ago gira oteimana vene ka iniye ni kurugasa nigamadi, “Amiye be moi vegu riyo, idu iniye bi makai anua rego! ³²Mina Keriso, Israel di kini, satauro gutuna soka rei deyaine vegi mamo ina rofu mokena vari gira aigifa!”

Ma kaere bi ina sa satauro ikoko reyadi ka ni fafana reyadi.

Iesu di muyena

(Mt 27.45-56; Lk 23.44-49; Jn 19.28-30)

³³Meda nemoko tobo niyo ri, bi gagani tora noibantu bi mukuna yaku fono reyo bogo meda nemoko regodenuri koina niyo mamo. ³⁴Ma meda nemoko regodenuri, Iesu bi ababa nigasa raka ni tora reyo, “Eloi, Eloi, lema sabchthani?” ago di adina bi, “Nai Sei o, beika resi na ferei tavoi reyo?”^a

³⁵Kamini amiye be kaere bi ina atafu are regamadi mina neidesi niyadi, “Vefo kumo, ina bi Elijah raka nido!” ³⁶Amiye yokoi raga resi

^v 15.21 Rom 16.13 ^w 15.24 Ps 22.18 ^x 15.27 Is 53.12 ^y 15.28 Bura bedakai bi nanaka 28 nufa: *Mina ida dudu Sei di ago bura rena bae rama aisi niyo, “Ina bi vegu no amiye sa toe moyjadi”* (Lk 22.37 baku re). ^z 15.29 Ps 22.7; 109.25; Mk 14.58; Jn 2.19 ^a 15.34 Ps 22.1

sipanisi waini safi de ru dudu vata baisi koduri aisi ina rofu duduka
reyainedi magasa niyo, “Kode, vena kumo Elijah desi moi sokau rego ba
de!”^b

³⁷Ye raka tora nisi asa you feideyo.

³⁸Kamini Sei vakena yava ideri biri rina varuka doba bi odoro
gutuna doka rofu bado remanu uvesi rei neyo.^c ³⁹Ma iya rededi vene di
ourefeidena amiye tora bi Iesu di nemokori are regasa bi Iesu di gokai
muyeyo,^d mina vesi niyo, “Rama mina amiye bi Sei di Mida!”

⁴⁰Ma rema bedakai ka bi gaima gutuna are resi vegamadi. Ini fogori
bi Mary Magdalene, Mary kaere bi usika James ma Joseph di nono ma
Salome.^e ⁴¹Mina rema vene bi Galilee ri Iesu usi disi aedegamadi. Ma
rema tau gade kaere bi Jerusalem ri ina sa baiyadi ka minari.

Iesu guri aiyadi

(Mt 27.57-61; Lk 23.50-56; Jn 19.38-42)

⁴²Kamini sena bi dogo dogo meda, Sabati meda ourena meda. Ye
uriyenau nigi regamo ri, ⁴³Joseph, Arimathea amiye, kaere bi kanisoro
amiye yokoi, ma bi Sei di ourefeidena amena sana baigo mina tua
regamo, bi rovaita gira dudu Pilate rofu bosi Iesu di rovaita usa niyo.

⁴⁴Pilate bi Iesu sena muyeyo ago mina neidesi tururu resi ruda rededi
vene di tora amiye yokoi mina ni kaiteyo Iesu bi sena muyeyo ba. ⁴⁵Ruda
redo amiye Pilate rofu niyo ri muyeyo mamo, Joseph rofu niyo bi Iesu di
rovaita moigi digo. ⁴⁶Ye Joseph bi varuka buni voi resi ini rovaita moi
sokau resi mina varuka dudu kumu risi kono guri bi fore ideri goeyadi bi
ini rovaita mina ideri aiyo. Kamini fore moi kurevai resi guri di ida vena
biri riyo. ⁴⁷Ma Mary Magdalene ma Mary, kaere bi Joseph di nono, bi
Iesu aiyadi sana vegamadi.

Iesu dubusa dadi rae reyo

(Mt 28.1-8; Lk 24.1-12; Jn 20.1-10)

16 ¹Kamini Sabati meda koina niyo ri, Mary Magdalene, Mary kaere
bi James di nono ma Salome bi Iesu di rovaitari rausi regika
sisika buni muramura voi reyadi. ²Ma ari uveyo ri uruyaku gorogoro
iniye fura di ourena medari, mina rema bi sena guri vegi ida bosi ³iniye
iniye ni kaiteyadi, “Kaere yaku bi guri di ida venari fore biri riyadi mina
moi kurevai rei etagae rigo?” ⁴Idu, kamini ne resi veyadi bi mina fore bi
sena moi kurevai rei etagae riyadi; mina fore bi tora iniye. ⁵Kamini guri
sana ideri dui resi bi amiye rua varuka doba feo akusi vana rama rofu
amegamo mina vesi tururu iniye iniye reyadi.

^b 15.36 Ps 69.21 ^c 15.38 Ex 26.31-33 ^d 15.39 *muyeyo*; buru bedakai bi *raka nisi muyeyo*
nufa ^e 15.40-41 Lk 8.2-3

⁶Idu ina vene rofu niyo, “Tururu ga refa, ya vene bi Iesu Nazareth amiye kaere bi satauro ikoko reyadi mina maina rededi. Ina bi dadi rae reyo! Ina bi minari de amedo. Ini aiyadi sana vefo. ⁷Idu bosi ini usi dina vene ma Peter ni oteimafa, ‘Ina bi siko Galilee urana bodo. Bi mironari baku regedi, ini niyo kana.’ ”^f

⁸Ye mina rema vene bi rovaita tururu resi ori dudu guri sanari gutuna raga resi disi bi amiye yokoi be de niyadi, ori reyadi dada.

Ago buni di ago metona yokoi^g

16.9-20

Iesu bi Mary Magdalene rofu ogau niyo

(Mt 28.9-10; Jn 20.11-18)

[⁹Iesu gabi muyenari gutuna dadi rae reyo ri, ouresi di ari fura kora rena uruyaku gorogoro, ina bi Mary Magdalene siko rofu ogau niyo, kaere bi vima no viro vara nufa mina umeki reyo. ¹⁰Ina yaku bosi Iesu sa vakoi dina vene kaere bi isaka nigasa guroro amegamadi mina oteimaro. ¹¹Mina sina neideyadi Iesu bi vegu niyo ma ina bi veyo vo niyo ri, ina vene bi uka vari gira de maradi.]

Iesu yaku ini usi dina remanu rofu ogau niyo

(Lk 24.13-35)

¹²Gabi rofu Iesu bi rovaita idana dudu ini amiye remanu rofu ogau niyo idau muro gagani negamadi ri. ¹³Mina ago bosi ni oteimaradi, idu mina ka uka vari gira de maradi.

Iesu yaku ini usi dina vene eleven rofu ogau niyo

(Mt 28.16-20; Lk 24.36-49; Jn 20.19-23; Acts 1.6-8)

¹⁴Gabi rofu Iesu di amiye eleven rofu ogau niyo iruku irigamadi ri; ago gira maro uka vari gira maraganedi. Ada tora nufa uka vari gira de maradi kaere Iesu dadi rae reyo ma veyadi vene rofu. ¹⁵Resi niyo, “Disi kono tora noibanuri ago buni Sei yaku riyo vene tau gade rofu ni rausi refa.” ¹⁶Kaere amiye uka vari gira mago ma babatiso rego ina bi vegu nigo, idu kaere uka vari gira de mago ina bi muyego. ¹⁷Kaere uka vari gira aigedi bi mina rebe dudu auta regedi: nai roka dudu vima no umeki resi ago ruaka dudu ago nilegedi; ¹⁸ini vana dudu aruma moisi vo nisi ma muyena di koru no duduka regedi vo nisi ka esika esika de moigedi; ini vana gauka venefafau aigedi bi ina buni nilegedi.”

^f 16.7 Mt 26.32; Mk 14.28 ^g 16.9-20 Bura bedakai ma ago idana di fefa bi mina ago metona nufa de (nanaka 9-20). ^h 16.15 Acts 1.8

Iesu bi omari dadisi boyo
(Lk 24.50-53; Acts 1.9-11)

¹⁹Kamini Iesu Varika Amiye ina vene rofu ago ni oteimaro gabu rofu
 bi Sei yaku omari afei boyo ma Sei di vana ramari ameyo.ⁱ ²⁰Iesu di
 usi dina vene yaku disi gagani tauri ago buni ni rausi reyadi ma Varika
 Amiye moimai regamo ina vene sa ma ini ago rama aiyo ini rebe auta
 regamadi ri.]

Metona ago yokoi^j

16.9-10

[(v 9) Rema vene yaku Peter ma ini asiyaka vene rofu disi ni
 oteimaradi beika ina rofu niyo mina. (v 10) Gabi, Iesu iniye yaku ago
 kikifa ini usi dina vene di vanari meda dadido ma meda nedo eta rofu ni
 feideyo. Mina ago bi toga vegu moina di vegu ago.]

ⁱ 16.19 Acts 1.9-11 ^j 16.9-10 Bura bedakai ma ago idana di bura bedakai bi ka mina
 metona ago tuma nufa (nanaka 9-10).

Ago buni

Luke

yaku bura reyo

Ago di ini adina

Ago buni Luke yaku bura reyo bi Iesu di sina: Ina bi Israel di vegu moi rina amiye ma kono tora noibanu di amiye di vegu moi rina amiye. *Luke* di sina yaku bura reyo bi Sei yaku Iesu raka niyo ma “ina yaku ago buni amiye fore nufa de rofu ni ogau rego” (4.18). Mina ago buni amiye tau gade rofu bura reyo. Ada rena bi *Luke* di bura rena bi tau gade; ouresi nanakari bi Iesu di okina, ma metona agori bi Iesu di omari dina. Gabi Luke yaku ekalesia amiye di uka vari gira mana di ago *Acts* ri bura reyo.

Ago remanuri (nanaka 1—2 ma 9—19) bi ago be mina ago buni ideri amedo, idu ago buni idana ide. Mina bi naivo naivo amiye di yauta di ago, ma mamoe nari rena vene yaku Iesu di vata nina oto reyadi di ago, ma Iesu goduari Sei ni vakena yavari, ma Samaria amiye buni ma rumana mida rerevaida di mokena ago. Ago buniri ago tau gade gade bi usa usa nina di ago, ma Vima Kikifa di ago, ma rema vene Iesu di moimai nari rena di ago, ma Sei yaku vegu no koite makuna di ago.

Beika sina ideri

Ago di ini adina 1.1-4

John Baptist ma Iesu di mida ariri 1.5–2.52

John Baptist di moimai 3.1-20

Iesu rofu babatiso reyo ma uka maina reyo 3.21–4.13

Iesu di moimai amiye rofu Galilee ri 4.14–9.50

Galilee gutuna Jerusalem rofu 9.51–19.27

Fura metonari Jerusalem ideri ma ini adinari 19.28–23.56

Varika Amiye di dadi rae rena, ogau nina ma omari dina di ago 24.1-53

1 1-3 Theophilus amiye tora, amiye tau tora ya beika vegu una rofu Sei yaku moi ogau reyo bi sena bura riyadi. Mina vegu vata ni baiyo

rofu, mina ni feidena vene ini ouresi ini ne yaku mina veguveyadi ma ina ka mina ago di ini moimai rededi vene. Kamini ini sina ni odoro reyadi, resi nidedi mini, una rofu. Mina dada, Theophilus e, nai mokena bi mina sina dubusa, bura rei mona regida, resi moi feidegida ya rofu, adina mina vata niyo vegu bi, sena baku rei mona reyaka, ini vata ni baiyo gutuna. ⁴Makai reyaka dada, yi adari ae mona regiya, ya rofu beika vegu ya oteimaradi bi, rama vata niyadi.

John Baptist ini vata niyo di ago ogau niyadi

⁵Herod yaku Judea gaganir^a kini niyo ri, Sei ma amiye utari naivo amiye yokoi roka Zechariah amegamo; ina bi Abijah di vene amiye yokoi. Ini rema di roka bi Elizabeth. Iniye ka, Sei ma amiye utari naivo amiye roka Aaron di ini tutubena rema.^b ⁶Ina remanu mokena rorobo nufa Sei di nemokori, Sei di ini ago vava tau vakoi ma Varika Amiye di ago gira ma mokena sina tau vakoi ka moi gira regamadi. ⁷Ina remanu bi mida de, adina Elizabeth bi natu, ma ina ini maruka sa ka ugava iniye niyadi.

⁸Yokaru Zechariah Sei ni vakena yavari Sei di ini nemokori Sei ma amiye utari naivo amiye di ini moimai regasa amedo, adina mina meda bi ini vene bedakai di moimai ari. ⁹Kamini Sei ma amiye utari naivo vene di rededi kana, ina vene ya laki isirari gutuna Zechariah moyadi ma bi Varika Amiye ni vakena yava ideri orina vatafafau sisika buni muramura origi. ¹⁰Ma amiye tau tora iniye bi etofaro are regamadi, usa usa nigamadi ri, bi sisika buni muramura oriyo.

¹¹Mina medari Zechariah yaku Varika Amiye di ini naivo naivo vima yokoi veyo, sisika buni muramura ori sisika rena fore vata vana rama rofu are reyo. ¹²Zechariah ya veyo ri, bi tururu resi ini uka ideri gutuna ori ya no iniye niyo. ¹³Idu naivo naivo vima yaku niyo, “Zechariah ori ga re, Sei yaku yi usa neideyo. Yi rema Elizabeth yaku yi mida yokoi evata rego, ini roka nigiya bi John. ¹⁴Ada yaku no iniye nigedi, ma amiye tau gade ka ada regedi John vata nigo dada! ¹⁵Adina bi Varika Amiye di nemokori bi amiye tora yokoi. Ina bi koru gira o waini de irigo; ina bi ini nono di ukari Vima Kikifa ya sena vata baiyo.^c ¹⁶Ina yaku Israel vene tau gade ini Varika Amiye Sei rofu moi dairigo. ¹⁷Ina bi Varika Amiye di ini naivo naivo amiye, kaere ourei bi bobigo, Sei di ago nido amiye Elijah di vima ma vava nufa. Ina yaku baba vene di uka moi kero rego ri, bi ini mida sa uka yokoi maka dudu ameibigedi. Ina yaku vegu no vene moi kero rego ri, bi mokena rorobo vene di mokena ameibigedi. Adina Varika Amiye di ini vene moi egogo resi Varika Amiye di ini dego meda nari rebigedi.”^d

^a 1.5 *Judea gagani*: Mina bi Palestine gagani noibantu. ^b 1.5 1 Chr 24.10 ^c 1.15 Num 6.3

^d 1.17 Mal 4.5-6

¹⁸ Zechariah yaku mina naivo naivo vima rofu ni kabai resi niyo, “Sina nisa bi gokai moi rama rego diba nigida? Na bi amiye ugava, ma nai rema ka rema ugava.”

¹⁹ Naivo naivo vima yaku ni kabai resi niyo, “Na bi Gabriel, na bi Sei di ini nemokori are reida. Sei yaku ya rofu na ni feideyo mina sina buni ya nigida.” ²⁰ Idu ya bi nai sina buni rofu uka vari gira de maro. Mina dada ya bi babo nisi ago de nigiya; nai niyaka kana ogau nigo mamo ago nigiya. Nai sina tau niyaka bi ini meda iniyeri vata nigo.”

²¹ Zechariah bi Sei ni vakena yava ideri amei doba regamo dada, amiye tau bi mokena tau moigamadi ina nari regamadi ri. ²² Etofarō yakuyo ri, bi amiye ni kabai de reyo, dada mokeyadi ina bi Sei ni vakena yava ideri rebe yokoi veyo. Ini vena babo niyo dudu maka amiye oteimaro ina bi rama iniyre rebe yokoi veyo. Ina babo nisi bi toga toga ina vene rofu rebe reyo.

²³ Zechariah ini moimai ari koina niyo ri, bi ini rautu rofu dairiyo. ²⁴ Mina ari koina niyo ri, bi ini rema Elizabeth rivo niyo. Mina rivo niyo ri, bi eo vana berou autu ini yavari maka amegamo. Elizabeth yaku makai niyo, ²⁵ “Gua Varika Amiye yaku na rofu ada reyo. Ina yaku nai maena amiye nemokori erufuyo!”

Iesu di vata nina ni ogau reyo

²⁶ Elizabeth ini rivo niyo eo koru idari bi, Sei yaku naivo naivo vima roka Gabriel Galilee di ini taoni yokoi roka Nazareth rofu ni feideyo.

²⁷ Rema ofi yokoi bi amiye yokoi sa varena kode mironari amegamo, iniyre bi amiye roka Joseph ni kake reyadi, megedi vo nisi. Joseph bi kini David di ini tutubena amiye yokoi. Mina rema di roka bi Mary.^f ²⁸ Mina naivo naivo vima bi Mary rofu bosi niyo, “Rema mida e, Sei ya rofu sena ada reyo, ma Varika Amiye bi ya sa amedo.”

²⁹ Mary yaku mina sina neideyo ri, bi ori tora gade resi mokegamo mina ago di ini rama adina iniyre bi beika. ³⁰ Naivo naivo vima yaku niyo, “Mary, ori ga re, adina Sei ya rofu sena ada reyo. ³¹ Ya bi rivo nisi rumana mida yokoi moi vata resi ini roka bi Iesu vo nigiya.” ³² Ina bi amiye tora gade iniyre nigo, ma ini roka Sei Odoro Iniye di ini Mida nilegedi. Varika Amiye Sei yaku ini tutubena David di ini vava moi mago.^h ³³ Ma ina bi Jacob ini tutubena fafau toga toga ourefeidebobigo. Ini ourefeidena amena sana bi koina de nigo!”

³⁴ Mary yaku naivo naivo vima ni kaitesi niyo, “Na bi amiye yokoi sa varena kode. Mina nisa bi gokai vata nigo?”

³⁵ Naivo naivo vima yaku ni kabai resi niyo, “Vima Kikifa bi ya rofu dego, ma Sei Odoro Iniye di vava ya fafau ameinu rego, mina dada

e 1.19 Dan 8.16; 9.21 f 1.27 Mt 1.18 g 1.31 Mt 1.21 h 1.32-33 2 Sam 7.12, 13, 16;
Is 9.7

mina mida kikifa bi Sei di ini Mida vo nigedi. ³⁶Ma va moke, yi rasini Elizabeth, ina bi ugava nufari sena rivo niyo; amiye ya nigamadi bi mida de moigo vo niyadi, idu ini eo koru ida bi mini, ³⁷adina bi vegu yokoi de Sei yaku moi rama de rigo.”ⁱ

³⁸Mary yaku niyo, “Na bi Varika Amiye di ini naivo rema amiye. Yi sina niyo kana na rofu vata nigo bi buni.” Kamini mina naivo naivo vima ina feresi diyo.

Mary yaku Elizabeth rofu oto reyo

³⁹Mina medari, Mary dadisi evade omuna ikari taoni yokoi Judea gaganiri boi neyo. ⁴⁰Zechariah di yava ideri dui resi Elizabeth rofu ini ago buni niyo. ⁴¹Elizabeth yaku Mary di ini buni ago neideyo ri, bi ini mida ini rivo ideri kita reyo, ma Vima Kikifa yaku Elizabeth ini rovaitari vata baiyo. ⁴²Kamini dadisi ni goroka tora resi niyo, “Rema tau di ini fogori bi ya maka bi buni tora gade! Ya yaku evata regiya mida ka buni tora iniye nigo! ⁴³Nai buni bi beika, dada ma nai Varika Amiye di nono bi na rofu oto reyo mini? ⁴⁴Adina bi yi ago buni neideyaka ri, bi nai mida bi nai rivo ideri ada resi kita reyo. ⁴⁵Varika Amiye di ini ago ya rofu niyo ma ya bi mina rofu mokena vari gira aiyo. Ina bi buni tora gade ya mago dada!”

Mary Sei di roka moi odoro resi nina di yauta

⁴⁶Kamini, Mary yaku niyo,^j

“Nai vima yaku Varika Amiye di roka moi odoro resi nido;

⁴⁷ Nai vima yaku ka Sei na moi vegu rido amiye rofu ada tora redo,

⁴⁸ Adina bi na, ini naivo rema, na mokeyo mini!^k

Ma mina dada gua ameibonari, amiye tau yaku nigedi Sei yaku buni tora gade na rofu maro.

⁴⁹ Adina bi Vava Iniye Amiye yokoi maka yaku vegu tora iniye nafafau moi vata riyo,

ini roka bi kikifa.

⁵⁰ Ini iriyeduwa bi kaere ina rofu kikifa iniye rededi venefafau ameibigo.

Mina vene kaere bi ini tutubena venefafau ka ameibigo.

⁵¹ Ini vana yaku ini yeiva bi sena moi ogau riyo,

ma matuka vene ini mokena sa ina yaku meki reyo.

⁵² Ina yaku ourefeidena vene di amena vava sanari eyarei vau reyo,^l resi matuka de vene bi ina yaku moi odorori vau reyo.

⁵³ Rauna amededi vene bi ina yaku buni ini ukari moi vata baiyo.

Resi gugura tau amiye bi ina yaku vana koina moi feidei diyo.

ⁱ 1.37 Gen 18.14 ^j 1.46-55 1 Sam 2.1-10 ^k 1.48 1 Sam 1.11 ^l 1.52 Job 5.11; 12.19

⁵⁴ Ini naivo vene Israel aedeyo,
ini iriyeduка mokeyo dada.

⁵⁵ Ma uni tutubena vene toga toga ago niyo,^m
Abraham ma ini tutubena rofu!"

⁵⁶ Kamini Mary bi Elizabeth sa eo regode amesi ini rautu rofu dairiyo.

Elizabeth yaku John moi vata reyo

⁵⁷ Elizabeth di mida moina aru okiyo ri, rumana mida moiyo. ⁵⁸ Kamini ina atafu amededi vene ma ini usika ourena yaku Varika Amiye di ini iriyeduка tora ina rofu vata niyo sina neideyadi ri, bi ina sa ada no iniyadi.

⁵⁹ Meda vana berou autu regoderi, bi rumana mida di rovaita nugagedi vo nisi, egogo resi ini roka bi Zechariah vo nilegedi, ini baba di roka.ⁿ

⁶⁰ Idu ini nono niyo, "Ide, ini roka bi John."

⁶¹ Ina vene ya niyadi, "Idu ya yi usika ourenari bi mina roka bi koina!" ⁶² Kamini ina vene yaku vana dudu rumana mida di baba rofu ni kaiteyadi rumana mida di roka bi beika nisi mago.

⁶³ Zechariah yaku bura rina buka yokoi ni kaitesi yomakai bura reyo, "Ini roka bi John." Ina tau noibanu vakoi tururu reyadi! ⁶⁴ Mina medari, Zechariah dubusa ago nigamo. Resi Sei rofu moi odoro rena ago buni niyo. ⁶⁵ Mina dada, ina adina vene tau ori yaku ini uka vata baiyo, ma mina vegu di sina bi Judea omuna gagani tau rofu ni nega bogasa reyadi. ⁶⁶ Mina sina neideyadi vene tau yaku mokesi niyadi, "Mina mida yaku beika vegu moi ogau rigo?" Adina Varika Amiye di vava bi mina midafafau amedo mini.

Zechariah di ada reyo yauta Sei rofu

⁶⁷ Vima Kikifa yaku John ini baba di uka vata baiyo dada, Sei di ini ago niyo:

⁶⁸ "Varika Amiye ni moi odoro renadi, kaere bi Israel di ini Sei!
Idu ina bi una oto reyo, adina ina yaku ini vene moi vegu riyo.

⁶⁹ Moi vegu rina amiye una maro.

Ina bi ini naivo amiye David di ini tutubena gutuna deyo.

⁷⁰ Sei di ago nidedi vene kikifa yaku mina amiye sena niyadi,

⁷¹ una rofu uni tuma vene iya resi una moi vegu rego,
ma una rofu gubuyo rededi vene ka moi vegu rego.

⁷² Sei yaku uni tutubena vene rofu ini iriyeduка moi ogau rigo ina rofu niyo,

ma ini uka ago kikifa toto de nigo.

⁷³ Uni tutubena Abraham rofu ni tore reyo,

^m 1.55 Gen 17.7 ⁿ 1.59 Lev 12.3

⁷⁴ ina yaku uni tuma vene rofu una moi vegu rigo.

Ina rofu naivo renadi ma ori ga rena di ida riyo.

⁷⁵ Kikifa dudu, mokena rorobo dudu ini nemokori dinadi,
uni vegu ameibobina meda tauri.

⁷⁶ Ma ya, nai mida, bi Sei Odoro Iniye di ago nido amiye vo nibigedi,^o
adina ya bi Varika Amiye ouresi dibigiya,
resi ini ida dogo regiya.

⁷⁷ Ini vene oteimagiya ma Varika Amiye yaku moi vegu rigo bi diba
nigedi,
ini vegu no koite makugo di.

⁷⁸ Adina Sei di iriyeduka una rofu bi ini ukari vata baiyo,
ina yaku uruyaku meda vabara kana omari gutuna una rofu ni
feidego.

⁷⁹ Mukuna ideri ma muyena tumu sa vene rofu mina vabara mago,^p
resi ina yaku uka amuta di ida dudu una ourefeidebogo.”

⁸⁰ Mina mida kamini tora niyo, ma ini vima ka yeiva niyo. Ina bi
gagani autu sanari amegamo, baiyo Israel vene rofu ini ogau niyo medari
mamo.

Iesu vata niyo

(Mt 1.18-25)

2 ¹Mirona ariri, Caesar Augustus yaku ago ni feideyo gagani tau vakoi
rofu, amiye tau roka moigedi di. ²Ouresi roka moi yadi ini medari
bi, Quirinius yaku Syria ri gavana niyo ariri. ³Mina ago dada, amiye
tau vakoi ini roka magedi vo nisi, yokoi yokoi iniye di taoni iniye rofu
dairiyadi.

⁴Joseph Nazareth, Galilee di taoni yokoi rofu boyo, kini David di vata
nina di taoni Bethlehem, Judea gagani rofu boi okiyo, adina ina bi David
di tutubena. ⁵Bethlehem taoniri, Joseph ini roka mago di, Mary kaere bi
ina ni maradi mego vo nisi ka afesi, gogo boyadi. Mary niyo. ⁶Mironari
amegamadi ri, bi Mary ini mida moina meda okiyo. ⁷Mary yaku ini
ourena rumana mida odisi varuka dudu kumu risi, kamini boromakau di
iruku iridedi mauari moi aiyo, adina bi oto vene di amena varena yava bi
vata baiyo.

Naivonaivo vima ma mamoe nari rededi vene

⁸Mamoe nari rededi vene be bi nomu tora gaganiri amegamadi. Urusa
niyo ma ini mamoe tau nari regamadi. ⁹Kamini, Varika Amiye di naivo
naivo vima yokoi bosi mina vene adinari ogau niyo, ma Varika Amiye di

^o 1.76 Mal 3.1 ^p 1.79 Is 9.2

vabara yaku ina vene buru riyo ma ori yaku no iniye niyadi. ¹⁰Resi naivo naivo vima yaku mina vene rofu niyo, “Ori ga refa, sina buni moi baiyaka dada. Mina sina yaku amiye tau ada regedi. ¹¹Adina gua mina mida, David di taoniri, ya vene di moi vegu rina amiye sena vata niyo. Mina bi Keriso Varika Amiye! ¹²Gokai vei mama rigedi di ida bi yomakai: Rumana mida keika baku regedi, boromakau di iruku irina maua ideri varedo, varuka dudu fafa riyadi.”

¹³Kamini, minari maka, omari naivo naivo vima tau gade gade ogau nisi mina naivo naivo vima sa, Sei rofu ni vakena resi yauta nigamadi:

¹⁴“Oma Odoro Iniye Sei di roka moi odoro renadi,

kaere mina konori Sei yaku ada redo bi uka amuta ya rofu mago!”

¹⁵Mina koina niyo ri, mina naivo naivo vima tau gade omari dairiyadi, ma mamoe nari rededi vene iniye iniye rofu niyadi, “Bethlehem ri bonadi, beika bi vata niyo, Varika Amiye yaku una oteimaro kana venadi.”

¹⁶Evade kamini boyadi ri, Mary, Joseph sa baku reyadi. Ma rumana mida keika bi boromakau di iruku iridedi mauari varegamo. ¹⁷Mina veyadi ri, mamoe nari rededi vene yaku dadisi naivo naivo vima yaku beika ni oteimaro mina mida rofu ni negau reyadi. ¹⁸Kamini mina ago neideyadi vene tau mamoe nari rededi vene di sina neidesi tururu reyadi. ¹⁹Ma Mary yaku mina ago ma vegu tau ini ukari mokei tora iniye reyo. ²⁰Kamini mamoe nari rededi vene dairiyadi, Sei rofu yauta nigasa ini roka moi odoro reyadi, adina neidegasa veyadi vegu bi rama iniye, naivo naivo vima yaku ni oteimaro kana.

Iesu di roka aiyadi

²¹Meda vana berou autu regode moiyo ri, rumana mida di ini rovaita nugana medari, Iesu ini roka aiyadi, ini nono di uka ideri varena koderi; naivo naivo vima yaku niyo kana mina roka niyadi.^q

Iesu Sei ni vakena yava ideri afei boyadi

²²Nono ini kino nufa meda koina niyadi ruaka nigi Moses di ago gira kana, Joseph ini rema Mary sa Jerusalem rofu ini mida Iesu moi boyadi, Varika Amiye rofu magedi vo nisi.^r ²³Varika Amiye di ini ago girari bura rei niyo kana, “Vata ni oureyadi rumana mida tau bi Varika Amiye rofu nilegedi.”^s ²⁴Ina boyadi, Varika Amiye di ago gira kana, koena erena remanu ba kefuta di mida remanu ori sisika rena ma Sei rofu kana magedi.

²⁵Mina ariri, amiye yokoi roka Simeon Jerusalem ri amegamo. Ina bi mokena rorobo amiye ma Sei ori regamo amiye. Ina bi Israel di moi

^q 2.21 Lev 12.3; Lk 1.31 ^r 2.22-24 Lev 12.6-8 ^s 2.23 Ex 13.2, 12

vegu rina amiye nari amegamo, ma ina bi Vima Kikifa yaku vata baiyo. ²⁶Vima Kikifa yaku ka ina rofu niyo, ina bi de muyego Varika Amiye ini Keriso vego mamo. ²⁷Vima Kikifa yaku Sei vakena yava ideri Simeon afei dui reyo. Mida keika Iesu bi ini nono baba yaku moi dui reyadi, Moses di ago gira di vegu regedi vo nisi. ²⁸Kamini Simeon yaku mida keika moisi buda aisi Sei rofu ni buni resi niyo:

²⁹“Varika Amiye e, yi moimai rei tavoi reida amiye gua muyena sanari uka amuta dudu digida,
yi ago niyo kana.

³⁰Adina bi nai nemoko yaku yi moi vegu rena ida veyaka mini.

³¹ Ya sena amiye tau vakoi di ini neri mina vegu dogo reyo:

³²Vabara ruaka yokoi tutubena idana vene bedakai rofu moi evata reyo,^t
ma vabara yi vene Israel mago.”

³³Rumana mida di nono baba yaku Simeon di ago ina rofu neideyadi ri, bi tururu reyadi. ³⁴Kamini Simeon yaku ina remanu rofu buni nisi mida di nono Mary rofu nisi niyo, “Mina mida yaku Israel vene tau gade moi keto rego, ma tau gade tora ka moi vegu rigo. Ina bi Sei di ini rebe kana bogo, ma amiye tau tora yaku mokena no dudu ni vabi regedi.

³⁵Mina rofu dudu, ina yaku ini mokena no moi sui ridedi moi negau rigo. Ma mina mokena iriyeduwa yaku yi vima ora kana vaga imigo.”

³⁶Sei di ago nido rema yokoi ka minari amegamo, ini roka bi Anna, kaere bi Panuel di ini vefa, Asher di ini rubu rema. Ina ka bi rema ugava; meyo, idu lagani viro vara maka ini maruka sa vakoi ameyadi. ³⁷Ini maruka muyeyo ma lagani ⁸⁴ obu ni amegamo.^u Ina bi Sei vakena yava de ferei tavoi regamo, uru ari Sei ni vakena regamo rofu iruku irina de di ago gira, moi gira regamo ma usa usa vegu. ³⁸Mina ariri ina okiyo ri, Sei rofu buni tora gade masi Jerusalem moi vegu rigo vo nisi nari rededi vene tau vakoi ni oteimaro mina rumana mida di ini sina bi.

Nazareth ri dairiyadi

³⁹Iesu ini nono baba yaku Varika Amiye di ago gira di ini vegu tau vakoi rei vau reyadi ri, bi kamini Galilee ri dairiyadi, ini taoni iniyi Nazareth ri boyadi.^v ⁴⁰Mina mida bi kamini tora nibogamo yeiva nufa ma mokena tora iniyi dudu. Sei di ini buni tora iniyi ina rofu magamo.

Rumana mida Iesu Sei ni vakena yava ideri

⁴¹Lagani neinei Iesu ini nono baba sa Jerusalem bogamadi, Passover Irakuna regedi vo nisi.^w ⁴²Kamini Iesu ini lagani tuerori, ina regode,

^t 2.32 Is 42.6; 49.6; 52.10 ^u 2.36-37 lagani ⁸⁴ obu ni amegamo; o ini vata nisi amegamo lagani bi ⁸⁴. ^v 2.39 Mt 2.23 ^w 2.41 Ex 12.1-27; Deut 16.1-8

ini tutubena yarededi kana vegu, vakoi bi mina irakuna regedi vo nisi Jerusalem boyadi. ⁴³Irakuna meda koina niyo ri, dairigamadi, idu rumana mida Iesu maka bi Jerusalem ri ameyo. Ini nono baba diba de. ⁴⁴Ini mokenari bi ina bi ini amiye fogori dido mironi. Meda yokoi maka koina niyo fufutari mamo, ini usika ourena vene rofu ma asiyaka vene rofu, Iesu kamini maina reyadi. ⁴⁵Baku rena de reyadi dada, Jerusalem ri maina regi dairiyadi. ⁴⁶Meda regode koina niyo ri, ina vene yaku Sei vakena yava ideri baku reyadi, oteimana vene di utari amegasa ini sina neidegasa ina rofu ni kaitegamo. ⁴⁷Ini ago neidegamadi vene tau bi ini moke moke rofu ma ini ago dairi ni kabai regamo rofu tururu iniyre yadi. ⁴⁸Ini nono baba ka tururu reyadi mina veyadi ri, kamini ini nono yaku ni kabai resi niyo, “Nai mida, beika resi una rofu makai reyo? Na yi baba sa bi uka esika dudu ya maina reyafa.”

⁴⁹Ni kabai resi niyo, “Beika resi na maina rededi? Na nai Baba di yavari ameida bi, ya diba ba ide?” ⁵⁰Ini ago bi neideyadi, idu sina rama diba de.

⁵¹Kamini Iesu ini nono baba sa Nazareth ri dairiyadi, ma ini nono baba di ago neidegamo. Ini nono yaku mina vegu tau ini uka ideri moi gira regamo. ⁵²Kamini Iesu tora nigamo, rovaitari, ma moke moke ri. Sei di uka ma amiye di uka ka ada regamadi ini mina vegu dudu.^x

John Baptist yaku ago ni rausi reyo
(Mt 3.1-12; Mk 1.1-8; Jn 1.19-28)

3 ¹Tiberius Caesar bi lagani 15 varika amiye ni amegamo ri, Pontius Pilate bi Judea di gavana, ma Herod bi Galilee di gavana. Herod di ourena Philip bi Iturea ma Tranchonitis di gavana, ma Lysanias bi Abilene di gavana. ²Annas ma Caiaphas bi Sei ma amiye utari naivo naivo vene tora. Mina ariri, Sei yaku John, Zechariah di mida, rofu ini ago maro, gagani autu sanari. ³Kamini, John yaku Jordan Koru seri gagani tau rofuri digasa vegu no feresi moi etagae rina ma Sei yaku ini vegu no koite makuna di babatiso di ago ni rausi regamo.

⁴ Sei di ago niyo amiye Isaiah di bukari bura resi niyo kana:^y

“Amiye yokoi di goroka bi gagani autu sanari raka nido,

‘Varika Amiye di ida dogo resi
ini dibo ida moi rorobo rifa.

⁵ Soku tau moi vata baigedi,
omuna tora tora ma omuna keika keika tau bi nomu nigo.

Ida kevo sana moi rorobo risi
giyo ida bi amuta nigedi.

⁶ Amiye tau yaku vegedi Sei di vava gokai amiye moi vegu rego mina!” ”

^x 2.52 1 Sam 2.26; Prov 3.4 ^y 3.4-6 Is 40.3-5 (LXX)

⁷Amiye tau gade John rofu babatiso reyainedi baigamadi ri, ina vene rofu niyo, “Ya bi aruma di mida mida kana, kaere yaku ya niyo, ‘Sei di gubuyo baigo, mina rofu ori diyainedi?’^z ⁸Mina dada vegu no feresi moi etagae rina vegu di vegu iniye yabo meko rama rena kana moi ogau rifa. Ma ya kaya nigi ga kora refa, ‘Abraham bi uni tutubena.’ Adina ya vene rofu nida, Sei ina diba mina fore dudu Abraham di tutubena rigo!^a ⁹Viro bi yabo daruri sena ka aiyadi ma yabo neinei meko buni de varededi bi nu makusi itafafau you bogedi.”^b

¹⁰Amiye tau gade yaku ni kaitesi niyadi, “Ma una bi beika regifa?”

¹¹John yaku ni kabai resi niyo, “Kaere ini varuka remanu amiye bi varuka de amiye rofu bi yokoi mago. Ma kaere iruku nufa bi, rau re.”

¹²Fore butu rededi vene be ka babatiso moigedi vo nisi boyadi yaku ni kaiteyadi, “Oteimana amiye, ma una bi gokai regifa?”^c

¹³Ina yaku ni kabai resi niyo, “Ago gira yaku niyo kana maka moifa, moi tau tora bi ga refa.”

¹⁴Iya rededi vene be ka ina rofu ni kaitesi niyadi, “Una bi gokai regifa?”

Ina yaku niyo, “Amiye rofu fore moi tavoi ga refa, ma ofa sina dudu ina rofu ago ga nifa. Ma yi moimai dudu, gokaisanu moisa bi, kaini ada refa.”

¹⁵Gua amiye tau di uka mokena vau reyadi, dada mokena deda moi niyadi, “John bi Keriso mini ba?” ¹⁶Kamini ina yaku mina amiye tau rofu ni kabai resi niyo, “Na yaku koru dudu ya babatiso reida, idu baigo amiye ini vava yaku nai vava etei riyo, ye na bi rorobo de ini yuka ro di maena younegida. Mina amiye bi Vima Kikifa ma ita dudu ya babatiso rego.

¹⁷Ini witi fotaka utei resi koka rena di gadi bi ini vanari moi gira resi witi ada di fotaka dobeka gutuna makusi ini yavari aigika, idu ini sanika bi kafena de itari ori kamu rego.”

¹⁸Ina yaku ago tauri amiye rofu Sina Buni ni oteimaro. ¹⁹Idu John yaku, Herod kaere bi Galilee di ourefeidena amiye, di no moi negau regamo. Ini adina bi ini dubuini di rema Herodias meyo. Berou bi ini vegu no tau tora reyo mina ni negau reyo.^d ²⁰Mina vegu reyo ri, bi ini no dubusa moi tora risi John dibura yavari aiyo.

Iesu babatiso reyo

(Mt 3.13-17; Mk 1.9-11)

²¹Amiye tau babatiso maro ri, bi Iesu ka babatiso reyo. Usa usa nigamo ri, oma ekeyo ²²ma Vima Kikifa bi pune erena kana rovaita dudu desi ina fafau rou riyo. Ma goroka yokoi oma gutuna degasa niyo, “Ya bi nai uka maida mida; ada tora gade ya rofu reida.”^e

^z 3.7 Mt 12.34; 23.33 ^a 3.8 Jn 8.33 ^b 3.9 Mt 7.19 ^c 3.12 Lk 7.29

^d 3.19-20 Mt 14.3-4; Mk 6.17-18 ^e 3.22 Gen 22.2; Ps 2.7; Is 42.1; Mt 3.17; Mk 1.11; Lk 9.35

Iesu ini tutubena vene*(Mt 1.1-17)*

²³Ini vata niyo vegu bi 30 kanari mamo ini moimai reyo. Amiye yaku mokegamadi bi Iesu bi Joseph di ini rumana mida. Joseph bi Heli di ini rumana mida. ²⁴Heli bi Matthat di ini rumana mida. Matthat bi Levi di ini rumana mida. Levi bi Melchi di ini rumana mida. Melchi bi Jannai di ini rumana mida. Jannai bi Joseph di ini rumana mida. ²⁵Joseph bi Mattathias di ini rumana mida. Mattathias bi Amos di ini rumana mida. Amos bi Nahum di ini rumana mida. Nahum bi Esli di ini rumana mida. Esli bi Naggai di ini rumana mida. ²⁶Naggai bi Maath di ini rumana mida. Maath bi Mattathias di ini rumana mida. Mattathias bi Semein di ini rumana mida. Semein bi Josech di ini rumana mida. Josech bi Joda di ini rumana mida. ²⁷Joda bi Joanan di ini rumana mida. Joanan bi Rhesa di ini rumana mida. Rhesa bi Zerubbabel di ini rumana mida. Zerubbabel bi Shealtiel di ini rumana mida. Shealtiel bi Neri di ini rumana mida. ²⁸Neri bi Melchi di ini rumana mida. Melchi bi Addi di ini rumana mida. Addi bi Cosam di ini rumana mida. Cosam bi Elmadam di ini rumana mida. Elmadam bi Er di ini rumana mida. ²⁹Er bi Joshua di ini rumana mida. Joshua bi Eliezer di ini rumana mida. Eliezer bi Joram di ini rumana mida. Joram bi Matthat di ini rumana mida. Matthat bi Levi di ini rumana mida. ³⁰Levi bi Simeon di ini rumana mida. Simeon bi Judah di ini rumana mida. Judah bi Joseph di ini rumana mida. Joseph bi Jonam di ini rumana mida. Jonam bi Eliakim di ini rumana mida. ³¹Eliakim bi Melea di ini rumana mida. Melea bi Menna di ini rumana mida. Menna bi Mattatha di ini rumana mida. Mattatha bi Nathan di ini rumana mida. Nathan bi David di ini rumana mida. ³²David bi Jesse di ini rumana mida. Jesse be Obed di ini rumana mida. Obed bi Boaz di ini rumana mida. Boaz bi Salmon di ini rumana mida. Salmon bi Nahshon di ini rumana mida. ³³Nahshon bi Amminadab di ini rumana mida. Amminadab bi Admin di ini rumana mida. Admin bi Arni di ini rumana mida. Arni bi Hezron di ini rumana mida. Hezron bi Perez di ini rumana mida. Perez bi Judah di ini rumana mida. ³⁴Judah bi Jacob di ini rumana mida. Jacob bi Issac di ini rumana mida. Issac bi Abraham di ini rumana mida. Abraham bi Terah di ini rumana mida. Terah bi Nahor di ini rumana mida. ³⁵Nahor bi Serug di ini rumana mida. Serug bi Reu di ini rumana mida. Reu bi Peleg di ini rumana mida. Peleg bi Eber di ini rumana mida. Eber bi Shelah di ini rumana mida. ³⁶Shelah bi Cainan di ini rumana mida. Cainan bi Arphaxad di ini rumana mida. Arphaxad bi Shem di ini rumana mida. Shem bi Noah di ini rumana mida. Noah bi Lamech di ini rumana mida. ³⁷Lamech bi Methuselah di ini rumana mida. Methuselah bi Enoch di ini rumana mida. Enoch bi Jared di ini rumana mida. Jared bi Mahalaleel di ini rumana mida. Mahalaleel bi Kenan di ini rumana mida.

³⁸Kenan bi Enosh di ini rumana mida. Enosh bi Seth di ini rumana mida. Seth bi Adam di ini rumana mida ma Adam bi Sei di ini rumana mida.

Iesu no reyaine vo nisi ini uka maina reyo
(Mt 4.1-11; Mk 1.12-13)

4 ¹Iesu Jordan koruri gutuna dairiyo ri, Vima Kikifa bi ina vata baiyo. Kamini Vima Kikifa yaku gagani autu sanari afei boyo ²ma mironari meda 40 ideri Bodaka yaku no reyainedi vo nisi ini uka maina reyo. Mina meda tauri Iesu iruku irina de, ye meda koina niyo ri rauna reyo dada.

³Kamini Bodaka yaku ina rofu niyo, “Ya bi Sei di Mida vo nisi, bi yomina fore ni kumo iruku niyaine.”

⁴Iesu yaku ni kabai resi niyo, “Sei di agori yaku bura reyo bi, ‘Amiye bi iruku dudu maka de amegedi.’ ”^f

⁵Kamini Bodaka yaku afei bosí minari maka ourefeidená amena sana tau mina kono tora noibanuri oteimasi ⁶niyo, “Mina tau di vava ma buni vayavaya ya magida, adina mina tau bi na rofu maro, ma kaere uka mokesi magida bi magida. ⁷Mina dada, nai adinari na ni vakegi efuka meimigiya vo nisi, bi mina tau vakoi ya magida.”

⁸Iesu yaku ni kabai resi niyo, “Yomakai bura reyo, ‘Varika Amiye yi Sei ni vakesi ina rofu maka naivo rel?’ ”^g

⁹Kamini Satani yaku Jerusalem ri afei bosí Sei vakena yava tebori moi are resi niyo, “Ya bi Sei di Mida vo nisi minari gutuna ya kaya maku ne.

¹⁰Adina Sei di agori yaku bura reyo bi, ‘Sei yaku ini naivo naivo vima ago gira mago ya dada ma ya nari regedi.’ ”^h ¹¹Ma, ‘Ini vana dudu ya moi odoro regedi, yi yuka foreri de tagi magiya.’ ”ⁱ

¹²Iesu yaku ni kabai resi niyo, “Yomakai niyo, ‘Varika Amiye yi Sei bi ini uka maina ga re.’ ”^j

¹³Bodaka yaku Iesu vegu no reyainedi vo nisi ini uka maina koina niyo ri, bi ferei diyo kumo meda buni yokoiri.

Iesu ini moimai ouresi reyo Galilee ri
(Mt 4.12-17; Mk 1.14-15)

¹⁴Iesu bi Vima Kikifa di vava dudu Galilee ri dairiyo, ma iniyé di ini sina bi mina gagani tau vakoiri ni nega bogasa reyadi. ¹⁵Ini usa usa yavari amiye oteimago ma ina tau vakoi yaku ini roka moi odoro regamadi.

Nazareth ri Iesu etofa reyadi
(Mt 13.53-58; Mk 6.1-6)

¹⁶Kamini ini tora niyo taoni Nazareth ri dairiyo. Ini rei baiyo kana, Sabati medari usa usa yavari bosí buka kikifa bura vegi dadisi boyo.

^f 4.4 Deut 8.3 ^g 4.8 Deut 6.13 ^h 4.10 Ps 91.11 ⁱ 4.11 Ps 91.12 ^j 4.12 Deut 6.16

¹⁷Ina vene yaku Isaiah Sei di ago nido amiye di ini buka maradi. Kamini buka uforo resi bura reyadi sana baku resi vesi niyo:

¹⁸“Varika Amiye di Vima bi na sa,^k

na vo niyo dada, sina buni irava vene rofu ni rausi regida.

Ina yaku na ni feideyo bi, dibura tavoi rededi vene nigida ina bi moi younegida,

ma ne taufa vene rofu bi ini ne buni regida, ma dubusa nene reyagane;

ma kaere moke itu vene younegida.

¹⁹ Resi ni rausi regida, ‘Varika Amiye di ini mokei vava redo lagani bi mini,

ma Varika Amiye yaku ini vene moi vegu rego.’ ”

²⁰Kamini Iesu yaku buka firo risi nari redo amiye dairi masi ameinu reyo. Amiye tau usa usa yavari Iesu maka vei mama reyadi. ²¹Ma ina vene rofu nigi kora reyo, “Mina neideyadi Sei di ago bi gua meda rama aiyo.”

²²Kamini amiye tau yaku ina bi amiye buni vo niyadi, sina buni buni niyo dada tururu resi niyadi, “Mina bi Joseph di mida, ba?”

²³Kamini Iesu yaku ina vene rofu niyo, “Rama bi mina mokena ago na rofu yomakai nilegedi, ‘Gauka dogo amiye, ya kaya moi buni ri kumo.’ Ka nilegedi, ‘Beika Capernaum ri reyo bi neideyafa, dada minari yi rautu iniyeri ka re.’ ” ²⁴Ma Iesu yaku niyo, “Rama ya vene rofu nida, Sei di ago nido amiye ini rautu vene yaku ini ago de neidededi.^l

²⁵“Idu rama iniyie ya nida, Elijah ini ariri, obu tau gade Israel ri amegamadi bi lagani regode ma eo koru ida miya de deyo ma adabo tora gade Israel gagani fono reyo.” ²⁶Sei yaku ini vene nokoi rofu Elijah de ni feideyo, idu bi taoni yokoi roka Zarephath Sidon gagani atafu obu yokoi rofu maka ni feideyo.” ²⁷Ma Elisha Sei di ago nido amiye di ini ariri bi, refera nufa vene tau tora Israel ri amegamadi, idu yokoi kava moi ruaka de riyo, mina bi Syria amiye, Naaman maka.”^o

²⁸Usa usa yavari egogo reyadi vene tau yaku mina sina neideyadi ri, bi gubuyo tora reyadi. ²⁹Mina vene dadisi Iesu vanau risi taoniri moi yaku boyadi ini taoni are redo omuna ika yokoiri raravari maku negedi vo nisi. ³⁰Idu mina vene tobo yaku bae boyo.

Amiye yokoi vima no nufa (Mk 1.21-28)

³¹Iesu Capernaum, Galilee taoni yokoiri bosi Sabati medari amiye oteimagamo. ³²Ye ini oteimana ago rofu tururu reyadi, adina ini ago bi

^k 4.18-19 Is 61.1-2 (LXX) ^l 4.24 Jn 4.44 ^m 4.25 1 Kgs 17.1 ⁿ 4.26 1 Kgs 17.8-16

^o 4.27 2 Kgs 5.1-14

vava nufa.^p ³³Usa usa yavari, amiye yokoi vima no ini rovaitari amegamo kaere bi goroka torari imuna nigasa niyo, ³⁴“Aee, Iesu Nazareth amiye, una rofu bi beika ura reisa? Ya bi una ukero vau regika okiyo ba? Na na diba ya bi kaere: ya bi Sei di Kikifa Amiye!”

³⁵Iesu yaku ni kaka reyo, “Babo ni. Mina amiye rofu yakusi di!” Kamini mina vima no yaku mina amiye ina vene atafu moisi konori maku nesi ini rovaitari yakusi ferei diyo. Idu mina vima yaku esika yokoi de maro.

³⁶Amiye tau bi tururu resi iniye iniye ni kaiteyadi, “Mina sina bi beika? Ina bi vava ma yeiva nufa vima no rofu ago gira nido ri feregasa yakudedi!” ³⁷Kamini Iesu yaku beika reyo sina gagani tora noibanuri urafo rei diyo.

Iesu yaku amiye tau moi buni riyo

(Mt 8.14-17; Mk 1.29-34)

³⁸Usa usa yava feresi Simon di yavari dui reyo. Simon di imokai rema bi gauka resi rovaita vakivaki reyo, ye ina vene yaku Iesu inafafau usa usa niyadi. ³⁹Ye mina rema atafu are resi mina gauka besenai ago maro ri, rovaita vakivaki bi fereyo. Minari maka dadisi iruku dabara resi nari regamo.

⁴⁰Meda nei tomu niyo ma uru baiyo ri, ini vene gauka nufa vene tau tora Iesu rofu afei baiyadi; ini vana ina yokoifafau aiyo ri, moi buni riyo. ⁴¹Ma vima no ka amiye tau rofu yakusi ababa nigasa, “Ya bi Sei di Mida mini!”

Idu Iesu yaku besenai ago nisi ago ga niyaganedi ni maro, adina ina vene bi ina diba ina bi Keriso.

Iesu usa usa yavari ini sina ni rausi reyo

(Mk 1.35-39)

⁴²Aru vejo ri, Iesu dadisi gagani autu sanari diyo, idu amiye tau gade yaku maina regamadi. Baku reyadi ri, bi moi gira reyadi ga diyaine vo nisi. ⁴³Idu ni kabai resi niyo, “Na bi Sei di ourefeidena amena sana di sina buni taoni yokoi yokoiri ka ni rausi regasa digida, adina Sei yaku na moi feideyo dada.”

⁴⁴Ye Judea gagani di usa usa yavari ago ni rausi regamo.

Iesu yaku ini ourena usi dina vene raka niyo

(Mt 4.18-22; Mk 1.16-20)

5 ¹Meda yokoiri, Gennesaret^q koru moka tora seriri, Iesu are regamo ri, amiye tau tora iniye ina adinari, are rei desi Sei di ago neidegi

^p 4.32 Mt 7.28-29 ^q 5.1 *Gennesaret* Ini roka idana bi Galilee.

reyadi.^r ²Bouti remanu veyo koru seri adinari amededi ma oyena moidedi vene bi bouti feresi koru seriri ini oyena fate koitegamadi. ³Kamini Iesu yaku bouti yokoi, Simon di boutiri keu risi niyo keika maka beku rego ma koruri neyaine. Resi bouti odorori ameinu resi amiye tau gade oteimagi kora rego vo nisi.

⁴Ago ni vau reyo ri Simon rofu niyo, “Yi bouti koru mokari besa karoa rei bosi yi fate maku ne oyena moi yainedi.”

⁵Idu Simon yaku ni kabai resi niyo, “Varika Amiye, urusa dobari moimai tora rei baiyafa idu be de uyafa. Idu ya yaku nisa dada dubusa fate younegida.”^s

⁶Makai reyadi ri, bi oyena tau tora iniye moyadi. Ini fate ka uesti regi reyo,^t

⁷dada ma asiyaka be bouti yokoiri rofu mina vana maragane vo nisi raka ni boyadi. Baiyadi rofu bouti remanu moi vata baiyadi ma kamini tomu negi regamo. ⁸Idu Simon Peter ya mina veyo ri, Iesu di efukari yuka odesi niyo, “Varika Amiye e, na rofu etagae ri! Na bi vegu no reida amiye!”

⁹Ye ina ini asiyaka tau sa tururu reyadi mina oyena tau moyadi rofu, ¹⁰Zebedee di mida remanu, James ma John, kaere bi Simon di asiyaka ka tururu reyadi. Ma Iesu yaku Simon rofu niyo, “Ori ga re, gua ari gutuna bi oyena koda rena kana amiye ni rutu regiya.”

¹¹Ini bouti vasari rutu rei baiyadi fufutari bi, ini beika baika feresi Iesu usi diyadi.

Iesu yaku refera amiye yokoi moi buni riyo

(Mt 8.1-4; Mk 1.40-45)

¹²Taoni yokoiri amegamo ri, bi refera amiye yokoi baiyo. Iesu veyo ri, bi ini efuka ini ne uruma konori odesi Iesu guyaguya niyo, “Varika Amiye e, ya ura reisa vo nisi, ya yaku na moi ruaka rigiya!”^u

¹³Iesu yaku ini vana moi roto risi mina amiye avaka moisi niyo, “Na yaku ura reida; ruaka ni!” Minari maka ini rovaitari refera gauka ferei diyo. ¹⁴Iesu yaku ago gira ina rofu niyo, “Amiye yokoi ga ni oteima, idu nesi Sei ma amiye utari naivo amiye oteimasi yi rovaita buni niyo kana ori sisika re. Ye amiye vegedi ya bi buni niyo Moses yaku ago girari niyo kana Sei rofu moi ori sisika regiya.”^v

¹⁵Idu Iesu yaku ini mina regamo, sina bi urafo rei tora iniye reyo. Mina dada, amiye tau gade egogo regamadi, sina neidegi ma gauka ita moi buni riyainedi vo nisi. ¹⁶Idu Iesu bi gagani autu sanari usa usa nigi etagae rigamo.

Iesu dibo anua yuka kevo amiye moi buni riyo

(Mt 9.1-8; Mk 2.1-12)

¹⁷Meda yokoiri, amiye ni oteimagamo ri, Pharisee vene ma ago gira oteimana vene be Iesu atafu amegamadi. Ina vene bi Galilee ma Judea rautu

^r 5.1-3 Mt 13.1-2; Mk 3.9-10; 4.1 ^s 5.5 Jn 21.3 ^t 5.6 Jn 21.6 ^u 5.12 moi ruaka ri: Mina gauka bi amiye moi kino rido. ^v 5.14 Lev 14.1-32

tauri ma Jerusalem gutuna baiyadi. Iesu bi Varika Amiye di vava bi ina sa amiye moi buni regika.¹⁸ Amiye be dibo anua yuka kevo amiye yokoi, madunari uakaisi afei baiyadi Iesu di ini neri aigedi vo nisi. Yava ideri gokai moi dui regedi mina maina regamadi.¹⁹ Amiye tau gade dada, moi dui rena bi anua reyadi. Dada yava tebori moi bosi ruba reyadi rofu maina dudu ini ekama sa Iesu di neri, amiye tau fogori moi neyadi.²⁰ Ye Iesu mina vene di mokena vari gira aina veifategasa niyo, “Ya amiye, yi vegu no bi koite makuyaka.”

²¹ Ago gira oteimana vene ma Pharisee vene iniye ni kaitegasa niyadi, “Mina Sei di roka moi no rido amiye bi kaere? Vegu no koite makuna bi Sei yaku maka rego!”

²² Idu Iesu ini mokena veifatesi niyo, “Beika resi makai yi ukari mokededi?²³ Goina ago nigida bi rena gira dei, ‘Yi vegu no bi koite makuyo,’ o ‘Dadisi nana re?’²⁴ Idu, ya vei mama regedi Amiye di Mida bi vava nufa konori vegu no koite makugo.” Kamini Iesu yaku dibo anua yuka kevo amiye rofu niyo, “Ya nida dadisi yi ekama vanau moisi rautu di!”

²⁵ Ye minari maka amiye tau di nemokori dadisi ini varegamo ekama moisi Sei di roka moi odoro regasa ini yavari diyo.²⁶ Amiye tau noibanu tururu reyadi. Ori yaku vata baisi Sei di roka moi odoro resi nigamadi, “Gua medari mina asini vegu de vesifa minaveyafa!”

Iesu yaku Levi raka niyo (Mt 9.9-13; Mk 2.13-17)

²⁷ Mina reyo fufutari bi yakusi nesi fore butu redo amiye roka Levi ini fore butu rena ofesiri amedo mina veyo. Ina rofu niyo, “Na usi bae.”²⁸ Ma dadisi ini gugura tau feresi usi diyo.

²⁹ Kamini Levi ini yavari yaku Iesu di iruku tora reyo ma fore butu rededi vene tau gade ma bouna vene ka mina iruku sanari ameinu regamadi mini.³⁰ Idu Pharisee vene ma ini ago gira oteimana vene bi ago tau nisi Iesu ini usi dina vene ni kaiteyadi, “Beika resi ya bi fore butu rededi vene ma vegu no rededi vene sa iruku iridedi?”^w

³¹ Ye Iesu ni kabai resi niyo, “Gauka de amiye bi gauka dogo amiye de mokegedi, idu gauka vene maka.³² Na bi mokena rorobo vene rofu disi raka nigi de okiyaka, idu vegu no rededi vene rofu okiyaka ina yaku ini vegu no feresi moi etagae riyaine.”

Oyo rena di sina (Mt 9.14-17; Mk 2.18-22)

³³ Amiye be yaku Iesu niyadi, “John di usi dina vene bi ariu Sei rofu usa usa nigasa oyo rededi, ma Pharisee di usi dina vene makai ka rededi, idu yi usi dina vene bi iruku iri tavoi rededi.”

^w 5.30 Lk 15.1-2

³⁴Idu Iesu yaku ni kabai reyo, “Rema mego amiye yaku ini asiyaka vene sa ameibigo ri, iruku oyo regedi ba ide? Ide mada!^x ³⁵Idu mina meda baigo ri rema mego amiye moi digedi, mirona medari mamo iruku oyo regedi.”

³⁶Iesu yaku ina vene rofu mina mokena ago ka niyo, “Amiye yokoi de varuka ruaka tu yokoi de uesi resi varuka kori di ruba fafa rigi de rego.

Makai rego ri, bi varuka ruaka uesi rego ma ini tu kori sa de rorobo nigo.

³⁷Ma amiye yokoi de waini ruaka moisi waini kori di ro ideri aigo. Makai rego ri, bi waini ruaka di ro ufategedi ma waini rausi rego ma ro bi no nigedi. ³⁸Mina dada waini ruaka bi waini di ro ruaka ideri rausi regiya!^y

³⁹Waini iriyo amiye bi ruaka bi de irigo, adina bi nigo, ‘Waini kori bi buni inkiye.’ ”

Sabati meda di ni kaitena ago

(Mt 12.1-8; Mk 2.23-28)

6 ¹Kamini Sabati medari Iesu ma ini usi dina vene sa witi muro idari nana diyadi. Ini usi dina vene yaku witi di ada koma resi ini vanari fufuta resi irigamadi.^z ²Idu Pharisee vene ina rofu niyadi, “Beika resi beika Sabati meda una rofu bi tabu mina rededi?”

³Ma ni kabai resi niyo, “Ya bi buru de veyadi beika David ini amiye sa yaku reyadi mirona medari rauna reyadi ri?^a ⁴Sei di yava ideri dui resi Sei rofu mana beredi moisi irisi ini vene ka maro. Ago gira yaku nido bi tabu Sei ma amiye utari naivo vene maka bi mina beredi irigedi.”^b

⁵Resi ina vene rofu niyo, “Amiye di Mida bi Sabati meda di Varika Amiye.”

Vana kevo amiye

(Mt 12.9-14; Mk 3.1-6)

⁶Kamini Sabati meda yokoiri, usa usa yavari dui resi amiye oteimaro ri, mironari bi vana rama kevo amiye amegamo. ⁷Ago gira oteimana vene ma Pharisee vene vegamadi Sabati medari mina amiye moi buni rigo vo nisi bi ini no dada nisi tourage regika. ⁸Idu mina vene di mokena bi sena vesi mina vana kevo amiye rofu niyo, “Dadisi mina vene di nemokori are re.” Dadisi are reyo ri, bi ⁹ina vene rofu ni kaiteyo, “Ya usa nida, beika vegu bi buni ago gira dudu Sabati medari regiya? Vegu buni regiya o vegu no regiya ba? Amiye di vegu moi rigiya o umuyegiya ba?” ¹⁰Resi ina vene tau gade nene resi mina amiye rofu niyo^c, “Yi vana ae roto ri.” Ma reyo ri, bi ini vana dubusa dairi buni niyo.

^x 5.34-35 Jn 3.29 ^y 5.38 Iesu yaku senagi vegu rena ma ruaka vegu rena sa de moi tanu reyo. Jn 1.17, Rom 10.4, 2 Cor 3.6 baku re. ^z 6.1 Deut 23.25 ^a 6.3-4 1 Sam 21.1-6
^b 6.4 Lev 24.9 ^c 6.10 niyo; buru bedakai gubuyo resi niyo nufa.

¹¹ Idu mina vene di mokena gubuyo yaku vata baiyo ma Iesu rofu beika regedi iniye ni dodi regamadi.

Iesu ini ni feidena vene tuero moiyo
(Mt 10.1-4; Mk 3.13-19)

¹² Mina ariri bi, Iesu omuna yokoiri usa usa nigi boyo, urusa doba Sei rofu usa usa nigamo. ¹³ Aru uveyo ri, ini usi dina vene raka nisi tuero moisi ini roka maro bi ni feidena vene: ¹⁴ Simon (ini roka yokoi Iesu yaku ka niyo bi Peter) ma ini usika Andrew; James ma John, Philip ma Bartholomew, ¹⁵ Matthew ma Thomas, Alphaeus di mida James, ma Simon Zealot,^d ¹⁶ James di mida Judas ma Judas Iscariot, kaere bi Iesu tautore riyo amiye niyo.

Iesu amiye oteimasi gauka moi buni riyo
(Mt 4.23-25)

¹⁷ Kamini ina vene sa deyadi ma nomuri ini usi dina vene tau gade sa are reyadi. Ma Judea gagani vene ma Jerusalem vene tau gade, ma Tyre ma Sidon kone vene tau gade ka minari; ¹⁸ ini okiyadi bi Iesu di ini sina neidegi ma ini gauka moi buni riyainedi. Ma kaere vima no ini rovaitari ka Iesu negau deyadi ina yaku moi buni rigamo. ¹⁹ Amiye tau Iesu avaka moigika vo nisi regamadi adina vava ina rofu yakugamo ri, bi amiye tau gade moi buni rigamo.

Ada rena ma iriyeduka rena
(Mt 5.1-12)

²⁰ Iesu yaku ini usi dina vene rofu vesi niyo,

“Ya kaere ina diba ini vimari Sei di gugura buni nokoi de bi ada regedi,

adina Sei di ourefeidena amena sana bi yi!

²¹ Gua, ya rauna rededi vene bi ada regedi;

adina Sei yaku yi iruku ya mago mironi ma yi uka bere nilegedi!

Gua, ya isaka nidedi vene bi ada regedi;

adina yoga nilegedi mironi!

²² “Amiye yaku ya rofu gubuyo resi fufuta masi ya rofu nifafana resi yi roka moi no regedi ri, Amiye di Mida usi dina dada, bi ada regedi!^e

²³ Mirona medari, ada resi adena ufa, adina yi obini omari moigedi bi tora, adina mina vegu makai dudu ini tutubena yaku Sei di ago niyadi vene rofu reyadi.^f

²⁴ “Idu no baigo mironi ya kaere gua bi gugura tau vene,

^d **6.15 Zealot** Mina bi Rome vene meki regamo amiye yokoi. *Auna rena ago di ini oteimana ago ideri baku re.* ^e **6.22 1 Pet 4.14** ^f **6.23 2 Chr 36.16; Acts 7.52**

yi vegu moi buni rena bi gua moigedi mini!

²⁵ No baigo mironi, ya gua kaere iruku tau iridedi;
rauna regedi mironi!

No baigo mironi ya kaere gua yoga nidedi bi;
isaka nigasa guruo amegedi mironi!

²⁶ “Amiye tau yaku ya ni buni regedi ri, bi no baigo ya rofu; yi
tutubena vene yaku mina ago yokoi maka Sei di ago nidedi ofa vene rofu
nigamadi.

Uka mana tuma vene rofu

(Mt 5.38-48; 7.12a)

²⁷ “Idu na neidededi vene ya rofu nida: yi tuma vene rofu uka masi
ya rofu gubuyo rededi vene rofu buni refa. ²⁸ Ya karaini rededi vene
rofu bi buni tora gade masi ya no rededi vene rofu bi Sei rofu usa usa
nifa. ²⁹ Amiye yokoi yaku yi ragenam famago ri, bi berou ka ma kumo
famaraine. Ma amiye yokoi yaku yi serti moigo ri, bi ferei kaini yifafau
varuka ka ma. ³⁰ Amiye neinei ya rofu ya usa nigo ri, bi mina ma; ma
kaere ya rofu yi beika be moigo ri, dairi ya marainedi bi ga ni. ³¹ Ya ura
rededi amiye yaku ya rofu rebigedi kana, ina rofu makai refa.⁸

³² “Ye ya uka madedi vene maka uka magedi vo nisi bi gokai resi Sei
buni tora gade ya mago? Vegu no rededi vene ka ina rofu uka madedi
vene maka rofu uka madedi! ³³ Ma ya rofu buni rededi vene maka rofu
buni regedi vo nisi bi gokai resi Sei buni tora gade ya mago? Vegu no
rededi vene ka makai rededi! ³⁴ Ya ya diba ina dairisi ya magedi vo nisi
maisa ri, bi gokai resi Sei buni tora gade ya mago? Vegu no rededi vene
ka vegu no rededi vene rofu madedi, maradi kana dairi moigi maka!
³⁵ Idu yi tuma vene rofu uka ma. Vegu buni ina rofu resi masi ya rofu
dairi moigiya di mokena bi ga moke. Makai dudu bi yi buni tora gade
moigiya resi ya bi Sei Odoro Iniye di ini mida vene. Adina ina kaya kaere
amiye ina rofu ni buni de rededi vene ma vegu no rededi vene rofu ka
mokei tora redo. ³⁶ Amiye rofu iriyeduwa refa, yi Baba ka bi iriyeduwa ya
rofu redo kana.

Amiye be rofu kota rena

(Mt 7.1-5)

³⁷ “Amiye di no rofu ga mokei no refa, ma Sei yaku ka yi no rofu mokei
no de rego. Amiye be di nori emana ga refa, ma Sei ka yi nori de ya
emago. Amiye di vegu no mokei toto nifa, ma Sei yaku yi vegu no mokei
koina nigo. ³⁸ Amiye be rofu mafa, ma Sei yaku ya rofu mago. Yi dura
moi vata baigo ri moi varaka varaka resi besa ma vata baibigo regasa

⁸ 6.31 Mt 7.12

rausi rebigo, kamini ya bi ya rofu beika rau resi bi uka bere nigedi. Adina ya amiye gokai toe maledi kana, Sei yaku mina toe dairi ya mago.”

³⁹ Ma mokena ago ina vene rofu niyo, “Ne taufa amiye yaku ne taufa amiye bi de ourefeidego. Makai ina remanu sokuri gogo keto regedi.^h

⁴⁰ Usi dina amiye yaku bi oteimana amiye ebu de rego, idu oteimado mokena tau mina ina tau noibantu yaku moigedi ri, bi ina oteimana amiye kana nigedi.ⁱ

⁴¹ “Beika resi bubudo yi usika ourena di nemokori bi veisa, idu yabo rata yi nemokori bi de ni dodi reisa? ⁴² Gokai ida dudu yi usika ourena rofu nigiya, ‘Dubu na ferei kumo yi nemokori bubudo amedo mina moigida,’ ma ya kaya yi nemokori yabo rata amedo bi de veisa? Ofarosi amiye, yi nemokori yabo rata amedo mina siko moi etagae rigiya, mamo vei mona resi yi usika ourena di nemokori bubudo amedo mina moi etagae ri.

Yabo ma ini meko (Mt 7.16-20; 12.33-35)

⁴³ “Adina yabo buni yaku meko no de varededi, ma yabo no yaku ka meko buni de varededi. ⁴⁴ Ye yabo yokoi yokoi bi ini meko dudu vei mama regiya. Imiye tafari fuka meko butu de regiya. Waini di meko ka imiye yabo rofu butu de regiya.^j ⁴⁵ Amiye buni yaku ini ukari beika mokedo bi buni dada, vegu buni moi baido ma amiye no yaku ini ukari beika mokedo bi no dada, vegu no moi baido, adina beika uka ideri makudo bi ini vena yaku nido mini.^k

Yava rina amiye remanu (Mt 7.24-27)

⁴⁶ “Ya vene bi na rofu nidedi, ‘Varika Amiye e’ idu beika resi na yaku nida kana bi de rededi? ⁴⁷ Amiye tau na rofu baisi nai ago neidesi regedi bi gokai kana amiye ya oteimagida. ⁴⁸ Ina bi amiye yokoi yava akugamo kana, kono goesi guri iniye resi forefafau ini yava moi are reyo. Kamini abata deyo ri, koru yaku nesi ini yava uyo ri de moi kita reyo, adina bi mina yava bi aku mona reyo dada. ⁴⁹ Amiye kaere yaku nai ago neidesi de rego bi amiye yokoi kana kaere bi ini yava vasafafau akuyo; abata yaku ini yava uyo ri, bi minari maka yareyo — ini mina yareyo bi no iniye!”

Iesu yaku Rome di iya rededi vene di ourefeidenam amiye di naivo amiye buni riyo (Mt 8.5-13)

7 ¹ Amiye rofu ini sina tau ni vau reyo ri, bi Capernaum ri okiyo.

² Rome di iya rededi vene di ourefeidenam amiye yokoi di moimai rei

^h 6.39 Mt 15.14 ⁱ 6.40 Mt 10.24-25; Jn 13.16; 15.20 ^j 6.44 Mt 12.33 ^k 6.45 Mt 12.34

tavoi redo amiye yokoi bi gauka reyo; ina bi muyena gauka moiyo. ³Mina iya rededi vene di ourefeidena amiye yaku neideyo bi Iesu bi Capernaum ri, bi ago ni feideyo Jew tora vene be rofu, buni baisi ini moimai rei tavoi reyo amiye moi buni riyainedi ba ide. ⁴Iesu rofu baisi ni guba regasa niyadi, “Mina amiye vana magiya bi buni. ⁵Adina uni vene rofu uka mado dada, una rofu uni usa usa yava bi ina yaku riyo.”

⁶Kamini Iesu ina vene sa boyadi. Yava adina okiyadi ri, bi mina iya rededi vene di ourefeidena amiye yaku ini asiyaka vene rofu ini ago ni feideyo Iesu rofu niyadi, “Varika amiye e, gokai mokegiya ri, bi ga devo adina na bi rorobo de ya yaku nai yavari bogiya. ⁷Mina dada na ka ya rofu baigida bi buni de, idu sina nigiya ma nai naivo amiye buni nigo. ⁸Na ka bi amiye be gabireri aiyo ma ameida dada; iya rededi vene be bi nai gabireri amededi. Na yaku yokoi rofu nida, ‘Bol’ vo nida ri bodo; ma yokoi rofu nida, ‘Bae!’ vo nida ri baido; ma nai moimai rei tavoi redo amiye rofu nida, ‘Mina re!’ vo nida ri redo.”

⁹Iesu mina ago neidesi bi tururu resi kero resi amiye tau gade kaere ina rofu usi diyadi niyo, “Ya nida, Israel ri ka mokena vari gira aina makai de baku reyaka!”

¹⁰Mina ni feideyo vene yavari dairiyadi ri, bi ini moimai rei tavoi reyo amiye bi buni niyo.

Iesu yaku obu di mida moi dadiyo

¹¹Meda doba de,¹ Iesu yaku taoni yokoi roka Nain ri ini usi dina vene ma amiye tau gade sa boyadi. ¹²Taoni ida venau okiyo ri, bi muyena amiye yokoi, guri aigi, uakai yakuyadi. Mina muyena amiye bi obu yokoi di ini mida yokoi maka ma taoni di amiye tau gade gade ka mina obu sa. ¹³Varika Amiye yaku veyo ri, iriyeduwa resi ina rofu niyo, “Isaka ga ni.” ¹⁴Kamini, baisi muyena maua avaka moiyo ri, bi uakaiddi vene are reyadi. Iesu yaku niyo, “Mida godua, na yaku ya nida, dadi!” ¹⁵Kamini, mina muyena godua dadisi ameinu resi ago niyo ma Iesu yaku ini nono maro.

¹⁶Ma amiye tau noibanu ori no inkiye resi Sei di roka moi odoro regasa niyadi, “Sei di ago nido amiye tora yokoi una fogori ogau niyo mini!” Resi ka niyadi, “Sei yaku ini vene rofu vana magi okiyo mini!”

¹⁷Kamini mina vegu di sina bi Judea gagani tau ma ina adina gagani negau tauri urafo reyo.

John Baptist ni feideyadi vene (Mt 11.2-19)

¹⁸John Baptist di usi dina vene yaku mina sina tau ni oteimaradi. Kamini ini usi dina amiye remanu roka nisi ¹⁹ni feideyo Varika Amiye rofu bosi ni kaitegedi, “Ya bi baigo amiye ba, o amiye yokoi tua regifa?”

¹7.11 Meda doba de; burabedakai Ari uveyo ri nufa.

²⁰Ina remanu ina rofu boyadi ri niyadi, “John Baptist yaku una ni feidesi usa usa nigi niyo, ‘Ya bi baigo amiye ba, o amiye yokoi tua regifa?’”

²¹Mina medari, Iesu yaku amiye tau gade moi buni riyo; gauka vene, esika vene, vima no yaku moiyo vene, ma ne taufa vene ka moi buni riyo ma dubusa nene reyadi. ²²Kamini ina vene rofu ni kabai resi niyo, “Bosi John rofu beika vegasa neideyadi nifa: ne taufa vene vededi, yuka no vene nana rededi, refera nufa vene bi moi ruaka niyadi,”^m anema kora vene bi neidededi, muyena vene bi veguri edadiyo, ma ago buni bi irava vene rofu ni rausi reyo.ⁿ ²³Ma kaere na rofu mokei itu de rego bi buni tora gade ina rofu mago!”

²⁴John di ago moi raga rededi vene diyadi ri, bi amiye tau gade Johnfafau ago nigi kora reyo, “Ya bi beika vegi gagani autu sanari boyadi? Doi iye aura yaku moi raudai redo mina vegika ba? ²⁵Idu mironari beika vegika boyadi? Varuka burefe rido amiye ba? Mina kana varuka burefe ridedi ma beika baika burefe moiga irigasa amededi vene bi kini di yavari amededi! ²⁶Idu beika vegika boyadi? Sei di ago nido amiye yokoi ba? Yo, ya vene rofu nida, ina bi Sei di nido amiye, idu ina bi isivaga iniye. ²⁷Mina amiye bi kaere bi buru reyo: ‘Sei yaku makai niyo; nai ago moi raga redo amiye yi budari ni feidegida. Yi ida moi dogo rego.’^o ²⁸Ya vene rofu nida, amededi tau vakoiri bi yokoi yaku John ebu rena de redo. Idu Sei di ourefeidena amena sanari bi kaere amiye roka de mina yaku bi John ebu redo.”

²⁹Amiye tau vakoi ma fore butu rededi vene ka mina sina neideyadi ri, bi Sei di vegu bi rama vo niyadi, adina bi John yaku babatiso reyo dada.^p

³⁰Idu Pharisee vene ma ago gira oteimana vene bi John di babatiso de moyadi dada, Sei di mokena ina vene rofu bi makuyadi.

³¹Iesu yaku niyo, “Ye gua amededi vene bi gokai dudu ni rorotari regida? Ina bi gokai kana? ³²Ina bi mida keika keika kana, maketi sanari amegasa iniye rofu raka nisi nidedi, ‘Una bi ya rofu bibo uyafa, idu ya bi adena de uyadi; muyena yauta niyafa, idu ya bi isaka de niyadi!’

³³Adina John Baptist baisi beredi oyo regasa waini de irigamo ri, kamini niyadi, ‘Ina bi vima no nufa!’ ³⁴Amiye di Mida baisi iruku irisi waini irigamo ri, ya vene yaku niyadi, ‘Mina amiye vefa! Ina bi iruku ma waini irina kurakura amiye. Ina bi fore butu rededi vene ma vegu no vene di asini!’ ³⁵Idu Sei di mokena tora yaku vegu beika tau ini vene rededi dudu una oteimado bi rama mini.”

Iesu bi Pharisee amiye ini roka Simon di yavari ameinu reyo

³⁶Pharisee yokoi yaku Iesu niyo ini yavari vakoi iruku irigedi, dada Iesu ini yavari bosi iruku irina sana boi ameinu reyo. ³⁷Mina taoniri vegu

^m 7.22 *moi ruaka niyadi*: 5.12 baku re. ⁿ 7.22 Is 35.5-6; 61.1 ^o 7.27 Mal 3.1

^p 7.29-30 Mt 21.32; Lk 3.12

no redo rema yokoi yaku neideyo bi, Iesu bi Phariee amiye di yavari amegasa iruku irigamo, dada fore roka alabaster dudu riyadi siua yokoi, ideri bi diga di sisika buni vata baiyo, mina moi boyo.^q ³⁸Bosi Iesu di yuka atafu fufuta are resi isaka niyo. Ini isaka ne koru dudu Iesu di yuka moi dou regi kora resi ini ada iye dudu moi ifi regamo, moi roko rego vo nisi. Ini yuka rafo fuka resi diga rausi reyo. ³⁹Kamini, Iesu raka niyo Phariee amiye mina yaku veyo ri, ini uka ideri iniye niyo, “Mina amiye bi Sei di ago nido amiye vo nisi bi veyadu mina bi gokai kana rema yaku avaka moido. Adina mina rema bi vegu no redo rema!”

⁴⁰Kamini Iesu yaku ni kabai resi niyo, “Simon na bi sina yokoi ya rofu nigida.”

Ni kabai resi niyo, “Oteimana amiye, na rofu ni.”

⁴¹Iesu yaku niyo, “Amiye remanu yaku amiye yokoi rofu fore abitore reyadi; yokoi bi meda 500 di moimai di fore moi tavoi reyo, ma yokoi bi meda 50 di moimai di fore moi tavoi reyo. ⁴²Ina remanu bi mina fore dairi mana anua reyadi. Dada mina amiye ina remanu rofu fore dairi magedi mokena ga moiuyagane vo niyo. Goina yaku bi ina rofu uka tora gade mago?”

⁴³Simon yaku niyo, “Nai mokena bi ina rofu fore iniye moi toka reyo amiye yaku.”

Ma Iesu yaku niyo, “Ya bi rama nisa.” ⁴⁴Kero resi mina rema rofu resi Simon rofu niyo, “Mina rema veisa? Yi yava dui reyaka ri, nai yuka koitegi koru de na maro, idu ina bi nai yuka rafo bi ini ne koru dudu moi dou resi ini ada iye dudu moi roko reyo. ⁴⁵Ya bi de na fuka reyo, idu dui reyaka ri gutuna bi, nai yuka rafo fuka redo mina bi ferena de mini. ⁴⁶Nai adari diga rausi de reyo, idu ina bi nai yuka rafori diga di sisika buni erausi reyo. ⁴⁷Mina dada, ya nida, mina rema ini uka mana tora gade iniye dada, ini vegu no tau gade ka koite makuyo. Idu ini vegu no keika maka amiye bi koite makuyo, ini uka mana ka keika maka.”

⁴⁸Kamini Iesu yaku mina rema rofu niyo, “Yi vegu no bi koite makuyaka.”

⁴⁹Ina sa vakoi iruku iridedi vene yaku iniye ni kaitesi niyadi, “Mina bi kaere, vegu no ka koite makudo?”

⁵⁰Kamini Iesu yaku mina rema rofu niyo, “Yi mokena vari gira aina yaku ya moi vegu riyo; uka amuta dudu di.”

Rema be bi Iesu sa

8 ¹Mina fufutari Iesu yaku taoni ma rautu digasa ago buni ni rausi regamo; Sei di ourefeidena amena sana di ago buni nigamo ri ini usi dina vene tuero ina sa boyadi ²ma rema be ka, kaere bi Iesu yaku vima

^q **7.37-38** Mt 26.7; Mk 14.3; Jn 12.3

no meki reyo, ma be bi ini gauka moi buni riyo: Mary, kaere ini roka bi Magdalene, ina rofu bi, Iesu yaku vima no viro vara meki rei ini rovaitari yaku.^r ³Ma yokoi bi Joanna, ini maruka Chuza bi Herod di ini yava nari redo amiye, ma Susanna ka bi rema yokoi, ma rema tau ka ina vene yaku ini gugura dudu Iesu ini usi dina vene sa nari regamadi.

Oga varina amiye di mokena ago
(Mt 13.1-9; Mk 4.1-9)

⁴Taoni neinei vene tau gade gade ina rofu baisi egogo reyadi ri, ina yaku mokena ago yokoi niyo:

⁵“Amiye yokoi ini yoyava varigi diyo. Ye yoyava vari vari reyo^s ri bedakai bi yuka rafo adina sanari yareyadi ma amiye yaku etei ri fufuta reyadi ma oma di erena yaku iri vau reyadi. ⁶Be bi abita fore odoro yareyadi. Dadiyadi ri, bi abiye niyadi, adina kono bi roko dada. ⁷Ma be bi imiye tafa fogori yaresi vakoi boi tora niyadi ma imiye yaku fafa risi fono reyadi. ⁸Ma be bi kono buniri yaresi imu resi rama 100 niyadi.”

Mina ago niyo ri, ni tora resi niyo, “Kaere neidego, bi neideyaine!”

Mokena ago di ida
(Mt 13.10-17; Mk 4.10-12)

⁹Kamini ini usi dina vene yaku ni kaiteyadi mina mokena ago ni rorotari reyaine. ¹⁰Kamini niyo, “Ya bi Sei di ourefeidena amena sana di kiki ago diba nigika bi ya maro, idu idana vene rofu mokena ago maka nida; ye yomakai vededi, idu vei mama de rededi; ma neidededti, idu diba de nidedi.^t

Iesu oga varina amiye di mokena ago ni rorotari reyo
(Mt 13.18-23; Mk 4.13-20)

¹¹“Mina mokena ago di ini adina bi yomini: yoyava bi Sei di ago. ¹²Amiye bedakai bi yuka rafo ida sanari yoyava yareyadi kana. Ago neideyadi ma Bodaka yaku baigasa ini uka mekori mina ago moi diyo, mokena vari gira aigedi ma moi vegu rigo baebu. ¹³Ma bedakai bi ago neidesi ada dudu moi yadi bi yoyava abita foreri yareyadi kana. Idu ini daru bi de, ma mokena vari gira aina doba de regedi. Ye uka maina regi baigo ri, bi you feidegedi. ¹⁴Ma amiye be bi imiye tafa fogori yareyadi kana. Mina vene bi ago neideyadi, idu mina vegu di mokena toe ma gugura tau gade ma vegu buni buni bi moi forovai reyadi, ye ina bi meko varena de reyadi. ¹⁵Idu amiye be bi kono buniri yoyava yareyadi kana; ago neidesi ini uka buniri moi gira risi yavoi resi toro dudu rama nidedi.

^r 8.2-3 Mt 27.55-56; Mk 15.40-41; Lk 23.49 ^s 8.5 Mirona medari amiye yaku yoyava varigasa konofafau makuyadi. ^t 8.10 Is 6.9-10 (LXX)

Ramefa takura ideri
(Mk 4.21-25)

¹⁶“Amiye yokoi yaku ramefa orisi moi disi takura ideri o ekama gabireri de aigo. Idu, ina bi ini ikina sanari ikigo ye kaere yava dui rededi ka vabara vegedi.” ¹⁷“Adina gokai beika sui niyadi bi yakusi ogau nigedi ma gokai beika bou riyadi bi bou uyounegedi.”

¹⁸“Ya beika neidededi bi mokei mona refa! Amiye kaere ini beika baika nufa bi moi tanu mago. Idu kaere ina bi de iniye iniye nufa, ka ina rofu ini mokena keika amedo, bi moi dairigo.”^w

Iesu ini nono ma ini dubuiyaka sa
(Mt 12.46-50; Mk 3.31-35)

¹⁹Kamini Iesu ini nono ma ini dubuiyaka ina rofu vegi baised bi anua reyadi adina bi amiye tau gade dada. ²⁰Resi ni oteimaradi, “Yi nono ma yi dubuiyaka bi etofaro are resi ini ura bi ya vegi rededi.”

²¹Idu ni kabai resi niyo, “Nai nono ma nai dubuiyaka bi Sei di ago neidesi rededi vene.”

Iesu yaku miya ma aura moi amuta riyo
(Mt 8.23-27; Mk 4.35-41)

²²Meda yokoiri Iesu ini usi dina vene sa bouti yokoiri keu risi niyo, “Una koru moka tora berou eta rofu boi nenadi.” Dada boyadi. ²³Boyadi ri Iesu vareyo, kamini aura yeiva tora koru moka torafafau fu reyo ye koru yaku boutiri vata baigamo, ina bi no baku reyadi dada. ²⁴Ini usi dina vene ina rofu bosi edadisi niyadi, “Ourefeidena amiye, una bi kamini tuyegifa!”

Iesu dadisi aura ma ureure besenai ago maro ma aura bere niyo ma koru moka tora amuta niyo. ²⁵Resi ina vene rofu niyo, “Yi mokena vari gira Sei rofu aina bi goini?”

Idu ina vene bi ori resi tururu resi iniye iniye rofu niyadi, “Ye mina amiye bi gokai kana amiye? Aura ma koru tafo rofu besenai ago mado ri ka neidededi!”

Iesu yaku amiye vima no nufa moi buni riyo
(Mt 8.28-34; Mk 5.1-20)

²⁶Iesu di usi dina vene sa Galilee koru moka tora berou eta rofu Gerasa^x gaganiri okiyadi. ²⁷Soka reyo ri, mina taoni amiye nokoi vima no ina sa amegamo baised ina baku reyo. Ina bi senagi iniye varuka rina

^u **8.16** Mt 5.15; Lk 11.33 ^v **8.17** Mt 10.26; Lk 12.2 ^w **8.18** Mt 25.29; Lk 19.26

^x **8.26** Gerasa; buru bedakai Gadara nufa (Mt 8.28 baku re); idana Gergesa nufa.

de digamo. Ina bi yavari amena de idu ina bi amiye guri sana fore rubari amegamo. ²⁸Iesu veyo ri, ababa nisi ini yuka atafu keto resi raka ni tora reyo, “Iesu Oma Odoro Sei di Mida, beika resi na rofu baisa? Ya ni guba reida, esika na mana ga re!” ²⁹Mina kana niyo ini adina bi Iesu yaku sena mina vima no niyo yakuyainedi vo nisi. Seini dudu yuka vana ukita risi nari regamadi, idu meda tau vima no yaku moiyo ma mina seini moi ubaki reyo ma gagani autu sanari moi afei bogamo.

³⁰Kamini Iesu yaku ni kaiteyo, “Yi roka bi beika?”

“Nai roka bi ‘Taugadegade’,” vo niyo — adina bi vima no tau gade bi ina ideri amegamadi. ³¹Vima no yaku Iesu ni guba reyadi kono ruba moka torari^y ga moi feideyaine.

³²Mironari bi dona tau gade atafu, omuna ikari ina vana irigamadi. Ye vima no yaku Iesu guyaguya niyadi mina dona tau rovaita ideri dui regedi. Ni feideyo ma ³³vima no mina amiye di rovaitari yakusi dona tauri dui reyadi. Mina dona tau raravari raga nesi koru moka torari yoyo resi koruri sofу nisi muyeyadi.

³⁴Dona vana regamadi vene bi ori disi beika vata niyo ma veyadi mina taoniri ma gagani gaganiri sina ni digamadi. ³⁵Amiye diyadi beika vata niyo mina vegedi vo nisi. Iesu rofu okiyadi ri, bi mina amiye veyadi, kaere bi vima no tau gade gade ini rovaitari ideri yakuyo, bi mironari Iesu di yuka atafuri amegamo rovaita dogo resi mokena rorobo dudu, ma ina tau noibanu ori reyadi. ³⁶Mina vegu veyadi vene yaku amiye nigamadi gokai mina vima no yaku moindedi amiye buni niyo. ³⁷Kamini mina gagani tau vene yaku Iesu guyaguya niyadi, ina vene ferei diyainedi, adina ina vene bi ori yaku no iniye niyadi. Ye ina yaku boutiri keu risi diyo. ³⁸Mina vima no fereyadi amiye yaku Iesu usi digo vo nisi usa niyo.

Idu Iesu yaku ni feidegasa niyo, ³⁹“Rauturi dairisi Sei yaku beika vegu buni ya rofu reyo ni digiya.”

Dada dairi nesi taoni noibanuri Iesu yaku ina rofu beika reyo mina ni rausi regasa diyo.

Jairus di vefa ma rema yokoi kaere Iesu di varuka avaka moiyo
(Mt 9.18-26; Mk 5.21-43)

⁴⁰Iesu dairiyo ri, amiye tau yaku faiva niyadi, adina ina tau noibanu bi ina nari regamadi. ⁴¹Kamini amiye nokoi ini roka Jairus okiyo. Ina bi usa yava di ourefeidenam iyi yokoi. Iesu di yuka adinari you makusi guyaguya niyo ini yavari boyagane, ⁴²adina bi ini vefa yokoi maka ini lagani bi tuero kana bi muyena tumu sa.

^y 8.31 *kono rubari*: Jew vene di mokena bi vima no kono ruba ideri dibura aigedi, ini meda koina nigo ma ini kaunava meda okigo ri. Rev 20.3 baku re.

Mironari bodo ri, bi amiye tau yaku fafa riyadi. ⁴³Rema yokoi bi lagani tueru rema di gauka gura ugamo. Ini fore tau gade gauka dogo vene rofu makuyo,^z idu yokoi yaku moi buni de riyo. ⁴⁴Ina bi Iesu di fufutari baisi ini varuka tu avaka moiyo ri, evade bi ini dava degamo koina niyo. ⁴⁵Ma Iesu yaku niyo, “Kaere yaku na avaka moiyo?”

Yokoi yaku nina de reyadi ri, bi Peter yaku niyo, “Ourefeidena amiye, amiye tau gade ya sa didedi mini, mina tau yaku ya fafa ridedi.”

⁴⁶Idu Iesu yaku niyo, “Amiye yokoi yaku na avaka moiyo, adina na na diba bi vava nai rovaitari yakuyo.” ⁴⁷Mina rema yaku veyo bi ina bi baku reyo dada tururu resi Iesu di yuka rafo adinari iniye you makuyo. Minari amiye di nemokori niyo beika resi ina avaka moiyo ma gokai minari maka buni niyo. ⁴⁸Ma Iesu yaku ina rofu niyo, “Nai vefa, yi mokena vari gira aina yaku ya moi buni riyo. Uka amuta dudu digiya.”

⁴⁹Kamini Iesu mina nigamo ri, Jairus, kaere bi usa usa yava di amiye tora, bi naivo naivo amiye yokoi ini yava gutuna ina rofu okisi niyo, “Yi vefa bi tuyeyo. Beika resi mina oteimana amiye rofu toga mokena moigasa ameisa?”

⁵⁰Idu Iesu yaku neidesi Jairus rofu niyo, “Ori ga re; mokena vari gira maka aigiyia ri, bi buni nigo.”

⁵¹Iesu Jairus di yavari okiyo ri, bi amiye yokoi ina sa afena de reyo, idu Peter, John ma James, ma mina rema mida keika ini nono baba sa maka.

⁵²Amiye tau minari uka vorivori regasa isaka nigamadi mina mida keika dada. Iesu yaku niyo, “Isaka ga nifo; mida keika bi tuyena de — idu bi neota varedo!”

⁵³Ina rofu yoga nigamadi adina ina diba bi tuyeyo. ⁵⁴Idu Iesu yaku rema mida keika di vana moisi ina rofu raka nisi niyo, “Rema mida keika, dadi!” ⁵⁵Ini vegu dairoyo ri, bi minari maka dadiyo ma Iesu yaku iruku be magedi ma iriyainedi, vo niyo. ⁵⁶Ini nono baba bi tururu reyadi, idu Iesu yaku amiye yokoi mina vegu vata niyo ga niyaganedi vo niyo.

Iesu yaku ini usi dina vene tueru ni feideyo

(Mt 10.5-15; Mk 6.7-13)

9 ¹Kamini Iesu ini usi dina vene tueru raka ni egogo resi vima no tau meki regi ma gauka vene moi buni rigi vava maro. ²Resi ni feideyo, Sei di ourefeidena amena sana di sina ni rausi regasa digedi resi gauka vene moi buni riyaned. ³Ina vene rofu niyo, “Gugura bi yokoi de idari moigedi: yukana bi de, dura bi de, iruku bi de, ma fore bi de. Varuka yokoi maka akugedi.” ⁴Goina yavari dui regedi bi minari amegedi mamo mina taoni ferei digedi. ⁵Ma amiye tau kaere de ya moi dui regedi ri, bi

^z 8.43 Bura bedakai *Ini fore tau gade gauka dogo vene rofu makuyo* nufa de.

^a 9.3-5 Lk 10.4-11; Acts 13.51

yi yuka di budoka usi eyarei feresi mina taoniri kamini digedi. Ye mina bi ini vegu makai regedi yaku bi vei mama regedi.”

⁶Rautu rautu kamini digasa ago buni ni digasa gauka vene moi buni rigamadi.

Herod rofu eva riyo
(Mt 14.1-12; Mk 6.14-29)

⁷Herod, kaere bi Galilee di ourefeidenam amiye, yaku beika tau vata nigamadi bi neideyo ri, bi ini mokena forovai iniye reyo, adina bi amiye be yaku nigamadi bi John Baptist bi muyena gutuna rae reyo.^b ⁸Amiye be yaku nigamadi bi Elijah ogau niyo, ma be yaku nigamadi bi sena Sei di ago nido amiye yokoi vegu ni rou reyo. ⁹Kamini Herod yaku niyo, “John di ada bi niyaka dada, nugai feideyadi; idu mina bi goina amiye di ini sina mina neideida?” Ini mokena tora bi Iesu vego vo nisi.

Iesu yaku amiye tau gade gade ubua reyo
(Mt 14.13-21; Mk 6.30-44; Jn 6.1-14)

¹⁰Kamini ni feidena vene ina rofu dairisi ini beika tau reyadi kana mina nigamadi. Ina sa taoni roka Bethsaida ri sui nisi boyadi. ¹¹Idu amiye tau gade mina vei mama reyadi ri, bi ina usi boyadi. Ina vene rofu faiva nisi Sei di ourefeidenam amena sana di ago ni oteimagamo, ma kaere gauka nufa vene yaku buni maina regamadi bi moi buni rigamo.

¹²Uriyenau niyo ri, bi ini usi dina vene tuero yaku bosi niyadi, “Amiye ni feide kumo rauturi ma gagani sanari disi ini varena sana ma ini iruku maina reyaganedi, adina una bi autu sanari amesifa.”

¹³Idu ina rofu niyo, “Ya yaku iruku mafo kumo iriyaganedi.”

Idu ina vene ni kabai resi niyadi, “Una sa bi beredi vana berou autu ma oyena remanu maka. Yi mokenari bi mina amiye tau di iruku voi regifa ba?” ¹⁴(Adina rumana vene bi 5,000 kana.)

Ye ini usi dina vene rofu niyo, “Amiye nifa kumo tau neinei 50 dudu kana ameyaganedi.”

¹⁵Mina kana rei vau reyadi ri, ¹⁶bi Iesu yaku beredi vana berou autu ma oyena remanu moisi omari nesi bi buni tora gade Sei rofu masi bi beredi ma oyena moi okusi ini usi dina vene maro amiye tau gade rofu rau regi. ¹⁷Ye iriyadi ma ini uka bere niyadi. Ma ini fereyadi iruku tuta butu risi foroka tuero moi vata baiyadi.

Peter yaku ni okuyo Iesu bi Keriso
(Mt 16.13-19; Mk 8.27-29)

¹⁸Kamini Iesu inaikusa usa usa niyo ri, bi ini usi dina vene bi ina sa ameyadi. Kamini ina vene ni kaitesi niyo, “Amiye yaku nidedi na bi kaere vo nidedi?”

^b 9.7-8 Mt 16.14; Mk 8.28; Lk 9.19

¹⁹Ye ni kabai reyadi, “Be yaku nidedi ya bi John Baptist, be yaku nidedi bi Elijah, ma be yaku nidedi bi sena Sei di ago niyo amiye yokoi vegu nisi dairiyo.”^c

²⁰Ma ni kaiteyo, “Idu ya yaku nidedi na bi kaere?”^d

Ye Peter yaku ni kabai reyo, “Ya bi Sei di Keriso.”

Iesu ini esika ma muyena di ago niyo

(Mt 16.20-28; Mk 8.30-9.1)

²¹Kamini ni diba resi ago gira maro, “Mina amiye yokoi rofu ga ni oteimaraine.” ²²Ka niyo, “Amiye di Mida bi esika esika tau moiylaine ma tora vene, Sei ma amiye utari naivo vene di varika vene ma ago gira oteimana vene yaku fufuta masi umuyegedi ma gabi meda regodenuri dubusa dadi rae rego.”

²³Resi ina tau noibanu rofu niyo, “Kaere amiye ini ura bi na usi digo vo nisi, bi ina kaya ni de resi meda neinei ini satauro moisi na usi baiyaine.”^e

²⁴Adina kaere ini vegu moi rigi ura rego, bi de moigo, idu kaere na dada ini vegu you feidego, bi moi rigo.^f ²⁵Adina beika buni bi amiye yokoi mina kono tora noibanuri baku resi ini vegu eyarego? ²⁶Bema amiye yokoi na dada ma nai ago dada maena rego, Amiye di Mida ini Baba di vabarari ini akeke naivo naivo vima sa okigo ri, ina rofu ka maena rego. ²⁷Idu rama ya nida, ya bedakai minari bi de muyegedi idu ina bi Sei di ourefeidena amena sana dego vegedi.”

Iesu veiyadi ini rovaita bi idana

(Mt 17.1-8; Mk 9.2-8)

²⁸Kamini mina vegu meda vana berou autu regode koina niyo ri, Iesu yaku Peter, James ma John afesi omuna ikari usa usa Sei rofu nigi boyo.^g ²⁹Usa usa niyo ri, bi ini rovaita idana niyo, ma ini varuka bi feo kamanika iniye niyo. ³⁰Ma amiye remanu, bi ina vene sa sina nigamadi. Ina bi Moses ma Elijah, ³¹vabara iniye dudu ogau niyadi. Ini sina bi Jerusalem ri gokai muyesi Sei di ini sina moi rama aigo. ³²Peter ini asiyaka sa bi vare muyeyadi. Varena dudu dadisi nei reyadi ri, Iesu di ini vabara ma ina sa are regamadi amiye remanu veiyadi. ³³Kamini ina rofu etagae rededi ri, Peter yaku Iesu rofu niyo, “Ourefeidena amiye, bi buni una bi minari! Una bi karaga regode akunadi, nokoi bi yi, nokoi bi Moses di, ma nokoi bi Elijah di.” (Ina bi ina diba de beika ago nigamo bi.)

³⁴Mina niyo ri, bi seuya desi ina vene bou riyo; mina seuya ada gabireri ma ori reyadi. ³⁵Ma ago goroka mina seuya gutuna baisi niyo, “Mina bi nai Mida, nai vo niyaka amiye — ina bi neidefa!”^h

^c 9.19 Mt 14.1-2; Mk 6.14-15; Lk 9.7-8 ^d 9.20 Jn 6.68-69 ^e 9.23 Mt 10.38; Lk 14.27

^f 9.24 Mt 10.39; Lk 17.33; Jn 12.25 ^g 9.28-35 2 Pet 1.17-18 ^h 9.35 Is 42.1; Mt 3.17; 12.18; Mk 1.11; Lk 3.22

³⁶Mina goroka koina niyo ri, Iesu inaikae are regamo. Ma babo nisi beika mina medari vata niyadi vesi bi amiye yokoi ni oteimana de reyadi.

Iesu yaku mida vima no sa moi buni riyo
(Mt 17.14-18; Mk 9.14-27)

³⁷Aru uveyo ri, bi mina omunari gutuna dairi neyadi ri, bi amiye tau gade gade ina baku reyadi. ³⁸Ma mina amiye tau gade fogori amiye yokoi raka niyo, “Oteimana amiye, ya rofu guyaguya nida, baisi nai mida — nai mida yokoi maka vegiya! ³⁹Be aruri, vima no yaku moisi raka ni tavoi resi moi tururu resi ini vena kabudo baido. Mina yaku toga toga esika masi vegu gira gira dudu maka ini rovaitari de feredo! ⁴⁰Yi usi dina vene rofu mina vima no umeki reyaganedi guyaguya niyaka, idu anua reyadi.”

⁴¹Iesu yaku ni kabai reyo, “Ya gua mokena vari gira de aina ma mokena no vene, gokaisanu ari doba ya sa amegida? Meda gokaisanu ya sa moimai regida? Yi mida na rofu afei baifo.”

⁴²Mina mida ina rofu boyo ri, vima no yaku konori maku nesi moi tururu reyo. Idu Iesu yaku mina vima no rofu ni kaka resi mida moi buni resi ini baba dairi maro. ⁴³Amiye tau tururu resi Sei di vava veyadi ri.

Iesu dubusa ini muyena di sina niyo
(Mt 17.22-23; Mk 9.30-32)

Ina tau Iesu yaku beika reyo mina tururu reyadi ri, bi Iesu yaku ini usi dina vene rofu niyo, ⁴⁴“Toto ga nifo na beika ya nigi reida bi! Adina Amiye di Mida bi amiye di vanari siri rego.” ⁴⁵Idu ini usi dina vene bi ini adari de ufateyadi beika niyo. Mina sina bi ini adari de dui reyo, ini mokenari de negau niyo, dada ina diba de mina sina bi beika kaite rena mokena ka de moiyadi ori reyadi dada.

Kaere bi tora inkiye?
(Mt 18.1-5; Mk 9.33-37)

⁴⁶Kamini inkiye kayamo regi reyadi kaere bi tora inkiye,ⁱ ⁴⁷ma Iesu ina diba beika mokegamadi ri, bi mida keika yokoi moisi ina atafu moi are resi ⁴⁸ina vene rofu niyo, “Kaere amiye yaku mina mida nai roka dudu moi dui rego, ina ka na moi dui rego. Ma kaere yaku na moi dui rego bi na ni feideyo amiye ka moi dui rego. Adina bi, kaere yi fogori, ini mokenari roka tora de bi, ina bi tora inkiye.”^j

Kaere ya rofu no de nido bi yi
(Mk 9.38-40)

⁴⁹John yaku niyo, “Ourefeidena amiye, una bi amiye nokoi veyafa yi rokari vima no umeki regamo, ma una yaku niyafa ga reyagane, ini adina bi una sa usi dina de amiye.”

ⁱ 9.46 Lk 22.24 ^j 9.48 Mt 10.40; Lk 10.16; Jn 13.20

⁵⁰Iesu yaku niyo, “Ni vai ga refa, adina kaere ya rofu no de, ina bi yi.”

Samaria gagani rautu vene Iesu rofu gedu maradi

⁵¹Iesu omari moi bogedi meda negau nigamo dada uka gira dudu Jerusalem ri digi neyo. ⁵²Ina yaku ini ago moi raga rededi vene siko Samaria rautu yokoiri ni feideyo ma dui resi ini amena sana ni tore regi. ⁵³Minari amededi vene yaku bi gedu maradi, adina bi Jerusalem ri digi neyo dada. ⁵⁴Ini usi dina amiye remanu James ma John yaku mina vegu veyadi ri niyadi, “Varika Amiye, gokai mokeisa, ita omari nigifa ma desi vai vau rego ba?”^k ^l

⁵⁵Idu kero resi emaro.^m ⁵⁶Kamini rautu yokoiri boi neyadi.

Amiye kaere Iesu usi digi mokededi

(Mt 8.19-22)

⁵⁷Ida bodedi ri, amiye yokoi yaku ina rofu niyo, “Ya goina digiya na bi ya usi digida.”

⁵⁸Iesu yaku ina rofu niyo, “Sufa auna bi ini fore ruba nufa ma erena odoro didedi bi ini buri nufa, idu Amiye di Mida bi ini ada aisi raudai rena sana bi koina.”

⁵⁹Ma amiye nokoi rofu ka niyo, “Na usi bae.”

Idu niyo, “Varika Amiye e, na ferei kumo bosi nai baba kaere muyeyo siko moi guri aigida.”

⁶⁰Idu ina rofu niyo, “Muyena vene ferei kumo ini muyena iniye moi guri aiyagane. Idu ya bi bosi Sei di ourefeidenamena sana di ago ni odoro re.”

⁶¹Yokoi yaku ka niyo, “Varika Amiye, ya usi baigida, idu nai yava vene kokora nigida kumo.”ⁿ

⁶²Idu Iesu yaku ina rofu niyo, “Amiye yokoi, ini vanari gadi moi gira resi muro di moimai kora resi nei kero rei fufuta rofu nei resi bi Sei di ourefeidenamena sanari moimai rena bi buni de nigo.”

Iesu yaku amiye 72 ni feideyo

10 ¹Mina fufutari, Varika Amiye yaku amiye 72^o moiyo rofu remanu siko ni feideyo ma diyadi. ²Ma ina vene rofu niyo, “Iruku rama butu rena bi tora gade, idu moimai rededi vene bi tau de. Mina dada butu rena Varika Amiye rofu usa nifa kumo moimai rededi vene ni feidego

^k 9.54 Bura bedakai bi Elijah reyo kana ka nufa. ^l 9.54 2 Kgs 1.9-16 ^m 9.55 Bura bedakai resi niyo, “Ya ya diba de ya bi beika Vima di, adina Amiye di Mida amiye di vegu moi vegu rigi ogau niyo. Ina bi ini vegu moi no rigi ogau de niyo” ka nufa. ⁿ 9.61 1 Kgs 19.20

^o 10.1 72; bura bedakai bi 70 nufa.

ma ini butu butu resi moi aiyaganedi.^p ³Diga mokefa; na yaku mamoe di mida kana suma auna di fogori ya ni feideida.^q ⁴Fore di pausi, o dura, o yuka ro moina ga refa. Idauri ka amiye sa sina ga nifa.^r ⁵Goina yavari dui regedi ri, bi yomakai siko nifa, ‘Sei di uka amuta bi mina yavari ameyaine.’ ⁶Mina yavari uka amuta nufa amiye yokoi amedo vo nisi bi yi uka amuta niyo bi ina sa ameyaine; de vo nisi, bi yi uka amuta maro bi dairi moi. ⁷Yava idana idana rofu di ga refa; mina yavari maka amesi beika ya mabigedi ina sa irigedi, adina moimai redo amiye bi ini moimai reyo obini kana moigo bi buni.^s ⁸Goina taoni okigedi ma ya moi dui regedi ri, ina yaku beika iruku ya magedi bi irifa. ⁹Ini gauka vene moi buni risi ina vene rofu nifa, ‘Sei di ourefeidena amena sana bi ya atafu okiyo.’ ¹⁰Idu taoni yokoi dui regedi bi amiye yaku de ya moi dui regedi ri, bi taoni ida nefau are resi nifa,^t ¹¹‘Ye yi taoni di budoka, uni yuka rafori usi eyaresifa mini bi ya rofu gubuyo rena kana. Yomakai ya ya diba niyaine Sei di ourefeidena amena sana bi atafu okiyo!’ ¹²Ya rofu nida, kota rego medari Sodom di esika esika moigo bi keika, idu mina taoni di esika esika moigo bi tora gade!^u

Taoni taoni vene kaere mokena vari gira Sei rofu de aiyadi
(Mt 11.20-24)

¹³“Chorazin vene ya rofu bi iriyeduka iniye ma Bethsaida vene ya rofu ka bi iriyeduka iniye! Adina bi, mokena vegu ya vene rofu reyaka kana, mina Tyre taoni ma Sidon taoniri reyagadu vo nisi bi mirona vene bi senagi ameinu resi varuka gabu akusi udo ini rovaita ifi rei bogasa dega reyagadu mina yaku oteimagadu ina bi ini vegu no feresi moi etagae riyadi!”^v ¹⁴Idu Sei di kota rego medari bi ya rofu esika esika tora gade mago, idu Tyre ma Sidon vene rofu esika esika moigedi bi keika. ¹⁵Ma ya Capernaum vene, ya bi omari moi odoro de rego! Idu, ya yaku muyena sanari negedi!”^w

¹⁶Iesu yaku ini usi dina vene rofu niyo, “Kaere ya neidego, bi na neidego; ma kaere ya rofu gedu mago, bi na rofu gedu mago; ma kaere na rofu gedu mago, bi na ni feideyo amiye rofu gedu mago.”^x

Amiye 72 di ini dairina

¹⁷Mina amiye 72^y dairisi ada dudu Iesu rofu niyadi, “Varika Amiye, vima no ka uni ago neideyadi, yi roka dudu nigamafa dada!”

^p 10.2 Mt 9.37-38 ^q 10.3 Mt 10.16 ^r 10.4-11 Mt 10.7-14; Mk 6.8-11; Lk 9.3-5 ^s 10.7 1

Cor 9.14; 1 Tim 5.18 ^t 10.10-11 Acts 13.51 ^u 10.12 Gen 19.24-28; Mt 11.24; 10.15

^v 10.13 Is 23.1-18; Ezek 26.1-28.26; Joel 3.4-8; Am 1.9-10; Zech 9.2-4 ^w 10.15 Is 14.13-15

^x 10.16 Mt 10.40; Mk 9.37; Lk 9.48; Jn 13.20 ^y 10.17 72; bura bedakai bi 70 nufa (nanaka 1 baku re).

¹⁸Iesu yaku niyo, “Omari gutuna Satani ayena kana yareyo ma veyaka. ¹⁹Neidefa, na yaku vava ya maraka, aruma ma kaikai fafau disi ya rofu ruda rena amiye di vava tau etei rigedi; ma beika no yaku esika de ya mago.” ²⁰Idu vima no yaku yi ago neidededi vo nisi ada ga refa; yi ada regedi di adina bi yi roka bi omari bura riyo dada.”

Iesu ada reyo
(Mt 11.25-27; 13.16-17)

²¹Mina meda nemokori, Vima Kikifa^a yaku Iesu di uka ada dudu vata baiyo ma ina bi niyo, “Baba, oma ma kono di Varika Amiye, yi roka moi odoro reida, adina ya bi mina mokena tora vene rofu moi sui resi mokena keika keika vene kaere bi mida mida kana rofu oteimaro. Baba, yi ukari mokeyo kana, makai vata niyo.

²²“Nai Baba yaku beika baika tau na maro. Ma amiye yokoi ina toto ini Mida, idu ini Baba maka ina diba. Ma amiye yokoi ka ini Baba toto, ini Mida maka ina diba ma ini Mida yaku ka ini ura amiye oteimagi bi rama iniye vegedi, Sei bi kaere.”^b

²³Kamini ini usi dina vene rofu kero resi sui dudu niyo, “Yi nemoko bi buni tora gade maro, ya beika vededi dada! ²⁴Adina ya nida, Sei di ago niyadi vene ma kini tau ina ura bi ya beika vededi mina vegedi, idu bi de veyadi. Ma ya beika neidededi mina, ka neidegedi, idu bi de neideyadi.”

Samaria amiye buni di mokena ago

²⁵Ma ago gira oteimana amiye yokoi Iesu di uka maina regi are resi niyo, “Oteimana amiye, beika regida ma toga toga ameibobina vegu moigida?”^c

²⁶Ina rofu niyo, “Ago gira ideri bi gokai bura reyadi? Ya yaku bi gokai veisa?”

²⁷Ye ni kabai reyo, “ ‘Yi uka meko noibanu dudu, yi vima noibanu dudu, yi yeiva tora noibanu dudu ma yi mokena noibanu dudu Varika Amiye yi Sei uka magiya’; ma ‘Ya atafu amedo amiye uka magiya, ya kaya uka maisa kana.’ ”^d

²⁸Kamini ina rofu niyo, “Ya rama niyo mini makai regiya ri, bi ameibobigya.”^e

²⁹Idu mina amiye iniye moi rama regi Iesu dubusa ni kaitesi niyo, “Nai atafu amedo amiye bi kaere?”

³⁰Iesu yaku ni kabai resi niyo, “Amiye yokoi Jerusalem gutuna Jericho negamo ri, bi duma duma vene di vanari dui reyo. Ubobo resi muyei

^a 10.19 Ps 91.13 ^b 10.21 *Vima Kikifa*; bura bedakai bi *Vima nufa*; fefa idana be bi *ini vima nufa*. ^c 10.22 Jn 3.35; 10.15 ^d 10.25-28 Mt 22.35-40; Mk 12.28-34 ^e 10.27 Lev 19.18; Deut 6.5 ^f 10.28 Lev 18.5

tamatama reyadi ri, bi ini varuka ita kutusi, moisi ferei diyadi. ³¹Minari bi Sei ma amiye utari naivo amiye yokoi bi mina idari negamo. Mina ubobo reyadi amiye veyo ri, bi ida berou eta rofu boi nesi bi kamini ebu rei diyo. ³²Levi amiye yokoi ka makai mina sanari baisi veyo ri, bi ida berou eta rofu boi nesi bi kamini ebu rei diyo. ³³Samaria amiye yokoi ka mina ida baiyo. Idu mina amiye rofu okisi veyo ri, bi iriyeduwa ina rofu resi^f ³⁴bosi oira ma waini dudu uyadi sana mina koitesi fafa reyo. Ini donkey^gfafau aisi oto vene di amena varena yavari afei bosi resi nari reyo. ³⁵Uruyaku dadisi bi meda remanu di moimai di fore moisi yava di ini madini masi niyo, ‘Ina nari re. Beika baika ina fafau regiya bi dairi baigida ri ya magida.’ ”

³⁶Iesu yaku ini ago ni vau resi niyo, “Ya yaku mokeisa bi mina amiye regoderi kaere bi mina amiye rofu duma duma vene di vanari dui reyo bi ini atafu amedo amiye kana?”

³⁷Ma ago gira ni feidena amiye yaku niyo, “Kaere ina bi mina amiye rofu iriyeduwa reyo.”

Ma Iesu yaku ina rofu niyo, “Disi ya ka mina kana vegu re.”

Iesu yaku Martha ma Mary sa egoru reyo

³⁸Kamini Iesu ini usi dina vene sa bosi rautu yokoiri okiyadi ri, bi rema yokoi roka Martha yaku ini yavari moi dui reyo.^h ³⁹Ina bi ini rasini nufa ini roka bi Mary. Mary bi Varika Amiye di yuka atafu amesi ini sina nigamo mina neidegamo. ⁴⁰Martha bi ini yavari amiye afei dui reyo dada, mina kero karo regamo. Dada bosi Iesu rofu niyo, “Varika Amiye, nai rasini bi beika baika bi fereyo dada na yaku maka reida, idu gokai mokeisa? Ni kumo na moi vana reyaine!”

⁴¹Idu Iesu yaku ni kabai resi niyo, “Martha e, ya bi beika baika tau resi yi ada moi esika resi mokena tau tora moisa, ⁴²idu yokoi maka bi tora iniye. Mary beika mokei redo bi buni mini. Ina rofu mina vegu redo bi una yaku de moi etagae regifa.”

Iesu di oteimana ago usa usa nina rofu (Mt 6.9-13; 7.7-11)

11 ¹Meda yokoiri Iesu yaku gagani yokoiri usa usa nigamo. Ini usa usa ni vau reyo ri, ini usi dina amiye yokoi yaku niyo, “Varika Amiye, gokai usa usa nigifa mina una oteima, John yaku ini usi dina vene oteimagamo kana.”

²Iesu yaku ina vene rofu niyo, “Usa usa nilegedi ri, bi yomakai nifa: ‘Baba:

^f 10.33-34 2 Chr 28.15 ^g 10.34 Mina bi hosi keika kana, anema doba nufa.

^h 10.38-39 Jn 11.1

Yi roka bi moi kikifa riyaine;
yi ourefeidena amena sana bi deyaine.

³ Ari neinei di iruku una mai baisa una mavo.

⁴ Ma uni vegu no koite makuvo,
adina una ka amiye tau di vegu no una rofu rededi moi erufu
resifa.

Ma uka maina rena rofu ga una moi ourefeidevo.’ ”

⁵ Resi Iesu yaku niyo, “Ya yokoi mina urusa tobo iniyeri bosí yi asini
rofu usa nigiya vo nisi, ‘Nai asini, beredi regode na ma. ⁶ Adina bi nai
asini yokoi yaku yava ika oto disi nai yavari okiyo ma na sa bi iruku
koina!’ ⁷ Idu asini bi yava ideri ya ni kabai resi nigo, ‘Ada esika na mana
ga re! Ida vena bi sena gana riyaka ma nai mida sa bi sena vareyafa.
Dadisi beika baika ya mana ka gira inkiye.’ ⁸ Ya vene rofu yaku nida ina
mina de dadigo, ini asini vana magi bi, idu besa besa usa nigo ri, bi
dadigo rofu, yi beika usa niyo mina ya mago.

⁹ “Dada ya vene rofu nida: Usa usa nifa kumo ya mago; maina refa
kumo baku regedi; raka nifa kumo ya rofu iduara moi ekego. ¹⁰ Adina
kaere yaku usa usa nigo bi moigo, ma kaere maina rego bi baku rego, ma
kaere raka nigo bi ina rofu iduara moi ekego. ¹¹ Yi fogori kaere baba ini
mida yaku oyena usa nigo ri, bi oyena de masi dadisi aruma mago ba?
¹² Ye unema vo nigo ri, bi kaikai magiya ba? ¹³ Ma ya vene no bi yi mida
mida rofu gugura buni magi diba nidedi vo nisi, bi Baba omari amedo
amiye yaku Vima Kikifa usa nilegedi vene bi besa besa mago!”

Iesu ma Beelzebul (Mt 12.22-30; Mk 3.20-27)

¹⁴ Iesu yaku babo vima no yokoi umeki regamo. Mina vima no yakuyo
ri, bi mina amiye ago niyo ma amiye tau gade tururu reyadi. ¹⁵ Idu amiye
be yaku niyadi, “Mina bi vima no Beelzebul, vima no di ourefeidena
amiye kaere yaku vava mado ma vima no umeki redo.”ⁱ

¹⁶ Ma be yaku omari rebe yokoi reyainedi kaiteyadi ebene regika bi
rama ba ide ina bi Sei yaku vava maro.^j ¹⁷ Idu mina vene di mokena vesi
ina rofu niyo, “Gagani yokoi uta okusi inkiye iniye berou berou are resi
ruda rego vo nisi, bi berou berou keto rego. Ma rubu inkiye iniye berou
berou ruda rego vo nisi, bi berou berou keto rego. ¹⁸ Ye Satani ini vene sa
ka inkiye iniye ruda resi utama okugedi vo nisi, gokai resi ini ourefeidena
amena sana bi are rego? Adina ya yaku nidedi bi, na bi Beelzebul di vava
dudu vima no umeki reida. ¹⁹ Idu na yaku vima no Beelzebul di vava
dudu umeki reida vo nisi, bi yi vene bi kaere di vava dudu umeki rededi?
Mina dada ini beika rededi yaku yi ago bi rama de vo nidedi! ²⁰ Idu Sei di

ⁱ 11.15 Mt 9.34; 10.25 ^j 11.16 Mt 12.38; 16.1; Mk 8.11

vava dudu vima no umeki reida vo nisi, bi Sei di ourefeidenamena sana bi ya vene rofu deyo.

²¹“Yeiva amiye ini mari moi gira resi ini yava nari rego ri, bi ini beika baika bi buni ameibigo. ²²Idu yeiva iniye amiye yokoi yaku ina sa ruda resi ugo ri, mina amiye ini moi gira regamo mari moigo. Makai mina amiye yeiva mokeyo bi ina kaya nari mona rego dada. Kamini mina yeiva iniye amiye beika tau yokoi yokoi rau rego.^k

²³“Amiye kaere na sa de bi na rofu de; ma kaere na sa butu de rido bi rerevaida nido.^l

Vima no dairigo (Mt 12.43-45)

²⁴“Vima no yaku amiye yokoi ferei yakusi bi koru de gaganirameine Rena sana maina rego. Yokoi baku rena de resi iniye kamini nigo, ‘Nai yava ferei yakuyaka minari dairigida.’ ²⁵Dairisi mina yava baku rego ri, bi guda resi ae dogo reyadi. ²⁶Resi bi disi vima no viro vara iniye ini no ebu reyadi afei minari babis amegedi. Ye mina amiye di amena gua bi no iniye sena kana de.”

Rama iniye ada rena

²⁷Iesu yaku mina sina niyo ri, amiye tau gade di ini fogori, rema yokoi yaku ina rofu raka nisi niyo, “Ya moi vata resi susu ya maro rema bi buni tora gade moido!”

²⁸Idu Iesu yaku ni kabai resi niyo, “Rama, idu kaere Sei di ago neidededi bi buni tora gade moidedi!”

Rebe di usa usa (Mt 12.38-42)

²⁹Amiye tau gade Iesu atafu egogo reyadi ri, ina vene rofu nigi kora resi niyo, “Gua amededi vene bi vegu no rededi vene! Rebe ni kaitededi; rebe nokoi de mago idu Jonah rofu vata niyo rebe bi kamini mina maka bi mago.^m ³⁰Adina Sei yaku Jonah moisi Ninevah di rebe reyo kana, ye ina yaku ka Amiye di Mida moisi gua amededi vene di rebe rego.ⁿ ³¹Meda baido rama eta rofu di kuini Sei di kota rena medari gua amededi vene sa edadigo ma beika reyadi vegu mina nifafana rego, adina bi, gagani maikeri gutuna kini Solomon di mokena tora neidegi vo nisi baiyo. Ye vefa, amiye yokoi kaere Solomon ebu reyo bi mini.^o ³²Ninevah vene Sei di kota rena medari gua amededi vene sa are resi ini beika reyadi vegu nifafana regedi, adina bi Jonah yaku Sei di ago

^k 11.22 Iesu bi mina yeiva iniye amiye. Acts 10.38; 1 Jn 3.8 baku re. ^l 11.23 Mk 9.40

^m 11.29 Mt 16.4; Mk 8.12 ⁿ 11.30 Jon 3.4 ^o 11.31 1 Kgs 10.1-10; 2 Chr 9.1-12

ni rausi reyo ri, vegu no feresi moi etagae riyadi. Ma vefa, amiye yokoi Jonah ebu reyo bi mini!^p

Uka di vabara
(Mt 5.15; 6.22-23)

33 “Amiye yokoi yaku ramefa orisi rubari moi sui o foroka gabireri de aigo;^q idu bi ini ikina sanari ikigo ye kaere yava dui rededi ka ini vabara vegedi.^r 34 Yi nemoko bi ramefa di vabara kana yi rovaitari. Ye yi nemoko buni vo nisi, bi yi uka tau noibantu bi vabara yaku vata baigo. Idu yi nemoko no vo nisi, bi yi uka tau noibantu bi mukuna yaku vata baigo. 35 Mina dada, yi ukari vabara nari rei mona re, ye mukuna ga niyainedi. 36 Yi uka tau noibantu vabara yaku vata baigo vo nisi, bi ma mukuna keika yi ukari ka ide amego vo nisi, bi yi uka tau noibantu vabara iniye nigo, ramefa di vabara yaku ya moi vabara rego kana.”

**Iesu yaku Pharisee vene ma ago gira oteimana vene
rofu ni tourage reyo**
(Mt 23.1-36; Mk 12.38-40)

37 Iesu sina ni koina reyo ri, bi Pharisee amiye yokoi yaku raka niyo ina sa iruku irigedi. Dada ini yava dui resi iruku irigi ameyo. 38 Ma Pharisee amiye yaku Iesu ini vana koitenan siko de reyo mina veoyo ri, bi tururu reyo. 39 Dada Varika Amiye yaku ina rofu niyo, “Ya Pharisee vene bi biyo ma siua bi etofaro maka koitededi, idu yi uka ideri bi dadaga ma vegu no vata baiyadi. 40 Ada de vene! Sei yaku etofaro riyo vo nisi, bi ideri ka riyo ba ide? 41 Yi uka idounai dudu irava vene mafa; mina regedi ri, bi beika baika tau bi ya rofu ruaka nigo.

42 “Ye ya Pharisee vene iriyeduka no iniye iniye ya rofu bi! Adina bi iruku moi sisika rena roka mint ma rue ma bedakai tau vakoi di yuveita neinei moisi vana ufori bi yokoi maka Sei rofu madedi, idu ya bi Sei rofu vegu rorobo rena ma uka mana de rededi. Idu mina reyagane kumo ma mina vegu rededi bi ga ferefra.^s

43 “Ya Pharisee vene bi iriyeduka no iniye iniye ya rofu bi! Adina usa yavari amena sana ka buni torari ma maketiri amiye yaku ago buni dudu matagini reyagane ura rededi. 44 Iriyeduka no iniye iniye ya rofu bi! Adina ya bi amiye guri aiyadi sana sena tovo niyadi kana. Dada amiye guri de vesifafau etei ri didedi, adina ina toto mina bi amiye guri aiyadi sana bi ini kino amedo.”^t

^p 11.32 Jon 3.5 ^q 11.33 Bura bedakai o biyo gabireri de aigo nufa de. ^r 11.33 Mt 5.15; Mk 4.21; Lk 8.16 ^s 11.42 Lev 27.30 ^t 11.44 Mina guri aiyadi sana di vena bi buni, idu ina ideri bi amiye muyena nena. Makai kana mina Pharisee vene ini vegu vena bi buni, idu ina ukari bi ini kino amedo. Mt 23.27-28 baku re.

⁴⁵ Ago gira oteimana amiye yokoi yaku ina rofu niyo, “Oteimana amiye, ya makai sina nisa ri, bi ya ka una rofu ni no reisa mini!”

⁴⁶ Idu ni kabai reyo, “Ya ago gira oteimana vene, ka iriyeduka no iniye iniye ya rofu bi! Adina toe kirokai rena anua rededi mina amiyefafau aidedi, idu yi vana ebuna yokoi dudu bi mina toe de erufugedi.

⁴⁷ Iriyeduka no iniye iniye ya rofu bi! Adina bi yi tutubena vene yaku Sei di ago niyadi vene umuyeyadi, idu ya vene bi ini guri yava ikefata dudu moi buni buni rededi. ⁴⁸ Mina dada ya iniye iniye nidedi yi tutubena yaku beika reyadi bi buni, ini adina ina vene yaku Sei di ago niyadi vene umuyeyadi ma ya bi ini guri yava akudedi. ⁴⁹ Mina dada Sei yaku ini mokena tora dudu ka niyo, ‘Nai ago nidedi vene ma nai ni feidena vene ina rofu ni feidegida; be bi umuyesi be bi esika esika magedi.’ ⁵⁰ Dada Sei yaku kono riyo medari gutuna kaere Sei di ago niyadi vene tau gade umuyeyadi, gua amededi vene bi ini kaunava baku regedi: ⁵¹ Abel umuyeyo gutuna boyo Zechariah kaere bi ori sisika rena fore vata ma Sei di yava utari umuyeyadi. Mina bi rama, ya nida gua amededi vene bi mina kaunava baku regedi!

⁵² “Ago gira oteimana vene iriyeduka no iniye iniye ya rofu bi! Adina bi diba nina di sana di ida vena ekena etagae reyadi mini. Ya bi de dui rei boyadi ma be yaku dui rena mokededi bi, ya yaku ini ida biri ridedi!”

⁵³ Iesu yaku mina sana fereyo ri, bi Pharisee vene ma ago gira oteimana vene yaku nifafana resi ago tau rofu ni kaitegi kora regamadi, ⁵⁴ eru regedi ma ago rama de yokoi nigo ri, bi moi gira regedi vo nisi.

Ofarosi sina di ago gira
(Mt 10.26-27)

12 ¹ Amiye tau gade gade okisi egogo resi iniye iniye mini itei regamadi duakau ri, Iesu yaku ini usi dina vene rofu nigi kora reyo, “Pharisee vene di yeast siko ya kaya nari rei mona refa — mina bi ini ofarosi vegu.” ² Gokai beika sui niyadi bi moi ogau nigedi ma gokai beika bou Riyadi bi bou usase regedi, ^w ³ mina dada beika sina mukunari niyadi bi vabara sanari neidegedi. Ma beika sina yava ideri kiya ka mumugu niyadi bi yava tebori are resi ni rausi regedi.

Sei rofu ori regedi
(Mt 10.28-31)

⁴ “Nai asiyaka vene ya nida, rovaita maka umuyegedi vene ori ga refa, idu gabu vegu no yokoi ya rofu anua de regedi. ⁵ Ya oteimagida kaere rofu ori regedi: Sei rofu ori refa, kaere bi ya umuyegi resi gabu ini vava dudu ya ita mokari maku negi rego, ina rofu maka ori refa!

^u 11.51 Gen 4.8; 2 Chr 24.20-21 ^v 12.1 Mt 16.6; Mk 8.15 ^w 12.2 Mk 4.22; Lk 8.17

⁶“Erena keika vana berou autu di davana bi fore keika remanu dudu ba? Ma Sei yaku ina tau noibanu bi toto de nigo. ⁷Ye yi ada iye tau vakoi ka gokaisanu amedo bi duaiya reyo. Ye ori ga refa. Yi davana bi tora gade, erena keika tau gade kana de!

Keriso ni ogau nina ma fufuta mana

(Mt 10.32-33; 12.32; 10.19-20)

⁸“Ye na yaku ya vene rofu nida, kaere yaku ariarari nigo ina bi nai, bi Amiye di Mida yaku ka Sei di naivo naivo vima tau di nemokori makai nigo. ⁹Idu kaere yaku amiye di nemokori na diba de ina vo nigo bi, Amiye di Mida yaku ka Sei di naivo naivo vima tau di nemokori makai nigo.

¹⁰“Ma kaere amiye yaku Amiye di Mida rofu ago no nigo Sei yaku ini vegu no koite makugo; idu kaere yaku Vima Kikifa rofu ini roka moi no rigo Sei yaku ini vegu no de koite makugo.^x

¹¹“Usa usa yavari o gavana o ourefeidena vene di nemokori kota regi ya afei bogedi ri, yi mokena toe ga moiyanne, gokai sina nigiya ba gokai ni kabai regiya bi.”^y ¹²Adina mina nigiya medari Vima Kikifa yaku ya oteimago mironi.”

Gugura nufa ada de amiye di ago

¹³Amiye tau gade di fogori amiye yokoi yaku ina rofu niyo, “Oteimana amiye, nai dubuini nigiya kumo beika baika uni baba fereyo na sa rau reyaine.”

¹⁴Iesu yaku ni kabai resi niyo, “Vava na mana kode ya remanu di sina sina neidegi yi beika baika rau regi.” ¹⁵Kamini ina vene tau rofu niyo, “Ya kaya nari rei mona regasa beika baika tau rofu yi mokena udu ga refa. Adina amiye di vegu iniye bi mina beika baika tau yaku de mago.”

¹⁶Kamini Iesu yaku mokena ago yokoi ina rofu niyo: “Beika baika tau amiye ini kono fafauri muro iruku tora gade iniye rama niyo. ¹⁷Dada iniye mokesi niyo, ‘Gokai kamini regida? Iruku aina sana bi koina.’ ¹⁸Resi niyo, ‘Yomakai regida: nai iruku aina sana ukero vau resi tora risi nai iruku ma sogona tau gade minari aigida. ¹⁹Resi bi na na kaya rofu nigida, lagani tauri mina beika tau bi yi. Nai veguri mina beika baika tau kiya kiya irigasa vaigasa ada regasa ameibigida!’ ²⁰Idu Sei yaku ina rofu niyo, ‘Ya bi ada de amiye! Gua mina urusari umuyegiya ri, bi kaere yaku mina beika tau ya kaya moi tauri fereyo mina moigo?’”

²¹Resi Iesu yaku sina ni vau regi niyo, “Amiye bi makai kaere beika baika tau inaikie moiyo, idu Sei di mokenari bi beika baika tau de moiyo.”

Uka vari gira Sei rofu mana

(Mt 6.25-34)

²²Resi Iesu yaku ini usi dina vene rofu niyo, “Mina dada ya nida, vegu nigasa amesi beika irigedi o beika varuka yi rovaita yaku akugedi

^x 12.10 Mt 12.32; Mk 3.29 ^y 12.11-12 Mt 10.19-20; Mk 13.11; Lk 21.14-15

mokena toe ga moifa. ²³ Adina vegu yaku iruku bi ebu redo ma rovaita yaku varuka ka ebu redo. ²⁴ Yomina gayo bora erena vefa; ina bi iruku yo varina o iruku goena de rededi; dokena o iruku aina sana ka koina; idu Sei yaku vana redo. Ya bi mina erena ebu iniye reyadi! ²⁵ Ye ya kaere yaku ini ukari mokena toe moigo ri, mina mokena yaku ini vegu moi doba rego ba? ²⁶ Mina mokena dudu mina beika keika anua reisa, ye beika resi mokena toe tau moisa? ²⁷ Sufari farofaro bi gokai bodedi mina vefa: ina bi moimai de rededi o varuka de ridedi. Idu ya nida kini Solomon di varuka burefe tau ka bi mina sufari farofaro kana de.^z ²⁸ Sei yaku sufari farofaro imu mado. Mina farofaro bi gua vegu amedo mini, idu agiya bi kufusi makugedi roko nigedi ri, ita mokari origedi. Ye ina bi yi varuka dudu ya nari rei mona iniye rego, ya kaere bi mokena vari gira keika aidedi vene!

²⁹ “Ye beika irigedi di, yi ukari mokena toe ga refa. ³⁰ (Adina mina beika baika tau bi mina konori gagani gagani vene tau gade yaku maina rededi.) Idu yi Baba ina diba ya nufa de tau bi. ³¹ Idu Sei di ourefeidena amena sana rofu maina refa kumo mina beika baika ka ya mago.

Omari gugura tau (Mt 6.19-21)

³² “Ya amiye tau ori ga refa, adina yi Baba bi ini ourefeidena amena sana ya rofu magi ada redo. ³³ Yi beika baika nufa bi sero resi fore bi irava vene mafa. Yi beika baika tau bi omari aifa: mironari fore dura de no nigedi ma duma amiye yaku ka moigi atafu moina de ma nurina yaku de moi no rigo. Ye toga koina de nigedi. ³⁴ Adina yi gugura buni tau amededi sanari yi uka di ura ka ameibigo.

Naivonaivo vene kaere nari rei mona rededi

³⁵ “Yi varuka mitai ri gira regedi rofu yi ramefa orisi toro dudu amefa.^a ³⁶ Ini varika amiye, rema mena irakuna gutuna dairigo naivo naivo vene toro rededi kana ameibifa. Ini varika amiye bi rema mena irakuna gutuna dairisi fidi fidi rego ri, evade maka dadisi iduara moi boka regedi.^b ³⁷ Mina kana vene rofu bi buni tora gade iniye, adina bi ini varika amiye dairigo ri, bi ina vene bi varena de, ina rofu toro regasa nari amededi dada! Ya vene rofu nida, ini varika yaku roka nisi moimai regi ini varuka mitai rigo ma iruku irina sanari amegedi ri, bi ina yaku dadisi ina rofu ini naivo rego. ³⁸ Uru tobori baigo o uruyaku vabarari baigo rofu ina toro regasa nari rededi vene baku rego ri, bi buni iniye moigedi! ³⁹ Idu ya ya diba nifa, yava biyaguna amiye bi siko diba nigo vo nisi duma amiye baigo meda nemoko bi, ina bi nigo dada ini yava ideri

^z 12.27 1 Kgs 10.4-7; 2 Chr 9.3-6 ^a 12.35 Mt 25.1-13 ^b 12.36 Mk 13.34-36

ga baiyainedi.^c ⁴⁰Ye toro dudu amefa, adina Amiye di Mida bi mokena de rededi meda nemokori baigo.”

**Vegu rama redo naivo amiye o vegu rama de redo naivo amiye
(Mt 24.45-51)**

⁴¹Peter yaku Iesu rofu ni kaitesi niyo, “Varika Amiye, mina mokena ago bi una rofu maka nisa ba amiye tau noibanu di nisa ba?”

⁴²Ye Varika Amiye yaku ni kabai resi niyo, “Kaere bi vegu rama redo mokena tora nufa naivo amiye ini varika amiye yaku vava mago, ini yava nari regi naivo vene be di iruku ini meda ramari rau rego. ⁴³Ini varika amiye yaku dairisi baku rego mina vegu regasa ameibigo ri, bi mina moimai rei tavoi redo amiye bi ada iniye rego! ⁴⁴Rama ya nida, bi vava mago, dada ini beika baika tau nari rego. ⁴⁵Idu mina moimai rei tavoi redo amiye yaku iniye rofu mokesi nigo, ‘Nai varika amiye bi ari dobari dairigo,’ kamini ini moimai rei tavoi rena rumana rema tau ugi kora resi iruku irigasa koru no moiga ameibigo ri ⁴⁶ini mokena de redo ariri ma meda nemokori ya ya toto, ini varika amiye dairisi mina moimai rei tavoi redo amiye di rovaita bado bado nugasi^d mokena vari gira de aina vene di sanari aigo.

⁴⁷“Ma mina moimai rei tavoi redo amiye, kaere bi ini varika amiye di mokena diba, idu yomakai kana dogo de resi de rego, bi ubobo tora gade rego. ⁴⁸Idu kaere naivo amiye, ini varika amiye di mokena ina toto resi de reyo ma ubobo keika rego. Ma kaere moimai tora gade ina rofu maro ina ka bi moimai tau gade reyaine; ma kaere besa moimai tora gade maro ka bi moimai besa reyaine.

**Iesu bi amiye moi ututama okuyo amiye
(Mt 10.34-36)**

⁴⁹“Na nai deyaka bi mina konori ita origi. Nai mokenari bi ori katugo kumo! ⁵⁰Nai babatiso^e mago; ma nai mokena toe evade moigida kumo!^f ⁵¹Ga mokefa na mina konori deyaka bi uka amuta moi soka reyaka. Ide, idu ya vene rofu nida na bi amiye iniye iniye utama okugi deyaka. ⁵²Gua mina medari gutuna kaere ini rema mida sa bi vana berou autu amededi mina okugida; regode berou remanu sa utama ma remanu berou regode sa utama okugida. ⁵³Iniyeiniye utama okuyaganedi: baba vene ini rumana mida sa, rumana mida ini baba vene sa; nono vene ini vefa vene sa, vefa vene ini nono vene sa; radiyaka tora vene ini radiyaka sa, radiyaka vene ini radiyaka tora vene sa.”^g

^c 12.39-40 Mt 24.43-44 ^d 12.46 *di rovaita bado bado nugasi; o you makusi*

^e 12.50 *babatiso* Mina ini adina bi ini esika esika moina. ^f 12.50 Mk 10.38 ^g 12.53 Mic 7.6

Meda di ari vei mama rena
(Mt 16.2-3)

⁵⁴Kamini Iesu yaku ka amiye tau gade rofu niyo, “Meda nedo eta rofu gutuna seuya yokoi dadi baigo ri vesi evade nigiya, ‘Mina bi miya regi redo,’ resi bi miya redo. ⁵⁵Ma meda baido rama eta gutuna aura rebigo ri, bi nigiya, ‘Meda sei regi redo,’ resi bi sei redo. ⁵⁶Ofarosi vene! Ya oma ma kono vesi bi beika ari gua una mago bi diba nigedi. Beika resi gua yomina meda di ari bi de vei mama rededi ba?

Yi tuma amiye rofu uka amuta ni
(Mt 5.25-26)

⁵⁷“Beika resi ya kaya vegu bi rama ba ide mina de moidedi? ⁵⁸Ya sa uka yokoi maka de nido amiye kaere yaku ya kota aigi rego koderi, amiye sa evade vakoi yi mokena moi yokoi maka rifa idau gogo kota sanari bodedi ri, adina bi, makai de regiya ri, bi kota nido amiye di vanari ya aigo baebu. Ina yaku bi dibura yava nari redo amiye di vanari ya aigo ma bi dibura yavari ya aigo. ⁵⁹Na ya rofu nida, mina sanari de yakugiyia bogo kota ai niyo kana fore keika keika mai vau regiya mamo.”

Vegu no feresi moi etagae rifa o muyegiya

13 ¹Mina ariri maka, amiye be yaku sina Iesu rofu ni oteimaradi, Galilee vene be yaku Sei rofu ori sisika regamadi ri, bi Pilate di ruda vene yaku umuyeyadi. ²Kamini Iesu yaku ina vene rofu ni kabai resi niyo, “Mina Galilee vene makai muyeyadi dada, ya yaku mokededi bi ina vene di no bi tora iniye Galilee vene tau rofu ba? ³Ide iniye! Idu ya nida ya vene yi vegu no de feresi etagae rigedi ri, bi ya tau noibantu makai muyegedi. ⁴Ma mirona amiye 18 Siloam ri yava doba inafafau yaresi emuyeyo bi gokai? Ya yaku mokededi mina yaku nido bi ina vene di vegu no bi Jerusalem ri amededi vene tau ebu reyo ba? ⁵Ide iniye! Idu ya nida ya vene yi vegu no de feresi etagae rigedi ri, bi ya tau noibantu makai muyegedi.”

Fuka yabo kana rama de aido di mokena ago

⁶Resi Iesu yaku mina mokena ago ina vene rofu nigi kora reyo: “Amiye yokoi ini waini murori fuka yabo kana yokoi varisi boyo mina yabori bi rama be aiyo vegi vo nisi. Idu be de baku reyo. ⁷Dada ini muro redo amiye rofu niyo, ‘Ve kumo, lagani regoderi rama mina fuka yabo kanari maina baigamaka, idu de baku reyaka. Nu! Beika resi mina kono moi no rigasa amedo?’ ⁸Idu muro nari redo amiye yaku ni kabai resi niyo, ‘Amiye tora, lagani yokoi maka ferei kumo adinari kono tanu masi fonuka aigida. ⁹Agiya laganiri mina fuka yabo kana rama aigo ri, bi buni tora gade, idu de vo nisi bi nu makugiyia.’”

Iesu yaku rema yokoi Sabati medari moi buni riyo

¹⁰Sabati meda yokoiri Iesu usa usa yavari amiye oteimago. ¹¹Minari rema yokoi bi vima no ini rovaita ideri amegamo. Mina vima no yaku lagani 18 moi gauka reyo, ye ini uboma bi foki dada rorobo de nigamo. ¹²Iesu yaku ina veyo ri, bi raka nisi niyo, “Rema, mina gauka rofu koina niyo mini!” ¹³Ini vana inafafau aiyo ri, bi minari maka uboma rorobo niyo ma bi Sei di roka moi odoro reyo.

¹⁴Usausa yava di amiye tora bi gubuyo iniye reyo, adina Iesu bi Sabati medari amiye moi buni riyo. Dada dadisi amiye rofu niyo, “Meda koru idari moimai regifa; dada buni nigika bi mina medari baifa, Sabati medari bi ide!”^h

¹⁵Idu Varika Amiye yaku ni kabai resi niyo, “Ya bi ofarosi vene! Ya yokoi yokoi yaku yi boromakau o donkey mina Sabati medari ini yavari moi etae risi koru usi maragadu. ¹⁶Gua mina bi Abraham di tutubena rema kaere bi Satani yaku lagani 18 moi gira regamo; Sabati medari moi torufuka de regiya, ba?” ¹⁷Makai niyo ri, bi Iesu rofu gubuyo rededi vene bi maena reyadi. Amiye tau tora iniye bi Iesu yaku beika vegu buni vayavaya reyo mina rofu ada no iniye niyadi.

Mastadi yo di mokena ago
(Mt 13.31-32; Mk 4.30-32)

¹⁸Ye ni kaitesi niyo, “Sei di ourefeidena amena sana bi gokai kana? Beika kana rofu ni kake regida? ¹⁹Ina bi mastadi di yoyava kana. Amiye yokoi yaku moisi ini murori variyo ma tora nisi yabo niyo ri erena yaku ini tetekari nui riyadi.”

Yeast di mokena ago
(Mt 13.33)

²⁰Dubusa ni kaitesi niyo, “Sei di ourefeidena amena sana bi beika kana rofu ni kake regida? ²¹Ina bi yeast kana: ye rema yokoi yaku moisi farava siua tora regodeⁱ sa moi fui reyo mamo mina yeast yaku farava moi uruyo.”

Iduara vena kakaita
(Mt 7.13-14, 21-23)

²²Iesu bi rautu ma taoni yokoi yokoiri amiye oteimasu Jerusalem rofu bogamo. ²³Amiye yokoi yaku ni kaitesi niyo, “Varika Amiye, moi vegu rigidi vene bi tau ba be yaku maka?”

^h 13.14 Ex 20.9-10; Deut 5.13-14 ⁱ 13.21 farava siua tora regode Mina bi farava 21 kilogramme kana.

Iesu yaku ina vene ni kabai resi niyo, ²⁴“Nana rei yeiva resi iduara kakaitari dui refa, adina ya nida amiye tau tora ini mokenari bi dui regika idu anua regedi. ²⁵Yava amiye yaku dadisi yava iduara kebi rigo ma ya bi etofarori are resi fidi fidi resi nigedi, ‘Varika Amiye e, iduara una rofu moi ekel’ Idu ni kabai resi nigo, ‘Na na toto ya goinari gutuna okiyadi! ²⁶Kamini ni kabai resi nigedi, ‘Vakoi iruku irigamafa, ma ya bi uni taoni di idari oteimagasa digamo!’ ²⁷Idu dubusa nigo, ‘Na na toto ya goinari gutuna okiyadi. Ya mokena rorobo de rededi vene tau na rofu etagae ri difa!’^j ²⁸Etofarao ya maku negedi ri, bi esika dudu isaka nigasa gade aki gigi rebigedi; Abraham, Issac, Jacob ma Sei di ago niyadi vene tau vegedi ri, bi Sei di ourefeidena amena sanari ameibigedi!^k ^l ²⁹Gagani gagani meda dadido eta rofu ma meda nedo eta rofu, ma meda baido enana eta rofu ma meda baido rama eta rofu, vene okisi Sei di ourefeidena amena sana ameinu resi irakuna irigedi. ³⁰Mironari mamo kaere gabi vene bi ouregedi ma gua kaere ourededi vene bi gabi nigedi.”^m

**Iesu di uka mana Jerusalem vene rofu
(Mt 23.37-39)**

³¹Mina medari Pharisee vene be Iesu rofu baisi niyadi, “Ya mina sanari feresi sana be yokoiri diyaine, adina bi Herod yaku ya umuyegedi mokena moido.”

³²Iesu yaku mina vene kabai resi niyo, “Bosi mina sufa auna mina nifa: ‘Na bi gua ma agiya bi vima no umeki rei feidesi gauka vene moi buni regida ma aineka mamo nai moimai koina nigo.’ ³³Idu gua, agiya ma aineka nai boida sana bogida, adina bi rorobo de iniye Sei di ago nido amiye kono yokoiri umuyegedi, bi Jerusalem ri maka bi rorobo iniye!

³⁴“Jerusalem taoni vene o! Ya vene yaku Sei di ago niyadi vene umyesi Sei ya rofu ni feideyo vene fore dudu uyadi. Uru gokaisanu yi mida mida egogo regi ura regamaka, kokoro kosini yaku ini mida ini eta gabireri bou rido kana, idu ya vene bi na gedu magamadi! ³⁵Ye yi sana autu feresi digo. Kamini ya nida, de na vegedi bogo meda yokoi okigo ri mamo nigedi, ‘Varika Amiye di rokari baido amiye buni tora gade maraine.’ ”ⁿ

Iesu yaku gauka amiye moi buni riyo

14 ¹Sabati meda yokoiri Iesu Pharisee amiye tora yokoi di yavari iruku irigi boyo. Kamini minari amededi vene tau yaku Iesu vei mona regamadi beika rego mina. ²Yuka vana uruyo amiye yokoi bi Iesu di nemokori baisi are reyo. ³Kamini Iesu yaku ago gira oteimana vene

^j 13.27 Ps 6.8 ^k 13.28 Mt 22.13; 25.30 ^l 13.28-29 Mt 8.11-12 ^m 13.30 Mt 19.30;
20.16; Mk 10.31 ⁿ 13.35 Ps 118.26; Jer 22.5

ma Pharisee vene rofu ni kaitesi niyo, “Ago gira rofu gauka vene Sabati medari moi buni rigifa ba ide?”

⁴Idu de ni kabai reyadi. Kamini Iesu yaku mina gauka amiye moisi moi buni resi ni feideyo. ⁵Ye ina vene rofu niyo, “Ya kaere yi mida o yi boromakau nufa kono rubari keto rei nego vo nisi, bi evade Sabati medari moi yakugo ba ide?”^o

⁶Idu ina vene bi Iesu ni kabai rena anua reyadi ini mina agori.

Ave nina ma gaba rena di vegu

⁷Iesu yaku raka niyadi vene be veyo, amena sana burefe maina regamadi, dada mina mokena ago ina vene rofu niyo: ⁸“Rema mena irakuna regi vo nisi amiye yokoi yaku ya raka nigo ri, bi amena sana burefe minari ga ame, mina amena sana bi raka niyadi amiye tora iniyе yokoi di amena sana baebu.^p ⁹Resi bi ya roada raka niyo amiye yaku ya rofu baisi nigo, ‘Dadi kumo ini amena sanari ka ameyainedi.’ Ye ya bi kamini maena resi nesi egonari amegiya. ¹⁰Idu ya raka nilegedi ri, bi bosi egona sanari ame. Kamini ya raka niyo amiye baisi ya nigo, ‘Dubu, dadi baisi yomina amena sana burefe minari ame.’ Mina vegu yaku ya raka niyadi vene tau di nemokori bi mokegedi amiye tora yokoi vo nilegedi. ¹¹Adina bi kaere iniyе moi odoro rigo bi Sei yaku moi ave nigi rigo. Ma kaere iniyе ave nigo bi Sei yaku moi odoro rigo.”^q

¹²Kamini Iesu yaku amiye bedakai rofu niyo, “Yi uriyenau o urusa irukuri, yi asiyaka o usika ourena o gugura tau vene ga raka ni — makai regiya ri, bi ina ka dairi ya raka nilegedi, ye yi beika reyo kana bi dairi ya magedi mini. ¹³Irakuna regiya ri, bi irava vene, rovaita bero niyadi vene, yuka no vene ma ne taufa vene mina raka ni. ¹⁴Minari bi buni tora gade baku regiya, adina ina vene bi anua dairi ya magedi. Sei yaku mokena rorobo amiye dadi rae rego medari, dairi ya mago.”

Irakuna tora di mokena ago

(Mt 22.1-10)

¹⁵Amededi sanari amiye yokoi yaku mina sina neideyo ri, bi Iesu rofu niyo, “Sei di ourefeidena amena sanari amesi irakuna irigedi vene tau bi buni tora gade moigedi!”

¹⁶Ma ina rofu niyo, “Amiye yokoi yaku irakuna tora resi amiye tau raka niyo. ¹⁷Resi mina irakuna meda okiyo ri, bi ini moimai rei tavoi redo amiye ni feideyo omaro vene nilegedi, ‘Ya baifa, iruku tau amededi!’ ¹⁸Idu ina tau noibantu bi dadisi deda sina kamini niyadi. Yokoi yaku niyo, ‘Muro regi kono tu yokoi voi reyaka ye vegi digida, dada yi amiye tora ka bosi ni gubuyo ga reyaine.’ ¹⁹Ma yokoi yaku

^o 14.5 Mt 12.11 ^p 14.8-10 Prov 25.6-7 ^q 14.11 Mt 23.12; Lk 18.14

niyo, ‘Na bi boromakau vana ufo voi reyaka ye vei mona regi digida, dada yi amiye tora ka bosi ni gubuyo ga reyaine.’²⁰ Ma yokoi yaku niyo, ‘Na bi ruika rema meyaka, dada baina anua reida.’

²¹ “Kamini mina moimai rei tavoi redo amiye dairi bosi mina sina tau niyadi ini amiye tora rofu ni oteimaro. Mina amiye tora gubuyo resi niyo, ‘Evade digasa taoni di ida tora ma ida keika tauri resi irava vene, rovaita bero niyadi vene, ne taufa vene, ma yuka no vene minari afei bae.’²² Doba de bi mina moimai rei tavoi redo amiye yaku niyo, ‘Amiye tora, yi niyo kana bi reyaka, idu yi yava bi vata baina kode.’²³ Dada niyo, ‘Bogiya gagani ma muro di idari ni yeiva re kumo amiye afei dui regiya ma nai yava vata baiyaine.²⁴ Ya nida mirona vene tau raka niyaka mina, nai irakuna reyaka mina de irigedi! ’ ”

Usi dina amiye di mokei mona rena (Mt 10.37-38)

²⁵ Amiye tau tora Iesu sa bogamadi ri, ne kero resi ina vene rofu niyo, ²⁶ “Amiye yokoi nai usi dina amiye mokego vo nisi bi na rofu uka tora mago ma ini baba, ini nono, ini rema, ini mida, ini usika ourena ma iniye rofu ka uka de mago.”^r ²⁷ Kaere amiye ini satauro iniye de uakaisi na usi baigo bi nai usi dina amiye bi anua rego.^s

²⁸ “Ya amiye yokoi ini mokenari bi yava doba akugo vo nisi, bi ina bi siko ameinu resi fore gokaisanu moimai koina nigi bi ina nufa vego. ²⁹ Mina siko de rego ri, bi ini yava dadigo sana bi rigo, idu de moi koina rigo ri, bi amiye tau yaku mina vesi bi ni ninika regedi ina rofu. ³⁰ Resi nilegedi, ‘Mina amiye bi yava rigi kora reyo idu de ri vau reyo!’ ”

³¹ “Gagani yokoi di kini ini iya rededi vene bi 10,000 moisi ruda bogo gagani kini yokoi sa kaere bi ini iya rededi vene bi 20,000 vo nisi, bi ina bi siko ameinu resi mamo vego mirona gagani di kini u vau rego ba ide mina. ³² Ini mokena mina bosi toe nigo ri, bi ago ni feidego mirona gagani kini rofu ruda okina koderi uka yokoi maka reyaganedi vo nisi. ³³ Mina kana dada, ya kaere na usi dina amiye mokeisa vo nisi bi yi beika tau bi fere.

Mami de ramena (Mt 5.13; Mk 9.50)

³⁴ “Ramena bi buni; idu ramena di safi ka koina nigo vo nisi, bi gokai dudu moi safi rigiya? ³⁵ Mina bi moi makuna maka; ini buni yokoi de. Amiye ini neidego vo nisi, bi neideyaine!”

^r 14.26 Mt 10.37 ^s 14.27 Mt 10.38; 16.24; Mk 8.34; Lk 9.23

Mamoe forovai reyo

(Mt 18.12-14)

15

¹Meda yokoiri fore butu rededi vene tau gade ma vegu no rededi vene be bi Iesu di sina neidegedi vo nisi ina rofu baiyadi ri,^t

²Pharisee vene ma ago gira oteimana vene bi ago tau nisi niyadi, “Mina amiye bi vegu no rededi vene faiva nisi ina vene sa kumo iruku irido!”

³Dada Iesu yaku mina mokena ago ina vene rofu niyo:

⁴“Ya tau vakoiri amiye yokoi bi yi mamoe 100 nufa ma yokoi maka bi kamini boyo rego ri, bi mina mamoe 99 nomu ini tavara rededi sanari feresi disi mina yokoi maka boyo reyo maina resi mamo baku rego.

⁵Baku rego ri, bi ada iniyе nisi ini megeafafau aisi ⁶uakaisi rauturi okigo. Mina resi bi ini asiyaka vene ma ina atafu amededi vene raka ni egogo resi nigo, ‘Na bi nai boyo reyo mamoe mina baku reyaka dada na sa ada renadi!’ ⁷Makai ya nida omari amededi vene ada regedi amiye yokoi maka ini vegu no feresi moi etagae riyo dada. Idu mokena rorobo vene 99 bi ini vegu no de feresi moi etagae de riyadi dada omari amededi vene ada de regedi.

Fore forovai reyo

⁸“O goina rema ini siriva fore bi vana ufo, idu yokoi maka bi moi boyo rego vo nisi, ina bi ramefa ori katusi yava guda resi maina rei bogo ma baku rego ba? ⁹Baku rego ri, bi ini asiyaka ma ina atafu amededi vene raka ni egogo resi nigo, ‘Na bi nai siriva fore boyo reyo mina baku reyaka dada na sa ada renadi!’ ¹⁰Mina kana ida dudu ya nida, Sei di ini naivo naivo vima bi ada regedi amiye yokoi maka ini vegu no feresi moi etagae rido dada.”

Mida forovai reyo

¹¹Resi Iesu yaku niyo, “Amiye yokoi bi ini rumana mida remanu.

¹²Usika mida yaku dadisi ini baba niyo, ‘Baba, muyegiya ri beika gugura tau bi nai vo nisi gua na ma.’ Dada mina amiye yaku ini mida remanu di ini beika gugura muyesi ferego kana bi kamini rau reyo. ¹³Meda be koina niyo ri, mina usika mida yaku ini gugura tau moisi ini rautu ferei dadi diyo. Gagani maike tora yokoiri disi ini fore tau ini uka di mokena rofu maku vau reyo. ¹⁴Ina sa beika amedo kana maku vau reyo ma mina gagani adabo tora yokoi are reyo ri, bi iniyе sa bi beika buni irigi yokoi de. ¹⁵Dada disi moimai reyo mina gagani amiye yokoi sa. Ina bi ini murori ni feideyo ma ini dona nari rei mago. ¹⁶Ini mokenari bi dona iruku vana magamo iniyе ini uka rauna mina moi amuta rigo, idu yokoi

^t 15.1-2 Lk 5.29-30

yaku kana beika yokoi mina mana de irigamo. ¹⁷Gabi mamo ini mokena ina rofu dairi baiyo ri, bi dadisi niyo, ‘Nai baba di moimai rededi vene tau bi ini iruku bi tora gade iridedi ma na bi yomini rauna dudu muyegi reida! ¹⁸Dadisi bogida nai baba rofu nigida, Baba, na bi Sei rofu ma ya rofu vegu no reyaka. ¹⁹Na bi yi mida vo ga na ni; yi moimai amiye yokoi kana na nari re.’ ²⁰Resi bi dadisi ini baba rofu dairiyo.

“Ina bi yava okina koderi, ini baba yaku maikeri gutuna vesi ina rofu iriyeduwa resi raga rei bosi ini mida buda aisi fuka reyo. ²¹Ini mida yaku niyo, ‘Baba, na bi Sei rofu ma ya rofu vegu no reyaka, na bi yi mida vo ga ni.’ ²²Idu ini baba yaku raka nisi ini moimai rei tavoi rededi vene rofu niyo, ‘Evade varuka burefe iniye moi desi ae mafa. Ini vanari rini yokoi ae masi ini yukari tamaka ae mafa. ²³Mina resi bosi boromakau mida vana resifa mina ufa ma irakuna tora resi ada renadi! ²⁴Adina nai mida mina bi muyeyo, idu gua bi vegu niyo; eva niyo idu disi dairiyo ma baku reyafa.’ Kamini irakuna ekeyadi.

²⁵“Mina medari ini ourena mida bi murori ameyo. Dairi baiyo ri yava adinari bi gita kukuroka ma adena udedi mina neideyo. ²⁶Dada naivo amiye yokoi raka nisi ni kaitesi niyo, ‘Mina bi beika rededi?’ ²⁷Mina naivo amiye yaku ni kabai resi niyo, ‘Yi dubuini dairi okiyo dada yi baba yaku boromakau mida vana masifa mina usi irakuna rededi, adina yi baba yaku buni dudu dairi moiyo dada.’

²⁸“Mina ourena mida bi gubuyo resi yava ideri de dui rei boyo; dada ini baba yaku desi ni guba reyo dui reyaine vo nisi. ²⁹Idu ni kabai resi niyo, ‘Ve kumo yomina lagani tau na yi moimai reyaka yi naivo amiye kana, resi yi ago gira mina de neidei kora regamaka. Idu ya bi gouti mida nai asiyaka vene sa irakuna regi ka de na maro! ³⁰Idu yi mina mida bi yi gugura fore tau koa rededi rema vene rofu maka rau rei vau resi yavari dairiyo ri, ya bi boromakau mida vana resifa mina rofu uyo!’ ³¹Ini baba yaku ni kabai resi niyo, ‘Nai mida, ya bi ari neinei na sa dada beika tau nai bi yi. ³²Idu buni bi ada resi irakuna renadi, adina yi dubuini bi muyeyo, idu gua bi vegu niyo; disi forovai reyo, idu, gua baku reyafa.’ ”

Gugura fore nari redo amiye mokena buni nufa

16 ¹Iesu ka ini usi dina vene rofu niyo, “Gugura fore tau amiye yokoi ini gugura nari redo amiye yokoi nufa amegamo. Mina gugura fore tau amiye ni oteimaradi bi ini gugura nari redo amiye yaku ini fore iri vau regamo. ²Dada raka nisi niyo, ‘Na bi mina sina nidedi neideida. Nai fore gokai makusa mina bi buni na oteimagiya, adina ya bi nai gugura tau moi ourefeidesa bi moi dairigida.’ ³Mina naivo amiye yaku iniye kamini niyo, ‘Nai amiye tora bi nai moimairi kamini na moi etagae rigo ma na bi kono goenari yeiva de ma amiye rofu ni guba renari ka maena reida; dada na bi beika regida? ⁴Idu ida yokoi amedo bi na

na diba; nai moimairi nai moi etagae rigo ri, nai asiyaka vene yaku ini yavari na moi afei dui regedi.

⁵“Kamini kaere ini amiye tora rofu ini beika moiyadi rofu gabu mago vene raka ni vau resi amiye yokoi siko rofu ni kaiteyo, ‘Ya bi nai amiye tora rofu bi gokaisanu magiya?’ ⁶‘Olive oira botoro 100^u magida,’ vo niyo. Ma yaku niyo, ‘Yi moiyo kana fefa bi mini, moisi ameineu resi evade 50 bura ri.’ ⁷Resi yokoi ni kaiteyo, ‘Ma ya bi gokaisanu magiya?’ Ina yaku niyo, ‘Witi fuse 100.’^v Kamini ina rofu niyo, ‘Yi moiyo kana fefa bi mini, moisi 80 bura ri.’

⁸“Gabi ini amiye tora yaku makai reyo ma neideyo dada ini roka ni odoro reyo, adina bi mokena buni dudu ini moimai reyo; dada mina kono vene diba mokena buni dudu ini moimai rededi, idu vabara vene ini diba bi keika mokena buni dudu ini moimai rededi.”

⁹Ma Iesu ka niyo, “Mina dada ya vene rofu nida: yi kono di gugura dudu vegu rau regasa auta refa, ye mina gugura koina nigo ri Sei yaku ini toga toga amedo sanari ya afei dui regedi dada. ¹⁰Kaere amiye yaku beika keika keika rofu nari rei mona rego, ina bi beika tora ka nari rei mona rego. Idu beika keika keika de ofa ofa dudu nari rego amiye bi beika tora rofu ka ofa ofa dudu de nari rego. ¹¹Ya kono di gugura de nari rei mona reyadi vo nisi, ya yaku gugura rama^w dudu ka de nari rei mona regedi. ¹²Resi ya bi amiye be di gugura nari rei mona de reyo vo nisi, bi kaere yaku yi gugura rama ya mago?

¹³“Moimai rei tavoi redo amiye yokoi yaku amiye tora remanu di moimai de rego. Adina bi yokoi rofu bi gubuyo resi yokoi rofu bi uka mago; o ina bi yokoi di ago neidesi yokoi rofu bi mokei itu rego. Ya bi Sei ma fore ka di moimai rei tavoi rededi vene anua moimai regedi.”^x

Iesu di ini sina be

(Mt 11.12-13; 5.31-32; Mk 10.11-12)

¹⁴Pharisee vene yaku mina sina neideyadi ri, bi Iesu ni ninika reyadi, adina ina vene bi fore mokei tora rededi. ¹⁵Idu Iesu yaku ina vene rofu niyo, “Ya vene yaku amiye di nemokori ya kaya yi vegu bi rorobo moi ofa ofa ago vo nigasa rededi, idu Sei bi ina diba yi uka mokena; adina beika gugura bi buni iniye amiye di mokenari mina bi Sei di nemokori no iniye kino nufa.

¹⁶“Moses di ago gira ma Sei di ago niyadi vene di ago bura reyadi bi ni odoro regamadi ma John Baptist di okina ariri baiyo. Mina ariri gutuna Sei di ourefeidena amena sana di sina buni bi ni ogau rededi mini ma amiye tau bi ini yeiva tau dudu dui regika rededi.^y ¹⁷Idu oma ma kono

^u 16.6 Mina bi 3,000 litre kana. ^v 16.7 Mina bi 21,000 kilogramme kana. ^w 16.11 Mina bi oma di gugura mini. ^x 16.13 Mt 6.24 ^y 16.16 Mt 11.12-13

bi ini ida nufa roro nilegedi, idu ago girari bura reyadi mina di tuta yokoi kava de roro nigo.^z

¹⁸“Kaere amiye ini rema feresi rema bouna mego, bi koa rego; ma mina amiye kaere bi rema mego, ka bi koa rego.”^a

Gugura tau amiye ma Lazarus

¹⁹“Gugura tau amiye yokoi amegamo; ina bi varuka burefe iniyemina risi ada regasa iruku buni ari neinei irigamo. ²⁰Ina yava ida nefauri bi irava amiye ini roka Lazarus mina bae amegamo. Ini rovaita mina bi ara yaku ni vai rena iniyereyo. ²¹Ini ukari mokegamo bi mina gugura tau amiye di iruku bubudo ini teiborori yareyadi mina irigo. Auna yaku kabosi ini ara uaka regamadi.

²²“Mina irava amiye muyeyo ri, bi Sei di naivo naivo amiye yaku Abraham atafu afei boyadi. Kamini gugura tau amiye ka muyeyo maguri aiyadi. ²³Muyena sanari^b esika moiga ameyo ri, bi ini nemoko maku boyo ri, bi maikeri gutuna Abraham veyo ma Lazarus bi ina atafu ameyo. ²⁴Dada raka niyo, ‘Abraham, nai baba, na iriyeduka re! Lazarus ni feidegiya ma ini vana metona dudu koruri bi risi nai afiye moi amutareyaine, adina na bi esika tora iniyemina ita ideri moida!’

²⁵“Idu Abraham yaku niyo, ‘Nai mida, moke, yi vegu amegamo ri, gugura buni moigamo ma Lazarus bi no mina moiyo. Idu ya esika moisari, ina bi minari gua ada redo. ²⁶Ma yomakai, una remanu uni utari bi kono ruba tora gade amedo, dada kaere minari gutuna ugasa bae nego vo nigo bi rena anua rego ma mirona eta rofu ugasa baina ka rena anua rego.’ ²⁷Kamini mina gugura tau amiye yaku niyo, ‘Makai vo nisi bi ya ni guba reida, baba Abraham, Lazarus nai baba di yavari ni feide. ²⁸Mironari bi nai dubuiyaka vana berou autu. Ni feidegiya kumo nesi ni oteimago mina esika sanari ina ka ga baiyagane.’

²⁹“Idu Abraham yaku niyo, ‘Moses ma Sei di ago nidedi vene di ini ago bi ina vene sa; ina rofu maka ago neideyagane.’ ³⁰Idu mina gugura tau amiye yaku niyo, ‘Baba Abraham, mina bi buni de! Amiye yokoi muyenari gutuna ina vene rofu dadisi boi nego ri vo nisi, bi ini vegu no feresi moi etagae rigedi.’ ³¹Idu Abraham yaku niyo, ‘Moses ma Sei di ago nidedi vene di ago de neidegedi vo nisi, bi muyena amiye dadigo rofu yaku ka ini uka de moi kero regedi.’ ”

Vegu no

(Mt 18.6-7, 21-22; Mk 9.42)

17 ¹Iesu yaku ini usi dina vene rofu niyo, “Vegu nofafau uka maina rena vegu bi rama iniyemina nigo, idu mina vegu nofafau uka

^z 16.17 Mt 5.18 ^a 16.18 Mt 5.32; 1 Cor 7.10-11 ^b 16.23 *ita moka sana*: Muyena sana.

maina redo amiye bi ina rofu bi gokai no iniye iniye! ²Amiye yokoi yaku mina mida keika keika yokoi ourefeidego vo nisi ma vegu no rego bi kaunava tora moigo. Bi buni bi witi utei rina di fore tora ini kuriri ukita resi davarari makugo. ³Mokena dudu ya kaya nari re!^c

“Yi usika ourena vegu no rego ri vo nisi, bi ni kumo ga reyaine; ini vegu no feresi moi etagae rigo ri vo nisi, ini vegu no toto ni. ⁴Ya rofu vegu no mina meda yokoi makari uru viro vara reibigo rofu baigasa ya uru viro vara nibigo, ‘Na bi vegu no feresi moi etagae riyo,’ vo nibigo ri, bi ya bi ini vegu no reyo mina toto ni.”

Uka vari gira mana

⁵Varika Amiye di ni feidena vene yaku ina rofu niyadi, “Uni mokena vari gira aina ya rofu moi tora ri.”

⁶Ma Varika Amiye ni kabai reyo, “Yi mokena vari gira aina bi mastadi di yo kana vo nisi, bi yabo tora rofu nigedi, ‘Ya kaya daru noibanu rae resi koru moka torari vari’ vo nigedi ri, yi ago neidego.

Naivonaivo amiye di moimai

⁷“Ya yokoi minari yaku yi moimai rei tavoi redo amiye bi murori moimai reibigo, o mamoe vana rei vau resi yavari okigo ri, bi ina rofu nigiya, ‘Baisi amesi iruku iri,’ de vo nigiya. ⁸Ide mada! Ya bi nigiya, ‘Nai iruku feidesi varuka burefe risi nai ita koru naivo regiya bogo nai koru ma iruku iri vau regida mamo; gabii yi koru ma iruku irigiya.’ ⁹Mina moimai rei tavoi redo amiye yi ago neideyo, idu ina ni buni tora gade de magiya. ¹⁰Mina dada, ya vene ka, niyadi kana rei vau regedi ri, bi nigiya, ‘Una bi ka moimai rei tavoi rededi vene itafu; mina bi uni moimai maka reyafa.’ ”

Iesu yaku amiye vana ufo moi buni riyo

¹¹Iesu Jerusalem seira risi bogamo ri, bi Samaria ma Galilee taoni di kono utari boyo. ¹²Rautu yokoi dui reyo ri, refera vene vana ufo baku reyadi kaere bi maikeri are resi ¹³raka niyadi, “Iesu, Varika Amiye, una iriyeduwa re!”

¹⁴Iesu yaku ina vene vesi niyo, “Bofa kumo Sei ma amiye utari naivo vene ya veyagane.”^d

Idauri boyadi ri, bi ini rovaita moi ruaka rido.^e ¹⁵Kamini amiye yokoi maka yaku ini rovaita moi buni riyo mina veyo ri, bi dairi baisi goroka tora dudu Sei di roka moi odoro resi ¹⁶Iesu di yuka adinari kero resi buni tora gade niyo. Mina amiye bi Samaria amiye. ¹⁷Kamini Iesu yaku niyo, “Amiye bi vana ufo moi ruaka riyaka. Ma mina amiye vana berou autu

^c 17.3 Mt 18.15 ^d 17.14 Lev 14.1-32 ^e 17.14 moi ruaka rido: 5.12 baku re.

vana raro bi goini? ¹⁸Beika resi mina Israel de amiye yaku maka dairiyo Sei di roka moi odoro regi ba?” ¹⁹Kamini Iesu yaku ina rofu niyo, “Dadisi bo. Yi mokena vari gira aina yaku ya moi buni riyo.”

Sei di ourefeidena amena sana gokai dego
(Mt 24.23-28, 37-41)

²⁰Pharisee vene be yaku Iesu ni kaitesi niyadi, “Sei di ourefeidena amena sana goivaka ogau nigo?” Ina vene rofu ni kabai resi niyo, “Sei di ourefeidena amena sana gokai dego bi ini rebe de vegiya. ²¹Yokoi yaku ka de nigo, ‘Vefa, ina bi yomini!’ o, ‘Ina bi yoronil’; adina bi Sei yaku yi ideri ourefeidesi amedo.”

²²Kamini Iesu yaku ini usi dina vene rofu niyo, “Amiye di Mida di ini meda baigedi ma ya yaku mina meda vegi ura regedi vo nigedi, idu de vegedi. ²³Be vene yaku ya rofu nigedi, ‘Mironari nei rei vefal’ o ‘Minari nei rei vefal’ Idu bosí maina ga refa, ²⁴adina bi ayena yaku kamanika redo ri oma berou eta rofu vabara ni bodo berou rofu moido kana Amiye di Mida di ini dena ari bi mina kana rego. ²⁵Mina vata nina koderi, bi esika tau tora siko moigo ma mina ari vene yaku ina rofu gedu magedi kumo. ²⁶Kamini Noah di medari reyadi kana, Amiye di Mida dena medari ka makai regedi.^f ²⁷Ina vene bi iruku ma koru irigasa rumana ma rema megasa rei bogamadi boyo ini mina medari Noah sisima ideri dui reyo mamo, bi abata yaku desi ina vene ukero vau reyo.^g ²⁸Lot di medari ka kana ina vene tau bi iruku ma koru irigasa voi voi regasa muro regasa yava regasa rei bogamadi ri.^h ²⁹Lot yaku Sodom ferei yakuyo medari, Sei yaku fore ita omari gutuna miya kana moi feidesi ina vene ukero vau reyo. ³⁰Amiye di Mida ogau nigo medari ka mina kana vegu vata nigo.

³¹“Mina medari yava tebo odorori amiye bi ga neyaine ini yavari gugura fore ga moi yakuyaine; ma murori amedo amiye ka, ga dairiyaine.ⁱ ³²Lot di ini rema beika vegu rofu vata niyo ina mokefa!^j ³³Kaere ini vegu moigi maina rego, bi ini vegu de moigo, idu kaere ini vegu you feidego, bi ini vegu moigo.^k ³⁴Ya rofu nida, mina urusari, amiye remanu bi ekama yokoi makari varebigedi. Yokoi bi moi etagae risi nokoi bi ferego. ³⁵Rema remanu vakoi fore dudu witi utei rebigedi ri, yokoi bi moi etagae risi nokoi bi ferego.” ³⁶^l

³⁷Kamini ini usi dina vene yaku ni kaiteyadi, “Varika Amiye, mina vegu bi goinari vata nigo?”

Ye ni kabai reyo, “Muyena rovaita amedo sanari bi gayo bora ka mina sanari egogo regedi.”

^f 17.26 Gen 6.5-8 ^g 17.27 Gen 7.6-24 ^h 17.28-29 Gen 18.20-19.25

ⁱ 17.31 Mt 24.17-18; Mk 13.15-16 ^j 17.32 Gen 19.26 ^k 17.33 Mt 10.39; 16.25; Mk 8.35;

Lk 9.24; Jn 12.25 ^l 17.36 Bura bedakai nanaka 36 nufa: *Amiye remanu vakoi gogo murori moimai rebigedi ri yokoi bi moi etagae risi yokoi bi ferego* (Mt 24.40 baku re).

Rema obu ma kota neidena amiye di mokena ago

18 ¹Kamini Iesu yaku mokena ago yokoi ina rofu nisi oteimasi ari neinei usa usa niyaganedi, ma kosika bi ga reyagane vo nisi. ²“Taoni yokoiri kota neidena amiye yokoi amegamo, kaere bi Sei rofu ori de resi amiye rofu moi kikifa de regamo. ³Minari ka obu yokoi amegamo. Ina bi ari neinei baigasa nigamo, ‘Ya bi nai tuma vene rofu na moi rama rigiya bi buni! ⁴Mina kota neidena amiye bi meda be ini ago bi ni gedu magamo, idu gabii iniye rofu kamini niyo, ‘Na ka bi Sei rofu ori de resi amiye rofu ka moi kikifa de reida, ⁵idu mina obu yaku ago tau nido dada, ini kota rina usa nido kana bi regida, bi dairisi ada esika na mago baebu! ”

⁶Resi Varika Amiye yaku niyo, “Mina mokena rorobo de kota neidena amiye yaku niyo mina neidefa. ⁷Sei yaku gua ini abidi resi moiyo vene kaere uru ari ina rofu isaka nidedi bi ini ago neidesi ini vegu moi rama rigo, ba ide? Kiya kiya aedego ba? ⁸Ya vene rofu nida, evade ini ago neidesi ini vegu moi rama rigo. Idu Amiye di Mida ini dego ri, bi mina kono tora noibanuri mokena vari gira aina baku rego ba ide?”

Pharisee amiye ma fore butu redo amiye di mokena ago

⁹Iesu yaku ka amiye be rofu mina mokena ago niyo. Mina vene yaku ini mokeyadi bi, ina bi mokena rorobo nufa vene ma be vene rofu mokeyadi bi vegu no rededi vene. ¹⁰“Ari yokoiri, amiye remanu yaku Sei vakena yavari usa usa nigi boyadi; amiye yokoi bi Pharisee amiye ma yokoi bi fore butu redo amiye.

¹¹“Pharisee amiye yaku gaimari etae resi are resi usa usa niyo,” ‘Sei, ya rofu buni tora gade nida, na bi be kana de: ofa ofa dudu duma duma rededi vene, vegu no rededi vene, o koa rededi vene. Na ka mina fore butu redo amiye kana de; ¹²fura yokoi makari meda remanuri, bi iruku oyo resi nai gugurari beika vana ufo amedo ri, bi yokoi maka bi ya rofu maida.’

¹³“Idu mina fore butu redo amiye bi gaimari are resi ini kuri agu risi ini vana ini kokobari aisi niyo, ‘Sei, na iriyedula re; na bi vegu no amiye! ¹⁴Resi Iesu yaku niyo, “Ya nida, mina amiye remanu ini yavari dairiyadi ri, bi Sei yaku fore butu redo amiye rofu niyo ini vegu bi rorobo, idu mina Pharisee amiye bi de. Kaere iniye moi odoro rigo, bi Sei yaku moi ave nigi rigo; ma kaere iniye ave nigo, bi Sei yaku moi odoro rigo.””

**Iesu mida keika keika buni tora gade maro
(Mt 19.13-15; Mk 10.13-16)**

¹⁵Kamini be vene yaku ka ina rofu kakua afei baigamadi bi avaka moiyanedi, idu ini usi dina vene yaku mina vesi ni vai reyadi. ¹⁶Idu Iesu

^m **18.11** gaimari etae resi are resi usa usa niyo; buru bedakai are resi inaika usa usa niyo nufa. ⁿ **18.14** Mt 23.12; Lk 14.11

yaku mida keika keika rofu raka nisi niyo, “Mida keika keika bi ferefo kumo na rofu baiyagane; ga meki refo, adina Sei di ourefeidena amena sana bi mina kana vene di. ¹⁷Rama ya nida, kaere amiye yaku Sei di ourefeidena amena sana mida keika kana de moigo vo nisi, bi de iniye iniye dui rego.”

Amiye gugura tau nufa
(Mt 19.16-30; Mk 10.17-31)

¹⁸Kamini ourefeidena amiye yokoi yaku ni kaiteyo, “Oteimana amiye buni, beika regida bi toga toga ameibobina vegu moigida?”

¹⁹Ma Iesu yaku niyo, “Beika resi na rofu bi buni vo nisa? Amiye yokoi bi buni de, Sei iniye maka bi buni. ²⁰Ya ya diba ago gira di ago bi: ‘Mena vene koa ga re; amiye umuyena ga re; duma duma ga re; amiye di vegufafau ofa ofa ago ga ni; yi nono baba di ago neide’ ”^o

²¹Ye mina amiye yaku niyo, “Na keikari gutuna mina kana vegu ago tau vakoi moi gira rei baida.”

²²Ma Iesu yaku mina neideyo ri, bi niyo, “Nokoi maka bi yaku de reyo. Yi gugura tau mina sero resi ini fore irava vene masi yi gugura buni bi omari baku resi na usi bae.” ²³Idu mina neidesi ini uka yarena iniye reyo, adina ina bi gugura tau gade amiye.

²⁴Iesu yaku ina vesi niyo, “Gugura tau gade nufa vene yaku Sei di ourefeidena amena sanari dui rena bi gira iniye! ²⁵Kamelo^p yaku niduru nemokori dui rego bi aita, idu gugura tau gade nufa amiye yaku Sei di ourefeidena amena sanari dui rena bi gira iniye.”

²⁶Ye mina ago neideyadi vene yaku niyadi, “Kamini kaere moi vegu rigo?”

²⁷Ma Iesu niyo, “Amiye beika baika yaku anua regedi, Sei yaku mina rego bi aita iniye.”

²⁸Kamini Peter yaku niyo, “Ve kumo, uni beika baika feresi ya usi diyafa.”

²⁹Ma ina vene rofu niyo, “Rama ya nida, amiye yokoi yaku ini yava, o rema, o usika ourena, o nono baba, o mida, Sei di ourefeidena amena sana rofu fereyo bi, ³⁰mina veguri, bi tora gade iniye moigo. Ma gabi mina meda baigo ri, toga toga ameibobina vegu moigo.”

Iesu dubusa uru regode ini muyena ni okuyo
(Mt 20.17-19; Mk 10.32-34)

³¹Kamini ini amiye tuero moi gaima risi niyo, “Neidefa, una bi Jerusalem bogifa, Sei di ago niyadi vene yaku Amiye di Mida rofu

^o 18.20 Ex 20.12-16; Deut 5.16-20 ^p 18.25 kamelo bi hosi kana; gagani autu sanari amiye di gugura fare moi didiedi.

vata nigo vegu buru reyadi mina rama aigo. ³²Tutubena idana vene di vanari aigedi; ina rofu ni kurusi ni no resi ayaka su resi ³³buburu resi umuyegedi. Idu gabi meda regoderi, dubusa dadi rae rego.”

³⁴Idu ini usi dina vene bi mina sina niyo ri, bi ini adari ufatena de reyo. Mina sina di ini rama bi ina vene di mokenari sui niyo ma ini beika nigamo bi ina vene ka ina toto.

Iesu yaku usa usa nina amiye ne taufa nufa moi buni riyo

(Mt 20.29-34; Mk 10.46-52)

³⁵Iesu Jericho negau okiyo ri, bi ne taufa amiye yokoi ida negau amegasa usa nigamo. ³⁶Amiye tau gade bae bogamadi mina neidegamo ri, bi ni kaitesi niyo, “Mina bi beika?”

³⁷Kamini niyadi, “Iesu Nazareth amiye bi bae boyo dada.”

³⁸Kamini raka nisi niyo, “Iesu, David di tutubena, na iriyeduka re!”

³⁹Ourei boyadi vene yaku emaradi babo niyaine vo niyadi, idu besa raka niyo, “David di tutubena, na iriyeduka re!”

⁴⁰Ye Iesu are resi ago gira dudu ina rofu moi baiyaganedi vo niyo. Atafu baiyo ri, bi ni kaiteyo, ⁴¹“Ya ura reisa bi beika ya rofu regida?”

Ni kabai resi niyo, “Varika Amiye, na ura reida bi dubusa vegida.”

⁴²Iesu yaku niyo, “Ve kumo! Yi mokena vari gira aina yaku ya moi buni riyo.”

⁴³Ma evade maka ini ne dubusa areyadi ma Iesu usi bosi Sei di roka moi odoro regamo. Amiye tau yaku mina veyadi ri, bi ina vene ka Sei di roka ni odoro reyadi.

Iesu ma Zacchaeus

19 ¹Iesu Jericho dui resi ebu rei bogamo. ²Minari bi amiye roka Zacchaeus, kaere bi fore butu redo vene di amiye tora. Iniye ka bi gugura tau amiye. ³Ini ura bi Iesu vego, idu ina bi amiye tumu dada, vena anua regamo, amiye ka berou bi tau tora iniye dada. ⁴Mina dada ouresi raga bosi yabo tora yokoi firu boyo, Iesu vegi. Ina bi mina dakai baigo dada. ⁵Iesu yaku mina sana okiyo ri, bi ne odoro resi ina rofu niyo, “Zacchaeus, evade soka rei degiya, adina na bi gua yi yavari amegida.”

⁶Dada evade soka resi ini yavari ada dudu moi dui reyo. ⁷Amiye tau yaku mina veyadi ri, bi ni mumugu regi kora regasa nigamadi, “Ina bi vegu no redo amiye yokoi di yavari iruku irigi dui reyo.”

⁸Zacchaeus are resi Varika Amiye rofu niyo, “Varika Amiye, nai gugura tauri berou afona moisi bi irava vene rofu magida. Resi amiye ofa dudu ini gugura fore moiyaka vo nisi, bi dubusa uru vana raro besa dairi magida.”

⁹Iesu yaku ina rofu niyo, “Gua medari moi vegu rina bi mina yavari dui reyo, adina bi mina amiye ka Abraham di mida. ¹⁰Amiye di Mida deyo bi boyo reyadi vene maina rei baku resi moi vegu rigo.”^q

Goro fore di mokena ago
(Mt 25.14-30)

¹¹Mina sina neidegamadi ri, bi yavoi resi mokena ago niyo, adina ina bi Jerusalem atafu okiyo, ma amiye yaku mokegamadi bi Sei di ourefeidenamena sana bi minari evade maka ogau nigo. ¹²Mina usi niyo, “Amiye yokoi, kaere bi varika amiye kana, dadisi gagani maike yokoiri diyo iniye kini rigedi ma dairigo. ¹³Dada ouresi ini moimai rei tavoi rededi vene tau vakoi vana ufo raka nisi goro fore’ yokoi yokoi masi niyo, ‘Mina forefafau moimai refa bogo dairi okigida kumo.’ ¹⁴Idu ini gagani vene yaku bi ini ura de iniye regamadi, dada naivo vene ago ni feideyadi ma usi disi niyadi, ‘Una ura de resifa mina amiye yaku uni kini niyaine.’

¹⁵“Kini nisi ini gaganiri dairiyo. Mina usi bi ago ni feidoyo ini moimai reitavoi rededi vene rofu fore marofafau moimai reyadi ri beika be reyadi mina ini nemokori vego vo nisi. ¹⁶Ourena amiye yaku baisi niyo, ‘Varika amiye, yi goro forefafau dubusa vana ufo riyaka.’ ¹⁷Ma ina rofu niyo, ‘Rei mona reyo; ya bi nai moimai rei tavoi reisa amiye buni! Beika keika ya maraka bi nari reimonareyo dada, taoni vana ufo bi nari regiya.’ ¹⁸Ina usi naivo amiye yaku baisi niyo, ‘Varika amiye e, yi goro forefafau bi dubusa vana berou autu riyaka.’ ¹⁹Ma ina rofu ka niyo, ‘Taoni vana berou autu bi nari regiya.’

²⁰“Kamini naivo amiye yokoi yaku baisi niyo, ‘Varika amiye e, yi goro fore bi yomini. Muko yokoiri aisi moi sui reyaka. ²¹Ya rofu ori reyaka, adina ya bi amiye gira. Banikari de aiyo mina moisa ma varinade reyo mina goe goe reisa.’ ²²Ini varika amiye ni kabai reyo, ‘Ya kaya yi sina niyo dudu ya kota regida. Ya bi amei tavoi resi moimai rei tavoi reisa amiye no! Ya diba niyo na bi amiye gira, beika banikari de aiyaka bi moida ma beika de variyaka bi goesi moida. ²³Beika resi nai fore bi banikari de moi aiyo? Kamini na dairi baiyagadu ri, bi dubusa bae moiyagadu, banika yaku fore keika fafafau aiyagadu mina sa.’

²⁴“Resi atafu are rededi vene rofu niyo, ‘Ini goro fore yokoi maka moisi vana ufo nufa amiye rofu mafa.’ ²⁵Idu niyadi, ‘Varika amiye, ina bi ka ini goro fore bi vana ufo!’ ²⁶Ni kabai resi niyo, ‘Ya rofu nida, amiye kaere ini beika baika nufa bi moi tanu mago. Idu kaere ina bi de iniye iniye nufa, ka ina rofu keika iniye amedo bi moi dairigo.’^s ²⁷Idu nai tuma vene kaere yaku ura de reyadi na kini nigida vo niyadi, bi afei baisi minari nai nemokori u vau refa!” ”

^q 19.10 Mt 18.10 ^r 19.13 *goro fore*: Goro fore yokoi maka bi rautu amiye di moimai meda 100 ri di ini davana kana. ^s 19.26 Mt 13.12; Mk 4.25; Lk 8.18

Iesu kini kana Jerusalem ri dui reyo
(Mt 21.1-11; Mk 11.1-11; Jn 12.12-19)

²⁸Iesu yaku mina sina ni vau reyo ri, dadisi Jerusalem ri ourei boyo.
²⁹Kamini Bethphage ma Bethany taoni keika, omuna di roka Olive yabo adinari bae ekaira regasa ini usi dina amiye remanu ni feidesi ³⁰niyo, “Rautu yokoi yi budari rofu bogedi. Mina sanari boi okigedi ri, bi donkey di mida ukita riyadi baku regedi; ina bi keu rina kode. Younesi moi baifa.
³¹Ye amiye yokoi yaku ya ni kaitego beika resi ini maena younededi vo nigo vo nisi, bi nifa, ‘Varika Amiye^t yaku ura redo dada.’”

³²Ye ni feideyo vene feresi baku reyadi, ini niyo kana. ³³Donkey di mida di maena younei deyadi ri, bi ini nari rededi vene yaku ni kaiteyadi, “Beika resi ini maena younededi?”

³⁴Ni kabai resi niyadi, “Varika Amiye^u yaku ura redo dada.” ³⁵Resi Iesu rofu moi baisi ini bou varukafafau yousi Iesu odorori aiyadi. ³⁶Keu risi bogamo ri, bi amiye yaku ini fafau varuka moisi idau ibu regamadi.

³⁷Jerusalem atafu, Olive yabo di omuna ika di ida dena sanari deyo ri, bi ini usi dina vene tau gade yaku goroka tora dudu Sei ni odoro rigi kora regamadi, mokena vegu tau veyadi dada. ³⁸Yomakai nigamadi, “Sei buni tora gade mado kini kaere Varika Amiye di rokari baido! Uka amuta ma Sei di vabara oma odoro iniyeri ameyaine!”^v

³⁹Kamini Pharisee vene be mina amiye tau fogori yaku ina rofu niyadi, “Oteimana amiye, yi usi dina vene emasi nivo makai ga niyagane!”

⁴⁰Ni kabai resi niyo, “Ya nida, bere nilegedi vo nisi, bi fore inkiye raka nilegedi.”

Iesu yaku Jerusalem rofu isaka niyo

⁴¹Jerusalem kaira resi ne rei veyo ri, bi iriyeduka resi isaka niyo.
⁴²Resi niyo, “Gokai uka amuta nina di vegu gua medari ya diba niyagadu! Idu gua bi de veifategedi! ⁴³Ari yokoi baigo mironi ri, bi yi tuma vene yaku ya rofu kotari ya buru resi kafu tau mina biri rigedi.
⁴⁴Resi yi amiye tau sa, yi kota ideri ya ukero vau vau regedi. Fore yokoi maka de feregedi ma are regasa ameibigo. Ini adina bi, Sei ya rofu baiyo ari bi de vei mama reyadi!”^w

Iesu bi Sei ni vakena yavari boyo
(Mt 21.12-17; Mk 11.15-19; Jn 2.13-22)

⁴⁵Kamini bi Sei vakena yavari dui resi sero rena vene umeki rei feidegi kora resi ⁴⁶niyo, “Sena bura reyo, ‘Nai yava bi usa usa nina yava,’ idu ya vene yaku duma duma vene di sui nina yava kana reyadi!”^w

^t 19.31 Varika Amiye; o ini biyaguna. ^u 19.34 Varika Amiye; o ini biyaguna.

^v 19.38 Ps 118.26 ^w 19.46 Is 56.7; Jer 7.11

⁴⁷Meda neinei Sei vakena yavari amiye oteimagamo, idu Sei ma amiye utari naivo vene di varika vene, ago gira oteimana vene, ma amiye di ini tora vene be yaku bi umuyegedi vo nigamadi.^x ⁴⁸Ida de baku reyadi gokai regedi, mina adina amiye tau tora bi ini ago moi gira reyadi.

Iesu di vava mina ni kaiteyadi
(Mt 21.23-27; Mk 11.27-33)

20 ¹Meda yokoiri, Sei vakena yava ideri, amiye oteimasi ago buni ni rausi regamo ri, bi Sei ma amiye utari naivo vene di varika vene, ago gira oteimana vene, ma tora vene ina rofu bosi are regasa ²ni kaiteyadi, “Una ni, beika vava dudu mina vegu reisa? Ma kaere yaku mina vava ya maro?”

³Ma ni kabai resi niyo, “Nai ni kaitena ka bi yokoi maka. Na nifa,
⁴John di babatiso rena di vava bi oma gutuna ba amiye gutuna deyo?”

⁵Ye iniye iniye ni dodi resi niyadi, “Bema nigifa, ‘Oma gutuna,’ ina yaku ni kaitego, ‘Ma beika resi ina rofu mokena vari gira de aiyadi?’

⁶Idu bema nigifa, ‘Amiye gutuna,’ mina amiye tau yaku fore dudu una umuyegedi, adina ini ukari mokededi bi John bi Sei di ago niyo amiye yokoi.” ⁷Ye ni kabai reyadi, “Una una toto bi goinari gutuna deyo.”

⁸Ma Iesu yaku niyo, “Na yaku ka makai de ya nigida na bi beika vava dudu mina vegu reida bi.”

Waini meko di muro nari vene di mokena ago
(Mt 21.33-46; Mk 12.1-12)

⁹Kamini amiye rofu mina mokena ago nigi kora reyo: “Amiye yokoi waini meko di muro varisi muro nari rena vene be ini nanaka moigika ni masi yava ika oto diyo.^y ¹⁰Mina usi butu rena di meda okiyo ri, bi ini moimai rei tavoi redo amiye yokoi muro nari rena vene rofu ni feideyo ma waini meko vareyo mina bi butu reyainedi. Idu bi mina moimai rei tavoi redo amiye ubobo resi vana notoka ni feideyadi. ¹¹Kamini dubusa ini moimai rei tavoi redo amiye yokoi ina vene rofu ni feideyo, idu mina vene yaku ka ubobo resi ni moi maena resi vana notoka ni feideyadi. ¹²Dubusa yokoi ni feideyo, mina bi uru regode niyo mini. Mina ka ubobo resi etofaro makuyadi. ¹³Ye waini meko di muro di biyaguna amiye yaku niyo, ‘Beika bi regida? Nai mida ni feidegida, kaere bi nai uka maida mida; ina vegedi ri, bi rama matagini regedi!’ ¹⁴Idu muro nari rededi vene yaku vesi iniye iniye ni dodi resi niyadi, ‘Mina bi muro biyaguna nigo. Baifo kumo umuyenadi, ma beika baika ini baba ferego bi uni nigo!’ ¹⁵Ye waini meko di muro etofarori meki resi umuyeyadi.

“Ye waini meko di muro biyaguna amiye bi ina vene rofu gokai beika be rego? ¹⁶Ina bi baisi muro nari rededi vene umuyesi muro bi bouna vene mago.”

^x 19.47 Lk 21.37 ^y 20.9 Is 5.1

Amiye yaku mina sina neideyadi ri, bi niyadi, “Makai bi ga ogau niyaine!”

¹⁷Idu ina vene vesi niyo, “Ye mina bura riyo bi beika?”^z

‘Yava akuna vene moi kekevata uyadi fore

bi yava moi gira redo fore iniye niyo.’

¹⁸Mina fore amiye tau vakoi kaere fafau keto rego bi rei vau uratokugo, ma mina fore kaere fafau yarego bi mina amiye foyoma rego ma budoka nigo.”

Fore butu resi mana di ni kaitena ago

(Mt 22.15-22; Mk 12.13-17)

¹⁹Ma mina meda nemoko makari ago gira oteimana vene ma Sei ma amiye utari naivo vene di varika vene yaku ina moi gira regika ida maina reyadi, adina diba niyadi mina mokena ago ina vene fafau niyo. Idu amiye rofu ori resi ²⁰Resi Iesu vei mona resi ini ura bi Rome vene di gavana di ourefeidena ma vava gabireri aigedi. Dada amiye be fore masi ni feideyadi, kaere bi sina buni buni kana dudu niyagane. Idu rama iniye bi, Iesu ini ago nigo ri ni eru regedi. ²¹Ye baisi Iesu rofu niyadi, “Oteimana amiye, una una diba ya bi sina rama maka nisa amiye. Ya bi amiye gokai kana bi de mokeisa, idu sina rama dudu maka Sei di ida oteimaisa. ²²Una ni, Caesar rofu takesi fore fei rena bi uni ago gira rofu rorobo ba ide?”

²³Idu Iesu bi sena ini eru rena vegu vei mama resi niyo, ²⁴“Siriva fore yokoi na oteimafa. Mina bi kaere di vima ma roka?”

Ye ni kabai reyadi, “Caesar di.”

²⁵Kamini ina vene rofu niyo, “Beika Caesar di, bi Caesar mafa, ma beika Sei di, bi Sei mafa.”

²⁶Beika ago niyo rofu amiye di nemokori eru regika anua reyadi; ini ago dairi maro rofu tururu reyadi, dada bere niyadi.

Muyenari dadi rae rena di ini ni kaitena ago

(Mt 22.23-33; Mk 12.18-27)

²⁷Kamini Sadducee vene be Iesu rofu baiyadi, kaere bi muyenan gutuna dadi rae rena bi egere de vo nidedi vene.^a ²⁸Ina yaku niyadi, “Oteimana amiye, Moses yaku una rofu bura reyo bi: ‘Amiye kaere ini rema feresi muyego, mida de ma natu bi ini dubuini yaku mina obu mego ma ina rofu ini dubuini di mida mago.’^b ²⁹Yokaru bi dubuiyaka viro vara amegamadi. Ourena bi rema meyo, idu muyeyo, mida yokoi de. ³⁰Ina usi vata niyo amiye ka makai ³¹ma mina usi amiye ka makai meyo. Mina vegu yokoi maka mina dubuiyaka viro vara tau noibantu

^z 20.17 Ps 118.22 ^a 20.27 Acts 23.8 ^b 20.28 Deut 25.5

rofu vata niyo — ina tau noibanu mida de muyeyadi. ³²Gabi bi mina rema ka muyeyo. ³³Ye muyena gutuna dadi rae renari, ina bi kaere di rema nigo, adina bi amiye viro vara tau noibanu yaku moyadi?”

³⁴Ma Iesu yaku ni kabai reyo, “Gua ariri amededi rema ma rumana bi mededi, ³⁵idu kaere vene Sei yaku niyo bi buni mina meda baigo ri ameyaine, muyena gutuna dadi rae regedi ri, bi iniye iniye de megedi. ³⁶Ina vene bi naivo naivo vima kana nigedi, de muyegedi. Ina vene bi Sei di mida nidedi, adina bi muyenari gutuna dadiyadi. ³⁷Idu mirona imiye yabo orina agori bi Moses yaku ka una oteimaro, amiye bi muyena gutuna dadi rae regedi, adina bi Varika Amiye rofu niyo bi ‘Abraham di Sei, Isaac di Sei ma Jacob di Sei’ vo niyo.^c ³⁸Ina bi vegu ameibobina di Sei, diya muyena di Sei. Ini mokenari ina tau noibanu bi vegu amededi.”

³⁹Ago gira oteimana vene be yaku ni kabai resi niyadi, “Oteimana amiye, ni kabai rei mona reyo!” ⁴⁰Adina dubusa ni kaitegika de regamadi.

Keriso di ini ni kaitena ago
(Mt 22.41-46; Mk 12.35-37)

⁴¹Kamini Iesu ni kaitesi niyo, “Gokai dada nidedi Keriso bi David di tutubena? ⁴²Adina David iniye yaku Psalms bukari bura riyo,^d

‘Varika Amiye yaku nai Varika Amiye rofu niyo:

Nai vana rama rofu ameinu re

⁴³ kumo na yaku yi tuma vene yi yuka aina sana rigida.’

⁴⁴Mina dada David yaku ‘Varika Amiye,’ vo niyo, ye gokai ida dudu ina bi ini tutubena?”

Iesu yaku ago gira oteimana vene di vegu ni diba reyo
(Mt 23.1-36; Mk 12.38-40)

⁴⁵Amiye tau yaku neidegamadi ri, ini usi dina vene rofu niyo, ⁴⁶“Vei mona refo ago gira oteimana vene rofu, kaere varuka doba dudu nana regika ma maketiri amiye yaku ago buni dudu matagini reyagane ma usa usa yavari ma irakuna sanari amena sana ka buni torari ura rededi. ⁴⁷Ina vene yaku obu vene di gugura ka duma resi ofa dudu usa usa doba nidedi. Mina kana vene, ini kaunava moigedi bi toe tora iniyel!”

Obu di ini fore maro
(Mk 12.41-44)

21 ¹Iesu yaku ne odoro resi bi gugura tau vene yaku Sei ni vakena yava di fore aina mauari ini fore aigamadi mina vegamo. ²Resi minari ka obu irava veyo kaere bi fore keika keika remanu aiyo. ³Resi niyo, “Ya nida, mina obu gugura de nufa bi tora iniye aiyo ma mina

^c 20.37 Ex 3.6 ^d 20.42-43 Ps 110.1

amiye tau yaku aiyadi bi ebu reyo. ⁴ Adina mina vene yaku fore tora tora bi ini gugura taufafau aiyadi, idu mina rema ini gugura nufa de bi, ini tora noibanu aiyo; mina bi ini fafau ameibobigo gugura.”

Iesu yaku Sei ni vakena yava di tumuda rigo di ago niyo

(Mt 24.1-2; Mk 13.1-2)

⁵ Kamini ini usi dina vene be yaku Sei vakena yava fore buni buni dudu risi Sei rofu moi aigedi gugura buni tau reyadi ni dodi regamadi ri, Iesu yaku bi kamini niyo, ⁶ “Gua beika tau vededi — bi ini ari yokoi baigo mironi, mina fore fafau fafau yokoi de amegedi; mina tau gade varadaugedi.”

Toe ma esika esika

(Mt 24.3-14; Mk 13.3-13)

⁷ Kamini ni kaiteyadi, “Oteimana amiye, mina bi goivaka vata nilegedi? Ma ini rebe bi gokai mina vata nilegedi?”

⁸ Ma ina vene rofu niyo, “Nari rei mona refa; nokoi yaku ya eru ga reyaine. Ini adina amiye tau gade nai roka dudu baisediniyi ni kake regedi, ‘Na bi Kerisol’ ma ‘Ari rama bi bae okiyo mini!’ Ina vene usi ga difa. ⁹ Idu iya renma gavmani fafau ruda renaga ago neidegedi ri, mina yaku yi uka ga dadiyaine. Adina mina kana bi ouresi vata niyaine, idu ari metona bi evade baina kode.”

¹⁰ Resi bi ka niyo, “Gagani tora iniye iniye ma ourefeidena vene iniye iniye ruda regedi.” ¹¹ Gagani bedakairi, bi kono yagayaga regedi ma adabo ma orefadedi gauka ogau nilegedi; ma ori renabeika baika ma rebe tora tora omari ka ogau nilegedi. ¹² Mina beika tau vata nina koderi, bi ya vene moisi esika esika ya masi usa usa yavari ma diburari ya kota reyainedi kini ma gavana di nemokori nai roka dada moi erokoko rei bogedi. ¹³ Mina medari, bi yi ari buni mini amiye di nemokori nai ago nilegedi: na sa amei digamo ri, gokai kana vegu veyo mina. ¹⁴ Gokai ina vene di ini ago dairi magedi ya rofu mokena bi moina ga refa,^e ¹⁵ adina bi na yaku ago ma mokena tora ya vene rofu magida. Ye yi tuma vene tau bi yi ago kebi rina anua regedi. ¹⁶ Yi nono baba, ma yi dubuiyaka, ma yi usika ourena, ma yi asiyaka yaku ka ya muyena rofu siri regedi. ¹⁷ Ma amiye tau gade yaku nai roka dada ya gubuyo regedi. ¹⁸ Idu yi ada iye yokoi maka kava mina ka de rerevaidi ni digo. ¹⁹ Uka vari gira mana toga rebigedi mina dudu ya kaya moi vegu ragedi.

Iesu yaku Jerusalem ukero vau ragedi di ago niyo

(Mt 24.15-21; Mk 13.14-19)

²⁰ “Iya rededi vene yaku Jerusalem baisediburu ri deyo regedi vegedi ri, bi mokefa mina taoni bi evade ukero vau regedi. ²¹ Mina ariri bi ya kaere Judea gaganiri bi omuna rofu ori difa, ma kaere taoni ideri bi feresi ori

^e 21.14-15 Lk 12.11-12

difa, ma ya kaere taoni etofaro bi ga dui refa. ²² Adina mina meda bi ‘Kaunava vata nigo Meda’, ye vegu tau rofu bura reyadi baisi rama aigedi.^f ²³ Mirona ituari mina vegu no vata nigo ri, nono kaere bi rivo nufa ma nono ini mida susu irido ina fafau bi no iniye iniye! Adina bi esika esika tora gade iniye mina kono fafau vata nigo ma Sei di kaunava mina vene fafau yarei dego. ²⁴ Be vene bi bainasi dudu umuyegedi, ma be bi vegu moisi gagani gagani tauri moi digedi. Tutubena dava bouna vene be yaku Jerusalem ri okisi ina vene rofu itei rigedi bogo ini ari bae koina nigo.

Amiye di Mida di dego sina
(Mt 24.29-31; Mk 13.24-27)

²⁵ “Ye meda, eo ma iya rofu bi de vena rebe mina ogau nigedi. Ma davara ini koru yeiva odoro dadisi kukuroka rebigo mina neidego ri, bi gagani gagani vene tau mina kono tora fafau amededi bi mokena forovai resi ori no iniye nigedi.^g ²⁶ Beika vegu mina kono noibantu fafau vata nigedi rofu nari regedi ri, bi amiye yaku ori dudu muyei tamatama regedi. Adina bi omari ini vava amededi mina ka moi tururu regedi. ²⁷ Mina usi amiye yaku Amiye di Mida seuyari vava ma vabara tora nufari debigo vegedi.^h ²⁸ Mina reremama vata nigi kora rego ri, bi dadi are resi ne odoro rifa, adina Sei ya moi vegu rigo di meda bi baisi negau niyo mini.”

Fuka yabo kana di ago
(Mt 24.32-35; Mk 13.28-31)

²⁹ Resi mokena ago yokoi niyo: “Fuka yabo ma yabo tau vesi mokefa. ³⁰ Ini iye imu rego ri, ya bi diba nigedi amona bi bae negau nido. ³¹ Mina dada, mina ogau nibigedi ma vegedi ri, bi ya ya diba Sei di ourefeidena amena sana di ari bi negau nigi rego.

³² “Rama ya nida, gua ari amededi vene bi muyei vau regedi koderi bogo mina beika baika tau gade vata nigedi mamo. ³³ Oma ma kono bi roro nigedi, idu nai ago bi roro de nigedi.

Nari rei mona refa!

³⁴ “Ya kaya nari rei mona refa! Iruku ma koru gira rofu dadaga ga refa. Yi vegu di toe di mokena tau yaku ya moi forovai ga reyaine. De bi, mina meda bae evade iruruka rego ri, tururu regedi baebu ya bi ivota ideri ya moi gira rigedi kana. ³⁵ Adina mina meda bi kono tora noibantu vene tau rofu baisi ogau nigo. ³⁶ Mina dada ari neinei nari regasa usa usa nifa ya bi yeiva moisi beika tau vata nigo mina rofu ebu regi Amiye di Mida di ini nemokori are regedi.”

^f 21.22 Hos 9.7 ^g 21.25 Is 13.10; Ezek 32.7; Joel 2.31; Rev 6.12-13 ^h 21.27 Dan 7.13; Rev 1.7

³⁷Ari neinei Iesu bi Sei vakena yavari amiye oteimagamo. Idu urusa nigamo ri, bi dadisi Olive yabo di ikari bosi amegamo.ⁱ ³⁸Ari uvegamo ri, bi amiye tau bosi Sei vakena yavari egogo resi ini ago nigo mina neidegi.

Iesu umuyegedi di sina
(Mt 26.1-5; Mk 14.1-2; Jn 11.45-53)

22 ¹Beredi Yeast de Feidena di Irakuna ari bae kaira niyo. Mina ari di roka bi Passover.^j ²Ma Sei ma amiye utari naivo vene di varika vene ma ago gira oteimana vene bi Iesu moisi umuyegedi di ida maina regamadi, adina bi amiye rofu ori reyadi.

Judas yo niyo Iesu tautore regi
(Mt 26.14-16; Mk 14.10-11)

³Minari bi Satani yaku Judas, kaere bi roka Iscariot vo nigamadi, di ukari dui reyo. Ina ka bi Iesu di usi dina amiye tuero yokoi. ⁴Kamini ina bi dadisi Sei ma amiye utari naivo vene di varika vene ma Sei ni vakena yava di iya rena ourefeidena vene rofu bosi sina sina niyo gokai ida dudu Iesu tautore rego mina. ⁵Bi ada tora gade resi Judas rofu ni tore reyadi fore magedi vo niyadi. ⁶Judas bi mina vene sa ini uka moi yokoi maka risi gokai tautore rego di ida maina regi kora reyo ma amiye tau bi ga ameyaganedi.

Iesu yaku Passover di iruku ini usi dina vene sa iriyadi
(Mt 26.17-25; Mk 14.12-21; Jn 13.21-30)

⁷Ourena meda baiyo ri, Beredi Yeast de Feidena di Irakunari, Passover di mamoe di mida ori sisika regi. ⁸Iesu yaku Peter ma John ni feidesi yomakai niyo: “Bosi Passover di iruku irigifa mina dogo refa.”

⁹Kamini ni kaitesi niyadi, “Yi ura bi goidu dogo regifa?”

¹⁰Ma ni kabai reyo, “Taoni ideri bogedi ri, bi mironari amiye nokoi koru urena adodisi ya baku regedi. Goina yavari dui rego bi usi ka dui resi ¹¹yava biyaguna amiye ni oteimafo, ‘Oteimana amiye yaku ya rofu niyo, Goina daiyutu bi nai usi dina vene sa Passover di iruku irigifa?’

¹²Mina yava amiye yaku odorori daiyutu tora ya oteimago. Mina bi sena veika reyadi. Mironari uni iruku dogo refo.”

¹³Ma ina remanu bi feresi bi gokai ago niyo kana mina veitao resi Passover di iruku dogo reyadi.

Varika Amiye di iri iri
(Mt 26.26-30; Mk 14.22-26; 1 Cor 11.23-25)

¹⁴Kamini ini iruku irina meda nemoko moiyo ri, Iesu bi ini ni feidena vene sa iruku irina sanari ameinu reyadi. ¹⁵Resi bi ina vene rofu niyo,

ⁱ 21.37 Lk 19.47 ^j 22.1 Ex 12.1-27

“Nai mokena tora bi vakoi gogo amesi mina Passover iruku irigifa, esika esika moina di budari! ¹⁶ Adina ya vene ya nida, na bi mina iruku dubusa de irigida bogo ini rama iniye Sei di ini ourefeidena amena sanari ogau nigo.”

¹⁷ Resi Iesu yaku biyo moisi Sei rofu buni tora gade masi niyo, “Mina biyo moisi ya kaya ka rau refa. ¹⁸ Adina ya nida, na bi gua rofu ida nokoi kana mina waini di meko de irigida bogo Sei di ourefeidena amena sana okigo mamo.”

¹⁹ Kamini bi beredi be moisi Sei rofu buni tora gade masi uroki resi ina vene magasa niyo, “Mina bi nai rovaita, ya dada ya maida. Makai resi na rofu mokefa.” ²⁰ Iri vau reyadi ri, Iesu bi mina ida dudu biyo moisi niyo, “Mina biyo bi nai dava Sei di uka ago ruaka regi ya vene rofu rausi reyaka.”^k

²¹ “Idu na tautore rego amiye di vana bi na sa mina teiboro fafau!”^l ²² Adina Sei yaku niyo kana Amiye di Mida muyego, idu mina amiye rofu bi iriyeduka no inkiye, kaere bi Amiye di Mida tautore rego.”

²³ Kamini inkiye inkiye ni kaitegasa nigi kora reyadi, ‘Mina bi kaere amiye uniye yaku mina vegu rego?’

Kaere bi tora inkiye di kayamo renā

²⁴ Ma ini usi dina vene inkiye kayamo reyadi kaere bi ini mokenari tora inkiye.^m ²⁵ Ma Iesu yaku niyo, “Gagani gagani vene di kini yaku ini vene fafau ini vava moi raga resi ini vava dudu beika vegu rigedi amiye ini gabireri rofu ago gira nisi inkiye nigi ‘una bi uni vene di mokei vava amiye’ vo nidedi.”ⁿ ²⁶ Ye yi fogori bi makai de, idu kaere yi fogori bi amiye tora inkiye bi keika inkiye niyaine, ma yi ourefeidena amiye bi naivo naivo amiye kana niyaine.^o ²⁷ Adina kaere bi tora inkiye, amesi iruku irido amiye ba naivo redo amiye? Amesi iruku irido amiye bi tora ba? Idu, na bi yi fogori naivo amiye kana.^p

²⁸ “Nai uka maina regamo ri, bi ya vene bi na sa amegamadi. ²⁹ Mina dada, nai Baba yaku na moi varika riyo kana, na ka ya vene moi varika rida. ³⁰ Makai reyaka dada, ya bi nai teiboro nai ourefeidena amena sanari amesi na sa iruku ma koru irisi ya ka ourefeidena amena fata ameinu resi Israel vene di rubu tuero kota regedi.”^q

Iesu yaku Peter ina rofu ni sui renā ogau niyo (Mt 26.31-35; Mk 14.27-31; Jn 13.36-38)

³¹ Kamini Iesu yaku Peter rofu niyo, “Simon, na neide! Satani yaku Sei rofu usa niyo ina yaku ya vene di uka maina rego vo nisi, ini mokena yaku yi vene di uka

^k 22.20 Jer 31.31-34 ^l 22.21 Ps 41.9 ^m 22.24 Mt 18.1; Mk 9.34; Lk 9.46

ⁿ 22.25-26 Mt 20.25-27; Mk 10.42-44 ^o 22.26 Mt 23.11; Mk 9.35 ^p 22.27 Jn 13.12-15

^q 22.30 Mt 19.28

mokena gira moi yaregedi, niyo. ³²Idu ya dada usa niyaka yi mokena vari gira aina mina ga keto reyaine, ye na rofu dairigiya ri, bi yi asiyaka vene egira re.”

³³Idu Peter ina rofu niyo, “Varika Amiye, na bi ya sa ka dibura sanari bosi vakoi tuyegifa!”

³⁴Idu ni kabai reyo, “Peter, ya rofu nida, kokoro gua raka nina koderi, bi uru regode ya ya toto nigi na ni sui regiya.”

Fuse, dura ma bainasi

³⁵Resi Iesu yaku ina vene rofu niyo, “Fuse de, dura de, ma tamaka de ya ni feideyaka ri, bi beika besa be moigedi vo nisi mokeyadi?”^r

Ina ni kabai regasa niyadi, “Ide mada.”

³⁶Resi ina vene rofu niyo, “Gua bi kaere fore fuse o dura nufa bi moi; ma kaere bainasi de, bi ini varuka bou mina sero risi yokoi voi re.

³⁷Makai ya nida bi Sei di ago ideri beika bura reyadi mina baisi vata niyainedi. Bi yomakai bura rijo, ‘Ina bi vegu no rededi vene sa ni kake reyadi,’ adina beika na dada bura reyadi bi baisi rama aigo.”^s

³⁸Ina vene yaku kamini niyadi, “Varika Amiye, ve kumo, bainasi remanu mini!”

Iesu yaku niyo, “Kaini!”

Iesu Olive yabo di ikari usa usa niyo

(Mt 26.36-46; Mk 14.32-42)

³⁹Kamini Iesu yaku ini rei baigamo kana dadisi taoniri feresi Olive yabo di ikari boyo. Ini usi dina vene ka ina sa boyadi. ⁴⁰Mina gagani ri okigasa ina vene rofu niyo, “Usa usa nifa yi uka maina regi keto rego baebu.”

⁴¹Kamini inaiket etagae risi boyo, fore moi si makugedi di maike kana, resi efuka odesi usa usa nigasa ⁴²niyo, “Baba, ya ura reisa vo nisi, bi mina esika esika di biyo na rofu moi etagae rigiya. Idu, ya yaku yi beika mokeisa mina resi nai mokena dudu bi ga regiya. ⁴³Kamini naivo naivo vima yokoi omari gutuna desi ina rofu ogau nisi egira reyo. ⁴⁴Ma Iesu ini uka bi esika yaku vata baiyo dada usa usa ni yeiva regamo ri, bi ini mofa bi dava kana kono fafauri yaregamadi.”^t

⁴⁵Usausa nigamo mina feresi dadisi ini usi dina vene rofu dairiyo. Iriyedula yaku no niyo ma varegamadi ri nesi baku reyo. ⁴⁶Resi ina vene rofu niyo, “Beika resi varededi? Dadisi usa usa nifa yi uka maina rego baebu.”

Iesu moi gira reyadi

(Mt 26.47-56; Mk 14.43-50; Jn 18.3-11)

⁴⁷Iesu ago nigamo ri, bi amiye tau gade okiyadi ma Judas, kaere bi amiye tuerori yokoi, bi amiye tau gade ourefeidei baisi Iesu fuka regi ina

^r 22.35 Mt 10.9-10; Mk 6.8-9; Lk 9.3; 10.4 ^s 22.37 Is 53.12 ^t 22.44 Bura bedakai nanaka 43-44 nufa de.

atafu are reyo. ⁴⁸Ye Iesu yaku ni kabai reyo, “Judas, ya bi Amiye di Mida fuka resi tautore reisa ba?”

⁴⁹Kamini amiye kaere bi ina atafu beika vata nigo mina veyadi ri, bi ina rofu niyadi, “Varika Amiye, uni bainasi dudu ruda regifa ba?” ⁵⁰Ma yokoi yaku Sei ma amiye utari naivo amiye tora di moimai rei tavoi redo amiye di anema rama kuaita resi nugai feideyo.

⁵¹Idu Iesu yaku niyo, “Mina kana vegu bi kaini!” Resi mina naivo amiye di anema avaka moiyo ri, bi buni niyo.

⁵²Kamini Iesu yaku Sei ma amiye utari naivo vene di varika vene ma Sei vakena yava di iya rena ourefeidena vene ma tora vene, kaere bi moigika okiyadi, ina vene rofu niyo, “Ya vene bi duma duma amiye yokoi kana bainasi ma gai moisi baiyadi ba? ⁵³Ari neinei ya sa Sei vakena yavari amegamafa ri, bi de na moi gira reyadi. Idu gua bi yi ari – mukuna di vava ari.”^u

Peter Iesu ni moi sui riyo

(Mt 26.57-58, 69-75; Mk 14.53-54, 66-72; Jn 18.12-18, 25-27)

⁵⁴Kamini moi gira resi Sei ma amiye utari naivo amiye tora di yava ideri afei boyadi. Ma Peter bi egaima risi usi digamo. ⁵⁵Be vene yaku yava ida nefau di tobori ita orisi amei buru riyadi. Peter ka ina vene di fogori bains ameinu reyo. ⁵⁶Kamini naivo naivo rema yokoi Peter ita atafuri ameinu resi mina vei mona resi niyo, “Mina amiye ka bi ina sa digamo amiye yokoi mini!”

⁵⁷Idu ni sui resi niyo, “Rema, na na toto ina!”

⁵⁸Ma doba de bi amiye yokoi vesu niyo, “Ya ka bi ini asini yokoi!”

Idu Peter yaku niyo, “Ide, diya na.”

⁵⁹Ye meda nemoko yokoi kana di fufutari, amiye yokoi yaku ni gira regi kora regasa niyo, “Rama iniye mina amiye ka bi ina sa, adina ina ka bi Galilee amiye!”

⁶⁰Idu Peter yaku niyo, “Na na toto ya beika nisa bi!”

Mina niyo ri, evade bi kokoro raka niyo. ⁶¹Ma Varika Amiye ne kero resi Peter vei mona reyo. Ye Peter minari bi kamini Iesu beika vata nigo di ago niyo mina mokeyo, “Kokoro gua raka nina koderi, bi uru regode na ni sui regiya.” ⁶²Kamini etofaro yakusi isaka no iniye iniye niyo.

Iesu ni kurusi ubobo reyadi

(Mt 26.67-68; Mk 14.65)

⁶³Ma Iesu moi gira reyadi vene yaku ni kurusi ubobo resi ⁶⁴ini nemoko fafa risi ni kaitesi nigamadi, “Ya bi Sei di ago nido amiye vo nisi, beika vata una ni; kaere amiye yaku ya ugo ini roka ni.” ⁶⁵Ago no tora gade ina rofu nisi ini roka moi no rigamadi.

^u 22.53 Lk 19.47; 21.37

Iesu bi kanisoro vene di nemokori afei boyadi
(Mt 26.59-66; Mk 14.55-64; Jn 18.19-24)

⁶⁶Ari uvoyo ri, bi amiye di kanisoro tora vene, ma Sei ma amiye utari naivo vene di varika vene, ma ago gira oteimana vene egogo resi kota rena sanari Iesu afei bosi kota resi ⁶⁷niyadi, “Ya bi Keriso vo nisi, bi una ni.”

Idu ina vene rofu niyo, “Ya vene rofu nigida vo nisi, bi ida nokoi dudu mokena vari gira de aigedi; ⁶⁸ma ya ni kaitegida vo nisi, bi ida nokoi dudu de na ni kabai regedi. ⁶⁹Idu gua ari gutuna Amiye di Mida bi Sei Vava Iniyi di vana ramari amego.”

⁷⁰Ma ina tau vakoi yaku niyadi, “Ye ya bi Sei di Mida ba?”

Ma Iesu yaku ina vene rofu niyo, “Ya yaku nidedi mina bi na.”

⁷¹Ma ina vene yaku niyadi, “Beika resi nisi una bi mina ago di adina besa ni maina resifa? Uniye ini vena ago bi neideyafa mini.”

Iesu bi Pilate di nemokori aiyadi
(Mt 27.1-2, 11-14; Mk 15.1-5; Jn 18.28-38)

23 ¹Kamini egogo reyadi vene tau gade dadisi Pilate rofu Iesu afei bosi ²ina rofu ni tourage resi kora resi niyadi: “Mina amiye vei tau reyafa bi uni vene di uka moisi Caesar rofu takesi mana ga rena vo nigamo. Resi iniye nigika ina bi Keriso, kini yokoi.”

³Kamini Pilate yaku ni kaitegasa niyo, “Ya bi Jew vene di kini ba?”

Ma ni kabai reyo, “Ya bi mina niyo.”

⁴Ma Pilate yaku Sei ma amiye utari naivo vene di varika vene ma amiye tau rofu niyo, “Mina amiye rofu no yokoi baku rena de reida.”

⁵Idu ina vene yaku bi ago ni gira resi niyadi, “Ina bi amiye tau Judea gaganiri oteimasi di uka moi odoro rido. Galilee ri siko ago ni oteima disi bi gua minari baiyo.”

Iesu Herod rofu ni feideyadi

⁶Pilate yaku mina neideyo ri, bi ni kaitesi niyo, “Mina amiye bi Galilee amiye ba?” ⁷Resi bi diba niyo ina bi Herod di ini vava gabireri ri, bi Herod rofu ni feideyo, kaere mina ariri iniye ka bi Jerusalem ri. ⁸Herod yaku Iesu veyo ri, bi ada iniye reyo, adina ini sina neidesi meda torari ini ura bi vego vo nisi. Ini mokenari bi rebe be rego ma vego. ⁹Herod yaku ago tau gade dudu ni kaitegasa nigamo, idu bi ago yokoi be ni kabai de reyo. ¹⁰Ma Sei ma amiye utari naivo vene di varika vene ma ago gira oteimana vene yaku ina rofu gubuyo resi ni tourage regamadi. ¹¹Herod ini iya rededi vene sa ni ninika resi ni kurugamadi. Resi bi kamini varuka burefe aku masi Pilate rofu dairi feideyadi. ¹²Mina medari maka Herod ma Pilate dubusa uka yokoi maka niyadi. Sena bi ina remanu bi de auta regamadi.

Iesu di umuyena ago

(Mt 27.15-26; Mk 15.6-15; Jn 18.39-19.16)

¹³ Kamini Pilate yaku Sei ma amiye utari naivo vene di varika vene ma ourefeidena vene ma amiye tau ni egogo resi ¹⁴ ina vene rofu niyo, “Ya vene yaku mina amiye na rofu moi baised ni tourage reyadi nidedi bi ina bi amiye di uka moigamo. Yi nemokori ni kaitegasa vaigasa reyaka. No yokoi de baku reyaka gua ya vene yaku nidedi kana. ¹⁵ Herod yaku ka no yokoi de baku reyo, dada dairi ni feideyo. Mina amiye bi no yokoi reyo dada muyeyaine. ¹⁶ Ye na maka buburu resi moi feidego.” ¹⁷v

¹⁸ Idu ina tau vakoi imuna niyadi, “Mina amiye afei bo, idu Barabbas bi una rofu erufu!” ¹⁹(Barabbas bi amiye yokoi amiye di fogori kaere bi taoni ruda rena yokoi moi vata riyo ma amiye be umuyeyo ma dibura yava ideri afei boyadi.)

²⁰ Ye Pilate dubusa ina vene rofu ago niyo. Ini ukari mokena moigamo bi Iesu erufugo, ²¹ idu imuna nigamadi, “Satauro ikoko re, satauro ikoko re!”

²² Pilate yaku uru regode kamini ina vene rofu niyo, “Beika resi, ina bi beika vegu no be reyo? Vegu no muyeyaine vo nisi di ini adina bi de baku reyaka! Mina dada na maka bururu resi moi feidegida.”

²³ Idu ina vene yaku ago gira resi goroka tora dudu ni tona tona niyadi, “Satauro ikoko re!” Ina vene di ago yaku vava niyo. ²⁴Dada Pilate ini mokena bi Iesu rofu regi mina vene di usa niyadi kana. ²⁵Mina amiye ruda resi amiye umuyeyo ma dibura yavari afei boyadi bi kamini erufuyo, kaere bi usa nigamadi. Idu bi Iesu ini vanari aiyo, ini mokeyadi kana reyaganedi vo nisi.

Iesu satauro ikoko reyadi

(Mt 27.32-44; Mk 15.21-32; Jn 19.17-27)

²⁶ Iya rededi vene Iesu afei bogamadi ri, bi Cyrene gagani amiye yokoi roka Simon, kaere bi taoni etofaro gutuna digamo ri, bi moi gira resi satauro ina fafauri aiyo ma uakaigasa Iesu usi boyo.

²⁷ Amiye tora gade iniye ina usi boyadi. Mina amiye tau fogori bi rema vene be iriyeduwa resi ina dada isaka nigamadi. ²⁸ Idu Iesu yaku ina vene rofu kero resi niyo, “Jerusalem rema vene, na dada isaka ga nifa, idu ya kaya ma yi mida dada isaka nifa. ²⁹ Adina bi, ini ari baigedi bi amiye yaku nilegedi, ‘Mida de rema vene, ma natu rema vene, kaere bi susu de maro, bi buni tora gade regedi!’ ³⁰Mina ariri bi amiye yaku omuna rofu nilegedi,

v ^{23.17} Bura bedakai ka nanaka 17 nufa: *Passover irakuna neineiri Pilate di vegu ina rofu bi dibura sanari amedo amiye yokoi moi feidego* (Mk 15.6 baku re).

‘Una fafau yare!’ resi ika keika keika rofu bi, ‘Una moi sui refa!’^w ³¹ Adina bi yabo veguri bi makai regedi vo nisi, ma yabo abiye nigo ri, bi gokai?”^x

³² Amiye remanu, kaere bi vegu no reyadi vene, ka Iesu sa vakoi umuyegi afei boyadi. ³³ Gagani roka “Ada Girika” ri bae okiyadi ri, bi kamini satauro ikoko reyadi, ina vegu no reyadi amiye remanu sa. Yokoi bi ini vana rama rofu ma yokoi bi ini vana enana rofu. ³⁴ Ma Iesu yaku niyo, “Baba, ini vegu no koite maku; adina ina vene bi ina toto dada makai rededi.”^y ^z

Iya rededi vene yaku laki dudu isira resi ini varuka ina yokoi yokoi moi yadi. ³⁵ Amiye tau yaku are resi vegamadi ri, bi Jew vene di ourefeidena vene bi Iesu ni ninika regasa nigamadi: “Amiye be bi moi vegu riyo; ina bi Keriso kaere Sei yaku abidi reyo amiye vo nisi, bi iniyi moi vegu riyaine!”^a

³⁶ Iya rededi vene ka ni fafana resi ina rofu basisi waini safi de ru mina magasa^b ³⁷ nigamadi, “Ya bi Jew vene di kini vo nisi, bi ya kaya moi vegu ri!”

³⁸ Ini satauro yabo odorori ka bi yomakai bura reyadi: “Mina bi Jew vene di kini.”

³⁹ Ma vegu no reyo amiye yokoi satauro ikoko reyadi mina yaku Iesu ni kurugasa niyo, “Ya bi Keriso ba? Ya kaya moi vegu risi una ka moi vegu ri!”

⁴⁰ Idu yokoi ere yaku emagasa niyo, “Ya bi Sei rofu ori reisa ba ide? Ini adina yi kaunava bi ini kaunava kana. ⁴¹ Una beika moisifa bi una vegu reyafa kana; rama moisifa mini. Idu yomina amiye bi vegu no yokoi renade.” ⁴² Resi niyo, “Iesu, yi ourefeidena amena sana moigiya ri, bi na na moke!”

⁴³ Ma Iesu yaku ina rofu niyo, “Gua ya ni tore reida mini, mina medari ya bi na sa ada renna sanari amegiya.”

Iesu di muyena

(Mt 27.45-56; Mk 15.33-41; Jn 19.28-30)

⁴⁴ Meda nemoko tobo niyo ri, bi gagani tora noibantu bi mukuna yaku fono reyo bogo meda nemoko regodenu koina niyo mamo,^c ⁴⁵ ye mukuna yaku meda bou riyo ma Sei vakena yava ideri biri rina varuka doba bi utama uvesi rei neyo. ⁴⁶ Kamini Iesu goroka tora dudu raka nigasa niyo, “Baba, yi vanari nai vima fereida!” Mina nisi asa you feideyo.^d

^w 23.30 Hos 10.8; Rev 6.16 ^x 23.31 O Na bi yabo vegu kana, ye mina vegu na rofu ogau niyadi, idu ya yabo abiye kana ya rofu beika ogau niyadi? ^y 23.34 Bura bedakai Ma Iesu yaku niyo, “Baba, ini vegu no koite maku; adina ina vene bi ina toto dada makai rededi nufa de.” ^z 23.34 Ps 22.18 ^a 23.35 Ps 22.7 ^b 23.36 Ps 69.21 ^c 23.45 Ex 26.31-33

^d 23.46 Ps 31.5

⁴⁷Ma iya rededi vene di ourefeidena amiye tora yaku beika vata niyo mina vegasa Sei di roka moi odoro regasa niyo, “Rama iniye mina amiye bi mokena rorobo amiye!”

⁴⁸Amiye tau gade iniye mina vata nigamo vegi egogo reyadi. Beika vata niyo mina veyadi ri, bi iriyeduwa tora gade resi ini rautu rofu dairiyadi. ⁴⁹Ma Iesu di asiyaka tau gade ma rema bedakai, kaere Galilee gutuna usi baigamadi, bi gaima gutuna are resi mina vegu vegamadi.^e

Iesu guri aiyadi

(Mt 27.57-61; Mk 15.42-47; Jn 19.38-42)

⁵⁰Kamini kanisoro amiye yokoi ini roka bi Joseph, bi buni ma mokena rorobo amiye. ⁵¹Ina bi Arimathea, Judea gagani di taoni yokoi amiye, idu kanisoro vene yaku egogo resi ini sina ago ma reremama regamadi ri, bi de dui reyo. Kamini ina ka Sei di ourefeidena amena sana baigo mina tua regamo. ⁵²Mina amiye yaku bosi Pilate rofu Iesu di rovaita moigi usa niyo. ⁵³Resi bi ini rovaita moi sokau resi varuka buni dudu kumu risi kono guri fore ideri goeyadi bi ini rovaita mina ideri aiyo. Mina kono guri bi rua; muyena rovaita yokoi mina ideri aina kode. ⁵⁴Mina bi Sabati dogo rena di meda, adina Sabati meda bi kaira niyo.

⁵⁵Ma Iesu sa vakoi Galilee gutuna baiyadi rema vene bi Joseph usi bosi ini rovaita gokai kono guri ideri aiyo veyadi. ⁵⁶Resi bi sisika buni be dogo regika rauturi dairiyadi.^f

Sabati medari, bi tarutaru reyadi, adina bi ago gira yaku bi makai niyo dada.

Iesu dubusa dadi rae reyo

(Mt 28.1-10; Mk 16.1-8; Jn 20.1-10)

24 ¹Idu ari uveyo ri uruyaku gorogoro iniye fura di ourena medari, rema vene dadisi guri sanari sisika buni muramura dogo reyadi mina moi boyadi. ²Resi bi veyadi bi mina guri di ida venari fore bi sena moi kurevai rei etagae ri. ³Idu dui reyadi ri, bi Iesu Varika Amiye di rovaita de baku reyadi. ⁴Mina yaku ina vene di mokena forovai reyo ri, bi amiye remanu atafu are reyadi, kaere ini varuka bi kama kama iniye. ⁵Ori resi ini seira kono rofu agu ri, bi mina amiye remanu yaku ni kabai reyadi, “Beika resi vegu amedo amiye bi muyena amededi vene di fogori maina rededi? ⁶Ina bi minari de amedo; ina bi dadi rae reyo. Galilee ri amegasa beika sina ya nigamo bi mokededi ba ide?^g ⁷Yomakai niyo, ‘Amiye di Mida bi vegu no rededi vene di vanari aisi satauro ikoko regedi, idu meda regode koina nigo fufutari bi dadi rae rego.’ ”

^e 23.49 Lk 8.2-3 ^f 23.56 Ex 20.10; Deut 5.14 ^g 24.6-7 Mt 16.21; 17.22-23; 20.18-19; Mk 8.31; 9.31; 10.33-34; Lk 9.22; 18.31-33

⁸ Ini ago kamini mokesi ⁹guri sanari gutuna dairisi bi beika vata niyo tau vakoi mina amiye eleven ma ini usi dina vene be rofu ni oteimaradi. ¹⁰Mina rema bi Mary Magdalene, Joanna ma Mary, kaere bi James di nono; ma rema be ina vene sa yaku mina vegu ni feidena vene rofu niyo. ¹¹Idu ni feidena vene yaku mokeyadi mina rema di ago bi tavoi reyadi, ye mokena vari gira de aiyadi dada. ¹²Idu Peter bi dadisi raga bosi guri sanari ideri agu risi dui reyo ri, bi varuka buni maka veyo. Kamini beika vata niyo mina tururu regasa ini yavari dairiyo.^h

Emmaus rautu rofu nana rena
(Mk 16.12-13)

¹³ Mina medari, Iesu di ini usi dina amiye remanu bi rautu roka Emmaus ri bogamadi, Jerusalem gutuna ini maike bi 11 kilometreⁱ kana. ¹⁴Ina remanu bi mina beika tau vata niyo mina ni dodi regamadi. ¹⁵Mina sina nigasa ni dodi regamadi ri, bi Iesu iniye bi ina vene atafu nisi kamini vakoi bogamadi. ¹⁶Vegamadi mini, idu de vei mama regamadi ina bi Iesu. ¹⁷Kamini ina vene rofu niyo, “Ya vene bi beika sina nigasa didedi?”

Kamini ini ne uruma bi iriyeduwa dudu are reyadi. ¹⁸Ina remanuri, bi yokoi di roka bi Cleopas, ina yaku kamini ni kabai resi niyo, “Ya bi Jerusalem ri odi okiyo amiye maka baeko, dada ya toto mina meda be koina niyo ri beika vata niyadi bi?”

¹⁹ Kamini bi ina vene rofu niyo, “Beika vata niyo?”

Ma ina rofu niyadi, “Iesu Nazareth amiye rofu nisifa, kaere bi Sei di ago nido amiye. Ina bi ini ago ma ini reremama bi yeiva iniye Sei ma amiye di nemokori. ²⁰Ma uni Sei ma amiye utari naivo vene di varika vene ma uni ourefeidena vene yaku gokai iniye ini vanari moisi tuyena ida risi satauro ikoko reyadi. ²¹Idu uni uka mokena regamafa bi ina bi Israel erufugo amiye! Mina beika vata niyo bi meda regode koina niyo mini. ²²Idu gua uni rema vene be yaku una moi tururu reyadi. Uruyaku gorogoro guri sanari bosi ²³bi ini rovaita de baku resi dairi baisi niyadi bi yaduka kana naivo naivo vima ka veyadi. Mina naivo naivo vima yaku ni oteimaradi bi ina bi vegu niyo. ²⁴Be vene una sa bi kamini dadi guri sanari boyadi ri, bi rema vene yaku niyadi kana makai baku reyadi, idu Iesu bi de veyadi.”

²⁵Kamini Iesu yaku ina vene rofu niyo, “Ya vene bi ada de iniye; yi mokena bi mukuna tora. Sei di ago nidedi vene di ago tau bi mokena vari gira de aidedi! ²⁶Ba rorobo ide, Keriso bi mina kana esika moisi ini vabara moigo?” ²⁷Kamini Moses gutuna Sei di ago nidedi vene tau rofu ago buni tau gaderi ina dada bura reyadi sina di ini rama mina ni itara reyo.

^h 24.12 Bura bedakai bi nanaka 12 nufa de. ⁱ 24.13 Greek agori mina bi 60 stadia.

²⁸Kamini bogamadi ri, bi rautu ekaira reyadi, idu Iesu bi ebu rei digo kana dudu nana reyo. ²⁹Idu ni guyaguya reyadi, “Una sa amevo; uriyenau kamini niyo ma doba de urusa nigo.” Dada ina vene sa amegi dui rei boyo. ³⁰Ina regode iruku irigi ameinu reyadi ri, bi Iesu yaku beredi moisi ni buni resi bi okusi ina remanu maro. ³¹Minari ini nemoko bi ne are reyadi bi vei mama reyadi ina bi kaere, ma ina vene di neri roro nisi diyo. ³²Iniyeiniye rofu niyadi, “Uni uka ita kana vaido, idau baigamafa, ago nigasa Sei di ini ago di ini adina mina ni itara regamo ri ba?”

³³Minari maka dadisi Jerusalem ri dairiyadi. Iesu ini usi dina amiye eleven ma amiye be ina sa bi minari egogo ameyadi baku reyadi. ³⁴Ina vene yaku ka niyadi, “Rama Varika Amiye bi dadi rae risi Simon rofu ogau niyo!”

³⁵Ina remanu yaku ida beika vata nigi kora reyo ma gokai vei mama reyadi beredi okuyo ri ni itara reyadi.

Iesu yaku ini usi dina vene rofu ogau niyo

(Mt 28.16-20; Mk 16.14-18; Jn 20.19-23; Acts 1.6-8)

³⁶Mina nigamadi ri, bi Iesu iniye ini fogori are resi rofu niyo, “Uka amuta bi ya sa.”^j

³⁷Idu ina vene bi ori yaku no iniye iniye nisi ini mokenari bi muyena vima yokoi vegamadi. ³⁸Idu Iesu yaku niyo, “Beika resi yi mokena forovai redo ma yi uka deda ni kaitena ago mina baidedi? ³⁹Nai yuka vana vefa, mina bi na mini; na avaka moisi vefa. Adina vima bi musa nena koina ma vededi na bi nai musa nena nufa.”

⁴⁰Mina ni vau resi bi ini vana ma yuka oteimaro.^k ⁴¹Idu tururu resi ada yaku no iniye niyadi rofu, mina bi ofa ba rama moi mokena forovai reyadi, dada Iesu yaku niyo, “Iruku keika be amedo ba, ide?” ⁴²Ina vene yaku oyena kiro reyadi di ini tu yokoi maradi ⁴³ma ini nemokori bi moisi iriyo.

⁴⁴Resi bi ina vene rofu niyo, “Mina bi nai ago ya sa amegasa nigamaka: na dada beika tau bura reyadi Moses di ago girari, Sei di ago nidedi vene di burari ma psalms bukari. Mina tau bi baisi rama aiyaine.”

⁴⁵Dada ini mokena moi vabara reyo Sei di agori beika bura reyadi vei mama reyaganedi, ⁴⁶resi niyo, “Yomakai bura reyo: Keriso bi mina kana esika moigo ma meda regode koina nigo ri, bi muyena sanari gutuna dadi rae rigo. ⁴⁷Dada Keriso di roka dudu vegu no feresi moi etagae rina vegu no koite makuna rofu di ago ouresi Jerusalem gutuna gagani gagani vene tauri disi ni rausi rei diga bogasa reyaine. ⁴⁸Ya vene yaku mina vegu tau bi yi nemokori veyadi rofu oteimagedi. Mina dada ya vene yaku ni oku

^j 24.36 Bura bedakai bi resi rofu niyo, “Uka amuta bi ya sa” nufa de. ^k 24.40 Bura bedakai be nanaka 40 nufa de.

rausi regedi.⁴⁹ Dada, nai Baba yaku ya mago ni tore reyo mina, bi na yaku ya venefafau ni feidei degida. Ya bi taoni ideri tua reyaine mamo mina vava yaku ya fafau ni vai rego.”^l

Iesu bi omari afei boyo
(Mk 16.19-20; Acts 1.9-11)

⁵⁰ Kamini Iesu yaku ina vene taoni gutuna afei boyo Bethany atafu, ini vana moi odoro resi ni buni tora gade maro.^m ⁵¹ Mina ni buni tora gade magamo ri, bi ina vene rofu etagae riyo ma oma odoro afei boyo.ⁿ ⁵² Ina vene yaku ni vakesi ada tora iniye dudu Jerusalem rofu dairiyadi. ⁵³ Kamini Sei vakena yavari ari neinei Sei rofu buni tora gade magamadi.

^l **24.49** Acts 1.4 ^m **24.50-51** Acts 1.9-11 ⁿ **24.51** Bura bedakai bi *ma oma odoro afei boyo* nufa de.

Paul di ouresi bura

Thessalonica vene rofu

Ago di ini adina

Thessalonica bi Rome di taoni tora Macedonia gaganiri. Paul yaku minari ekalesia vene moi egogo reyo. Mina reyo ri, Paul yaku ago buni Jew de vene rofu niyo dada. Doba de Jew vene yaku ni tourage reyadi, amiye tau gade ini uka moigamo Judah ekalesia vegu dada. Paul bi mina resi Thessalonica feresi Berea ri boyo. Corinth okisi ameyo doba niyo ma usi, Paul bura yokoi baku reyo ini asini ma vakoi moimai redo amiye Timothy inkiye di sina Thessalonica duburi mina inkiye gokai vedo kana.

Paul di ouresi bura Thessalonica vene rofu bi mironari mina ekalesia vene rofu moi egira ma rama vo nigika bura reyo. Ina yaku Sei rofu buni tora gade maro, adina ini uka vari gira mana ma uka mana di ago neideyo. Ina vene sa doba de ameyo ri, ini beika vegu regasa amegamadi, mina vene rofu ni rua resi duburi Keriso dairi dego ni kaitena sina ni kabai resi niyo: kaere Keriso rofu mokena vari gira aisi tuyeyo Keriso dairi denari bi toga ameibobina vegu moigo ba? Ma goivaka Keriso bi dubusa dairi dego? Paul bi mina resi ina vene niyo kumo moimai regasa Keriso dego nari regedi.

Beika sina ideri

Ago di ini adina 1.1

Buni tora gade nina ma roka moi odoro rena 1.2–3.13

Ekalesia di vegu egira rena ago 4.1-12

Keriso dairi dego di sina ago 4.13–5.11

Metona vegu egira rena ago 5.12-22

Metona ago 5.23-28

1 ¹Mina bura na Paul, Silas ma Timothy yaku —^a
Thessalonica ekalesia vene ya rofu, kaere bi Baba Sei ma Varika
Iesu Keriso ideri:
Buni tora gade ma uka amuta bi yi.

^a 1.1 Acts 17.1

Thessalonica vene di vegu ma uka vari gira mana

2 Una bi ari neinei ya vene tau rofu usa usa nigasa ya venefafau Sei rofu buni tora gade masifa. **3** Una bi uni Baba Sei di nemokori toga ya mokei baisifa, gokai yi mokena vari gira aina moimai yaku moi vata rido, ma gokai yi uka mana yaku yi moimai rei tavoi moi vata rido, ma gokai yi uka mokena uni Varika Amiye Iesu Keriso rofu mina moi gira rido. **4** Usika ourena, una diba Sei yaku ini uka ya mado ma ina yaku ya vo niyo ya bi ini, **5** adina uni ago buni bi ya rofu ago dudu maka de moi baiyafa, idu vava nufa ka, ma Vima Kikifa sa ma mokena gira iniye sa. Makai ya ya diba gokai ya sa amegamafa ri vegu reyafa; ya rofu reyafa dada. **6** Ya vene bi una ma Varika Amiye yaku amesifa kana mina reyadi; gokai esika esika tora gade moi yadi, idu Vima Kikifa yaku ada ya vene maro ma ya yaku ago buni moi gira reyadi. **7** Mina ye, ya bi Macedonia ma Achaia gagani di uka vari gira aidedi vene tau yaku veyaganedi kana niyadi. **8** Adina Varika Amiye di ago bi ya rofu Macedonia ma Achaia ri maka de yakuyo, yi mokena vari gira aina Sei rofu di sina bi gagani gagani tau ka diba niyadi. Mina resi, minari beika yokoi de nigifa, **9** adina gokai una moi dui reyadi bi iniye niyadi mironi. Ma gokai ofa sei rofu kero rei feresi vegu amedo ma rama Sei rofu naivo reyadi ka niyadi. **10** Ma ini Mida oma gutuna dego nari rededi ka niyadi — mina bi ini Mida Iesu, kaere bi muyenari moi dadiyo ma kaere Sei di gubuyo baido rofu uni moi etagae rigo.

Paul di moimai Thessalonica ri

2 **1** Usika ourena, ya kaya diba una bae nesi ya oto reyafa bi tavoi tavoi de reyafa. **2** Ya ya diba, sena Philippi ri bi una rofu no reyadi ma esika esika moi yafa, idu uni Sei di ini aedena yaku yeiva una maro dada ini ago buni bi ya niyafa, una tourage regamadi utari. **c 3** Uni usa usa ago ya vene rofu resifa bi vegu no o mokena no dudu de ya eru regika ofa ofa dudu. **4** Idu Sei di ura ini ago buni uni vanari aigi reyo kana, mina nisifa; amiye di uka moi buni regika de resifa, idu Sei di uka moi ada regika resifa, kaere bi uni uka mokena diba nisi vedo. **5** Ya ya diba una bi ya moi ada reyaganedi di ago dudu de bae neyafa, o unlike auna kana irisifa ni ofa regika ago nina de reyafa — Sei diba uni uka mokena bi! **6** Amiye yaku uni roka moi odoro reyaganedi de reyafa, ya vene rofu o be vene yaku ka de, **7** idu Keriso di ni feidena vene kana una yaku uni vava dudu uni aedegi ya efare reyagadu. Idu ya vene fogori ave niyafa, kosini yaku ini mida mida susu masi dogo redo kana^d. **8** Uni uka tora gade iniye ya marafa, mina resi ada dudu Sei di ago buni maka de ya marafa idu

^b 1.6 Acts 17.5-9 ^c 2.2 Acts 16.19-24; 17.1-9 ^d 2.7 ya vene fogori ave niyafa, kosini... kana; buru bedakai ya sa amegamafa ri, una bi mida mida kana; una bi kosini kana nufa.

uni vegu ka. ⁹Usika ourena, rama iniye mokefa, Sei di ago buni ya vene rofu ni rausi rega digasa urusa ariu moimai reyafa, moimai gira resi esika moiyafa, ya vene rofu toe moi baina ga regika.

¹⁰ Ya vene ma Sei iniye ka una vegamadi, uni vegu gokai bi akeke, rorobo ma vegu no de ya vene kaere uka vari gira maradi vene di fogori. ¹¹ Adina ya ya diba una ya neinei gokai reyafa bi baba yaku ini mida redo kana, ¹²Sei di ukari ina rofu yi vegu buni niyainedi ya egira regamafa, kaere bi ya raka nido ini ourefeidena amena sana ma ini vabara ideri dui reyagane.

¹³ Ma una ka toga Sei rofu buni tora gade masifa, adina Sei di ago buni moiyadi, goina bi una rofu neideyadi ri; ya bi amiye di ini ago kana dudu de moiyadi, idu Sei di ago kana, goina bi rama iniye. Adina Sei yaku mina ago dudu ka ini moimai yi veguri redo, ya kaere ina rofu uka vari gira aidedi. ¹⁴ Ma ya uni usika ourena kaere bi Iesu Keriso di, beika Sei di dubu ri Judea gaganiri amededi Jew vene gutuna ina vene rofu reyadi kana, yi gagani vene gutuna esika esika ka moiyadi, ^e ¹⁵kaere yaku Varika Amiye Iesu ma Sei di ago nidedi vene umuyeyadi ma una ka meki reyadi. Ina bi Sei moi ada de reyadi, idu amiye tau di tuma niyadi!^f ¹⁶ Tutubena dava bouna vene rofu sina ni marafa moi vegu rigedi, idu uni mina ka biri rigi regamadi. Mina ida dudu ini vegu no mina besa besa tauri bodedi. Sei di ini gubuyo tora iniye bi kamini inafafau deyo!

Paul dubusa ina vene vegi moke moke reyo

¹⁷Idu, usika ourena, neituari ya rofu etagae riyafa ri — uni moke moke bi de, idu uni rovaita yaku maka — gokai de yaveyafa ma gokai dubusa ya vegika reyafa! ¹⁸Adina uni ura bi dubusa ya rofu bae negifa. Na Paul, bi besa bae negika reida, idu Satani yaku una biri riyo. ¹⁹Adina uni Varika Amiye Iesu di ini budari ini dairi dego ri, bi ya vene bi kaere bi uni uka mokena, una ada ma uni moimai rei mona reyafa di vegu.

²⁰Rama iniye, ya vene bi uni matuka ma ada!

3 ¹Mina dada, una bi makai toga de amegasa nari regamafa ri, uni mokena buni moiyafa bi unike maka Athens ri amegifa.^g ²Timothy bi ni feidesifa, kaere bi uni dubuini ma Keriso di ago buniri Sei di vakoi moimai resifa amiye, yi mokena vari gira aina moi gira ma ya egira reyainedi, ³ye mina esika esika yaku ga ya moi no riyainedi. Ya ya diba mina deda vegu bi Sei di mokenari baigedi. ⁴Adina, una ya sa amegamafa ri, sena ya toga toga nigamafa bi una rofu esika esika magedi. Ye niyafa kana bi vata niyo, bi ya diba. ⁵Mina dada, toga de amegasa nari regida ri, Timothy ni feideyaka yi mokena vari gira aina bi

^e 2.14 Acts 17.5 ^f 2.15 Acts 9.23, 29; 13.45, 50; 14.2, 5, 19; 17.5, 13; 18.12

^g 3.1 Acts 17.15

gokai mina. Na bi ori reyaka be bi Satani yaku ya yi uka maina rego ri, uni moimai reyafa bi no nigo baebu!

⁶Idu Timothy bi ruika mamo una rofu bae okiyo ri, ago buni moi baiyo, yi gokai mokena vari gira aisi uka maddedi. Ina niyo bi ya yaku mokena buni dudu una mokededi, ma yi ura una vegi rededi una ka gokai ya vegifa kana.^h ⁷Ye, usika ourena, uni toe ma esika esika tauri una egira reyadi yafafau, adina yi mokena vari gira aina dada. ⁸Ya vene bi Varika Amiye ideri are rei gira rededi vo nisi, ye rama una gua mamo veguri ameinu regifa. ⁹Una bi gokai Sei buni tora gade magifa yafafau; uni Sei di ini nemokori ya dada ada reyafa rofu buni tora gade masifa. ¹⁰Urusa ariu una bi usa usa ni yeiva resifa, gokai dubusa ya vegifa rofu goinari yi mokena vari gira aina yau nido sana ya egira regika.

¹¹Ma gua bi uni Baba Sei inkiye ma Varika Amiye Iesu yaku uni ida ya vene rofu bae negifa ina vene bi riyangadu! ¹²Varika Amiye ya kaya ya kaya ma amiye tau vakoi rofu uka maddedi tora nisi rausi reyaine, una yaku ka ya rofu resifa kana. ¹³Ye ina yaku yi uka ideri yeiva ya mago, ye ya bi vegu no yokoi de nufa ma akeke ameibigedi, uni Baba Sei di ini nemokori uni Varika Amiye Iesu ini akeke vene tau sa dego ri.

Sei ada reyaine vegu dudu ameibina

4 ¹Usika ourena, una yaku gokai ameyaganedi bi ago ya marafa mina yaku Sei moi ada regedi, bi gua amededi mini. Ye metonari bi ya usa nisi ago ni egira resifa Varika Amiye Iesu ideri bi mina vegu bi besa besa rebiyaine. ²Adina ya ya diba beika ago gira bi Varika Amiye Iesu di vava dudu ya marafa. ³Ye mina bi Sei di ini ura dudu ya mina akeke niyaganedi: ya bi koa di vegu mina egavoi reyaganedi; ⁴ya kaya ya kaya yi yuka vana nari reyaine, ida akeke ma rorobo dudu, ⁵ma tutubena idana vene kaere bi Sei ina diba de, ina vene di koa mokena kana de. ⁶Ma mina idari bi amiye yokoi vegu no ga reyaine o ofa ofa vegu ga boyaine, ini usika ourenafafau. Adina una makai sena ya rofu nisi ni diba reyafa mina kana vegu no bi Varika Amiye yaku toe mago. ⁷Adina Sei yaku vegu no rena di una vo de niyo, idu vegu akeke dudu ameibina di vo niyo. ⁸Mina resi, kaere amiye mina ago masifa mina fufuta mago, bi amiye rofu mina fufuta de mado, idu mina bi Sei rofu fufuta mado, kaere yaku ini Vima Kikifa ya mado.

⁹Ma gua usika ourena rofu uka mana bi ya rofu de bura regifa, adina mina bi Sei yaku ya kaya ya kaya uka maraganedi ya sena oteimaro. ¹⁰Ma mina makai Macedonia gagani tauri usika ourena tau vakoi rofu rededi. Idu, usika ourena ya guyaguya nisifa, mina bi besa besa reyaganedi. ¹¹Ya sena niyafa kana yi mokena tora rifo kumo kimo ameibina vegu niyaine, yi moimai inkiye maka resi yi vana

^h 3.6 Acts 18.5

dudu maka moimai refo. ¹²Mina resi yi ameibobigedi ri, ya dubu etofaro vene ya rofu kikifa regedi, ye amiye yokoi rofu de gauna moigika de regedi.

Varika Amiye di ini dena

¹³Usika ourena, uni ura bi ya diba niyainedi kaere de neyadi vene rofu di resi bi ga uka esika refo, kaere be bi dadi rae ren a di uka mokena aina de mina vene kana ga reyagane. ¹⁴Adina una bi uka vari gira aisifa Iesu bi muyesi dubusa dadiyo, ye Sei yaku mina de neyadi vene kaere bi ini uka vari gira Iesu rofu aisi muyeyadi mina ina sa moi dego.

¹⁵Varika Amiye iniye di ini ago kana, mina ya nisifa una kaere vegu ameibogifa Iesu dairi dego ri, bi rama muyeyadi vene ouresi dadi rae regedi ma gabi una bi dadi rae regifa.ⁱ ¹⁶Adina Varika Amiye bi oma gutuna imuna nigasa dego, naivo naivo vima tora di ini goroka dudu, ma Sei di ini kibi kukuroka rena dudu, ma Keriso rofu mokena vari gira aisi muyeyadi mina siko dadigedi. ¹⁷Mina usi bi, una kaere vegu ameibobigifa una afei bogo ma ina vene sa seuya odorori Varika Amiye egogo baku regifa. Mina resi makai Varika Amiye sa toga amegifa. ¹⁸Mina resi ya kaya ya kaya mina ago dudu egira rebifo.

Varika Amiye dego mina toro refo

5 ¹Ma, usika ourena, goina ari ma meda nemokori beika vata nigo bi ya vene rofu buru de regifa, ²adina ya ya diba kotana Varika Amiye di ini dego meda bi duma duma amiye yaku urusa okido kana.^j ³Amiye yaku “Ari bi uka amuta ma buni vayavaya dudu” vo nibigedi ri, evade moi no rina meda okigo, rivo rema mida moigika esika guraudo kana; ma ori de digedi. ⁴Idu, usika ourena ya bi mukunari de, ye mina meda yaku duma vene kana de ya etururu rego. ⁵Adina ya tau vakoi bi vabara ma ariu di mida mida. Una bi mukuna ma urusa di rofu de. ⁶Mina ye, una bi be vene yaku varededi kana ga rebinadi, idu ne are resi uni yuka vana nari rebinadi. ⁷Adina kaere varededi bi urusa varededi, ma kaere koru no irisi forovai rededi bi urusa koru no irisi forovai rededi. ⁸Idu una bi ariu vena di vene mina ye, uniye uni yuka vana nari regasa, ma mokena vari gira aina ma uka mana mina uni kokoba mari kana ainadi, ma Sei ya moi vegu rina di mokena ago bi ada bou kana ainadi.^k ⁹Vegu moi rina uni Varika Amiye Iesu Keriso dudu moigifa, adina Sei yaku ini gubuyo di esika esika moina di una vo de niyo. ¹⁰Ina bi una dada muyeyo, mina resi muyena de o muyesifa vo nisi bi ina sa vakoi ameibigifa. ¹¹Mina dada ya kaya ya kaya egira regasa aedegedi, gua rededi kana.

Metona ago

¹²Usika ourena, gua ya usa nisifa bi, yi fogori amiye kaere moimai rei gira resi Varika Amiye di rokari ya nari resi yafafau oteimadedi, ya bi

ⁱ 4.15-17 1 Cor 15.51-52 ^j 5.2 Mt 24.43; Lk 12.39; 2 Pet 3.10 ^k 5.8 Is 59.17; Eph 6.13-17

ina rofu vei mama resi rei mona rebifa. ¹³Ina vene bi ini moimai dada, uka manari bi rei mona mona resi kikifa rebifa. Ya kaya ya kaya uka amuta dudu ameibifa.

¹⁴Ma usika ourena, amei tavoi varei tavoi rededi vene ni egira refa, uka yau egira refa, mokena yau vene aedefa ma amiye sa gubuyo ga rebifa. ¹⁵Vei mona rebifa, amiye yokoi yaku ya rofu no rebigo ri ya yaku ina ro dairi no ga re, idu vegu buni ya kaya rofu di ma amiye tau rofu toga rebifa.

¹⁶Ari neinei ada rebifa; ¹⁷usa usa toga nigasa ameibifa; ¹⁸beika baika tauri Sei rofu buni tora gade mabifa, adina mina bi Sei di ini ura ya rofu Iesu Keriso ideri.

¹⁹Vima Kikifa di ita ga ukafefa; ²⁰Sei di ago nido amiye di ago rofu ga mokei itu refa. ²¹Beika baika tau mina vei mona resi buni maka moi gira refa; ²²deda vegu no rofu egavoi rebifa.

²³Uka amuta di Sei iniyе yaku ya moi akeke kotana riyaine, ma Varika Amiye Iesu Keriso dairi dego ri, ina yaku yi vima, uka mokena ma rovaita vegu no yokoi de nufa moi gira rei mona rego. ²⁴Sei ya raka nido amiye bi ini beika ago niyo mina moi gira risi rego, adina bi vegu rama redo amiye.

²⁵Usika ourena, una fafau usa usa nifo.

²⁶Usika ourena tau uni yuata mafo.

²⁷Varika Amiye di vava gabireri, nai ago gira nida, mina bura rena bi usika ourena tau vakoi rofu bura vesi nifa.

²⁸Uni Varika Amiye Iesu Keriso di buni tora gade bi ya vene sa ameibiyaine.

Paul di buru remanu

Thessalonica vene rofu

Ago di ini adina

Amiye be yaku Keriso dairi dena di mokena ekalesia vene rofu Thessalonica taoniri moi no regamadi. *Paul di ouresi buru Thessalonica vene rofu* ri bi mokena Varika Amiye bi sena deyo vo niyadi dada buru reyo. Ina yaku mina mokena moi rorobo resi ina vene rofu niyo ma Keriso dairi dego ma vegu no di sina moi tora iniyi vo nigedi “Amiye No Iniye” (2.3) di ini ourefeidena gabireri baebu. Mina amiye no iniyi yaku Keriso rofu uka gira dudu moi no regika.

Oteimana amiye yaku ekalesia vene rofu niyo ma ina vene bi esika ma kerere ogau nibigo idu, ini uka vari gira aibobigedi. Ina vene yaku moimai regedi ri ameibigedi Paul ma ini moimai yokoi vene kana, toga toga vegu buni regika.

Beika sina ideri

Ago di ini adina 1.1-2

Keriso dairi dego ri bi Sei yaku amiye kota aigo 1.3-12

Keriso dairi dena di ago 2.1-17

Sei di mokena vari gira aina vene di vegu 3.1-15

Metona ago 3.16-18

1 ¹Mina bi Paul, Silas, ma Timothy yaku buru reyafa —^a

Ekalesia vene rofu Thessalonica ri, kaere bi uni Baba Sei di ma Varika Amiye Iesu Keriso di:

²Baba Sei ma Varika Amiye Iesu Keriso di buni tora gade ma uka amuta bi ya vene sa.

Keriso dairi dego ri Sei yaku amiye rofu kota rego

³Usika ourena, una yaku toga toga ya vene dada Sei rofu buni tora gade maragadu. Makai resifa bi buni, ini adina bi ya vene di mokena vari gira aiyadi ina rofu bi, tora nido ya kaya ya kaya rofu uka maddedi yaku

^a 1.1 Acts 17.1

bi tora nido. ⁴Mina dada una yaku Sei di ekalesia vene di nemokori ka ya rofu ni vasina resifa. Ya ni vasina resifa sana bi yomakai: esika tora ma toe tora moisi amededi idu, are rei gira resi bi yi mokena vari gira Sei rofu aisi amededi.

⁵Mina vegu rededi yaku nido Sei di kota rena bi mokena rorobo resi makai esika moi amededi dada ini ourefeidena amena sana ideri amegedi. ⁶Sei yaku vegu rama rego dada: Esika ya madedi vene rofу bi ina yaku esika mago. ⁷Resi bi Sei yaku ya rofu, kaere bi gua esika moisa bi, ini vegu buni masi una rofu ka makai rego. Varika Amiye Iesu ini naivo naivo vima tau ma ita fairo sa oma gutuna ogau nigedi di meda bi makai vata nigo. ⁸Sei rofu gedu madedi vene rofу, ma uni Varika Amiye Iesu di ago buni de neidededi vene rofу ini obini toe tora iniyе mago. ⁹Ini obini bi yomakai: ina vene bi toga toga ameibona di esika kaunava mina mago ma Varika Amiye ma ini vava di vabara gutuna resi ini nemokori nuga feidego. ^b ¹⁰Ini mina degо medari, ini vene tau yaku ini vabara magedi ma ini mokena vari gira aiyadi vene yaku ini roka ni odoro regedi. Mina ya vene ka ina vene fogori are regedi adina ya niyafa ago bi yi mokena vari gira aiyadi.

¹¹Mina dada toga toga ya vene rofу usa usa nisifa. Uni Sei usa nisifa, ina yaku ya vene di vegu moi buni reyainedi vegu buni ya raka niyo amegedi dada. Ina yaku yi vegu buni di ura tau ma mokena vari gira aina di moimai vava dudu moi rama rigo. ¹²Makai ida dudu bi uni Varika Amiye Iesu di roka ni odoro regedi ya vene dada, resi yi roka bi ni odoro rego ina dada, uni Sei ma Varika Amiye^c Iesu Keriso di buni tora gade dudu.

Amiye no iniyе

2 ¹Yomina sina bi uni Varika Amiye Iesu Keriso di dairi degо ina sa egogo regifa ri bi yomakai: Nai usika ourena vene ya usa nisifa^d ²bi yi mokena bi evade moi forovai ga refa o, uka esika ga refa, adina bi be vene yaku nidedi bi Varika Amiye di meda bi okiyo, vo nidedi. Be yaku mokededi bi vima di agori o sina sina nokoiri, o fefa yokoiri bura reyafa. ³Ofa mokena dudu yokoi yaku ya eru rena ga reyaine. Adina mina meda bi de okigo mamo amiye tau Sei rofу gedu magedi ma amiye no iniyе bae ogau nigo ri, kaere bi Sei yaku muyena sanari moi feidego. ⁴Mina amiye yaku amiye di ini usa nidedi gugura tau ma deda sei rofу gedu masi iniyе ni moi odoro rego mina tau rofу. Ma Sei ni vakena yavari dui resi ameinu rego ye iniyе ni kake rego ina bi Sei.^e

⁵Mokededi ba ide? Mina sina tau bi ya niyaka, ya sa amegamaka ri.

⁶Ma mina nida sina de vata nido bi vegu yokoi yaku moi gira redo gua

^b 1.9 Is 2.10 ^c 1.12 uni Sei ma Varika Amiye; ba uni Sei Varika Amiye.

^d 2.1 1 Thes 4.15-17 ^e 2.4 Dan 11.36; Ezek 28.2

ga vata niyainedi, ya diba beika bodo bi. Ma ini ari ramari ogau nigo. ⁷Adina vegu no di vava sui amedo yaku ini moimai sena rei baido, idu beika bodo vegu vata nigo bi de vata nigo bogo moi gira rido amiye etae rigo mamo. ⁸Resi bi amiye no iniye kamini ogau nigo, idu Varika Amiye Iesu bainsi dego ri bi ini venari gutuna asa moi feidesi umuyego ma ini baido vabara dudu moi no rigo.^f ⁹Mina amiye no iniye di baido bi Satani di moimai dudu vava tau, rebe ma ofa vegu rena.^g ¹⁰Ma ina yaku mina ofa vegu no amiye kaere muyededi rofu rego. Muyegedi adina bi sina rama di uka mana rofu vauya rededi, ye makai dudu moi vegu de rigo. ¹¹Mina dada Sei yaku ofa forovai mokena moi feidedo ye ina vene yaku ofa vegu rofu kamini mokena vari gira aigedi. ¹²Ye Sei yaku amiye tau kaere bi sina rama rofu mokena vari gira de aiyadi ma vegu no vei ada reyadi di kota aigo.

Sei ya moi vegu rena rofu raka niyo

¹³Usika ourena, toga toga ya vene rofu Sei buni tora gade manadi, ya kaere Varika Amiye yaku ya rofu uka mado. Mina dada adinari gutuna^h Sei yaku ya vene moi vegu rena rofu raka niyo, ya moi kikifa rego Vima Kikifa di vava ma sina rama rofu yi mokena vari gira aidedi dudu. ¹⁴Sei yaku uni ago buni dudu ya raka niyo, uni Varika Amiye Iesu Keriso di vabara moiyaned. ¹⁵Mina dada, usika ourena, are rei gira resi mina ago rama ya oteimarafa moi gira refa, uni ago niyafa dudu ba ya rofu bura reyafa dudu.

¹⁶Gua uni Varika Amiye Iesu Keriso ma uni Baba Sei, kaere bi una rofu uka madedi, yaku toga toga ameibobina di mokena tora ma uka mokena buni, buni tora gade dudu una rofu maradi. ¹⁷Ina vene yaku yi uka moi gira reyagane mokena tora dudu. Ma vegu buni resi ago buni nibigedi.

Una rofu usa nifa

3 ¹Usika ourena, uni sina metonari, bi una rofu usa usa nifa kumo Varika Amiye di ago bi evade urafo rego resi vabara moiyaned, ya vene yaku ya kaya ya kaya rofu reyo kana. ²Usa ka nifa Sei yaku vegu no vene ma vegu rorobo de rededi vene gutuna una moi vegu rigo. Adina amiye tau de yaku Sei rofu mokena vari gira aidedi.

³Idu Varika Amiye toga toga ini ago ni dodi vegu redo. Adina ina yaku yeiva ya masi amiye no iniye rofu ya moi vegu rigo. ⁴Una yaku mokena vari gira Varika Amiye rofu aisifa ma mina ago gira ya rofu niyafa ya yaku reisa bi toga rebigedi.

⁵Varika Amiye yaku yi uka di mokena Sei di uka mana ma Keriso di moi yeiva resi toe moi dina veguri ourefeideyaine.

^f 2.8 Is 11.4 ^g 2.9 Mt 24.24 ^h 2.13 adinari gutuna; bura bedakai bi sikonufa.

Yi moimai regiya

⁶Usika ourena, uni Varika Amiye Iesu Keriso di roka dudu ya ago gira nisifa mini, uni usika ourena be kaere bi moimai de rena amededi vene ma kaere bi oteimana ago ya rofu maro bi de neidededi kaiba ga refa. ⁷Ya kaya diba uni vegu reyafa bi buni, mina kana reyainedi. Una bi duomu de ya sa amegamafa ri. ⁸Resi una yaku amiye yokoi di iruku iri tavoi de reyafa. Idu, uru ari kosika de dudu moimai regamafa, una dada ya yokoi yaku fore maku regedi baebu. ⁹Makai reyafa bi, una bi vava de ya vene rofu ya nigifa resi una aedeyaganedi bi ide, idu makai regifa ri una vesi uni vegu tari reyaganedi. ¹⁰Ya sa amegamafa ri ya rofu ago gira nigamafa, “Kaere moimai rofu vauya rego bi iruku ga iriyaine.”

¹¹Makai neidesifa amiye be yi fogori bi duomu dudu amesi moimai de rededi, idu amiye di sina agori bisu basu rei tavoi rededi. ¹²Varika Amiye Iesu Keriso di roka dudu mina vene rofu ago gira nisi sisiba masifa, vegu rorobo dudu ameibiyagane resi moimai dudu iniye ini vegu baku regedi.

¹³Ma usika ourena, ya bi vegu buni rena rofu di bi kosika ga refa. ¹⁴Amiye yokoi yaku mina agofefari ya rofu moi feidesifa de neidego baebu, beika redo vesi ga bofa ina rofu; maena reyainedi. ¹⁵Resi tuma amiye yokoi kana dudu ga dogo refa, idu yi dubuini kana mokena dudu ago buni ni diba mafa.

Ago metonari

¹⁶Varika Amiye iniye, kaere bi uka amuta di adina yaku, uka amuta ya maraine ari neinei ida yokoi yokoi dudu. Varika Amiye bi ya vene tau sa.

¹⁷Na kaya nai vana dudu mina bura reyaka. *Na Paul yaku ya yuata nida.* Fefa tau bi makai dudu bera imida. Mina bi makai bura reida.

¹⁸Varika Amiye Iesu Keriso di buni tora gade bi ya vene tau sa ameibiyaine.

Paul di burā

Titus rofū

Ago di ini adina

Titus bi Jew de amiye kaere bi ekalesia amiye nisi Paul di asini moimai amiye ma dubu moimai Paul aedegika niyo. *Paul yaku mina bura* ini aedenā amiye rua Titus rofū Crete ri bura riyo. Ina yaku Crete ri fereyo dubu di moimai ourefeideyainedi. Mina bura di adina bi regode.

Ouresi bi, Titus niyo beika vegu dubu di ourefeidenā vene yaku rebiyaganedi, adina Crete amiye tau gade di vegu no dada. Adina yokoi bi Titus ni oteimaro gokai ekalesia amiye neinei oteimarainedi; rema rumana tora, ma rema rumana rua, ma moimai rei tavoi tavoi rededi vene rofū. Sina regode bi Titus rofū Sei di vene di vegu buni di ago bura riyo. Mina vegu bi uka amuta renā, auta renā, fufuta ma de, ita rafu sina de, ma dubu moi no renā de.

Beika sina ideri

Ago di ini adina 1.1-4

Titus di moimai Crete ri 1.5-16

Titus yaku oteimago sina 2.1-15

Ekalesia vene are rei gira renā 3.1-11

Metona ago 3.12-15

1 1-2 Na Paul, kaere bi Sei di moimai rei tavoi reida amiye, ma Iesu Keriso di ni feidena amiye mina bura reida.

Mina reida dada Sei yaku ini abidi reyo vene bi ini mokena vari gira aigedi resi sina rama di mokena moisi Sei yaku ini mokena kana regedi. Resi toga toga ameibobina vegu di uka mokena moigifa goina bi Sei ofa de nido yaku ari dobau sena ni tore reyo.³ Ma iniye ini niyo ariri ini ago moi ogau riyo, Sei, una moi vegu rina amiye di ago girafafau mina oteimana moimai na maro.

⁴ Titus mina fefa bi ya rofū bura reida. Ya bi nai mida kana, adina ya bi na sa vakoi Sei rofū mokena vari gira aisifa.^a

^a 1.4 2 Cor 8.23; Gal 2.3; 2 Tim 4.10

Sei uni Baba ma Iesu Keriso kaere yaku una moi vegu rina amiye yaku buni tora gade ma uka amuta ka ya mago.

Titus di moimai Crete ri

⁵Crete ri ya fereyaka di adina bi beika moi koina de fereyafa mina moi koina reyainedi, ma ya niyaka kana dubu ourefeiden vene taoni neineiri aiyainedi. ⁶Mina ourefeiden amiye bi ini vegu no yokoi de, rema yokoi maka meyo amiye, ini mida mida kaere bi Sei rofu uka vari gira aidedi ma rei tavoi de ma anema yora mida mida.^b ⁷Mina ourefeiden amiye bi Sei di moimai reibigo mina resi, ina bi vegu no yokoi de redo amiye, iniye maka mokena de redo amiye, ma evade maka gubuyo de redo amiye. Ma koru no irina amiye de, ruda rei tavoi amiye de, ofa ofa dudu baku baku de redo amiye. ⁸Idu ina bi amiye gaba redo, amiye kaere bi vegu buni rofu uka mado, ma ini yuka vana nari redo amiye, berou berou rofu mokena rorobo redo amiye, ma ina bi akeke amiye, ma iniye moi rorobo rido amiye. ⁹Ago rama oteimadedi mina moi gira kiki rebiyaine, ye ina yaku mina ago rama dudu amiye egira rego ma amiye kaere yaku ago rama rofu tourage rededi mina vei mama reyaganedi.

¹⁰Adina Jew vene tau gade kaere bi ekalesia vene niyadi bi ago neidena de vene, sakua vene ma amiye ofarosi rena vene. ¹¹Mina vene bi moi babo rigiya, adina ofa ofa dudu fore moigika beika de oteimana ago mina oteimagasa usika ourena tau di varena amena moi no ridedi. ¹²Iniye di ini ago nido vene yokoi yaku ka niyo, “Crete vene bi ari neinei ofa ofa nidedi vene, tuma dona kana ma amei tavoi regasa iruku iridedi vene,” vo niyo. ¹³Mina sina bi rama. Mina resi, mina vene rofu sina gira nigiya, ye ini mokena vari gira aibigedi ri bi rama maka rebigedi, ¹⁴ma Jew vene di sisina sina rofu o kaere ago gira rama rofu fufuta maddedi vene di sina rama rofu di anema aina ga reyagane. ¹⁵Amiye kaere bi ini vegu no yokoi de Sei di nemokori bi, beika tau mina bi ina rofu no yokoi de. Idu kaere vegu no nufa amiye ma Iesu rofu uka vari gira de aidedi, bi beika tau rededi bi buni de. Mina di adina bi, ini mokena ma ini uka di mokena bi kino nufa. ¹⁶Ina iniye ni kake rededi bi ina bi Sei diba, idu ini reremama rededi yaku bi ina bi Sei ina diba de. Ini vegu no yaku Sei ura de iniye rededi, ma Sei di ago gira neidena ura de, ma beika buni rena rofu bi anua rededi.

Titus yaku oteimago sina

2 ¹Idu Titus ya yaku bi, beika ago rama yaku niyo mina maka oteimagiya ma diba niyagane. ²Rumana tora tora oteimagiya koru no irina ga reyaganedi, ma mokena gira ma buni reyagane ma ini yuka

^b 1.6-9 1 Tim 3.2-7

vana nari reyagane; ma Sei rofu mokena vari gira aina, uka manari ma moi yeiva resi toe moi dina mina moi gira rebiyagane.³ Mina kana, rema tora tora oteimagiya beika rebigedi ri ka Sei ina ura redo kana dudu ameibiyagane, amiye rofu nifafana rena de, o koru no^c moke moke yaku ga ourefeideyagane, idu vegu buni regasa oteimabiyaganedi.⁴ Mina ida dudu, ina ka rema rua ni egira regedi ma ini maruka ma mida uka maraganedi,⁵ ma yuka vana nari resi ini maruka rofu maka uka mabiyaganedi, gokai ini yava dogo rena ma amiye rofu buni rebiyagane, ini maruka di vava gabireri ameibiyagane, ye makai dudu amiye yaku Sei di ago de nifafana regedi.

⁶ Mina kana sina dudu mida godua ni egira regiya kumo iniye ini yuka vana nari reyaganedi. ⁷ Beika tau rebigiyar i, ya kaya ka vegu buni re kumo mina ya vesi ya tari reyaganedi. Ye oteimabigiyar i uka di mokena buni ma gira dudu oteimagiya,⁸ ye mina sina rama bi amiye yaku no yokoi de veitao regedi. Mina resi kaere yaku uni ago obe regedi bi maena regedi adina una rofu beika sina no nigedi bi koina.

⁹ Moimai rei tavoi rededi vene oteimagiya ma ini ourefeidena vene di gabireri ini moimai tauri raga rebiyagane ma ini uka moi ada rebiyagane, ini ago obe ga reyagane,¹⁰ ma ina rofu duma duma ga reyagane, idu ourefeidena amiye di ini uka moina di moimai di vegu buni rebiyagane. Ye ini beika tau rebigedi ri Sei una moi vegu rina amiye di ini rama iniye ago mina vava nigo.

¹¹ Adina Sei di ini buni tora gade yaku una moi vegu rido moi baiyo bi amiye tau rofu ogau niyo. ¹² Mina yaku una oteimado Sei rofu fufuta mana vegu ma mina kono di vegu no rofu ide nisi nido, ma gua duakau amenari, yuka vana nari rena, vegu rorobo dudu, ma Sei di mokedo kana dudu ameibina. ¹³ Uni isivaga iniye Sei, uni moi vegu rina amiye Iesu Keriso^d di vabara ogau nigo, mina ada rena meda uka mokena aina nari regasa,¹⁴ ma kaere yaku vegu no tau rofu una erufugika iniye una maro ma amiye kaere bi iniye di mina iniye moi ruaka riyo, vegu buni rena moke moke rebigedi.^e

¹⁵ Ye Titus, mina ya oteimaida sina mina amiye ni oteima. Mina vava tau dudu ya yaku ni egira re kumo mina vegu no ga reyaganedi. Resi amiye yaku yi sina rofu gedu mana ga reyagane.

Ekalesia vene are rei gira rena

3 ¹ Amiye tau dubusa ni oteima kumo rautu di ourefeidena vene ma gavmani vene di vava gabireri amesi ini ago neidegasa moi gira

^c 2.3 Greek agori mina bi ‘waini’. ^d 2.13 Uni isivaga iniye Sei, uni moi vegu rina amiye Iesu Keriso; o Isivaga iniye Sei ma uni moi dairina amiye Iesu Keriso ^e 2.14 Ps 130.8; Ex 19.5; Deut 4.20; 7.6; 14.2; 1 Pet 2.9

reyagane. Beika moimai buni maka regika ameibiyagane,² resi amiye rofu nifafana rena de, idu amiye sa ave nisi kumo auta regasa amena maka rebiyagane, resi mina vegu rama amiye rofu reisa yaku amiye oteimago, ya gokai kana amiye bi.³ Una ka sena bi, mokena buni yokoi de ago ka neidena de, dona auna di moke moke regamafa, una ofarosi regamadi ma rovaita moi ada regika vegu no yaku una ourefeidegamo. Una yaku uni mokena no masi amiye be rofu ka maunu nigamafa. Una yaku amiye be rofu gubuyo regamafa, ma uniye uniye ka gubuyo regamafa.⁴ Idu, uni moi vegu rina amiye Sei di ini uka buni ma uka mana amiye rofu di bae ogau niyo ri,⁵ vegu buni ma mokena rorobo reyafa dada una moi vegu rina de reyo, idu ini uka iriyeduka dudu yaku una moi vegu riyo. Vima Kikifa di vava dudu una koiteyo ma dubusa vata niyafa resi ruaka niyafa, makai dudu una moi vegu riyo.⁶ Iesu Keriso una moi vegu rina amiye yaku beika reyo fafau, Sei yaku ini uka noibanu dudu ini Vima Kikifa una fafau moi urafo reyo.⁷ Ye makai dudu, uni vegu bi rorobo niyo ini buni tora gade dada, resi ini mida mida nigika toga toga ameibobina vegu di uka mokena moibigifa ri.⁸ Mina sina bi rama sina.

Gua ya ura reida bi, mina sina besa nigiya, kumo kaere Sei rofu di uka vari gira aiyadi vene bi ni kumo kimo mokena buni dudu vegu buni rebigedi. Amiye rofu mina moimai buni sina bi buni ma amiye tau buni baku regedi.⁹ Idu deda kayamo ma tutubena ini vata ni baiyadi sina ma ita rafu sina ma Jew vene di ago gira dada kayamo rededi mina feregiya, adina mina sina tau beika buni yokoi ka de rigo o buni yokoi de moi vata rigo.¹⁰ Kaere amiye yaku ekalesia vene moi etagae risi nanaka redo amiye bi ouresi nigiya; de ya neidego ri bi dubusa nigiya, mina de ya neidego ri bi kaini ferei tavoi rei.¹¹ Minari mamo vei mama regiya mina amiye bi mokena buni feresi vegu no redo amiye; vegu no redo dada iniye di ini no yaku moiyo.

Oteimana ago di ini metona

¹² Artemas o Tychicus ni feidegida ya rofuri bi, ida maina resi na rofu baigya Nicopolis taoniri adina bi mina avari bi mironari amegida vo nisi mokeida.^f ¹³ Zenas, kaere bi ago gira ni feidena amiye ma Apollos yaku ini dibo regedi ri aede mona mona ka refo resi vefo kumo gugura fore moi mona ka reyagane.^g ¹⁴ Uni vene moimai buni di mokena moi gira reyagane resi, ari neinei di gugura fore moi negau reyagane ma vare tavoi amei tavoi bi ga reyaganedi.

¹⁵ Amiye tau na sa yaku ini yuata ka ni feidededi ya rofu. Kaere vakoi mokena vari gira aiyafa dada una uka maledi, ka uni yuata ni feidesifa mina ma.

Sei di buni tora gade iniye bi ya vene tau sa.

^f 3.12 Acts 20.4; Eph 6.21-22; Col 4.7-8; 2 Tim 4.12 ^g 3.13 Acts 18.24; 1 Cor 16.12

Paul di burā

Philemon rofū

Ago di ini adina

Philemon bi ekalesia amiye gira tora yokoi, Colossae taoni di dubu gutuna amiye yokoi baeko ma ina bi moimai rei tavoi rena amiye yokoi ini roka Onesimus di ini varika amiye. Mina moimai rei tavoi redo amiye bi ini varika amiye rofū ori diyo resi Paul diburari amedo mina baku reyo. Paul dada Onesimus bi ekalesia amiye niyo. *Paul di burā Philemon rofū* di bi usa usa Philemon ini moimai rei tavoi redo amiye rofū uka yokoi maka nisi ina rofū dairiyainedi. Paul yaku Onesimus Philemon rofū moi feideyo ma, ada dudu moi dairiyaine ini moimai rei tavoi redo amiye kana de, idu ekalesia amiye ini dubuini kana niyaine.

Beika sina ideri

Ago di ini adina 1-3

Philemon di uka mana ma uka vari gira mana 4-7

Philemon yaku Onesimus dairi moigi usa usa niyo 8-22

Metona ago 23-25

¹Mina burā bi na Paul, Keriso Iesu dada, dibura yavari ameida ma uni dubuini Timothy vakoi —

Uni mokei vava resi vakoi moimai resifa amiye Philemon ya rofū, ²uni tobaini Apphia, ma Archippus rofū kaere bi Sei di una sa iya redo amiye, ma ekalesia vene kaere bi yi yavari egogo rededi:^a

³Sei uni Baba ma Varika Amiye Iesu Keriso di ini buni tora gade ma uka amuta bi ya vene fafau.

Philemon di uka mana ma uka vari gira mana

⁴Ari neinei nai usa usari ya rofū mokeida nai Sei rofū buni tora gade vo nida, ⁵adina bi yi sina neideyaka bi, ya yaku Sei di vene rofū uka

^a 2 Col 4.17

maisa, ma ya yaku Varika Amiye Iesu rofu mokena vari gira aisi ameisa.
 6 Nai usa usa ya rofu bi yi mokena vari gira aina rau reisa bi rebiyainedi,
 ye beika buni tau Keriso rofu moiyafa mina bi diba kotana niyainedi.
 7 Nai dubuini, Sei di vene tau noibantu rofu yi uka maisa dada, ini mokena
 moi gira risa. Makai dada na bi ada reida ma nai uka ka buni amedo!

Onesimus moigika usa niyo

8 Mina resi na bi Keriso di ini rokari uka bubu ma ago gira dudu beika
 reyainedi ya nigida 9 idu, uka mana fafau ya usa nigida. Na kaere Paul, ugava
 niyaka ma gua ka Keriso Iesu di dibura amiye. 10 Nai usa bi yomini: Onesimus
 rofu di, kaere bi dibura ideri amegamaka ri nai mida kana niyo.^b 11 Sena ina bi
 no inkiye inkiye ya rofu, idu gua bi ya rofu ma na rofu ka buni inkiye^c niyo.

12 Ya rofu dairi ni feideida mini, ina kaere bi nai uka meko. 13 Nai ura
 bi ina na sa ameibiyaine, ye ya kana bi ina yaku yi sanari na aedego ago
 buni dada dibura ideri ameida kana. 14 Idu ya ya diba nina koderi bi na
 ura de, ye yi vegu buni beika ura regiya bi yi mokena dudu regiya ma nai
 moke moke dudu bi ide.

15 Mina nei itua ya fereyo di adina bi ya yaku dairisi kamini toga toga
 ya sa ameibobiyainedi baeko, 16 ma moimai rei tavoi redo amiye de, idu
 mirona amei baigamo kana de; gua bi mokei vava rena dubuini kana. Ina
 bi nai mokei vava reida, idu ya rofu bi mokei vava tora inkiye regiya, vakoi
 amiye kana ma Varika Amiye ideri dubuini kana.

17 Ye, ya yaku mokegiya na yi asini vo nisi bi na moi dui regiya kana ina
 ka makai re. 18 Ye, ina yaku ya rofu beika no be reyo o beika moiyo mina
 de ya moi dairiyo bi nai rokari ae. 19 *Na Paul*, na kaya nai vana dudu bura
 reida. *Beika moiyo bi dubusa ya moi dairigida*. Ma ya kaya yi vegu mina bi
 nai de ni okugida. 20 Nai dubuini, nai ura na bi ya rofu Varika Amiye ideri
 ini obini be moigida. Nai uka moi ada regiya Keriso ideri!

21 Ya rofu bura reida bi ya mokei vava reida yi neidenari. Na na diba
 beika ya usa nida bi ya yaku besa besa regiya dada. 22 Ma sina yokoi ka
 yomini: Nai daiyutu yokoi moi dogo regiya. Adina nai uka aida bi Sei
 yaku yi usa usa neidesi na moi dairigo ya rofu.

Metona ago

23 Nai asini Epaphras, kaere bi Iesu Keriso dada na sa dibura yava ideri
 amedo, yaku ini yuata ni feidedo ya vene rofu.^d 24 Nai moimai resifa
 vene, Mark, Aristarchus, Demas ma Luke yaku ka ini yuata ni feidededi.^e

25 Varika Amiye Iesu Keriso di ini buni tora gade bi ya vene di vima sa
 ameibiyaine.

^b 10 Col 4.9 ^c 11 Mina roka Onesimus Greek agori bi “buni inkiye”. ^d 23 Col 1.7; 4.12

^e 24 Acts 12.12, 25; 13.13; 15.37-39; 19.29; 27.2; Col 4.10, 14; 2 Tim 4.10, 11

John

di ouresi burā

Ago di ini adina

John di ouresi burā di ini adina di ago bi remanu: Ini burā vegedi vene mina ni egira redo. Sei ma ini Mida Iesu Keriso sa vakoi auta regasa ameyaganedi, ma ofa ofa oteimana vegu regedi mina yaku ini auta rena moi no rigo baebu. Mina oteimana bi mokena fafau, goina bi mina kono di vegu no rededi rofu ogau nido, mina ye Iesu Sei di Mida, bi rama iniye ina bi amiye rovaita de. Mina ni feidena vene yaku niyadi bi, vegu moigika bi mina vegu konori mina de mokeibigedi; ma ka niyadi bi mokena buni rena ma asiyaka uka mana bi vegu moina di vegu yokoi de.

Mina oteimana berou di rofu burā reyo amiye yaku nido bi, Iesu Keriso bi rama amiye iniye rovaita nufa ma ni vabara rido kaere yaku Iesu Keriso rofu mokena vari gira aisi Sei rofu uka mado bi iniye iniye uka mabiyagane.

Beika sina ideri

Ago di ini adina 1.1-4

Vabara ma makuna 1.5–2.29

Sei di mida ma Satani di mida 3.1-24

Ago rama ma moi forovai 4.1-6

Uka mana di moimai 4.7-21

Uka vari gira di buni 5.1-21

Vegu di ago

1 ^a Mina amiye, kaere bi vegu di sina, ini adinari gutuna amegamo mina ya vene rofu nigifa. Una bi uni anema dudu neidesi uni nemoko duduveyafa. Senaveyafa ma uni vana dudu ka avaka moyafa.^a
2 Mina amiye mina bae ogau niyo ri, biveyafa, ye mina ago nisifa matoga toga ameibobina vegu mina ya nisifa goina bi Baba sa mina una

^a 1.1 Jn 1.1

oteimaradi.^b ³Beikaveyafa ma neideyafa mina bi ya vene rofu ka ya nisifa, ye ya ka una sa vakoi Baba ma ini Mida Iesu Keriso sa auta rena di. ⁴Mina bura resifa bi uni^c ada mina bae rama aiyainedi.

Sei bi vabara

⁵Gua beika ago ini Mida rofu neideyafa bi yomini: Sei bi vabara, mukuna yokoi ina rofu de. ⁶Una yaku nisifa, una bi ina sa auta resifa vo nisifa idu mina regasa ma mukunari disifa vo nisi, bi una bi uniye ofa nisifa, uni agori ma uni reremamari. ⁷Idu ina bi vabara mina resi una ka vabarari amesifa — makai vo nisi uni usika ourena sa auta resifa ma ini Mida Iesu di dava yaku uni vegu no rofu una moi ruaka rido.

⁸Ma una yaku nisifa una bi vegu no de vo nisifa ri, bi uniye moi no resifa, ma sina rama yokoi una sa de. ⁹Idu uni vegu no ni rausi resifa Sei rofu di vo nisi, bi ini beika niyo mina moi gira risi ma beika bi rama mina una rofu rego: uni vegu no moi erufu resi buni de vegu resifa rofu una moi ruaka rigo. ¹⁰Una yaku nisifa una bi vegu no de resifa vo nisi, bi Sei bi moi ofa amiye rofu aisifa, ma ini ago bi una sa de.

Keriso uni aedena amiye

2 ¹Nai mida mida, na yaku ya vene rofu bura reida, ya mina vegu no ga reyaganedi, idu kaere vegu no rego bi, uni rokari amiye yokoi uni Baba sa ni vabi redo — Iesu Keriso mokena rorobo amiye. ²Ma Iesu Keriso iniye bi vegu no moi koite makuna di adina, ina resi uni no tau vakoi erufudo, ma uni vegu no maka de, idu kono di amiye tau vakoi di ka.

³Ini ago gira neidesi regifa ri ye una makai diba nigifa una diba ina. ⁴Amiye yokoi yaku nigo ina bi Sei ina diba vo nigo, idu ini ago gira neidesi de rego ri ina bi ofa ofa amiye ma sina rama bi ina sa de. ⁵Idu kaere yaku ini ago neidesi rego amiye, ina bi Sei rofu ini uka mana bi rama iniye moi rorobo reyo. Mina vegu yaku diba nigifa una gokai Sei sa bi vakoi yokoi maka: ⁶kaere yaku nigo ina bi Sei sa vakoi yokoi maka amedo vo nido bi Iesu Keriso yaku amegamo kana ameibiyaine.

Rua ago gira

⁷Nai mokei vava reida vene, mina ago gira ya rofu bura reida bi rua de, mina bi sena ago gira, ini adinari gutuna ya sa mina. Mina sena ago gira bi ya yaku sena neideyadi.^d ⁸Mina resi gua ya rofu bura reida ago gira bi rua ago, adina bi ini rama iniye bi Keriso ma ya rofu ka vededi. Ma mukuna bi kamini tatava nido ma vabara rama bi sena kiki rei kora redo.

^b 1.2 Jn 1.14 ^c 1.4 *uni*; bura bedakai bi *yi* nufa. ^d 2.7 Jn 13.34

⁹Kaere amiye yaku nigo ina bi vabarari amedo, idu ini usika ourena uka de mado, bi mukunari baiyo gua medari ka. ¹⁰Kaere amiye^e ini usika ourena uka mado bi vabarari amedo, ma beika yokoi de ina rofu mina yaku rego ma amiye be mina vegu no regedi. ¹¹Idu amiye yokoi ini usika ourena uka de mago bi mukunari, mina ideri nana redo, ma goina ma dibo redo bi ina diba de, adina mukuna yaku ini ne moi taufa riyo.

¹² Ya rofu bura reida, nai mida mida, adina yi vegu no bi koite maku vau reyo, Keriso di ini roka dudu. ¹³Baba vene, ya rofu bura reida, adina ya ya diba kaere bi ini adinari gutuna amei baido. Ya rofu bura reida godua, adina ya bi amiye no mina uketo reyadi.

¹⁴ Ya rofu bura reida, nai mida mida, adina Baba bi ya diba. Baba vene, ya rofu bura reyaka, adina ya ya diba kaere bi ini adinari gutuna amei bado. Ya rofu bura reyaka godua, adina ya bi yeiva. Sei di ago bi ya sa, ma amiye no mina uketo reyadi.

¹⁵Mina kono ga uka mafo o koina kono di ini beika yokoi. Ya mina kono uka magedi vo nisi, bi Baba di ini uka mana una sa bi de. ¹⁶Beika tau mina kono di mina — beika vegu no uniye ura resifa, beika amiye yaku vesifa ma ura resifa, ma beika tau mina konori amiye yaku mokei tora rededi — mina tau bi Baba rofu di de dedo; mina tau bi konori gutuna baido. ¹⁷Mina kono ma beika tau mina konori amiye yaku mokeded bi kamini roro nido, idu ina kaere Sei di ura redo bi toga ameibobigo.

Keriso di tuma amiye

¹⁸Nai mida mida ari boi koina nigo meda bi negau niyo! Ya nigamadi Keriso di ini tuma amiye bi baigo; ma gua bi Keriso di ini tuma vene tau gade bi sena ogau niyadi, mina ye una diba ari boi koina nigo bi negau niyo. ¹⁹Mina vene bi rama iniyi uni auta rena rofu di de, mina resi una fereyadi; ina vene uni auta rena rofu di vo nisi bi una sa ameyagadu. Idu una ferei diyadi, ye mina yaku moi vabara riyo ina tau vakoi bi uni de.

²⁰Idu ya vene bi Keriso yaku vima kikifa ya venefafau erausi reyo, mina ye ya tau vakoi bi sina rama ya diba. ²¹Na ya rofu bura reida adina ya bi sina rama mina ya diba de vo nisi bi de, idu ini adina ya bi sina rama ya diba, ma sina rama rofu ofa de baido ka ya ya diba.

²²Mina ye, kaere rama bi ofa ofa amiye? Ina bi, kaere yaku nido Iesu bi Keriso vo de nido amiye. Mina kana amiye bi Keriso di ini tuma amiye. Ina bi Baba ma ini Mida vakoi etofa redo. ²³Kaere amiye Mida ni sui redo bi Baba ka ni sui redo, ma kaere amiye yaku Mida ni ogau redo bi Baba ka ni ogau redo.

^e 2.10 Kaere yokoi; o Ina vene.

²⁴Beika sina ini adinari gutuna neideyadi bi yi uka ideri ameibiyainedi. Mina ago moi gira rigedi ri bi ya vene bi, Mida ideri ma Baba ideri toga toga ameibigedi. ²⁵Mina bi Keriso iniye yaku ni tore rena ago una rofu maro — toga toga ameibobina vegu.

²⁶Na mina ya rofu bura reida bi, be vene kaere yaku ya rofu ofa ofa ago nigi rededi resi. ²⁷Idu ya vene bi, Keriso yaku ini vima yafafau erausi reyo. Ya bi ini Vima yaku gokai ya sa ameibigo kana, amiye yokoi yaku ya oteimarainedi moke moke de regedi. Adina ini Vima yaku beika tau bi ya oteimado ma beika ya oteimado bi rama, ofa de. Vima di oteimana neidesi ma ina sa vakoi ameibigedi.

²⁸Ma gua nai mida mida, ina sa vakoi ameibifa, ye ina ogau nigo ri una bi yeiva dudu ma maena resi ina rofu de sui nigifa ini dego medari. ²⁹Ya ya diba Keriso bi mokena rorobo amiye, mina resi, kaere amiye mokena rorobo reibigo bi Sei di ini mida.

Sei di mida mida

3 ¹Va mokefa, uni Baba di uka mana di gokai tora una rofu bi sena maro dada una bi ini mida mida vo nibiyagane. Una bi rama iniye ini mida mida. Ma kono di vene tau bi una vei mama de reyadi adina bi Sei vei mama de reyadi dada.^f ²Nai mokei vava reida vene, ruika una bi Sei di mida mida. Gabi una gokai bi ogau nina kode. Idu, yomina una diba: Keriso ogau nigo ri, bi una bi ina kana nigifa adina ina iniye vegifa. ³Amiye tau Keriso rofu uka mokena aidedi bi ini uka ideri vegu no yokoi de Keriso ini uka ideri vegu no yokoi de kana.

⁴Vegu no redo amiye bi Sei di ini ago gira ukero vau redo adina vegu no bi ago gira ukero vau rededi. ⁵Ya ya diba, Keriso baiyo bi, vegu no^g moi taga rigi. Ina ideri vegu no yokoi de amedo.^h ⁶Keriso ideri amedo amiye bi vegu no regasa de amedo. Ma vegu no regasa amei baido amiye bi Keriso vena de, o vei mama rena de.

⁷Nai mida mida, amiye yokoi yaku ga ya ofarosi reyaine. Kaere yaku vegu rorobo redo amiye bi mokena rorobo redo amiye, Keriso iniye bi mokena rorobo rena amiye kana. ⁸Vegu no redo amiye bi Satani adinari amedo, adina Satani bi vegu no regasa amegamo amiye ini adinari gutuna. Sei di ini Mida ogau niyo di ini adina iniye bi yomakai: Satani di ini vegu no redo mina moi no regika deyo.

⁹Kaere Sei rofu vata niyadi bi vegu no toga de regasa ameibigedi, adina Sei di ini yo bi ina vene ideri amedo. Mina vene bi vegu no de rededi adina Sei bi ina vene di Baba dada. ¹⁰Mina bi gokai diba nigifa kaere bi Sei di ini mida mida ma kaere bi Bodaka di mida mida: kaere amiye mokena rorobo de reibigo bi Sei di ini mida de, mina kana kaere ini usika ourena uka de mago ka makai.

^f 3.1 Jn 1.12 ^g 3.5 vegu no; buru bedakai bi uni vegu no nufa. ^h 3.5 Jn 1.29

Uniye uniye uka mabinadi

¹¹Ini adinari gutuna baiyo gua neideyadi sina bi yomini: uniye uniye rofu uka mabinadi.ⁱ ¹²Cain yaku reyo kana vegu bi ga renadi. Ina bi amiye no di ma ina yaku ini usika Abel umuyeyo. Beika resi Cain yaku umuyeyo? Adina Cain di vegu bi no ma Abel di vegu bi mokena rorobo nufa.^j

¹³Mina dada nai usika ourena, kono di vene yaku ya rofu gubuyo regedi ri bi tururu ga refa. ¹⁴Uni usika ourena uka masifa dada muyena bi feresi, vegu rofu bae deyafa. Amiye yokoi ini usika ourena uka de mago ri bi mina amiye bi muyena di vava ideri amedo.^k ¹⁵Ini usika ourena rofu gubuyo redo amiye bi amiye umuyedo amiye. Ya ya diba, toga toga ameibobina vegu bi amiye umuyedo amiye sa de amedo. ¹⁶Uka mana di vegu bi yomina vegu dudu vei mama regifa: Mina dada Keriso ini vegu una maro. Mina dada una yaku ka uni vegu mana di uni usika ourena rofu! ¹⁷Amiye yokoi kono di ini gugura tau nufa ma ini usika ourena bi gugura tau de ma vesi iriyeduka de rego bi gokai ida dudu Sei di uka mana bi ina sa amego? ¹⁸Nai mida mida, amiye uka mana bi vena dudu ma afiye dudu maka ga manadi. Mina bi uka mana rama inkiye, goina bi moimairi inkiye ogau nido.

Sei di nemokori are rei gira renā

¹⁹Mina bi gokai diba nigifa una bi sina rama di, ma gokai uni uka ini budari aigifa. ²⁰Uni uka meko yaku una rofu nido una bi no vo nisi bi una una diba Sei bi isivaga inkiye uni uka meko kana de. Ma beika tau bi ina ina diba. ²¹Nai mokei vava reida vene, uni uka meko yaku una rofu de nido una bi no vo nisi, bi una bi Sei di nemokori are regifa, ori yokoi de dudu. ²²Kamini una yaku beika bodo tau ina rofu usa nigifa ri bi ina yaku una mago. Adina ini ago gira moi gira resifa ma ina moi ada renā vegu resifa. ²³Sei di ago gira una rofu bi yomini: ini Mida Iesu Keriso di ini roka rofu mokena vari gira aigifa ma uniye uniye uka mafa. Mina ago gira bi Iesu Keriso yaku sena una maro.^l ²⁴Ini ago gira moi gira redo amiye bi Sei sa amedo ma Sei ka ina sa amedo. Ma una una diba ina bi una sa amedo adina una una diba bi ini Vima una maro.

Rama vima ma ofa vima

4 ¹Nai mokei vava reida vene, vima tau mina rofu mokena vari gira ga aifa, idu vima mina va eru refa rama ina bi Sei rofu ba ide mina, adina ofa ofa sei di ago ni okudedi vene bi konori ma sena di vau reyadi. ²Mina gokai dudu Sei di Vima ya ya diba nigedi: Goina vima yaku Iesu

ⁱ 3.11 Jn 13.34 ^j 3.12 Gen 4.8 ^k 3.14 Jn 5.24 ^l 3.23 Jn 13.34; 15.12, 17

Keriso bi rovaita nufa deyo vo ni okugo bi Sei rofu,³ Idu goina vima yaku Iesu de ni okugo bi Sei rofu di bi de. Mina vima bi Keriso di ini tuma amiye kaere baido vo nigamadi ma ina gua sena mina konori.

⁴ Ya, nai mida mida, ya bi Sei rofu di vene ma mina vima sena uketo reyadi, adina ina kaere bi ya sa bi isivaga iniye vima kaere bi konori amedo kana de. ⁵ Ina bi mina kono di mina ye kono di ini moke moke dudu sina ago rededi mina resi kono vene bi ina neideded. ⁶ Una bi Sei rofu di mina resi kaere amiye Sei diba nido bi una neidedo, idu kaere amiye Sei rofu di de bi de una neidedo. Mina bi gokai rama vima ma ofa ofa vima vei mama regifa.

Sei bi uka mana amiye

⁷ Nai mokei vava rena vene, uniye uniye uka mabinadi, adina uka mana bi Sei rofu dedo. Amiye tau kaere uka mado bi Sei rofu di vata niyo ma ina diba Sei. ⁸ Ma amiye kaere uka mana de redo bi ina diba de Sei, adina Sei bi uka mana amiye. ⁹ Mina be gokai uni fogori Sei yaku ini uka mana una oteimaro. Ini Mida yokoi maka mina konori ni feidei deyo, ye ina rofu vegu moigi regifa. ¹⁰ Mina bi uka mana: una yaku Sei uka mana bi de reyafa, idu ina yaku ini uka una masi ini Mida ni feideyo ye uni vegu no moi koite mago di kana.

¹¹ Nai mokei vava reida vene, Sei yaku ini uka una mana iniye reyo, mina resi una ka uniye uniye uka mabinadi. ¹² Yokoi yaku Sei vena de reyo, idu uniye uniye uka mabigifa vo nisi, bi Sei bi una sa ideri amedo, ma ini uka mana bi una ideri moi buni redo.^m

¹³ Una diba una bi ina ideri amesifa ma ina una ideri, adina ini Vima bi una maro. ¹⁴ Ma una bi vesi ni ogau reyafa Baba yaku ini Mida ni feideyo kono di amiye moi vegu riyainedi. ¹⁵ Ma kaere amiye yaku ni ogau rego Iesu bi Sei di ini Mida vo nisi, bi Sei bi ina sa amedo ma ina ka Sei sa amedo. ¹⁶ Mina ye, una una diba ma mokena vari gira aisifa Sei di uka mana uni rofu di.

Sei bi uka mana amiye ma kaere amiye uka mana ideri amedo bi Sei ideri amedo ma ina ka ina ideri. ¹⁷ Mina ida dudu uka mana mina uni veguri rama aido ye kota rego meda okigo ri uka gira moigifa, adina mina konori una ka bi ina kana dada. ¹⁸ Uka mana ideri bi ori yokoi de. Uka mana rama iniye yaku ori meki redo, adina ori di obini bi esika esika. Amiye kaere ori redo bi uka mana ina sa rama ae mona de.

¹⁹ Una uka masifa adina ina yaku siko ini uka una maro. ²⁰ Kaere amiye yaku nigo, “Na bi Sei nai uka maida,” idu ini usika ourena uka mana de redo bi ofa ofa amiye adina kaere amiye yaku ini usika ourena uka de mado kaere bi ini nemoko yaku vedo, Sei uka de mago kaere bi de vedo.

^m 4.12 Jn 1.18

²¹ Ma mina ago gira bi una maro: kaere Sei uka mago bi ini usika ourena ka ini uka marainedi.

Mina kono eru reyafa

5 ¹Kaere amiye Iesu bi Keriso rofu mokena vari gira aigo, bi Sei di mida, ma kaere yaku Baba rofu uka mago bi ini mida ka uka mago. ²Makai dudu diba nigifa Sei di ini mida mida bi uka masifa: Sei uka magasa ini ago gira neidegasa resifa. ³Mina makai bi Sei rofu uka masifa: ini ago gira mina neidegasa resifa. Ma ini ago gira bi toe de.ⁿ ⁴Adina Sei di mida mida tau yaku gagani gagani rofu uvau regedi. Una yaku Sei rofu mokena vari gira aisifa ma mina mokena dudu gagani gagani di vegu rofu bi uvau reyafa. ⁵Kaere yaku bi gagani gagani di veguri gutuna uvau rego? Amiye yokoi mokena vari gira Iesu bi Sei di Mida rofu aigo, mina amiye yaku bi gagani gagani di vegu rofu uvau rego.

Iesu Keriso di ni okuna ago

⁶Iesu Keriso bi ina kaere bi koru sa ma dava sa baiyo. Ina bi koru sa maka dudu de deyo, idu gogo koru sa ma dava sa. Ma Vima iniyе yaku ni okudo mina bi rama, Vima bi sina rama dada. ⁷Ni okuna vene bi regode: ⁸Vima, koru ma dava; mina regode yaku nidedi bi yokoi maka. ⁹Amiye yaku ni okudedi bi moi gira resifa, idu Sei di ni okuna bi isivaga iniyе, adina Sei di ni okuna bi ini Midafafau ni okudo. ¹⁰Kaere amiye yaku Sei di ini Mida rofu mokena vari gira aido bi mina ni okuna ago ini uka mekori. Kaere amiye yaku Sei rofu mokena vari gira de aido bi iniyе moi ofa ofa amiye rido, adina Sei yaku ini Mida ago ni okuyo bi mokena vari gira de aido. ¹¹Ma ago ni okuna bi yomini: Sei yaku toga toga ameibobina vegu bi una maro, ma mina vegu bi ini Mida ideri.^o ¹²Kaere amiye ini Mida moiyo bi mina vegu moiyo, ina kaere Sei di Mida moina de reyo bi vegu de moigo.

Toga toga ameibobina vegu

¹³ Ya kaere Sei di Mida di ini roka mokena vari gira aidedi vene rofu mina ago bura reida, ye ya diba niyagane toga toga ameibobina vegu bi moi yadi. ¹⁴Sei di nemokori una bi yeiva moisifa, adina beika ini mokenari usa usa nigifa, bi una neidego. ¹⁵Ma una neidego vo nisi, bi una diba beika usa nigifa bi una diba una mago beika ina rofu usa nigifa mina.

¹⁶ Amiye yokoi yaku ini usika ourena vegu no reyo vego vo nisi, ma mina vegu no yaku muyena de moi bogo, buni bi Sei rofu usa usa nigo ma Sei yaku vegu mago. Mina nida bi bogo amiye kaere ini vegu no yaku

ⁿ 5.3 Jn 14.15 ^o 5.11 Jn 3.36

muyena de moi baigo. Mina bi vegu no yokoi yaku muyena moi bogo; ni de nida mina vegu no kana usa usa nifa. ¹⁷Buni de rena vegu tau vakoi bi vegu no, idu mina vegu no tau vakoi yaku muyena de moi baigo.

¹⁸Una diba kaere Sei rofu di vata niyo bi vegu no toga de regibo, adina ina bi Sei di mida yaku nari redo ma amiye no yaku de avaka moigo.

¹⁹Una una diba una bi Sei di ini mida, ma mina kono tora noibantu bi amiye no di ini ourefeidenababireri.

²⁰Una una diba Sei di ini Mida bi desi vei mama rena di mina una maro, ye una Sei diba nina kaere bi rama iniye. Uni vegu bi Sei rama iniye ideri — ini Mida Iesu Keriso ideri. Ina bi Sei rama iniye, ma toga toga ameibobina vegu.

²¹Nai mida mida, ya kaya ofa sei rofu bu nibifa!

John

di bura remanu

Ago di ini adina

John di bura remanu bi “dubu di ourefeiden amiye” iniye “ini mokei vava redo rema ini mida sa” rofu bura reyo. Mina bi mirona rautu di dubu ini ekalesia vene sa. Fefa ini sina bi egira ago amiye be uka mana rofu ma ofa ofa nidedi vene ini oteimadedi rofu vei feidegasa ameibiyaganedi.

Beika sina ideri

Ago di ini adina 1-3

Uka mana bi vava iniye 4-6

Ofa ofa oteimana vei feide mona reyagane 7-11

Metona ago 12-13

¹ Mina bura bi dubu di ourefeiden amiye rofu.

Abidi reida rema, ini mida sa,^a kaere bi rama iniye nai uka maida. Na maka de idu, amiye tau vakoi, kaere bi mina sina rama ina diba ka ini uka ya maddedi, ²adina mina sina rama bi una sa amedo, ye una sa ameibigo ari neinei.

³Baba Sei ma Iesu Keriso ini Mida di buni tora gade, iriyeduka ma uka amuta una sa sina rama ma uka mana dudu ameibiyaine.

Sina rama ma uka mana

⁴Na bi neidesi ada tora gade reyaka adina sina rama dudu yi mida be bi Baba yaku ini ago gira una maro kana dudu amededi. ⁵Maka ye, ya mokei vava reida rema, ago gira ruaka yokoi de bura reida idu, mina sina ya bi sena moiyafa ini adinari gutuna. Nai usa usa uni fogori bi uniye uniye uka manadi.^b ⁶Uka mana di ago bi yomakai: Sei di ini ago gira yaku niyo kana ini vegu regasa ameibinadi. Adinari gutuna neideyadi kana, ini ago gira bi uka mana vegu dudu ameibigedi.

^a *1 rema ini mida sa:* Mina bi dubu ini vene sa (ka nanaka 4-5ri). ^b *5 Jn 13.34; 15.12, 17*

⁷Ofa ofa vene tau gade bi kono tora noibanu ma sena oku rofu rei diyadi. Mina vene yaku nidedi Iesu Keriso bi amiye rovaita kana nisi soka reyo vo de nidedi. Mina kana amiye bi ofa ofa vene ma Keriso di tuma vene. ⁸Mina resi vei feidegasa dibo refa, de bi yi^c beika mofa resi moiyadi bi you feidegedi baebu. Yi obini bi tora noibanu gabu mironi moigedi.

⁹Kaere amiye Keriso di beika oteimaro moi gira de rigo, idu fafa ma bogo bi Sei ina sa de. Kaere amiye Keriso di ini beika oteimaro mina moi gira rigo bi Baba ma ini Mida bi ina sa. ¹⁰Kaere amiye ya rofu baisi mina oteimana de moi baigo bi yi yavari moi na ga re, resi, “Uka amuta bi ya sa” ka ga ni. ¹¹Adina kaere amiye yaku mina amiye rofu buni ago nigo vo nisi bi ina remanu mina amiye di no mina auna regedi.

Metona ago

¹²Na bi ago tora gade ya nigida idu, buru bi de regida, makai rena kana nai mokenari bi, na kaya bae negida rofu ya vesi mamo ya nigida, ye una tau vakoi ada regifa.

¹³Yi abidi reisa rasini di mida mida^d yaku ini kokora ni feidededi ya rofu.

^c 8 yi; buru bedakai bi uni. ^d 13 yi mokei vava reisa rasini di mida mida: Mina bi buru rena amiye di dubu di eklesia vene.

John

di buru regode

Ago di ini adina

Mina bi John di buru regode. Ina yaku dubu ourefeidena amiye yokoi roka Gaius rofu mina buru reyo. John yaku Gaius rofu ada ago niyo adina ina yaku ekalesia vene be aedesi ni mama reyo amiye roka Diotrepheis rofu.

Beika sina ideri

Ago di ini adina 1-4

Gaius di roka moi odoro renar 5-8

Diotrepheis di vegu no 9-10

Demetrius di vegu buni 11-12

Metona ago 13-15

¹ Mina buru bi dubu di ourefeidena amiye rofu.^a

Gaius kaere sina rama nufa nai uka maida amiye mina fefa ya rofu buru reida.

² Nai mokei vava reida amiye, Sei rofu usa nida beika vegu tau reisa mina yaku buni moi vata riyainedi. Ma usa ka nida, yi rovaita di vegu tau noibantu buni niyainedi. Adina na diba yi vima bi buni amedo. ³ Ekalesia usika ourena be yaku baisi na niyadi, ya bi vegu rama reisa amiye. Ada tora gade iniye reyaka bi sina rama dudu nana reisa dada. ⁴ Beika vegu yokoi yaku de na moi ada redo idu neideda bi nai mida mida bi sina rama regasa amededi.

Gaius di roka moi odoro renar

⁵ Nai mokei vava reida amiye, ya yaku yi ekalesia usika ourena aedega ameisa bi, moimai buni iniye reisa mini. Yi vegu bi buni iniye adina ina vene bi amiye idana. ⁶ Ina vene yaku minari amededi ekalesia vene bi

^a 1 Acts 19.29; Rom 16.23; 1 Cor 1.14

sena ni oteimaradi, ya yaku ina vene uka magasa aedeisa mina. Ye, buni bi ina vene aedesi ni feidegiya ma dibo regedi mina yaku Sei moi ada rego. ⁷Keriso di roka dada ini rautu fereyadi. Ini makai dibo reyadi bi ekalesia de vene rofu aedenia buni yokoi be de moiyadi. ⁸Una ekalesia vene yaku bi mina kana vene aedegifa bi buni, ye una yaku ina vene nufa sina rama di vakoi moimai renadi.

Diotrephes ma Demetrius

⁹Fefa tumu yokoi ekalesia vene rofu sena bura reyaka idu, Diotrephes kaere iniyi nigi ina bi ourefeidena amiye vo nido, yaku nai sina bi neidena de redo. ¹⁰Mina dada ya vene rofu baigida ri bi ini vegu ma fufuta ago una rofu nido mina moi ogau regida! Mina maka de idu, ekalesia usika ourena okidedi ka de moido. Ma kaere yaku ina vene moigi rededi ka duburi gutuna moi etagae rigi redo!

¹¹Nai mokei vava reida amiye, vegu no mina tari ga re. Vegu buni mina maka tari re. Kaere vegu buni redo amiye bi Sei di. Kaere amiye yaku vegu no redo bi Sei de veyo.

¹²Amiye tau yaku nidedi Demetrius bi vegu buni redo amiye ma Sei di ini sina rama yaku ka makai nido. Una ka Demetrius nigika bi amiye buni vo nisifa, ma ya ya diba una yaku beika nisifa bi rama.

Metona ago

¹³Ya vene rofu sina bi tau gade bura risi ya nigida idu, sefari bura rina bi ura de reida. ¹⁴Agiya aineka na oto ya rofu bae negida mamo vakoi gogo sina sina nigifa.

¹⁵Uka amuta ya sa ameibiyaine.

Yi asiyaka minari ka ini yuata ya rofu ni feidededi. Uni asiyaka mironari amededi ka uni yuata nifa.

Jude

di bura

Ago di ini adina

Mina bura bi Jude rofu ofa ofa oteimadedi vene kaere bi mokena vari gira aidedi vo nidedi mina ni diba regika bura reyo. Mina sina tumu bi 2 Peter ri kana. Ina yaku ini bura vegedi vene egira regika, “ye Sei yaku ini vene uka vari gira uru yokoi maka maro mina moi gira reyaganedi”.

Beika sina ideri

Ago di ini adina 1-2

Vegu no ma ofa ago oteimadedi vene 3-16

Yi uka vari gira mana ideri are rei yeiva refa 17-23

Sei bi ni buni renadi 24-25

¹ Mina bura bi Jude rofu, kaere bi Iesu Keriso di moimai rei tavoi reida amiye ma James di dubuuni —^a

Mina bi kaere Sei yaku raka niyo vene rofu. Ma kaere bi Baba Sei yaku ya uka mado ma Iesu Keriso yaku ya nari redo.

² Iriyeduwa, uka amuta ma uka mana bi tora noibanu ya vene di.

Vegu no ma ofa ago oteimadedi vene

³ Nai mokei vava reida vene, na bi nai mokena tora noibanu dudu una moi vegu rena sina vakoi resifa mina ya rofu bura reida. Ye nai mokena bi ya rofu bura resi ya egira regida, ye mokena vari gira aina di ruda reyagane, goina bi Sei yaku uru yokoi maka ini vene maro. ⁴ Adina be vene yaku yi rafuri, sui ida dudu sena baiyadi. Mina vene bi ini obini moi yadi goina bi sena bura reyadi. Mina vene bi Sei ina diba de, kaere bi uni Sei di ini buni tora gade di sina mina moi idana risi vava maradi, vegu no resi Iesu Keriso uni Ourefeidena Amiye Tora yokoi maka ma Varika Amiye mina ni sui reyadi.

^a ¹ Mt 13.55; Mk 6.3

⁵ Ya mina ago bi sena diba niyadi, mina resi nai ura bi dubusa ya nigida. Varika Amiye^b yaku ini vene Egypt gaganiri gutuna moi yakuyo. Idu, kaere ina rofu mokena vari gira de aiyadi bi gabu ukero vau reyo.^c ⁶ Ma naivo naivo vima be kaere bi ini moimai di vava moi gira de reyadi bi ini yava fereyadi. Mina vene bi toga ameibigo seini aisi mukunari fereyo, ye kota rego meda tora nari reyaganedi. ⁷ Mina kana, Sodom ma Gomorrah ma ini adinari taoni ka koa ren a vegu reyadi. Mina kana vene bi vena di toga toga ameibobina ita di esika esika moigedi.^d

⁸ Mina ida kana, mina yaduka vededi vene yi rafuri yaku iniye ini rovaita moi no risi, ourefeidena vene fufuta masi oma ideri amededi vene ni fabana rededi. ⁹ Idu Michael naivo naivo vima tora iniye, mina yaku Bodaka sa kayamo reyadi, kaere yaku Moses di rovaita moigo mina. Mina medari Michael iniye yaku Satani ni fabana de reyo. Yomakai maka niyo, “Varika Amiye yaku ini kaunava ya mago!”^e ¹⁰ Idu, mina ofa ago oteimadedi vene yaku beika diba de niyadi, mina rofu ni fabana rededi. Ina vene bi sufa dona nadina di mokena kana, mina beika baika diba niyadi ini amutenari mina yaku ina vene moi no rido. ¹¹ Iriyeduca ina vene rofu! Ina vene bi Cain di ida moi yadi. Ina bi Balaam di ini no reyo ida kana fore baku regedi vo nisi evade maka reyadi. Korah^f yaku Moses di ago obe reyo kana, ina ka makai resi tau vakoi muyeyadi.^g ¹² Mina vene bi ekalesia irakunari naguma kana maena de iruku irigedi. Ina bi mamoe nari vene kana kaere bi iniye maka iri iri rededi. Ina bi miya de redo seuya kana, aura yaku ufu redo. Ina bi yabo kakari meko varena de, ye muyena iniye reyainedi daru sa yai rei makudedi kana. ¹³ Ina vene bi davara di ini ureure kana, ini maena bi davara di kabudo kana fonufonu rei baido. Ina bi yaveru kana, adina Sei yaku toga ameibigo mukuna girigiri sana ferei maro.

¹⁴ Enoch, Adam gutuna naba viro vara tutubena yaku sena dobau mina vene dada niyo, “Vefa, Varika Amiye bi ini akeke vene tau gade gade sa dego.”^h ¹⁵ ina vene tau kota resi vegu no rededi vene tau di vegu no tau ogau rego, mina kaere bi ini vegu no ida idari regamadi, ma ina yaku karaini ago toe tau ina rofu nigamadi mina!”

¹⁶ Mina vene bi ago sika vene ma goidu no be regedi maina vene; ina bi ini mokena tari rei didedi vene; iniye ini roka moi odoro vene ma idana di ini roka moi odoro reyagane iniye di ini buni dada.

Vei mona ma reremama ago

¹⁷ Idu, ya mokei vava reida asiyaka, va mokefo beika uni Varika Amiye Iesu Keriso di ni feidena vene sena niyadi mina. ¹⁸ Ina yaku niyadi bi,

^b 5 Varika Amiye; Bura bedakai bi Iesu, mina bi Greek agori, idu Hebrew agori bi Joshua.

^c 5 Ex 12.51; Num 14.29-30 ^d 7 Gen 19.1-24 ^e 9 Dan 10.13, 21; 12.1; Rev 12.7; Deut 34.6; Zech 3.2 ^f 11 Korah yaku Moses ma Aaron rofu ruda regi ourefeideyo. Sei gubuyo iniye resi kono moi eboka reyo ma Korah ini usi dina vene sa iriyo. Num 16.1-35 baku re.

^g 11 Gen 4.3-8; Num 22.1-35; 16.1-35 ^h 14 Gen 5.18, 21-24

"Ari tumu nibigo ri ninika nina vene kaere bi iniye di ni moke moke no mina tari rei dibigedi."ⁱ ¹⁹Mina vene yaku utama ya okugedi, kaere bi ini amutenari ma Vima Kikifa de mina tari rebigedi. ²⁰Idu ya vene, nai mokei vava reida asiyaka, ya kaya yi akeke mokena vari gira aina mina fafau are rei gira resi Vima Kikifa nufa usa usa nibifa. ²¹Sei di ini uka mana fafau are rei gira resi Varika Amiye Iesu Keriso di iriyeduka nari regasa, mina yaku ya moi bogo toga toga ameibobina vegu.

²²Kaere mokena remanu moibigedi vene rofu bi iriyeduka rebifa; ²³Be vene mina ita moka gutuna moi dairifa; be rofu bi iriyeduka rego ori vakoi sa; iniye di varuka vegu no di kino nufa mina ka ura de regedi.

Sei ni vakena di usa usa

²⁴Vabara ina rofu nigo kaere yaku keto renari ya moi are rego ma ini vabara iniye di budari goina bi yi no yokoi de minari ya aigo ma ada tora gade sa— ²⁵Vabara, roka tora odoro iniye, ma vava Iesu Keriso uni Varika Amiye dudu bi uni Sei, una moi vegu rina amiye yokoi maka mina rofu di, ini adinari gutuna, ma gua ma toga ameibobigo! Rama.

ⁱ **18** 2 Pet 3.3